

9

71

27

Lot 9

W^o - 71

R. 4

3/8

G. Budæi Parisiensis Cōsilia-

RII REGII, SVPPPLICVMQVE LI-
BELLORVM IN REGIA MAGISTRI,

A D

Inuictis. & potentis. Principem FRANCISCVM
Christianissimum Regem Franciæ

DE TRANSITV HEL- lenismi ad Christianismum, Libri tres.



PARISIIS.

Ex typographia Matthæi Dauîdis, via amygdalina,
ad Veritatis insigne.

1556.

Ex priuilegio Regis.

Del collegio de S. Hieronymo gilda.

G. Bideri Parichia Gollia

RM. REGII SVPTICVMQVE LL
DEIORVM IN REGIA MAGISTRAT

Inuictis & potentibus Principem FRANCISCV M
Christi fidei Regem Francie

DE TRANSITV HEB-

lectionis ad Christianissimum

Lion tics



PARISIENSIS
BIBLIOTHECA MARCHI PRINCEPS VITAE LITAE

ad Venerabilem

1775

1775

AD INVICTISS. ET POTENTISS. PRIN-
CIPEM, FRANCISCVM CHRISTIANISS. REGEM

Franciae, G. Budæi Consiliarij eiusdem Regis, supplicum-
que libellorū in regia magistri: in libros De transitu
Hellenismi ad Christianismum, Præfatio

Literarum humanarum studio, artiumque liberalium ac
civilium quoquo modo defunctus: Franciscus Rex Chri-
stianissime: ad literas diuinas longè liberaliores animum
conuertere non ita pridem perrexeram. Hoc autem ge-
nus philosophiæ, non mortis tantum, ut olim fuit, inanis
est commentatio, sed theurgicæ multiplicis potius, & admirandæ cōtemplatio,
quæ immortalitatem certam mortalibus, beatitudinēque sempiternam mi-
seris, fide non dubia pollicetur, comparatque mirificè atque benignissimè.
Cum verò illud prius studiū amorem philologiæ hætenus esse existimarim,
quæque semper appellauerim: ei verò atatus annos florentis atque etiam vi-
gentis, ab incunte non atatula, non exeunte ab adolescentia, sed ab iuuen-
tute demum dederim, ad hoc ipse alterum studium, serius quidem quàm o-
portuit: sed tamen aliquando transferre eundem animum concupiui: copias
item ipsius omnes, facultatesque transcribere, quales illæ sunt cunque. Id
demum receptum volui, cautumque diligenter, ne mihi necesse esset vsum &
consuetudinem philologiæ pristinæ, contracta perdiu & confirmata: sic
ipsi renunciare, eam ut ipsam vltimum valere iuberem, semelque salutare.
Quippe qui ita alterū studium ab altero dissidere minimè arbitrarer (est
opinio est hominum peruulgata) ut sodalitate consociari nequeant ipsa,
contuberniōque iungi. Et rem quidem sic temperandam censui, itaque
comparandam vtriusque assensu, bonaque pace, philologiæ, tantum ut ma-
iori minor philologia non grauati cederet: fasces etiam summitteret hono-
ris ac dignitatis: quanto illam maioribus ire per altum auspiciis manifesta
fides. Neque enim de prioribus illa, ne iisdem de partibus quidem contē-
dere non impudentissimè atque iniquissimè posset, quæ agnoscere nunquam
renuisset, apud nos quidem certè, temporaria tantummodo oblectamenta,
& vitæ ornamenta, cum sensuum delinimentis, sese suppeditare obseruantibus
sui: cum hæc eo amplius æterna bona polliceretur, & vero certissima fi-
de repromitteret, sponsoribusque quàm locupletissimis. Accedit quòd lau-
tior illa cōpriōrque philologia, à me prior adamata, permultumque & cul-
ta & obseruata: utpote quam annos vitæ plureis præcipuūque deperierim,
verba dare interdum (ut verum fateamur) non modo suis procis, sed spon-
sis solita est: cum eius amantiſsimis, tum liberalissimis etiam & assiduīs

maximé. & porrò vnde non semel atque iterum ipsa solùm, sed sæpius peperit : exactisque temporibus partitionis non incommodissima. multis enim illa decoxit nimium benignis creditoribus atque liberalioribus, & paulo magis candidis & ingenuis. Contrà verò altera quam cognitam nō minus statim adamauius, etsi minus cum ea consuescere nobis vacauit : non verborum illa quidem venditatrix est, ostentatione institoria atque nundinaria: verùm bona fide vel optima potius verbi negociatrix. In taberna verò suæ, atque etiam in tabernaculi abstrusioris penetralibus, longè plura, maiora, splendidioraque ostendit, & simul vendibilia, fidelibus quidem certè sui cultoribus, rerumque suarum æstimatoribus prudentissimis, & perspicacissimis. Priore autem aspectu verbi, facièque ipsa sua, quasi obducta rugis & vultuosa : cū parum festiuitatis præferat, tum lenociniis nullis, vti didicit: accersitisque extrinsecus inuitamentis hominum ingenio & studio præstantium : tantoque minus eorum, qui necessitudinem arctiorem cum illa contraxerunt ostentatrice nitoris atque elegantie. Etenim vt seuerior quedam paulo & morosior institrix, eximias suas merces non omnibus expromptas habet : sic ipsa ad recondita admittit ægrius & visenda, homines studiosos: nec nisi exorata assiduitate contentionis, & fide sibi facta desiderij non curiosi. Mihi autem videtur catena quedam aurea verbi diuini atque cælestis : argumentosissima serie apta, atque conserta actorum prouidentia, quæ æconomia à priscis vocatur & theurgia, terram & mare, vt illa in Iliade ὄψα, in cælum tollere & attrahere : nempe mortales ipsos continentis & insularum incolas. & tollere quidem illos sursum inuitos quodammodo & restitantes, vtpote terræ agglutinatos, è qua à principio factum fuit genus hominum. Tanta vis est verbi Dei, tanta facultas, ea facundia vis latens atque eloquentia in sermone sapientie, duntaxat iis in auribus atque mētibus, quas æterna prouidentia præfinitio pepulit & aperuit. Quicquid igitur Homerus ὄψαν illam χρυσείαν sui Iouis, esse ac significare censuerit, nos eā esse credimus cælestis discipline multas per ætates seriè, ad inuandos mortaleis ac seruandos delapsam, sublimésque rapiendos ad vitam non occasuram. Hæc porrò diuinitus ἐν τῇ παλαιᾷ καὶ τῇ καινῇ contexta est mira varietate, verùm nusquam non sibi consentanea, vt per omnes mundi ætates eodem numine prodita, summæque sapientie & veritatis complexu apta & comprehensa. Huius igitur philologie vel amor vel studium, vera est & germana philosophia, solaque digna suo nomine. Nec verò disciplinarum vna numeranda quæ ingenuæ dictæ sunt, vt ingenuis animis discipulorum dignæ : ceterum numero ipsa eximenda, vt egregia, & eximia. nec tam liberalis censenda, quàm liberatrix hominum, mentiūque bonarum assertrix (qui finis est philosophia) ex impotentissima tyrannide

metus, spei, letitiae gestientis, & tristitiae supra modum contrahentis. & porro ambitus, atque cupiditatis, affectuum imperiosissimorum & dominorum metis nihil non erumnarum ipsis iniungentium atque indignitatum. Et cum hac quidem ratione, tanquam nobili illa scala patriarchae in caelum scandere datum est hominibus: id est enim sanctioris philosophiae augustiorisque gradibus ad culmen euadere sapientiae. tum vero Deum intueri licet, & admirari descendentem e maiestate sua, & velut ex Olympo vero summoque semetipsum demittentem in planitiem mundi, atque ad humilitatem humanae conditionis se submittentem. Rursusque item ipsum post rerum humanarum status inspectionem, post seruaturae mortalium prouinciam peractam & absolutam: in caelum suapte vi sublimem raptum suspicere & adorare, una cum Deo hominem hinc auferentem selectaque hominum multitudini viam eodem aperientem & munientem. Atque hac est ferè summaphilosophiae, quam studium cōsectatur Christianissimi, haec Christi seruatoris aëconomiae dictae commētatio, humano generi caelitus scalarum instar demissa, ab imo ad summum pertinentium. nimirum ut iis scalis succedere caelo mortales quoque eius affectatores possent, quique terrenis retinaculis non ita valide adhærescerent. Nam & ipse sese viam esse & veritatem, & vitam olim dixit immortalitatis absolutae omnibus suis partibus. Iam vero huius siue philosophiae, siue philologiae disciplina, interpret ipsa utique existens, indexque veritatis nequicquam à Graecis indagata, qui se philosophos appellauerunt: praeter rerum diuinarum supremarumque doctrinam, magnam item illam docet scientiam, imprimisque commendabilem, quam τὴν ἐαυτοῦ γνώσιν antiqui nuncupauerunt: cuius etiam genus ipsi & natales e caelo repetendos esse duxerunt, propter eius excellentiam. Verum enimvero eadem hac philologia, non ut prisca philosophia fiducia humanae mentis subnixae, consummatum hominem & perfectum numerat, qui animante tantum carne constitutus sit, animoque intelligentia praedito, & absoluta ratione imbuto, id est ad amussim philosophicam recta & exquisita. Ipsa enim hac nostra philologia & prima & vltima docuit & demonstrauit, ad formalem hominis rationem perficiendam, duntaxat in regno Dei victuri, in caelumque tandem migraturi, Promethei (ut ita dicā) figmento & praedictis: accedere oportere spiramentum Mineruae caelestis atque diuinae. Siquidem eius numinis afflatu tinctos eos esse persusosque necesse in ortu rediuiuo atque paracletico, qui genesim immortalem sortiuntur ac beatam: non fidere natalitio, sed munere diuino, atque praesentissimo. Quibus autem id non contigerit: iis nec intellectus acumen efficere, nec humana ratio poterit, quamlibet instructa magisterio philologiae Mercurialis atque musica: quamque velint praedita sit ingenij, naturae, industriaeque praestantia: animam ut ipsi suam in potestate habeant, & tanquam mancipio possideant.



Quippe cùm nec anima, nec eius emissarij ac satellites, qui sensus appellan-
 tur, ita res mancipi sint, teneri ut nexu rationis ac sapientiæ possint, hu-
 mana quidem certe tantum, suæque ope nitentis ac fidentis. Verum maiori
 (ut dixi) philologiæ colendæ & deamandæ cùm animum tandem applicare
 sic institissem, ut eam studio complecterer ætati ac vitæ instituto attempera-
 to atque modificato, tyrocinium nuper facere institui, vel potius rudimenta
 ponere. Opus autem de minoris ad maiorem transitu, an migratu, treis in
 libros diuisum, nunc edendum censui. Caterum in eius argumenti tracta-
 tione utranque utrique ita conciliare conatus sum, vel huic potius illam sic
 subesse volui, maioris ut minor maiestatem comiter conseruaret, ut verbis
 utar antiquorum fæderum: non etiam indecorè ut ancillari, quasi que pe-
 disse quæ est vestigio esse videretur. Neque enim hoc illi imperare ego susti-
 nuissem, quæ heri ac nudius tertius mihi erat loco numeroque rei dilectissima,
 nec ab ipsa id exprimere non agerrimè potuissem, quasi exoletis iam amo-
 ribus, atque repudiendis. Tum autem veritus sum homines studiosos, de-
 corique prudentes, & iuris huius consultos: ne aut meam in hanc obseruâ-
 tiam & venerationem, aut obseruationem erga illam, honorisque habenda
 rationem, paulò magis desiderarent. est enim utraque philologia, mea qui-
 dem sententia, illuminatrix vitæ, per ignorationem rerum humanarum di-
 uinarumque tenebricosa: sed illa minor inferiorque, deorsum tantum præ-
 lucet intellectui: hæc autem sursum versus cælestem facem, grandem & il-
 lustrem præfert animis. Idcirco commodius mihi visum est, studiisque meis
 congruentius, sic illam in huius habere contubernio ac comitatu, hæc ut mi-
 nisterium suum & instrumentum agnoscere, lautum quidem illud satis ni-
 tidumque, sed tamen officio obsequioque obnoxium. Hæc illius ut comita-
 tum vicissim non grauaretur, quasi supraquam fas est lenociniis cultæ, pro-
 fanisque pigmentis atque ascititiis ornata, à munditia sua discrepantibus.
 Est autem hæc ita moribus fortasse magis quam natura comparata, ut à lau-
 ritia ac nitore abhorrere, non etiam ut hoc tempore munditiam auer-
 sari atque odisse videatur, duntaxat seueram & sacrosanctam. ac tamen si
 pullata diu fuit ipsa & horridula: in toga tamen talis fuit, non in pallio
 quoque. Verum enim vero libros de Hellenismi ad Christianismum tran-
 situ, libentius & cupidius fecerim, æne aptius & accommodatius, ut tibi
 Christianissimo viro, nedum regi, dicarem, non facile dixerim: qui iis ipsis
 de rebus, quæ in illis libris disputata sunt, verba mecum interdum & scitè &
 disertè, sæpe multis cum alio auscultante me feceris, & admirante. Qua-
 propter nisi me fallit opinio: horum librorum lectio non in Christianissimas
 aureis tantum, id est regias, incursum est: sed ad tuas etiam & Fran-
 ciscanas accidet, æquas atque procliuas: si quando ab anagnoste tuo con-

uiuili libri recitandi sunt & enarrandi: ut tui sæpe moris est huiuscemodi inter epulas uti auscultationibus. Id autem futurum confido, non quidem ob opificis doctrinam, aut propter industriam gratiámque opificij: quæ sanè tenues sunt, aut summum mediocres: ceterum operis ob speciem & frontem, quam futuram apud te festiuam reor & gratiosam. Et noui quàm tibi cordi semper fuerit Christianismi tutela, gentilis tui, atque necessitudine antiquissima maiestati tuæ coniuncti. Quæ iure ipsa iandiu legitimo, ut quedam pietatis hereditas religionisque tuendæ necessitas, tibi cum isto diademate nobilissimo obuenerit. Quippe maiorum tuorum meritis parta, consensuque mortalium delata: qui maiores tui intra coronæ liliatæ ambitum tantum decus inclusum, tibi per manus tradiderunt, perpetui utique regni pignus, & tanquam palladium. Ac imperij quidem Francorum maiestatem, quod Christianismi gentilitate non minus, quàm rerum gestarum gloria censi ceptum est, atque nobilitari iam inde ab incrementis suis, quantopere dolueris imminutam fuisse paulò antè nefario facinore hominum amentium: documento dudum declarasti in præsens, in futurumque illustri. Nam præterquàm quod rem quæsitam diligentissimè seuerissimèque voluisti: coniurationem item impiam detectam vindicandam mandasti, allegatis quoque versus certis nunciis ac mandatis: etiam quod in huiuscemodi casu solenne est fieri, supplicationes decernendas, obsecrationesque iussisti. Ad diem autem conductum supplicationibus, ad urbem hanc aduolans, caput ac decus regni, sedemque imperij iamdicti, peculiarem ac legitimam, iustitium esse iussisti, tabernis occlusis atque feriantibus. Imperatæque viritim lampade phoria, tute è regia in proximum fanum progressus, vnde erat ineunda vniuersa supplicatio, splendidissimo tuo comitatu & officio, tanquam aulico ministerio, incredibilis agminis pompam, ex quòque homines meminerunt amplissimam, frequentandam ac celebrandam duxisti. ad placandam utique iram Dei, portentumque sceleris procurandum, iustis omnibus excogitatis, è veterique memoria repetitis, quàm fieri potuit expiabilissimis. Cum interim in solenni atque religiosa transuectione sacri, augustissimi, atque enthei, ingenti vi facium omnia collustrante, & lumen propè solis obscurante, ferculorum longissima serie præcedente, ut moris est, tanquam instrumento officioque supplicationum & obsecrationum: tute, non tam ut Rex, quàm ut pietatis signifer, & coryphæus prælucentium multitudini, cõspiciebare, è loco inferiore iuxta atque superiore. Quippe eminente cõspiciuè nudo vertice in medio, & confercto globo procerum, & tanquam existente & emergente regalis oris dignitate, è cohorte propè millenaria virorum letissimorum. Quorum pars torque & cochleus insignis: hexaphorum victima sacrosancta atque piacularis sub oculis tuis cingebat ac stipabat, visenda

religionis specie. Quod ob pietatis exemplum ac specimen memorabile, ut apud plebem popolare, sic apud ordines prætextatos, primoresque gratiosum: multitudo quæ vias utrinque rectâque replenerat, faustis acclamationibus, secunda tibi omnia prosperâque votis penè conceptis precabatur: simul soboli regia summæ spei, quæ religiosæ transvectionis insigne decusque præcipuum erat, populoque spectandum, duntaxat secundum regiam tuam maiestatem. Has autem voces plausibiles, & boni plenas ominis, sic excipiebant homines iudicio & prudentia præditi: ac si cognomentum tibi quoddam magnificum post fatum populus ominaretur. Mihi verò oculis omnia auribusque haurienti & arbitranti, non modo labefactatam aliquantum religionis probæ maiestatem constituere ipse videbare, hoc specimen edens insidentis animo tuo amoris orthodoxiæ, perstrictique non leuiter Christianismi ignominiam sarcire: sed etiam impietatem, ac deterrimæ hominum sectæ facinus infandum ac detestandum in triumphum ducere: quem triumphum ipsi seruatoriæ victimæ, impietatis victrici, ac domitrici comparandum ipse duxeras: omnique religionis atque ceremoniæ specie exornandum. Quod ob pietatis specimen Christianismi sanè tutori ac defensori congruens, & plebiscito, & senatusconsulto, & equitum torquatorum procerumque placito, purpuratorum porro ac prætextatorum consensu, elogium tibi testimoniumque delatum est, ut si cui maiorum tuorum, id est Franciæ regum, amplum & magnificum ac magni ominis in futurum. Vale princeps benignissime, & vale quidem gemina valetudine. immò verò vale tibi, vale tuis: vale etiam mihi, & nobis item omnibus, quotquot sunt vale sanitatibus. Parisiis, anno à salute condita supra millesimũ quingentesimo, quarto & tricesimo.

*Verbi certa fides ut mundo augustior esset,
Principe Francisco nobilitata fuit.*



DE TRANSITV HELLENISMI
AD CHRISTIANISMVM,
LIBER PRIMVS.

CONSIDERANTI mihi sæpe numero, Franciscus rex potentissime, ad eamque mentis intentionem vehementer incumbenti, quodnam dignum operæ precium ex usu philologiæ, atque è literarum consuetudine ferre possem: & verò scire aucti quo pacto potissimum meliorem hominis interioris conditionem, ex eo labore studioque efficerem, cui externa & corporis bona quæ dicta sunt, posthabenda, atate quoque florantissima duxeram: cupiditas incessit adeundæ tandem & consuetudæ philosophiæ. Philosophia autem (inquit apud Platonem Socrates in Phædone) mortis est meditatio, eò demum ipsa spectans, ut anima corpori nunc consociata, hinc tandem sublimis abeat, corporisque contagione defuncta morte facili, ad Deum creatorem suum rapiatur, cuius illa similitudine ab eodem ipso prædita est, quàm fieri potest integerrima ab ipsius corporis societate. Et quidem ipsius philosophiæ munus est, id quod homines norunt discendi cupidissimi, animam ut hominis docendam suscipiat, corpori alligatam, atque illi cōglutinatam, & verò necessariò coactâ, quasi per carcerem quendam, sic per corpus naturas contemplari, ideòque versantem in omni inscientia. Perspiciunt enim faciliè philosophia carceris grauitatem. nimirum quòd homo ipse interior vltro sese vincendum quodammodo præbeat, indulgens cupiditati. eo autem fit, ut illa animam ita affectam, ut dixi, in disciplinam accipiens, sensim eam soletur & cohortetur, tum soluere vinculis illis eandem ipsam aggrediatur. siquidem manifestè ostendit, ea quæ per oculos anima, quæ per aures speculatur, & quæ per alios sensus, errore esse illa sanè plena & fallacia. Quocirca auctor est illi philosophia, iis ut è rebus semetipsam recipiat, quantum quidem licuerit ab usu eorum temperare. Illam enim oportere colligi & cogi in sese ipsam docet, sibi que demum vni iis de rebus credere, quas ipsa per semetipsam intellexerit, ipsas esse per semetipsas. Cæterum aliis de naturis, quarum aliud in alio quampiam esse contemplata

fuerit: eam opinionem habere, nihil ut earum verum sit. cuiusmodi ea sunt quæ sensu & aspectu percipiuntur ab hominibus. at quod ipsa anima videt, id utique intellectui, non etiam oculis obuium esse ostendit atque perceptum. Quibus documentis anima hominis philosophi commonefacta, simul ut intellexit, non esse solutioni supradictæ obfistendum, continuò voluptatibus ipsa sese abstinere, abstinere cupiditatibus, abstinere ægritudinibus animi & timoribus, quoad eius facere potest. At verò Aristoteles in primo eorum librorum quæ *ἡ μὲν τὰ φυσικά* vocantur, Philosophiam ait esse scientiam veritatis contemplatricem. Cicero in Finibus, artem vitæ philosophiam appellat. de qua differens (inquit) arripere verba de foro non potest. Quandoquidem autem compertum habemus, priscam illam indagatricem virtutis & veritatis, vitæ lucem (ut ipse alibi Cicero dixit) & vitiorum expultricem, umbram modò exilem fuisse veræ philosophiæ, cuius studium ipsa nobis sapientia præscripsit & prodidit ipse mihi oracularem philosophiam aliquando adeundam esse duxi, quam Themidis consultricis & consultæ (ut Græci suo sermone vocant) antistitem esse videbam, eiusque oraculorum magistram & interpretem. hæc autem est amor Dei, ut Augustinus scripsit in octauo de ciuitate Dei: & ipsum philosophari, Dei est amorem colere. Ad eius porro philosophiæ cultum cum ægrè quidem ipse, seròque, sed tamen aliquando admissus essem, vel vi vel clàm vel precariò, aditum sensim aperiente, tum innata mihi quadam iandiu non leui opinione rerum mente perceptarum: tum sensu quodam abstractiore, res æternas suspiciente, fastidiosoque satis æstimatore rerum commeantium, iam mihi gratulabar ut discipulo sapientiæ, in eiusque clientela atque fide posito. Verum ut est vita ciuilis, ad negotia procliuis: curis statim externis aliis super alias subeuntibus, inde mox vel abductus vel detractus, abdicatum esse me ea disciplina magno cum dolore sæpenumero recordatus sum, in quam me disciplinam cupidè adoptare auspicatorumque cœperam. Ex eius autem magistræ auscultationibus, nec liberis illis quidem, nec frequentibus (multa enim intercedebant infestaque auocamenta) sed tamen iucundissimis, pauca adhuc teneo sanctioris notæ acroamata, ætate hac affecta, & (quod dicere pudet) propemodum effœta, quæ nondum exoleuerunt. aculeum enim mihi reliquerant in pectore non hebetem, etsi non satis altè penitusque infixum. Horum verò nullum satis certum nec ordinem nec numerum adnotaui, nec rationem nunc inire

explicatam magnopere contendi. etenim parum constitutas vi-
ces earum commentationum habebam, quas occasio mihi inter-
dum largiebatur, non voluntas præfiniebat. In eo tamen studio im-
penſe operæ ne pœniteat, summam adhuc commemini, eò ferè
ſpectantem, literarum vt ſtudioſos eos demum prudentes, & (vt ita
dicam) frugi lectores eſſe cenſerem, qui quæſitas vehementi ſtudio
facultates, in eam rationem referrent: quæ non externis bonis, non
caducis & intereuntibus, ſed propriis perpetuiſque, & interioribus
inſtituta eſt, tuendis atque augendis. Ac mihi quidem in primis
accurandum id videbatur & exoptandum mortalibus, literarum
præſertim optimarum cupidiffimis, conſtabilitas habere viuendi
commentandique rationes, ad eaſque conſilium inſtructum & pro-
poſitum accommodatum. ſic enim fieri, vt qui ſe precaria luce
frui, cùm mortalitatis conſcientia, tum quotidianis exemplis me-
miniſſet, magnopere opprimi tumultu mortis non poſſet. Nam
quid inconfultius, quid miſerius, quid denique præcipiti vitæ ſimi-
lis, quàm in diem luce frui? quid autem turbulentius, quid de-
ploratius, quid denique abruptius, quàm ex tempore è vita ex-
cedere? At quota pars hominum non in diem viuere, non exte-
porali fato fungi videtur, ſi ad verum, non ad vſum loqui tantif-
per ipſi volumus? Adeò circa temporaria ſatagentibus, & ſæpius
nugatoria, non occurrit, non ſubit ante mortis præceps vadimo-
nium, maturè commentari quid ſumus: aut quidnam victuri gi-
gnimur: ordo quis datus: & metæ quàm mollis flexus & vnde: quis
modus argento, quid fas optare, quid aſper vtile nummus habet.
denique quæ bona, quæ mala poſt mortem nos mancant, rectè aut
ſecus vitam agentes: eaque perpetua. An verò non ex tempore,
non tumultuaria morte, non exitu præcipiti tolluntur ii, quos pri-
die fati videmus, omnibus ſenſibus corporis atque animi ſatagen-
tes de rebus interituris, protinùſque ab ipſis ad alios aliòſque poſ-
ſeſſores tranſituris? quos honores ſimul hos atque illos ineunteis
ſpectamus, ſimul ad alios aliòſque geſtienti ſemetipſos ambitu de-
ſignanteis, ſerie perpetua peruigilis cupiditatis? At eoſdem mox au-
dimus improuiſo vadimonio euocatos, & interdum velut obtorto
collo tractos ad tribunal illud ſeuerum & ſummum, vel candidũ
calculum ipſos in re præſenti, vel atrũ & horrendum (ô diſcri-
men maius omni mentis conceptu) laturus in ſempiternum. Hæc
illa eſt ſedes iuſtitie iam præfractæ atque inexorabilis: hoc iu-
diciũ oraculari promulgatione prædictum: hoc (vt ita dicam)

apodyterium, in quo manticham hiantis cupiditatis homines, candidamque vesane ambitionis exuuntur, inter sacrum (vt dicitur) & saxum miseri constituti. Hoc cum futurum aliquando & prope diem fortasse, nemo nostrum ignoret: cuiusmodi tandem insania est hominum, quanta amentia, quam dira denique dementia, manticham illam, naturæ corruptæ vicio perfluentem pertusamque, ad summum implere omni ope, omnibus vngulis, velis denique remissæque contendere? aut candidam illam ambitus, identidem aliam atque aliam suscipere, & deinceps laxiorem, ampliorem, splendidiorrem? Proh diui immortales, nonne & vox humana, & omnia mentis sensa, imparia sunt stupori exprimendo hominum ciuilibus institutis moribusque viuentium? Mortales qui sese tertio quoque verbo sic appellant, & meminerunt esse: quandiu incolumes sunt, animaduertere aut nequeunt aut nolunt, quæ fors, quam æterna, quam abominanda & detestanda, iis prædicta sit diuinitus, ratæque lege, & verò Deiprimùm humanitate, deinde supplicio insigni, sancta, quorum aures occalluere ad præcepta interdictaque mel effata, agentis inter homines veritatis ipsius & iustitiæ. Nec verò antè se in fraudem incidisse ter capitalem norunt, ob contemptam, imminutam, læsamque maiestatem oraculorum, Christi que prædictionum, quam ad exitum huius theatri ventum est, quem mundum scriptura vocat. vbi clausula est risus & tristitiæ: vbi spei atque timoris finis, tum cupiditatis, iracundiæ, superbiæ, ambitionis, omniumque curarum, studiorum, atque nugarum, è quibus argumentum contextum est vitæ, quam in celebritate traducunt. Cum interim quotidie recitata in vulgus & decantata seruatoris monita, peruigilationes & excubias nobis, alta & summissa voce indicant, quasi que tesserâ salutis consecranda, conceptis hoc modo verbis, singulis nostrum inculcent: Inter spem curamque, timores inter & iras, Omnem crede diem tibi diluxisse supremum. Et Deus quidem olim cum mortalibus agens in præconiis cælestibus, in prædictionibus vatum sanctissimorum, quorum ore tanquam spiritus sui tuba, ante aduentum filii sui hominum seruatoris vsus est: flexiloquus fuit admodum & interpretum indigens. at in ipso vnigeno filio suo, & naturarum omnium primigenio, quo veluti Mercurio mandatorum sempiternorum vsus est, ad res humanas demisso inspiciendas & temperandas, cum potestate & imperio, apertus ipse pater fuit & planiloquus. quo fit vt causari nihil possimus, quasi rerum æternarum inscii. Horrèdas verò non immerito minas illas quon-

dam homines, humanarum tantum rerū prudentes, existimabant.

Πέρμω σ' ἡ πρέσβη δὲ βαλὼν ἐν νηὶ μετ' αὐτῆς,

Εἰς ἔχεται βασιλῆα θεσπῶν δηλήμονα πάντων.

ὅς κ' ἀπὸ ρῆνα γάμοι καὶ ἔατα νηλεῖ χαλκῷ,

Μήδεά τ' ἐξέρύγῃς δῶν κυσὶν ὦμα δάσασθαι.

At quot homines nunc sumus lactati in cunabulis religionis, rectè & verè philosophantis de natura diuina, nec lactati modò, sed porrò etiam nutriti, qui & nouimus & meminimus: crebrò etiam commemorare gaudemus, quæ supra, infràque: præmia suppliciaque, lege summa ac nunquam antiquanda, constituta, sancta, rata sint, & reposita mortalibus, rectè secusque vitæ muneribus perfun gentibus, atque è præscripto vel ex aduerso legis à Christo promul gata. Quî igitur fieri potest, vt in alta securitate futuri æui & sem piterni, somnum dormiamus Epimenidis? nempe quòd oculis at que auribus captos nos recordari nequeamus, qui in tenebris his Cimmeriis hallucinamur, prælucentem facem oracularem non ob rantes: & ad veritatis & salutis monita planè obsurduimus. Nam quotus quisque mortalium, qui per fas, nefas, quâ profana, quâ sacra exaggerant diuitias vrgente cupiditate, cogitare quicquam videtur de rationibus vitæ referendis, & ad ærariū referendis illud diui num ratiocinationis exactissimæ, vbi ad quadrantē expensa cū acce ptis tandē conferenda sunt, & reliqua verò cū ramento (quod aiunt) reddenda, vt Christus ipse Deus palàm cōtestatus est? Quis verò no strū interdū ad sese, è strepitu, è turba, è tumultu ciuilis cōuersationis reuersus, cū rem ipsam, quam dixi, æstimauit attentius, & perpen dit, non dementiæ instar esse, stuporem & suum & aliorum animadu ertit, multiplicisque amentia? Tandem autem moris est, & veluti expressæ necessitatis, cū aut morbum aliquem acutum, & breui tollere solitum, sentimus adesse, quasi mortis apparitorem: aut mi nas alias, quæ sarcinas colligere quasi in tumultu nos admoneant, diuina tum mandata, monita, prædictaque meminisse, auribus no stris in vita toties nequicquam inculcata. id quod si nō serò, certè difficili fit tempore, nec tam nostro quàm inimici atrocissimi, & tunc (vt creditur) infestissimi. Quid eos qui vel improuisa vi, vel ab dita mortis causa abripiuntur, medicosque fallente, qui permulti sunt: quid (inquam) ipsos habere animi, quid animæ tum putamus in casu necopinato, hinc momento temporis emigrantes in per petuum? Quod si nunc paulisper ad normam euangelicæ legis æ stimare socordiam nostram, vel verius vecordem somnolentiam va

cet, qua quidem lege ipsa atque seueritate quæstionem Dominus
 ab se habendam esse de seruorum suorum nequitia prædixit, quan-
 tula tandem pars nostrum non semisomnis tollitur? & fortasse (heu
 miserandam sortem) in stupore mentis obtorto collo rapitur. Quo-
 nam tandem igitur? ἐξ τούτων ταύτων ἡερόντα (iterum enim externis verbis
 in rebus nostris vtemur) τῆλε μάλ' ἢ χι βᾶτισον ὑπὸ χθονός ἐστι βέρετρον, τόσον
 ἐνέρεθ' αἰδέσθω ὅσον οὐρανός ἐστι ἀπὸ γαίης. At echetismi omnes & phalarismi,
 quos vt humana patiētia maiores auditos perhorrescimus, vix exiles
 sunt imagines tyrannidis tartariçæ, quæ finem nullum habitura est.
 Age, ignita supplicia, quorum elogia clara sunt in scriptura, & fu-
 riales omnes manias, pœnâsque transmittamus, diris tenebris in-
 uolutas, quando ea hîc obseruari satis præsender oculis mentis ne-
 queunt. Sed quis cruciatus animi ad summum bonum nati, maior
 excogitari potest, quàm inexpiabile semper ac deploratum eiusdem
 boni desiderium, transmissi ab homine per incuriam, & pro nihilo
 habiti? An huius etiam multæ prædictionem, aure stupida, aut a-
 liud agente, deuorabit admiratrix & indagatrix beatæ vitæ philoso-
 phia? Proh Christe sanctissime, optime ac maxime, quid est, si hæc
 amentia, si vēcordia non est? Nam quam acerbiorē mentium im-
 mortalium carnificinam, quam Aleçtò (vt ita dicam) acerbiorē,
 quem lubricum interiorem comminisci seuiorē hoc ipso quisquā
 possit, assiduè miseros æternūque exedente? Philosophia prisca
 omnem (vt dicitur) lapidem tot sæculis molita est, vt summi boni
 certam notam comperire atque veracem posset, tanquam rei in pri-
 mis homini soliūque expetendæ, tanquam omnes numeros com-
 plexæ felicitatis atque beatitatis. Quid igitur causæ esse dicamus, cur
 rei omnibus rebus præuertendæ, nos translaticiam curam habendā
 esse ducamus? nimirum quòd rebus diuinis & æternis consideran-
 dis, pectore incumbimus iam pleno vanitate, ac mente rerum sen-
 sibilium amore grauida & occupata. Vnde fit, vt monitis scripturæ,
 vt ipsius Dei filii responsis & prædictionibus, assensionem accom-
 modemus (quod dicere vereor) academicam, non aliam vtique ob
 causam, nisi quia sensibus, temerariis vanisque indicibus, fidem res
 illæ præsentem nō faciunt & ex tempore. Atqui de animorum im-
 mortalitate, eorūque post mortem conditione, aut cælesti sapien-
 tiæ auscultandum est: aut ad priscam polytheiam atheiāmque adeò
 iam reuoluti sumus, aut denique ex antiquitatis pleræque senten-
 tia, hodie quoque animos nostros cum corporibus damnamus mor-
 talitatis: cuius sceleris omen Deus, Deus inquam pater auertat, &

filius, eorūque spiritus. An in dubium fortasse nunc quoque ea ve-
 nire possunt, quæ de superis, inferisque promulgata sunt? etiāne
 post scripturæ vtriusque lectionem, sanctitatem, maiestatem, axio-
 maticāque fidem præ se ferentis & redolentis, iis quidem certè qui
 integris sensibus animi præditi sunt, & libentes in ea cōmentātur
 aspirante prouidentia? etiāne post ectypi cuntypo, expressi signi
 cum annullo similitudinem, animaduersam & adnotatam, omni-
 bus liniamentis exactam mirificentiissimè? Rectè verò diuina de na-
 tura, de Christi seruatoris diuinitate humanitatēque reuerentissimè,
 ac summa cum religione differere, vnāque ita viuere, dicere vt id ma-
 gis quàm censere videamur, ac semel constitutum habere, quidnam
 id est aliud, quàm in ludibrium vertere admirandam illam & ve-
 nerandam diuini iam olim commercii à primordiis rerum, pacti-
 que antiquissimi humano cum genere historiam? Mihi enim vide-
 tur, qui libros veteris testamenti cum attentione philosophica le-
 git, in iisque commentatur bona fide, tanquam historiam quandā
 ille diuinæ prouidentiae percensere, mortali animāti & ratione præ-
 dito, immortalitatem parentis indulgentia condentis & molientis,
 multifariāque misero beatitatem parturientis. Hæc porrò tam
 varia est historia tam copiosa, tot talibusque tropis figurisque & ver-
 borū & sentētiarum distincta, personarū etiam actibus, dialogisque
 exornata significatissimè, nullius vt amœnitas studii similis illi esse
 possit, nulla vt cōmētatio dignior maiestate philosophiæ. postremò
 res vt nulla contēplabilis, probare se magis hominis ingenio debue-
 rit, externis disciplinis exculto, à salute quidē certè æterna nō auer-
 so, ac præposterè de se merito. nam dramaticæ illæ commemorationes,
 cum sensus sint multiplicis, atque inexhaustæ interpretationis:
 tabernariæ tamen simplicitatis & planipedis licio detextæ sunt: mi-
 rè vt tragœdiam agat grauissimā scriptura, scita sub comœdia, eiūs-
 que choragio. In illo igitur studiorum paradiso, studiosissimo cui-
 que literarū bonarum tandē faciendum est, animus vt philosophi-
 cus, è pascuis philologiæ migrans, (amœnis illis quidē, sed ieiunis vti-
 litatis per sese, & inanibus, ad eam rem duntaxat qua de re nūc agi-
 tur) implere sese contendat pabulo sacrosanctæ philosophiæ, (quæ
 epulæ sunt cælestis sapientiæ inter homines cōuiuantis,) ad iustā-
 que habitudinē farcire & saginare pro modo captus sui. Nam quis
 nostrū non fatetur, quis verò nō libens audit, cum vsu ita venit, in-
 terdūque penè lachrymabundus, euangeliū normā esse vitæ homi-
 nū cælipetarum, & canonem innocentiae? Cur igitur quod miramur

ipsi, quod suspicimus: cuius instituti sequaces beatos arbitramur, nō etiam cupimus, capeffimus, & emulamur? Cur literarū admodū, aut supramodū fortasse, studiosi, non aliquando de Hellenismo transeūdū esse efficaciter ad Christianismū statuimus? atqui dignū est sublimibus animis, à doctrina probabili tantū atque persuasibili, studia sua ingeniūque exercitationē, ad doctrinā illam vt Græci vocāt *ἐν θεῷ καὶ αὐτοπίστου*, transcribenda ducere, quāque auctoritate sua pollet, ac plusquā Pythagorica inter Pythagoreos. Externa autem philosophia, (vt Chrysostomus inquit in epistolam priorem ad Corinthios) tanquam ancilla vilis atque neglecta, ab ingressu sacrorum theoriæ iampridem repulsa est, indignaque existimata, quæ arcana dominica per transitum introspiceret. Quare inter hoc & illud studium philosophiæ, quàm plurimum intercapedinis interest, quo Christianismi commentatio dirimitur ab Hellenismi. Verūm ō diram (vt ad inceptum redeam) intellectus peruersitatem, cū tamen ea demum parte naturam referamus diuinam. O tenebras plusquam Cimmerias, stygiisque illis oriundas, quibus nihilominus in ipsis humana se prudentia venditat & circumspicit, quasi in claritate summa. Multo maxima pars hominum, qui in vita civili aliquo sunt numero, aut rei cumulandæ seruire, aut fastigio suo tollendo supra turbam, ita solent, vt quisque luminibus gentilium suorum & propinquorū, vicinorum iuxta atque remotorum, magnopere obstruere, manibus pedibusque contendat. Quotus autem quisque, postquam in eum (vt ita loquar) nexum sese dedit fortunæ atque cupiditatis, non vniuersa contentione virium corporis atque animi, non omni destinatione mentis, atque adeò obstinatione, ita possessioni incumbit tum præsentis, tum futuræ, rerum sensu perceptarum, tanquam inde nunquam discessurus sit? Contrā bonis illis æternis, & ad expectationem cælestis ac diuinæ vitæ reiectis, non sic seruit per functoriè, pro iisque sibi quærendis, ita sibi negotium exhibet, ac si pignus nullum pronuntiati ab euangelio seruatore donatiui cælestis, haberemus: aut incertum ipsum haberemus, aut imaginarium? At eo quid testatius? quid consignatius? quid fide, quid opibus, quid auctoritate ipsius pollicentis, & quotidie clara voce confirmatis, subnixius esse potest ac solidius? Quid rursus vanius, quid inanius, quid denique fidei fluxioris, quàm illa fors aleatrix, quæ dicitur & creditur esse hominum fortunatrix: si quidem sensuum præstigias animi principatui obrepentes, nobisque fucum exitialem factitantes, cuiusuis esset rationis deprehendere & refellere? ecquid enim fal-

lacijs est? ecquid ludificantius oculata rerum auritáque speculatione atque existimatione? quod Plato non nostrarum partiũ auctor, in Phædro suo grauissimè, alibique docuit. Ceterum, dixeris hæc inter varicosos centuriones, continuò crassum ridet Vulpeius ingens: tametsi vtinam hoc tantum militaris ordo rideret: togatis autem & prætextatis satis probari posset. Quid autem si ne doctis quidem ipsis, & philosophia imbutis? Quòd si ad oraculorũ mandata, monita, consilia, quasi ad libros olim Sibyllinos, religiosè adiremus in cõsiliis vitæ capiendis, Themidis vtique responsa memorię nostræ adhærescerent, quæ citò abeunt euanida, dum aliud atque aliud agimus, etiam inter sacra. Neque verbis autem Dei confidimus, neque arrhaboni ab eo nobis dato, (vt diuus Paulus loquitur ad Corinthios scribens) nisi exili fide ac superficialia, fugacique credimus. Proh superi immortales, rerũ ne æternarũ fidem atque auctoritatẽ, fluxam aut ancipitem esse suspicari quisquam potest, qui secutas eam esse copias illas innumeras meminerit militum lectorum & deuotorum, qui pomæria prorogauerũt. Christianismi vsquequaque gẽtium? atqui illæ sola verbi Dei fiducia, quasi Vulcaniis armis fidẽtes, tum nouarum tabularum pronunciatione erectæ, ob idque Christo sese suaque deuouentes, cuius sacramento bona fide dixerant: ingẽtem & luculentam fecerunt impressionem, in erraticam illam nationum barbararum, trucẽmque & minacem multitudinem. Vnde nam igitur hæc tanta animorum opinionũque discrepantia? Illi pro asserenda auctoritate religionis quidẽ rectæ, sed tamẽ inter homines magnopere tunc controuersæ, patrociniique indigentis, post bonorum abiectionem, honorum cõtemptionem, gentilitatum atque necessitudinum abdicationem, mortes insuper ipsi exemplaque exquisitissima suppliciorũ pertolerarunt, multa atque hilari spe perfunsi & confisi. Nos eodem oleo certaminis vncti, eodem sacramento adacti, eorum exemplis condoceracti & confirmati, vt videri volumus: non facultatum saltem vilitate & neglectu, non abstinentia luxus atque cupiditatum, eandem ipsi palmam aut similem liceri sustinemus: quanquam immortalitatis animorum dogmate, passim omniũque consensu recepto, duntaxat non profligatissimorum. Sed scilicet fides donum est diuinum & largitio æternę prouidentię, non prudentię humanæ, non doctrinæ, nõ Græcę alumna philosophiæ. Profectò nos tenebris & caligine multa offusi, & crassissima, ad verum cernere certũque non valemus rerũ differentias & qualitates. idcircoque plerunque deteriora sequimur, auersantes

commodioria & planè salutaria. Illi verò (quod miremur) magna ex parte tyrones Christianismi, recens cælo delapsi. donatiui luculentæ pollicitatione diuinitus auctorati, clariore insuper atque repræsentata æternarum rerum cognitione aucti, omnia bona commodâque interitura, præ æternis bonis pessunderunt. Quare macti esse fide ad extremû, per gladios, per ignes, per omnia supplicia, quamlibet horrèda atque inusitata, diuinitus iussi sunt. Enimverò insaniâ omni gradu cõparationis excedit, quòd interdû atque etiam sæpenumero præ stupido intellectu & sensu emortuo, in rebus ter & quater capitalibus, & faceti (si diuis placet) esse, & ridicula fundere nō veremur: quòd antiquâ illam germanâque continentiam, atque innocentiam, ætatem iam ferre annosiorē negamus: videlicet tãquam antiquari die lex illa summa possit, & vt rogationes humanæ, desuetudine obsolescere, hominûmque negligentia: immò verò quòd sanctiorum ætatum disciplinam & ritus, vt commentitios iam & fabulares commemoramus: quòd beatissimam illam securitatem rerum vltro citroque comitantium, animique tranquillitatem, quatenus & qualis in vita esse potest (cuius Græca philosophia simulachrum tantum admirata est, eique nomen splendidum euthymiam indidit) longè maxima pars hominû, imperitorum iuxta & peritorum, non modò nullo studio consecretur, sed etiam auersari odissèque videtur: denique quòd ea quæ de superis, inferis, præmiis ac pœnis, prodita sunt oraculis sacrosanctis, atque etiam effata ipsius ore veritatis, tanquã ἀλκίης (absit Adrastia verbo) ἀπόλογον excipimus, vt est apud Platonem in decimo reipublicæ: siquidem hominum sensus non ex verbis, non è vultuosa facie, quæ sæpe vanissima sunt, sed ex corû actionibus iudicanda sunt, clarisque significationibus: quippe qui diuinæ maiestatis edicta & hortamenta, auribus transmittamus stupidis & futilibus: nisi si sordidas potius ipsas habemus, & cõspurcatas appulsu rerum inanium & fallacium è medio manantiû, quæ rationi per diametrum veritatique oppositæ sunt. Certè si ratio & intellectus principatum animi regiménque obtinerent, vt natura comparatum est, non mendosa atque integra: quid causæ esset obsecro, quin improba illa dictata cupiditatis, elationis, ambitionis, monitis sapientiæ præceptisque cederent, subeuntèque memoriæ rerum sempiternarum, caduca ista & fluxa concederent è præcordiis? Mihi quidem mediusfidius interim hæc estimâti, Platonis quidam dialogi, decenter & appositè personati, multisque in locis grauiter & scitè sententiosi, fœdam nobis inscitiâ exprobrare videntur, can-

démque capitale. Nam quid causę esse dicas, cur in hac nocte, sub-
lustrari quidem ipsa potius quàm illustri, sed tamen face doctrinę cę-
lestis & inspiratę, luculenter nobis pręlucente, non nisi exiliter cer-
nere eadem illa videamur, & tanquam per nebulam intellectus ad-
dubitantis, quę philosophum illum perspexisse nocte obscurissima
nouimus, ad lucernam tantum profanę philosophię commentan-
tem: tamen si in summa veritatis vehementer hallucinantem? Cui de-
disset ipsi quispiam, proferre impunè ut liceret quę de diuinis re-
bus vndecunque hauserat, posteritatique prodere? nec religiose ille
utique protinus, nec ambagiosę, nec accersitis ad colorem aut veniã
personis, sed docentis auctoritate diuinis ipsis de rebus, æternis que
differuisset præmiis ac suppliciis. nunc quo minus id liberè ut cupie-
bat faceret, à populo Atheniensi perimbuto errore hellenismi, me-
tuendum esse sciebat Socratis damnatione. Quidam autem eius fa-
milie alumni, aduerso (propè dixerim) numine sacris initiati philo-
sophię emulatricis orthodoxię, veritatis imaginem magnopere ad-
mirati esse dicuntur, ab ipso primum auctore adumbratam probabi-
liter & mirificè, duntaxat ut illis temporibus ac locis, quę luce ca-
ruerunt. Verum illa Platonis familia, quę post Christi prædicationē
extitit, si utendam orthodoxiam tractandamque rogasset ab ipsius
veritatis auctore vno & interprete, ut nonnulli alii fecerunt philo-
sophię quoque alumni, quid censemus eos de doctrina salutari pro-
dituros ac scripturos fuisse, germanaque philosophia? Hanc nos ho-
die veritatis disciplinam in paucis voluminibus, nec ipsis ita magnis,
consecratam habemus, literis nunquam fugientibus, cæterum arca-
norum sapientię capacissimis, vixque enarrabilibus humanę facun-
dię. Quod genus philosophię post percurſa studia, quę dicuntur ex-
terna, atque etiam inter ipsa percurrenda, summa mihi semper ha-
bere inuitamenta commentationis visum est: ut pote in quo omnia
penè sint symbolica, vnde sensus sublimes, arcani, mirifici, cęlestique
odore fragrant, salubri cum voluptate ducuntur, pro ingenio cu-
iusque, pro captuque mentium minimè affectarum. Hęc tute cum
paulo intentius consideraris: sic Dei consilia mirabilia, sic rerum ab-
ditarum, & procul à sensibus summotarum, in medium prolationē,
in figuris oraculorum condita, multiplicique ambage inuoluta esse
dices, ut aurum in puteis, aut venis metallorum altissimis & sinuo-
sissimis. His adde ad hominum disciplinam, atque ad immortalita-
tis æternę ac diuinę commercium locupletandum, quod ille im-
portator salutis & sapientię Iesus Christus, diuinitate atque huma-

nitate cōstans ratione ineffabili, cūm prouincia sua decederet vt cō-
 fecta & absoluta, in cælūmque remigraret: comites tamen ipse suos
 quoquē allegauit gētium (nullis enim finibus circūscriptū imperiū
 cælitus acceperat) legis & ipsos euangelæ promulgatores, & tan-
 quam institores æternæ sapientiæ, in cælūmque tollentis homines.
 Qui cūm multam copiosāque cælestium consiliorum scientiam
 oculis auribūsq̃ haussissent, Christo adhuc ipso inter homines agē-
 te: tum eo sublimē raptō, mox allapsu numinis spiritalis vberius mul-
 to cōdocefacti, & iam pleniore haustu sapientiæ inebriati, interpre-
 tes quoque ipsi esse cœperunt, magistrīque veritatis. Hæc porrō do-
 ctrina per eorū discipulos, & deinceps per alios atque alios, prodita
 Christi familiæ procures, instar & ipsa iuris habet diuini. Etenim eius
 magna pars, vt simillimū veri est, etsi nō iure scripto cōstat, moribus
 tamē recepta est ætatū sanctissimarum, senatūsq̃ consultis consti-
 tuta & confirmata: quorū auctoritas sacrosancta semper fuit cōsensu
 mortalium duntaxat vniuersorum. Verū enimvero in huius phi-
 losophiæ studio mira admodum voluptate animus hominis affici-
 tur, cūm latebris in illis ænigmaticis, in cryptis (vt ita loquar) sapien-
 tiæ, repositam iam olim conditāque veritatē, quasi animorum im-
 mortalium annonam intueri cœperit, tandiu frustra quæsitam Græ-
 cæ philosophiæ. Omnino enim id futurum est homini philosophiæ
 amantissimo, qui quidem auspicatō initia suscepit hominem no-
 uātia, ex illo admirabili supplicio seruatoris enata, nobis semper me-
 morabili ac prædicando, animōque versando: siquidem inde solum
 beatæ vitæ pignus habemus lustrico die initialique acceptum, ido-
 neum, certum, opimum. At huius sapientiæ & veritatis vmbra, phi-
 losophi quidam Hellenismi alumni, odorātes, ne quicquāque in
 ea ṽestiganda cernentes & sua & aliorum studia esse consumpta, de-
 merfam esse veritatem perhibuerūt in profundo vniuersi: aut in imo
 adobrutam putei cuiusdam inexhausti, quod Democritus dixit: cūm
 interim non in imo rerum illa, sed in summo naturarum omnium
 asseruaretur vnde est oriunda. Cæterū simulachrum ipsius penes
 Hebræos erat, vel apud eos potius, in tabulario clausum, ne custodi-
 bus quidem ipsis nisi paucis, aperto aut perspicuo: tametsi eorum o-
 lim principes Abrahamus, Isaacus, atque eorum pueri & familia, eā
 olim quasi scatentem, ē puteis quidem illi quoquo foderant modo.
 Cæterū Christus ipse postea aquam indidē viam suo iure, iām-
 que liquidam hausit & fudit: eaque demum aqua sedare sitim iucun-
 dissimē, atque desiderium implere philosophiæ potest, vel discendi

studio ardentissimæ. Proinde cum ea sit natura præstantium animorum, ut quemadmodum ignis sine sui alimenti usu, sic illi esse nequeant sine actu sibi peculiari, ingenito & cognato, aut certe cum ætate agnato, quod eorum est pabulum: quonam tandem in pascuo potius animi ipsi, generis sui conscii & memores, pastum sibi deligere possunt, quam in ea commentatione mortalitatis quæ ad immortalitatem spectat, mortalesque ipsos ad beatam vitam euehit? Nec verò eam nunc mortis commutationem dico, quam olim philosophia ut inane simulachrum amplexa est, in eaque contemplationem suam fixit, ieiunam, frustratricem, & erraticam: sed eiusmodi potius quæ fructum non leuiter odoretur immortalitatis beatissimæ, qua animi philosophi intectio, quamuis excelsi atque auidi, alitur prolixè, & vegetatur indies. Hæc est illa mirabilis, illa beata philosophia, humanitatis viciatæ recocinnatrix: quæ animum conditionis suæ prudentem a corpore dissidere docet, à naturæque discedere corrupta & deperita: neque id quidem modò, sed ipsum etiam à semetipso excedentem, & verò semetipsum exosum, ad summi boni consecrationem vergere, totumque in eo esse, quatenus fieri potest citra solutionem corpori exitialem. Quod genus sapientiæ ipsis ignotum fuit philosophiæ conditoribus, nominisque ipsius sanè vendibilis, ac splendidi proditoribus: quippe qui suo sapienti quem absolueret vel effingere sexcentis annis non potuerunt, omnia in sese posita esse putarunt, ridendamque cum vaniloquentia atque impia collegerunt. Hæc illa est manus Palæstinorum, quam puteos olim Hebræorum conspurcauissent, & tandem terra congesta solo equauisse, legimus. At Christianismi philosophia puteis ab integro refodiendis, non modò humum inde egerendam, sed veterem etiam humanitatem homini exuendam suscepit, nouamque induendam quasi venerationem. Quo fit, altero ut natali huius homo philosophiæ studiosus, humanum exuperet fastigium, tandemque inter superos diuosque allegatur, non hominum quidem ille decreto atque opinione, ut olim diui illi commentitii & poetici, non ut Romani Cæsares, aut senatus consultis, aut successorum suorum sanctionibus: sed cælestis ac diuinæ prouidentiae placito prærogatiuo. Hæc est illa gratia cælestis, hæc benignitas Dei, quæ humano generi cæli commercium (ô beneficiū nobis gloriandum, ô compressis decus manibus amplectendum) interuentu verbi Dei eiusdemque filii indulgit & largita est. Hac eadem philosophia auspice, sanctiores animæ, rerum fluxarum contemptrices, ut nullidū amori pactæ, ab externorumque bonorum desideriis

intactæ, Christo se dei filio despondere solitæ sunt, conditori sapientia, hominûmque assertori è mancipio teterrimi tenebrarum tyranni, atque è scruitute sensuum corporis satellitum, qui in fide sunt illius. Ita autē se despondent tanto vindici animæ, sua ut omnia doti dicant sponsalium gratia, suûmque arbitrium, quod suum habent: illæ maximè (tametsi obnoxium) si quicquam sui habent: sponsus autem vicissim semet ut ipsum, quantus est ille cumque, vicissitudine admirabili dedat, commemoranda conditione ac prædicanda instauratiuæ humanitatis. Atque huiusce quidem seu philosophiæ, seu vitæ per theoriam agenda, parens, conditor, præses & moderator est Iesus Christus, vnigenus dei filius, ut dictum est: omniûmque naturarû primigenius, cui à patre omniû principio omnia sunt credita, omnia liberè, summôque cum imperio commendata atque permissa. Qui cum cælo delapsus esset seruandi hominum causa, cælum etiam terræ, cælestemque naturam & immortalem, terrenæ & caducæ conciliandi, atque etiam coniungendi necessitudinis beatifica & sempiterna: humanitatis amictu tectus, inter homines tantisper egit (cætera quidem ille omnia humaniter, cæterum inculpate & innocēter diuinitatis priuilegio) quoad vniuersa vatum prædicta, omnia patris mandata placitæque exhausit ad vnum, & peregit. A quo quidem ipso & primo & vltimo, vir sapiens idem atque innocens, numeris omnibus absolutus rationis rectæ atque integræ, ad vnguem informatus est. tum autem eius informatio nobis ad exemplum vitæ prodita, literis que consecrata est fide rata subnixis, atque axiomatis instar obtinentibus consensu tot ætatum, & verò auctoritate cælitus sæpiusque confirmata. Ad huiusce igitur sapientis, magistri que immortalitatis adipiscendæ præcepta, monita, præscripta, hominē sapientiæ cupidissimum, affingere mores suos oportet, tenorēque vitæ mortalis affirmare, quā fieri licet proximè per naturæ oblæsæ conditionem, qui quidem ex hominum ordine mortalitatisque cōditione, ad diuos iam & immortales transcribi sese in perpetuum cupiat, id quod non minus plebeiis & officinariis, quā equitibus & palatinis licet, & patriciis ac primoribus, quam quid dico non minus? cum sortis tam expectæ competitor, conditionis que beatorum cupidos & ambientes, exuere & abicere prætextam fastus ac superbiæ necesse sit, pro eaque candidam induere simplicitatis & charitatis, ciuilis ac popularis affectu etiam habitūque demisso esse oporteat, minoribusque submisso, nō modò æqualibus? & verò iure suo & loco decedere plerumque, & com-

petitoribus maiora tribuere: omnibus denique æquo animo concedere? & quidem hæc omnia non sine captione modò, sed etiam optima fiunt conditione. Illud verò vehementer incommodum accidit philosophari hac uia auspicantibus, idque vitio iuris gentium euenit, quod penè iuris naturalis vim obtinuit ante seruatoris aduentum, nec magnopere postea exoleuit. Nam cùm in artibus ac disciplinis humanis, inter enunciata rata atque confessa censeantur ea quæ *ἀπορίαι* dicuntur, id est primæ & communes animi notiones, mentibus humanis suapte euidencia anticipatæ: è cōtrario cùm philosophiæ, tum verò Christianismi præcipua dictata, sensui cōmuni sunt paradoxa, prudentiæ eo amplius vrbanæ à primoribûsque cultæ, omnino antidoxa: cuiusmodi illa sunt apophthegmata, ex ipsius euangelii & seruatoris doctrina oriunda, & sapientia cælesti. Amorem sui vnunquenque deponere oportere: Quærendi studium abdicere: Gloriæ odium suscipere, duntaxat populo se & scenæ venditantis: A charitate cognitionis, affinitatis, ciuilibusque necessitudinis cuiuscunque abdicare se, quæ quidem coniunctam causam non habeat cum præceptis & interdictis huius philosophiæ: Sux sortis neminem pœnitere, etiam iudicio hominum calamitosissimæ: Ærunosam conditionem commodiorem censere: è réque & salute hominis philosophi magis esse, quàm rerum secundarum atque affluentium tenorem inoffensum: Genio suo ac cupidini eorum nihil indulgere, quibus homo carere citra noxam valetudinis possit: Alienam vicem pro sua iniuria dolere: Inimico quanlibet capitali & infesto placidum & beneuolentem sese præbere: & verò philotesiam illi, non in epulo modò seruatoris, (quod plerique ad dieculam, & defunctoriè facimus) sed vbicunque & cōstanter propinare, & semper optima fide, quenlibet sacris iisdem initiatum, non tantùm propinquum sibi atque necessarium, sed ipsummet etiam alterum esse ducere: Nihil pro suo iure agere: Nihil suum esse dicere & propriũ, omnia precaria existimare, omnia profectitia & herilia, præter nudam voluntatem, in vtrâque partem ipsam certo quodam modo liberam, nec tamen ingenuam: quin & eandem ipsam egere adminiculo cælitus aduentitio, ac præcurrente Domini comitèque indulgentia & aspiratu: Tum quod longè difficillimũ, & tamen in prima & summa cera tabularum diuinarum, insignitè, & cōceptis imperiose verbis conscriptũ, id omni ope facere, Dei vt amorem summum sic homo suscipiat, nullum vt locum vlli alii desiderio, ne sui quidem charitati relinquat in præcordiis suis: quo minus totus esse

in eo amore, hemioliúsque conetur: Omnium aliarum rerum amorem, voluptatem, ambitum, cupiditatem, lorarios demonis spiritus, lictoresque esse credere: Denique crucé seruatoris, crucé (inquam) & supplicium Domini, cultus & reuerentiæ causa nobis sæpe nominandum & prædicandum, Pythii illius & Cræsi diuitiis, Persarumque opibus celebratis anteferre: Ob ipsius admirationem & cultum nihil in numerato, in spe omnia habere velle: Præsentia Deo eidemque Domino fœnerari: pro iis futura ab eo stipulari, quæ cætuplicatò redeât, quæque optimo iure atque inusitato apud homines, in cælo possideantur olim, quod genus eos demum manet, vt oraculis testatum est: aut eos quidem certè, certissimè & copiosissimè, qui tolerantia philosophicam fixa fide nitentem, per omnes vitæ actus approbauerint ipsi Domino huius sectæ auctori, præmōstratori, & prætori: quique ante extremum vltimi actus plaudite, nec lassescere cœperint ipsi, nec animo labascere. Huiusmodi dictata sūt antistitis ipsius cœlestis sapientiæ, ex cuius vnus officina homines iusti & sapiētes exeunt: talisque erat eiusdem sapientiæ subantistes, qui Colossensibus scribens, acquiescere sese ait cum lætitia in vexationibus quas perpetiebatur: cū reliquias oppressionum Christi ecclesiæ capitis in carne sua exhauriret, pro ipsius corpore, quam Ecclesiam vocat. id quod pro modo gratiæ ipsi Paulo datæ eum fecisse intelligimus. Neque enim Dominus in sua ipsius tantum carne, sed etiam in electorum suorum passus est, & ad extremum vsque passurus, in quibus regnum suum constitutum voluit. *καὶ ἀναπληρῶ* (inquit) *τὰ ὑστερήματα τοῦ σώματος αὐτοῦ, ὅστις ἡ ἐκκλησία.* Quibus verbis significat, vt Photius auctor est, nos omnes eo nomine debitores esse Iesu Christo, oportereque singulos, pro captu sui quæque moduli, & vniuersos eodem genere id debitū dissoluere. tametsi persolui non potest æs tantum alienum, quod ne Ecclesia quidem vniuersa soluendo est, id est corpus suo capiti. quod *ὑστερήματα* vocabulum significat. Natura enim humana suapte origine rea & obnoxia quamlibet oppressa, equare tamen non potest supplicium domini in fontis vsque quaque. Quod igitur & sigillatim & vniuersim patitur, passa est, passuræque est electorum vniuersitas, *ὑστερήματα* est passionis Domini, vt Photius intellexit. Verum hæc atque alia eiusmodi paradoxa, Christiana constituit philosophia: vt parens ipsa hominum renascentium, ita sensus & prudentiæ communis in diuersum innouatrix. Quæ nisi plena fuisset numinis præsentissimi, nunquam hæc certè aliæque eorum consequentia, tum in vulgus, tum

ad primarios ordines promulgata, vbicunque approbauisset terrarum atque gentium (quod factum esse nouimus) quantumuis idololatriæ opinione imbutarū atque polytheiæ, adde etiam voluptati & sensuum indulgentiæ nihil non tribuere assuetarum. Passim autem eadem philosophia legem nouam, inauditam & admirandam suasit, immò verò legem summam, iure iam à principio gentium antiquatam, abrogatam, interlitam, obliteratam, quam Charitatē vocauit. Hæc lex quam rectam rationem appellare possumus, in homine quidē imbuto supradicta pietate: hæc inquam lex omneis mortales in familiam seruatoris ascitos, æquo iure esse censuit, duntaxat adoptionis iure: vt pote vnius & eiusdem domini imperio interdictoque parenteis. inter eos etiam necessitudinem germanitatis mysticæ intercedere, qui eodem parente sese genitos recordarentur, eodēque vtero editos dilectissimæ Christi sponsæ, mira fecunditate diuinitus donatæ. O rem stupendam! ô plenam numinis præsentissimi! profectò omnem superat admirabilitatem, tantam fuisse auctoritatem, eam facultatem, id numen legis euangelicæ, leges vt naturæ, vt iuris gentium, vt iurium ciuiliū & municipalium in cōmuni sensu gētium vniuersarum, omniūque nationum, incisas tot sæculis, humanæque prudentiæ atque etiam philosophiæ iniustas, nō modò passim abrogauerit, ac per omneis ordines, classes, sexus, atque ætates, sed etiam deleuerit & absterxit: quod quidem certè ad eos easque pertinet (quæ innumērabilis est multitudo) quos quāsque per singulas nationes pignerari, per omneis ordines deligere prouidentia visum est, vt adoptiuos liberos seruatoris, vt in album illud æternum relatos diuinę præscientiæ. Quenam fuit autem illa vis tanta, vndenam ipsa enata, quæ & viriles & fœmineas mentes, seniles iuxta iuuenilēsque, robore inuictò indomitòque firmavit? quæ huiusmodi persualione pietatis dilectos illos suos imbuit, tinxit, inebriauit, etiam in Ægypto metropoli impietatis, vt parētes, vt pignora charissima, vt coniuges dilectissimas, vt facultates: denique vt vitam, mortem, & cruciatus maiores humana patientia pro nihilo duxerint, præ amplexu Iesu Christi pro nobis in crucem acti? nempe vis illa fuit: illud fuit crucis numen præsentaneum. Crucis (inquam) illius & supplicii, tanto pōst honoratissimi futuri omniū insignium, atque augustissimi, quanto ante Christum in id lignum sublatum, fuerat suppliciorum omnium teterrimū ac detestabilissimū. inde enim gratia cælestis largitiōque inexhausta vt è perenni fonte cælestis munificentia manauit, qua Christus tyrannidem principis



mundi dissoluit. At quàm præsenti, quàm efficaci, quàm manifesto Dei numine eos esse afflatos, perfusos, suffusos offusosque oportuit, qui vitæ immortalis atque beatissimæ adipiscendæ certam spem & exploratam, in fide & institutis Christianismi, atque in pollicitatione seruatoris ipsius positam esse cerneret: ecquis eorum sensum eiusmodi tum fuisse dubitat, cum Phalaristarum minas carnificinasque spernerent, vt Seruatoris elogia ita ipsis viderentur axiomata fide digna, vt prænotiones illæ quæ vocantur, iis qui mathematicis argumentationibus studere instituerunt: probè enim beati illi animi intellexerunt, morte Christi filii Dei, elatum esse imperium & principatum præsulis tartarei, quod quidem ad filios Dei pertinet, qui regnum Dei verbo & voluntate flagitant & expetunt. Cum natura autem humana in huius vitæ mari naufragium fecisset calamitosum, ob iactum simplicitatis nudæ atque apertæ, culpa primordiali, diuineque ea calamitas homines fefellisset in tenebris versantes diuinarum rerum ignorantia: sub extremum sæculorū (vt creditum est) & mortem iam vergente quasi præcipiti, salutare lumen vitæ, plaudendumque nuncium salus ipsa mundo, & seruator Deus ac liberator attulit, naturæ in integrum aut paulo minus restituendæ. Hunc nuncium cælitus delatum, Euangelium scriptura appellauit, nomine sanè pleno fausti ac felicitis ominis. Quo lumine doctrinæ, salutis auctor Christus & conditor, cui eam ob causam euangelia debemus in perpetuum & agnoscimus, cum discipulos suos præluce mortalibus totum per orbem tenebricosum iussisset ac docuisset, ipse in cælum denuo suapte vi euolauit. Dein lampade (vt dicitur) per spiritū subinde cælo delapsam, tradita affectatoribus illis suis, quos sibi ad tantam prouinciam totque prouincias legauit, per orbem terrarum sparsas, iis tametsi incomitatis & expeditis, nihil tamen aliud nisi Pithò cælestem dedit, facundiam illis in re præsenti, securis, nec antè meditationis, cum persuasione stabilissima abundè largituram. Ex eo igitur iam tempore reliquiæ è naufragio delectæ, indolem asseruantes gentis Abrahamidarum, per tot ætates, eadem duce philosophia comitèque recolliguntur, tanquam ad ipsam salutis lampadem lucen-
tissimam: quoad numeros ascriptitiorum, cælestique colonie & sempiternæ destinatorum, diuina impleuerit prouidentia. Quem in diem, decantatam illam rerū vicissitudinis temporūque clausulā, cui etiā æterni ac beati auspiciatum & initium, Christianismus cultoribus sui præsstituit atque pollicitus est. Proh diui immortales, obsecro vestram fidem, cum hæc quæ ego dixi, certiora certis omnes esse

dicamus: plerique verò (vt opinor) ducamus & credamus: cur vndique nunc itur in mundi obsequium, inimicum legis euangelicæ? eleuatorem celestium auctoritatū? abrogatorem eternarum sanctionum, numine manifesto multifariam confirmatarum? tum etiam senatus consultis receptarum prudentiæ atque religionis ætatum sanctissimarum simul & consultissimarum? Huic certè domino populi & magistro ita parère, ita se probare ab ineunte ætate solertissimus quisque contendit, quasi & vitæ & necis potestatem habeat. an potius quasi hominum productori atque fortunatori? O stultitiam meram, quæ frugalitas certa putatur & prudentia. At huius plani atque circulatoris, hominum (vt stulti putant) expolitoris, eam esse improbitatem atque petulantiam docet philosophia, quam propter nuncium ei remittere prudentia, conditionis suæ non nescia, debeat, in montemque sacrum è medio secedere, atque ibi ad studia incubere ab eo diuersissima. Verùm cum historiæ doctrinæque seruatoris fides & auctoritas, in opinionem & prouerbum venerit, vt compertissima, vt testatissima, vt consignatissima, vt numeros omnes denique veritatis & sapientiæ complexa: quid causæ est, quin stupidi, quin torpentes, quin excordes simus atque væcordes, qui monstro tot capitum ac sine mente, morem gerere, cum eo gradum conferre, in tenebris vnà micare (quod aiunt) & euagari, certo tantoque cum discrimine, non horreamus? faciem autem illam ducis philosophiæ, sacram & luminosam floccifacere, ad portum prælucentē beatissimæ tranquillitatis? Nam quis inficiari audeat, si paulo instes acrius, cum tantis fluctibus affectuum, cum tam turbulentis iactetur æstibus cupiditatum vita ciuilis atque in medio posita, idque nemo ferè intra pomœria natus orthodoxiæ, non agnoscat, non fateatur, non queribundè sæpe dictitet: solem tamen ipsum salutis, Phœbum illum sapientiæ, qui nobis assiduè radiis mirificis sacrosanctæ disciplinæ præluceat: sidera etiam ipsa Ecclesiæ Dei sponsæ, sanctarumque animarum luminaria, ab ipso illustrata, à multo maxima parte nostrum neglectim obseruari: adde si placet vel meo periculo, eorum quoque bona parte, vel deterrima potius, qui rerum diuinarum fidem, æternæque immortalitatis expectationem, tenere, tueri, ac circunferre debent: & verò qui in sinu refouere & vegetare Christianismi religionem semianimam, existimari volunt, charitate feruete. atqui nemo erit (vt arbitror) inficiendo, qui quidem se in oculis Dei meminerit conceptis serium in modum verbis, asseueratione adactum esse, tametsi nō iurata. Quid igitur hîc causabimur? cur omnes

animæ facultates pedibus eunt in sententiam istius, quem communem sensum dicimus: atque ab euangeli auctoritate disciplinæque desciscunt contra pactum adoptionis? cur cùm tantum famæ ac venerationis omnium consensu habeat Euangelium: tam parum fidei habet in commerciis ciuilibus, tam parum obtinet auctoritatis in vita instituenda ad præscriptum communis prudentiæ? At dictata eius & consilia sufficiunt subsidiis ac præsidiiis parandis atque expediendis ad casus omnes qui imminet humanæ conditioni. Cur igitur multitudo ciuilis consiliorum suorum summam, ac suæ mentis thesaurum, in prudentiæ communis præsidiiis, multo amplius ac libentius, quàm in fidei fano deponit? Vtrum quòd doctrina ipsa Christi, quæ quotidie auribus nostris inculcatur, quæ oculis incurrit, numen illud suū amisit supradictum, quod tam luculentas quondam strages impietatis inueteratæ, inter innumeras gentes edidit barbaras quasdam ipsas & bardas, quasdem etiam semiferas, & tanquam androsphingum potius quàm hominum, si quidem mores & ingenium, non faciem tantum spectasses, sermonisque commercia? An diuorum exempla tam multa, tam mirifica, qui vadimonium capitale cupidè, certatim, turmatim, agminatim pro Christo obierunt, ut multis & summis auctoritatibus testatum est & consignatū: externis quoque testimoniis congruè accedentibus, non eosdem (ut ita loquar) radios veritatis, aut eiusdem splendoris, nunc ut olim asseruant? At si hoc esse fatebimur, vnà quoque necesse est ut fateamur, non vetustatis situ id contigisse (seniū enim res huiusmodi non sentiunt) sed oculorum humanorum vicio, qui obtueri tantum lumen nequeunt, quod tempore & situ æui, splendoris incrementum accipit. Ex quo fit (credo) ut quasi Deo cōniunte, aut minus iam res humanas arbitrate, vita sibi indulgeat, veluti sublata legis diuinæ seueritate, aut sensim desuescente, cuius ætates illæ heroicæ, sanctiorum exemplorum fœcundæ, gratiam sibimet ipsæ ducebant nec faciendam nec obtinendam. Quasi verò edicta cælestia interdictaque euangelica, atatem ferre tantam nō potuerint, ut sanctiones principum, ut scita populorum, ut mores emendati & inculpati, qui vix seculares esse soliti sūt vel lustrales potius. Basilius cognomēto magnus in quadā epistola, Mandata (inquit) euāgelica, nec interuallis tēporū, nec rerū humanarū inclinationibus cedunt: sed perēni tenore eadem ad posteritatē manāt, qualia semel ore ab illo promulgata sunt veraci, beato, & immortalī. homines verò nubibus similes sunt, quæ pro tēpestatum varietate, nūc in hanc, nunc in illam cæli partē feruntur:

ij vtique maximè, qui animo versatili & sententia euariante ducuntur. hactenus ille auctor, religionis rectæ prudentissimus. Sed ne sit tāta censura talisque iudicii diuini, quantam & cuiusmodi monumenta ipsa testificantur, quæ non dubio numine claroque consecrata sunt: ne sint supplicia peccatorum tam atrocia, quàm sæcula innocentiora esse perhibuerunt, quando iam nescio quid eiusmodi nobis incuria salutis quam præferimus, promittere, diraque securitas futuri æui videtur. demus etiam si fas est, hoc deterioribus iam sæculis, & fortasse deterrimis, permittamúsque nobis multo liceri minoris præmia cælestia, atque immortalia, quàm quanti discipulis suis Christus cælestium & terrenorum potens, & superum atque inferum, indicauit & addixit, cohortique vniuersæ contubernali suæ, atque eius affeclis & comitibus. quid tum? Num etiam persuadere nobis possumus, homines earum rerum cupidissimos, quas Deus inter homines agens, procul contubernio suo & comitatu cum detestatione amolitus est: homines (inquā) hinc beatos, & affluētes omniū rerum copia, in earumque possessione animo acquiescentes: vnāque deliciarum aucupes: aut qui eam vitæ conditionem exoptent & persequantur omni animi contentione: animas denique secundis rebus altiles & fæctas, sublimes hinc abituras post obitum credemus lege ab euangelio legillatore promulgata, ac sanguine suo sancta, qua tamen vna lege possumus? Neque enim Dominus noster, cū familia illa sua sodalitia, quæ facultatibus suis omnibus pignoribusque cessit, cū sese daret in eius clientelam & comitatum, alioqui etiam fidissima & obsequentissima, tam dura conditione egit: & cum ætatis nostræ hominibus cōnuentibus oculis acturus est, indulgētissimoque dominatu. Neque cohortem illam domesticam, & peculiariter euocatam, sequi vestigia sua voluit, conceptisque verbis sanxit, egerem ipsam & ieiunam, exuccam & exanguem, ac magnam partem cruentam: & nos tanto interuallo ad idem quidem sacramentum vocatos, cæterum exemplo longè diuersissimo, solutissima militia & luxu prædita dignos esse censuit, vacatione fruētes operis faciendi. Neque verò priuilegium latum apud superos de quoquam audiuius, ne vno quidem, lege vt diuina, vt sempiterna non teneretur. etsi multi diro errore ducti, solutos se ipsa arbitrantur quadam prærogatiua factorum benigniorum, rerumque ad votum cedentiū & secundarum. Nimirum multi mortales funeribus elati splendidis, opiparis, & interdum symphoniacis, sic beati hinc abeunt, vt principes olim Romani, sæuitia & impietate insignes, inter diuos refere-

c. iij.

bantur, specie quidem illi visenda spectandâque popularibus: caterum ridenda miserandâque prudentibus. Hic fortasse reclamabitur ab his, qui inertiae blandientes nepotinaeque licentiae, quorundam nunc hominum auctoritate confidentius abutuntur, non indoctissimorum. Quorum verba ediscetes, quae nuper exierunt, pro oraculisque citantes, sententias fortasse partim negligunt, partim non intelligunt. Quasi verò operum vacationes virtutumque largiri consentaneè possint, qui fidei iustae ut iustificae, primas & secundas apud Christum Seruatorem, tertiâsque tribuunt. Age, num copiae, num opes, num bona quae vocantur externa, ea conditione possidentur: sic cumulos homines felicitate beatosque efficere possunt, iis ut bona aeterna illa quidem, ac mentis humanae captu maiora, sed tamen futura, & in spectantum posita, mutanda sint? At sola ipsa explere desiderium animorum auentium, certum est inter homines sanae mentis. Atqui si in harum rerum perpensione accurata versari nobis aliquando vacarit, in mentemque venerit: nihil tam in causa esset editae incuriae bonorum & malorum extremi reperiemus, quam labantem ac vibrantem fidem historiae sacrae doctrinaeque diuinæ. tamen si ô superi, ô Seruator, rem miserâ, culpam foedam, atque inexpressibilem. Scripturae & oraculis credimus haesitabundè, multis, magnis, solidis, irrefutatis auctoritatibus, exemplis variis ac mirificis sic confirmatis, nihil ut iis esse possit consignatius & compertius, rerum quidem certè intellectu iudicioque interiore comprehendibilem. Etenim urbana multitudo & ciuilis cōuersatio, errorum omnium magistrae, docent nos in perditis vitae rationibus, subsidium mutuari tristi ac trepidae conscientiae, ab disciplina Academiae, ne pro certo quippiam habeamus, eorum etiam quae de superis inferisque naturis oracula prodiderunt. At perpurgatis auribus initiatisque esse oportet, à multitudinisque malè sanae auscultationibus integris, qui mysticae doctrinae studere constituerit, ei que assensionem semel accommodare. Nam si fides labat, charitas protinus tepeat necesse est. at verò sine ea operam & oleum huius studii perdere nos nouimus: ita spes languebit & vanescet, & frustra tandem erit & laborum & contentionis summa. Hic tu quid respondeas, si te ita affectum sacra philosophia ut discipulum suum roget? Heus tu literarum haecenus cupidissime, est aliquid quod tendis, & in quod dirigis arcum? An passim sequeris coruos testaque, lutoque, Securus quod pes ferat, atque ex tempore viuis? Certè aut tecum ipse quisquis es literarum amantissimus, aut mecum ego potius ita loquar necesse est, quasi per

parodiam, & verbis illis vtar Satyræ. Quidnam igitur miser ex cultu pietatis & philosophiæ expecto? Immo verò si nihil pensi rerum æternarum habemus, aut si ambiguum quippiam & alternans habemus: quò tandem nobismetipsis negotium exhibemus in Hellenismo, & ad philosophiam incumbimus, quæ meditatio mortis esse dicta est à Platone? An expectationem illam tandem cælestis fructus & sempiterni, quem tertio quoque verbo quisque nostrum usurpare in sermone solitus est, quem nobis, quem liberis, quem cõiugideamata, quem amicis, ac de nobis prolixè merentibus, libenter ominari & exposcere diuinitus gaudemus: tanquam nucem extrinsecus nitetem, intus forsan marcidam, asseruare in sinu nos putamus? Miserum me, si ita est, atque etiam nefariè ter miserum, qui aliud de re tanta sentiam & pronunciem. Age verò, quidnam causæ esse censemus, quòd cum longè maxima pars hominum, in tanta vitæ securitate degamus, mortisque sempiternæ: vix tamen decimū quentque videmus vel in morte placida, vel in morbo tumultuoso, non vehementer trepidare, venturique aui recordationem quasi deprehensum perhorrescere? Quid quòd facinorosi homines, & ter atque quater ausi capitalia: alique qui in summa obliuione & incuria æternitatis vitam egerunt, ad vadimonium mortis præsentaneum & post spem vitæ conclamatam, in cælum supplices suspiciunt: Deumque miserabiliter diuósque tãquam in tumultu aut naufragio, inuocant? Nempe quòd sensuum ludibriis, quasi nebulis quibusdam à principatu animi tum disiectis atque abscedentibus, lumē statim veritatis validiore appulsu incumbere animo ipsi incipit: intellectamque ad contemplationem earum rerum ciere, quæ impendent iam propius, & veluti capiti incubant animam agentium. Simul numen veritatis suapte vi tunc in mentem insinuat hominum, nisi si qui sunt torporis conclamati, qui callum iam obduxerit eorum præcordiis, qui pauci sunt. hoc enim non nisi planè excordibus euenit, vasa namque rerum æternarum incuria correptis. Iccirco acris & strenua futuræ omnino rei anticipatio, ad mortis commentationem nos perducere debet, vt semper appetētis, cum iam dies eius cesserit: hominem autem eo amplius philosophiæ studiosum, in rem præsentem sistere, vt immortalitatis in vtranque partem consciū vberiore fide, & persuasionē non labante. Sic enim fiet vt terrore mortis animus per totam vitā vacet, qui vulgò molestus esse solet, animorumque constantiam frangere: cumque vasa mortis conclamata fuerint, quod sæpe magna cum trepidatione vsuuenit etiā nō quibullibet,

animus semper ipse in statione sua excubans inueniatur, ac semper apud se sit: vt denique sibimet homo ipsi in articulo rei summæ, atque in vltimo discrimine non desit, in quo ipso summa actionum omnium, consiliorumque & studiorum vertitur: quippe vbi cum hoste perpetuò certamen in æuum decernitur, eodémque infestissimo. Ecquis autem nouit an Dei placabilitas, quanquam aditu semper obuia ac facilis, blanda etiam sui in vita, benignaque exhibitrix, in fera illa tumultuariâque pœnitentia, non tam mœsta ob admissa, quam pauore perfusa, minisque fati imminentis expressa, Atropi sese germanam ostensura sit? O si id euenerit, miseras ac perditas ærunosæ vitæ rationes, & pudendas pœnitendâsque, iis maximè atque in primis, qui beati & affluentes fuerunt, titulosque & grandi nomenclatura illustres: quorum memoria extructis altè monumentis cum elogio vitæ, longè latèque consecrata, atque in multa vitæ sacula propagata est. O nubem erroris densissimam, ô caliginem hominum cæatricem, qua vita obducta est in medio posita, atque in celebritate hominum, vt malè olim & præposterè lucem Latini hanc vitam appellauerint. Deus optimus, maximus, genus humanum ad imaginem suam factum, seruatum quondam volens, vicemque eius dolens & miserans, vt in tenebris insipientiæ dire & infaniæ, ad interuersionem præcipitantis populatim atque conferetim: filium vnicum, æqualem sibi æui æternitate, cæteraque omnia parem, humanitatis plenæ velamento circumdatū, ad homines ipsos cum mandatis liberis liberoque imperio legauit: tanquam Mercurium quendam futurum, interpretemque commercii cælestis & sempiterni. Is nasum sapientiæ veræ ac diuinæ, mirabilè atque memorabilè nobis cōdidit, aduersus prudentiam cōmunē, sapientiâque hominū quamlibet præditorū natura præstati & eximia. eius porrò aduentu & disciplina factum est, vt Hellenismi philosophia, quæ emunctissimæ naris antea atque sagacissimæ esse sibi omnibusque videbatur, fastigiumque humanæ mentis Deo propè equiparasse, mucosissimam adhuc esse ipsa se fateretur. Hoc nihil vnquam maius atque admirabilius, aut fecisse Deum aut facturum esse, humana intelligentia cōcipere aut comminisci potest. Huius miraculi commentationem animo aliquando philosophico, cuiusmodique beneficii diuini memoriam, cuius etiam homini sæpissime excidere, qui quidē per imperitiam rerum, rusticitatēque plebeiam, non impediatur rem ipsam animo versare & perpendere, sceleris instar est profectò ingentisque piaculi. At quotus quisque nostrum, in tanta studiorum va-

rietate, vel ad literarum cognitionem, vel ad quærendi possidendique auiditatem, vel ad ambitum incumbentium, vel ad sensuum de linimenta pertinentium, ad succisivas saltem horasne dicam, an horarum quædam momenta, raptim ac defunctoriè succisa? in iis æstimandis & considerandis bona fide occupatus est? cum interim totus sit, non in legitimis modò seriisque cogitationibus: sed sæpe nugatoriis, & nihil ad summam institutæ vitæ pertinentibus? O diram animorum torpedinem spem prorogandæ vitæ: quæ nos à commutatione harumce rerum & similium auocat. digna certè ipsa quam propter veratrum (vt dicitur) album sumptitari debeat: quippe cum mens humana tum maximè ab insania liberanda sit, quam atram bilem Græci vocant, cum rationis certamen sensuumque committitur, aduersariorum acrium & pugnacium: id quod euenit quoties philosophia copias suas instruit aduersus dictata & præcepta ciuicis prudentiæ, sensusque theatri. Cæterum Christum suum charissimum Deus ideò ad orbem terrarum descendere è cælo voluerat, vt homines veritatis inuestigandæ mirabili studio præditi, iidemque luculenta erratione ac deuia indagatione aliorum abducti, in viam tandem redirent ad veritatem ipsam ferentem, indeque in cælum spectantem, rectaque pertinentem. Eius igitur aduentu & magisterio factum est, vt enunciata diuina, oraculorumque proloquia, ac vatum sanctissimorum prædicta, cælitus olim edita, longo intervallo homines primùm pauci intelligerent, futuri paulò post populi præceptores. dispulsam enim oportuit crassam rerum diuinarum ignorationis nebulam, quam orbi terrarum offuderant stygii Protei præstigiæ, qui circulatoria ludificatione præstringens oculos mortalium, eos in terram conuerterat, ne sursum aspicientes, trans cælum perspicerent. Quam in pestem incurrens prisca philosophia, ea sibi tandem munia arrogare ausa est (vt est insolentia) quæ diuinæ sunt potestatis atque efficientiæ: in veritate interim persequenda & vestiganda toto ipsa cælo aberrans, vt est in prouerbio. Proinde cum manifestum sit nobis, quòd sapientiæ humanæ orbitæ, commentationisque philosophicæ vestigia, in ambages quondam ferebant, procùlque nunc abducunt studiosos sui, atque auertunt à cælestis disciplinæ methodo, cuius Christus seruator mortalium, auctor & præmonstrator fuit: aliam nobis viam ineundum est, ducem etiam sequendum orthodoxiam, cuius vtique doctrina tanquam amussi vtendum est ad dirigendas orbitas curriculi philosophici. id quod viri olim permulti doctissimi cum Latini, tum verò Græci fecerunt.

Et quidem absque doctrinæ diuinæ lumine, sine oracularium monumentorum adminiculis, gratiæque inde manante paracletica, nihil est opis in sese mortali prudentiæ, duntaxat ad semetipsam in cælum erigendam, ad viamque capeSSendâ ad summum bonum ferentem, qui scopus est philosophiæ: quippe ad aterna contemplanda suapte vi caliganti & hallucinatrici. cum etiam alioqui rationis (vt ita dicam) frēnos, humanitatis efferatæ petulantia, virtutis-que lupata duriuscula, nequaquam prius æquo animo libentique acceptura sit, quàm diuini numinis reuerētia, spēsque sempiternæ beatitudinis, intrò ipsa inferuerit. Ad summam si adurgere nosmet ipsos ratiocinādo institerimus, necesse est, vt opinor, ista reciprocari, Si doctrina seruatoris euangelii, auctor est & magistra veræ & infonsis ac perpetuæ sapientiæ (quod nemo tam perditæ mentis est, quin protinus ponenti assentiatur) germanam vtique stultitiam faciteri oportebit disciplinam hanc esse temporariam & secularem, communi sensu gentium oriundam, quæ ciuilis est vrbanaque prudentia, quatenus quidem certè diuinæ opposita est per lineam (vt aiunt) dimetientem. Et si partes omnes veritatis habet illa (id quod in prouerbiū receptum est ratæ fidei apud omnes, quodque instar habet axiomatis) nimirū hæc omneis habet numeros falsitatis. Age, si illa sacrarium est ipsius veritatis (quod in confesso est vbique gentium Christianismi retinentium) in hac vtique continuò fatendum est, vanitatis esse diuersorium. Denique si illa salutaris est, ac summa veneratione digna (id enim nemo inficias it) hæc continuò exitialis videbitur, & planè detestanda, si quidem hanc tute institeris cum illa contendere. Iam verò si ne præsentia quidem perspicuè cernit animus, nec futura præfagit cōmodè satis & tempestiuè: vt qui tenebris obrutus sit stolidarum opinionum: certè ad doctrinam illam numine afflatam & consecratam adeundum est, vt ad lumen certissimum atque saluberrimum. Verū ō mores inconsultos & præposteros: cum ipsa sapientiæ monumenta in manibus habeamus: cum in precationibus atque ceremoniis quotidie recitētur, quas maiorum placitis & exemplis frequentari ab omnibus institutū est: denique cum veritas ipsa auribus nostris identidem vltro semetipsam inculcet: quotus quisque nostrum inde abiens, eorum quæ audiuit, ad vespertinum vsque meminit? meminit dico? immò verò quis satis attentè auscultat, interim dum veritas ipsa atque sapientia, quasi cum populo, cum patriciis, cum omni ordine agit, præceptaque sua è suggestu monitaque ingeminat? Quis verò animo adest presenti &

contento? Quod nisi res alias interim aliásque ageremus, inter cæ-
lites ipsos vtique versari tantisper videremur, dum verba sacrosan-
cta leguntur & palàm pronunciantur: dum tanquam oracula indu-
bitata funduntur: partim ore Dei prolata, eiusdémque hominis: partim
ab entheis vatibus multis antè sæculis tum mirè prænunciata, tum
cōgruētissimè iis quæ ab ipso gesta sunt inter homines & exanclata.
Videlicet hoc illud est sermone diuino significatum: aures plerique
non habemus audiendæ sapientiæ, veritatique exaudiendæ. At o-
racula cælestia numen suum non perferunt, cū in aures insinuant
tantis sacramentis quolibet modo inauguratas, & more translatitio.
Nam nisi torpentem cælestibus promissis & interminationibus
auditum haberemus (& præmiis enim & pœnis lex diuina sancta est)
ecquis tam perditus est animi, ecquis socordiæ tā deploratæ, quin pa-
tore interim tremoréque perfunderetur? Nunc cū Christo quoti-
die auscultare inter sacra soleamus, præmia ac supplicia, tāta in vtran-
que partem, eadémque sempiterna pronuncianti: inde nihilo secius
abimus tum hilares, tum vultuosi, prout res nobis natæ sunt, studiis
nostris atque desideriis aut aduersæ aut secundæ: futuri interim ipsi
æui & perpetui, & cæli iuxta tartarique securi, aut securorum simil-
limi, præ stupore mentium. Hic facere nequiui cū minimè id af-
fectarem, quin paulum digrederer ab instituto cursu. veritus sum e-
nim præuicationis crimen, si id silentio prætermitterem, quod in-
currebat in stilum: etsi rursus vereri subiit, ne vlcus tetigisse incon-
sultè viderer. Quare vt alternantibus sententiis aliquando defun-
gerer, hætenus periclitari statui, vt specillo magis quàm vngue vlcus
attrectare auderem. nam scalpellum adigere tam luculento parentis
communis abscessui, nequaquam filii esse duxi, qui infirmitatem
manus suæ atque imperitiam nosset. at fomentum admouere non
sustinui, ne aut frigidum iudicaretur à lectoribus, aut fortasse præ-
calidum, quod non minoris esset culpæ. Verum enimvero cū ad
vitam agendam duas vias diremerit atque insigniuerit doctrina e-
uangelica: salutis alteram & immortalitatis beatissimæ: alteram in-
ternecionis aternæ, ac spei proiectissimæ: earum in dies discrimen
magis ac magis fugit, cū tamē luculenta sit orbita intermedia: ac
tantum inter se distent, quantum fines & extrema bonorum & ma-
lorum. Plerique autem mortales non intra viam à Seruatore sectā,
ab eiusque discipulis atque eorum sequacibus complanatam, sed in
spatio conterminino vel potius controuerso, viam facimus: securi quò
pes ferat, vt suprà iam dictum est. Eorum autem minimè nunc me-

minero, qui per orbitas transfuersim exultâtes, horsum illorſumque, quâ fas, quâ nefas expatiâtur, ſoluti metu legis diuinæ & immortalis: Cuius ſanctio quâlibet prolixè cōcepta aut minaciter, nihil tamen in præſens ſpondet atque interminatur. Cæterum non pauci ſunt, quâtum coniiicere licet, qui libertatis diſſolutæ placita comprobantes, nunc in hanc, nunc in illam cauſam Academicorū more tranſeunt: nullius addicti iurare in verba magiſtri. Quod inſtitutum vitæ nuper cœpit longè luculentius quàm pridem, impudentiùſque inualeſcere, nouarum opinionum occaſione, quæ magna ex parte cupidius exceptæ vt feſtiuæ, quàm intelligentius, vt ab imperita multitudine, fraudem capitalem creauerūt corporibus atque animis multorum mortalium. nempe quaſi præconium gratiæ euangelicæ, quæ legis ſeruitutem diſciplinamque obnoxiam excepit: non ad pileum mortales inſontis vitæ & abſtinentis, ſed ad licetiâ quandam vocari Saturnalium & Floralium. iuſtitium etiam planè indixerit antiquatis legibus ac moribus, quotlibet ætatum conſenſu probatis & receptis, & verò ætatum ſanctiſſimarum atque doctiſſimarum. Hæc manus primùm tenuis & obſcura, ſenſim duces habere cœpit & ſigniferos armis inſtructos doctrinæ & facundiæ. Sed vt eſt temeritas multitudinis, quadrato penè agmine vel incondito potius, partes facere longè gentium auſa eſt, nonnunquam inter ſe diſſentienteis. erumpunt autem in dies in alias atque alias rerum nouarum molitiones: quaſdâmque fœdiſſimas & ſcleratiſſimas: nō iisdem tamen auctoriſus indignitatum, vt ex ſcriptionibus apparet, nec iisdem voluntatibus. etſi inceptorum huiuſmodi amentiaque multorum inuidia, in eos inflammata eſt populari præiudicio, quorum nomina inclaruerunt in prouinciis quibuſdam, ob ſuſceptum primò facinus aut ſubſcriptum: quod per ora hominum agitatum eſt variis rumoribus. Verum id permagni & præcipuè refert, quid dextro, quid ſiniſtro numine ſuſceptū ſit ab vnoquoque hominū, in auſis huiſcemodi: quod dies (vt opinor) nō lōga declarabit. Peruellē autē vt ad res huiuſcemodi cōmētandas ſi factū oportuit, & cordi fuit prouidentia, doctiſſimi tātum vtrinque, atque etiam exiſtimatiſſimi accingerentur, nō etiam audaciſſimi. Eò autē res euasit partim horum confidentia, partim illorum culpa: ſummus vt apex auctoriſus, honores propè diuinos adeptus dicam, an meritus? eorum nomine ſacerdotum, quos ſibi quondam Chriſtus cæleſtis pontifex legauerat adhuc inter mortales agens, ſanè malè nunc audiat ad vulgus & incommodè, ne quid amplius dicam, & verò in ordinem propemodum

redactus sit sermone permultorum, & licentia temporum. Inuidia porro vt multis olim ætatibus in vniuersum, sic nostra flagrare cœpit vehementius sacer ordo mortalium, quem profanis ordinibus aiunt oportuisse ex instituto Seruatoris præmonstratorem viæ salubris esse, atque è loco superiore designatorem: id quod inter homines satis conuenit: de eoque demum controuersia est inter eos ac reliquos omneis ordines, quòd præitores quoque eosdem esse necesse fuit, exemplisque prælucere, nisi ordinis maiestatem imminuere existimari non nollent, aliisque penè contemnendam præcipua ex parte præbere. Etenim si sodales illi dominici, reliquique Christi discipuli, quique ab vtrisque eorum sanctissimam & germanam acceperunt disciplinam vitæ, vicissimque eam posteris tradiderunt per incorrupta sæcula, successoribus in locum suum suffectis, pietatis æmulationem tantâ vitæque sanctitatis reliquissent, quanta exēpla, quàmque solida earundem virtutum reliquerant: haud dubiè (inquiunt) ambitio & cupiditas summotæ procul essent ab aris sacrosanctis, ab earumque ministris: quæ res duæ maximè à regno Christi dissident. Deus in filio suo Iesu Christo, quem pontificem mundo summi dedit sacramenti, hominibusque salutaris, cælestis etiam philosophiæ conditorem & interpretem, exemplum nouum ac mirabile statuerat, crucis suscipiendæ vnicuique mortalium, qui ipsum sequi cuperent vt pontificem, vt ducem delectæ à patrefamilia, beatissimæ illi hæreditati æternæque destinatæ. Id exemplū præceptumque, quos maximè venerari, imitari, exequique decebat & oportebat, quibus diuus ille sodalitatis delectæ coryphæus, & collega ipsius, iure successorio in manus tradiderant lampades magisterii, eos iam diu ipsos copiosos imprimis factos, & quod longè discrepantius est. Sed præstat (vt opinor) vlcus altius non explorare, ne immemor esse contestationis videar à me factæ: atque hæc si diuis placet (inquiunt) auspiciis Christi Seruatoris nostri fiunt, eiusque asseclarum sub infulis & velamentis pietatis atque innocentia. Id verò quàm incongruè eorum professione, quàm absone euangelicæ simplicitati, quàm versa vice religionis priscae, quàm sursum denique deorsumque (vt apud Græcos dicitur) in mores receptum sit, nullus non intelligit, & omnes vociferantur. Nam qui Domini nostri quasi sub iugo traducti & furciferi (hoc enim Christus Dei filius deusque, seruandi nostri ergo & esse & videri sustinuit) tesseræ & insignibus, sese sacrosanctos esse meritò contenderent & venerandos, eos conueniebat ipsos, quo similiores Domini essent aut

certè viderentur, parcius de genio suo cautiùsque mereri. nisi verò censemus. Sed rursus hîc necesse non habeo multorum sermone commemorando, litem meam facere ex aliena controuersia, quasi in causam subscripserim, quæ parum mihi cordi est, quàmque maiorem esse non inficior cognitione mea. En quò mores (aiunt illi) deflexere ab illa disciplina heroicorum temporum, nobis quidem illa commemoranda semper & prædicanda: sed tamen vltimum à nobis, ab auisq; nostris tritauiusque salutata, ac nunquam reditura. aut post insignem quandam certè reditura tabernaculi Domini conuersionem, vasq; eius in officina priscae seueritatis bona fide interpolata, magnopere vt mirari homines non debeant antiquas dissensiones in præsidis nominis Christiani nuper recruduisse: quæ vtinam dissentiones tantum ipsæ non etiam discessiones sanctæ ciuitatis fuissent, & tanquam abscessus quidam fœdi in corpore spēs sæ Domini. Opprimi autem aut sedari vt olim, sic hoc tempore, potuerunt, non magis exercendis legibus, pœnarumque atrocitate quàm vitæ & exemplorum æmula seueritate. At nunc eò deformitatis licentia erupit in nauicularia Christi summi exercitoris: vectores vt hortamenta floccifaciant in puppi circaque sedentium: quandò ij qui ad gubernacula summa admoti sunt, quique propius inde absunt, obdormiscere somnum visi sunt socordiae, diurnum iuxta atque nocturnum, nec minus nubilo quàm sereno. id quod ipsis omnino contigisse oportet obreptione funesti Mercurii, aurea (vt est apud Homerum) virga homines improuidos exitialiter confopientis. Pars etiam vectorum non contemnenda; delicias grauati magistrorum nauarchique supinè iacentium (vt quidem speciosè satis isti plausibilitèrque, si minus verè, vociferantur) in nauigia se coniecerunt alia atque alia, derelicta & contempta summorum auspiciorum naui, sibi met ipsi velificantes. Quasi verò Iesus vnus ipse nauclerus (si ad verum loqui velimus) prætoriam nauem egressus, per mare iam medium huc illucque perambulet, quocunque inuocetur gentium subinde se conferens cum sua nauicula. Haud ita pridem homines quosdam ingeniosos, elegantiorèmq; in modum eruditos, pudere cœpit (vt videtur) *interdus* aut esse aut videri. qui quanquam consilii sui causas, sanè quàm speciosas, in medium attulerunt (quarum illis copiam, hominum literas bonas linguasque ignorantium improbitas largita est: quippe iure atque iniuria quædam inueterata tueri, eadèmq; ridicula, auctoritate sola, famæque elogio obstinantium: id quod nullis fidiculis

exprimi potest ab intelligentibus) quāquam igitur illi vt scita acroamata, plausu primū multorum excepti sunt, tamen obliuisci non debemus, parentem illam nostram, tum innumerabili, tum beatissima prole fœcundam, eoque nomine sponso suo dilectam & commendatam, salutarem methodum, non ipsam à semetipsa, non ab humano magisterio, sed diuinitus edoctā esse. Verū *ἢ εἰ ἀρχὴ καὶ τέλος* fortasse videbimur: cū vtrique apud sese parentis esse domicilium certum contendant, & alteri apud alteros simulachrū esse tantū sponsæ dominicę pari fiducia dictitent, nō item pari equitatis specie: & quidem vtrinque non studio partium fortasse minus, quā charitate certatur reponendę in artus suos disciplinę prolapsę. Est etiam vnus in partibus id incommodum, quod homines quidam existimatione freti longo vsu quęsita, titulōque inani, magis quā solido iure parta: omnia Dei ac pietatis Christianę causā facere se aut simulant, aut parum potius perhibentes persuasibiliter, ius oraculorum interpretandi solis sibi vendicant. cū interim alteri magnę mæris sacra, putidis verbis eleuent: ceremonias, annis melioribus consecratas rideant: ritus etiam vetustissimos: ordinū discrimen obterāt ac despuant: hymnodias lerodias esse censeant: psalmodias pro rhapsodiis habeant, vt quidē est opinio multitudinis occupatę incōsulto pręiudicio, in vtrisque partibus. His porrō qui auscultare cupidius institerunt, plurimi quidem certē, eorūque imperitissimi, atque ideō deterrimi, nec doctorum hominum sententię sensūque intelligentes, primū suis legibus viuere, deinde nullis cœperunt: quę duo non magnopere differunt. Deo certē nunc vota, vt si vnquam aliās faciendā sunt, si rempublicam in meliorem statum saniorēque verterit. nam quid futurum esse dicas, cū spretis centuriis prerogatiuis, primarūque classium, cēturię fabrū, sutorum, cerdonūque in suffragia cōcant de constituenda orthodoxia, apud nos quidem certē, cū eō licentię ventum esse videas, Theologi vt passim agminatimque prodeant è schola Lucretiana & Epicureorum? Tam dira autem fuit quorundam illiteratorum sceleratis in opinionibus pertinacia, vt velut pyraustę vltro ignem appetere non dubitauerint, nimirum dira vanitate elati & perciti, in numerum vt diuorum referrentur à suis factiosis: nec in eo falsi sunt post fatum detestandum. Ita in dies inualescens errorū proluuius indignis auditoribus & sæpe obscurissimis, veluti diluuium quoddam est prisce religionis, omneis ferē partes inundans Christiani nominis, discrimēque paulatim obruens pietatis atque impietatis. Qui igitur

diluuii huiuscemodi periculum metuunt, in arcam vt tandem redeat
 necesse est: siquidem eius compages eorum opinione dissoluta, ritè
 recon:innata fuerit. Atqui ciuitatis Dei & Ecclesię, quam Christus
 appellatione benigna sponsę suę, quasi pactę diuinitus, dignatus est:
 sic constituta mihi videtur esse societas, idẽmque sentiendi necessi-
 tas: vt singuli paucique facillè desipere, atque à regula aberrare sa-
 lutari non nequeant: vniuersi vt non viam tenere premonstratam
 à Domino, atque in commune sapere non possint, quasque confi-
 pere. Quod tamen ita demum intelligendum dico, si illi quidem
 è conuentu paracletico, à gregẽque dominico, superbè subducere
 semetipsos aut abripere obstinauerint: eorum taurorum non absi-
 miles, quos Aristoteles ἀμαγελῆντας vocat, quasi sui abgregatores,
 in ordinẽmque armenti sese cogere indignantes: hi autem indi-
 ctis rectè atque ordine conuentibus sacrosantis, tum charitate Chri-
 sti in publicum æmulante (quod quasi condimentum est eorũ quæ
 concilia vocantur) in vnum conspirare, atque in numinis diuini sen-
 tentiam transire parati sint. In huiusmodi autem casibus, ac rebus
 propè perditis aut turbulentissimis, illustres ætates Christianismi,
 solenne id remedium instituerunt, quod iandiu ac nequicquam fla-
 gitare se illi vociferantur. Verũ (vt est Aij loquentis proteruitas)
 rei longè saluberrimæ, quondamque vsitatæ sæculis melioribus, ap-
 pellationem tantũ inanem, quasque reliquias quasdam ac cine-
 res emortui instituti præclarissimi, ad nostram memoriam asserua-
 tas esse, plurimi nunc cauillantur. colorem enim iandiu quæsitum
 esse indicti senatus sacrosancti in ædem concordix ac pacis euan-
 gelicæ: speciẽmque consultorum ac ludibria religionis. senatus ve-
 rò ipsa consulta nec succum nec sanguinem pietatis illius heroicæ
 nec spiritum habere, nec verò charitatem præ se ferre probam, stre-
 nuam, æmulatione flagrantem constituendi Christianismi, eiusque
 maiestatis. Zelum scriptura Gręca voce appellat, quo significari
 antiquitas voluit feruorem animi commoti vice publica, stimu-
 lũque mentis in communem causam æmulæ. Multa huiusce-
 modi aliæque non meliora, quę commemoranda non duxi, ex ho-
 minum sermone collecta, ad inuidiam inflammandam non parum
 valuerunt, fatali quadam inclinatione rerum. quam rerum nouã-
 darum materiam, oblatam potius quàm quæsitam (nisi fallor, vt
 sunt rerum humanarum conuersiones) nacti homines primũ
 pauci cum minimè meticulosi, tum acumine præstantissimi, mul-
 ta quidem illi arguta atque etiam scita, vendibiliter: nonnulla

sanè commoda illa quidem, sed non perinde commendabiliter: ceterum aut sensim aut repenti plures facti, incommodè quædam exemplòque non probabili, in scenam protulerunt, multitudine circumfusam nouarum rerum cupida, ad licentiàmque propensa, religione vacuam. paulatimque quorundam confidentia id tentatum est, vt patrum decreta antiquissima, scriptorum etiam auctoritas & monumenta, consensu tot ætatum rata & comprobata, pro nihilo ducerentur, vt iure subnixa translatitio. Neque verò sese aut quenquam liberi spiritus hominem teneri iam defendunt nebulunculi quidam illiterati, non modò responsis prudentum iuris diuini, secundum quæ iura primùm pontificia & canonica temperata sunt: quibus iuris dictio constat, olim ad normam & bona fide exacta: sed ne insignitis quidem atque nobilissimis, & maiorum (vt dicitur) gentium senatus consultis, iussisque eorum & interdictis, tametsi antè semper pro numinibus habitis. Ex quo euēnit, vt vulgus licentiæ effrenatæ, quasi equitium quoddam vinculis abruptis lasciuiens, legum sese metu solutum esse existimarit: legesque diuini cultus, arbitrato suo condere sibi suisque non dubitarit. Audiamus si vacat, paulisper Cyprianum, cum doctum & vetustum auctorem, tum sanctitate clarum, tum pietatis vadium monio capitali ad extremum probatum & consecratum. Qui de manibus (inquit) conciliorum gubernacula extorquent, ecclesiasticæ salutis nauem in scopulos illidunt. Quid autem indignius ac foedius in Christianis gentibus, & in ipsa ciuitate Dei esse potest, quàm leges antiquas populari licentia abrogari: vnūque quemque sibi vel populum vel tribum, vel ciuem perditissimum priuilegium ferre, trinundinòque promulgare? Quòd si ex euentu iudicium faciendum est, gratumne id Deo fuerit tanta populi atque ordinum consternatione res nouare, lucem etiam caligini publicæ longo interuallo referre: sit quidem hoc sanè per me, quod & permultis visum est, eorum quoque qui in partes non descenderunt. Sed & Phaëthon quondam sursum deorsum lucem circumferendo, quam in fraudem inciderit de cælo tactus. Verùm ohe, iam satis est, forsàn dicet aliquis: & memini quid superius testatus sim. tantum hoc addiderim, rem mea quidem sententia non sine numine quodam prouidentia cœptam & agitaram esse, qui euentus cunque rei futurus est ancipitis, quæ omnino diuinam manum poscit. Iam autem in articulo arcendi incendij aut summo, aut præcipiti, aut proxime quidem eum sumus, in quo cessandi locus nullus

est, ne Vcalegontibus quidem: nisi veterno magis quàm somno oppressi sumus, quod ominari nolim. Nam quis tam hebes est, vt non videat incendii iam gliscentis, ac nisi obuiam eatur, longè latèque populaturi, quâ pios, quâ impios, præpetes aues (vt est in prouerbio) & prænuncios esse, cultus diuini opiniones idètidem euariantes pro libidine cuiusque etiam indoctissimi (quod inuidiam sanè inflāmat incepti facinoris) aliàs futuri fortasse controuerſi apud homines ingenio doctrināque præditos? Scilicet hoc illud est ore veritatis ipsius pronunciatum. Ita fert humanarum rerum conditio, mundi que præpostera ac turbulenta ratio, reliquiæ vtique noxiæ primordialis: vita vt carere nequeat huiusmodi euentis, pericula creantibus multitudinis animis: Scandala à scriptura vocantur: negotia sæpe facessentia hominibus quoque circumspectis, rerumque existimatoribus non quibuscumque. Necesse est enim vt eueniāt offensæ, causæque offensionum. At verò id oraculum væ particula consequitur è vestigio, quæ omnibus formidolosa debet esse, atque etiam horrenda. Væ (inquit Dominus) illis vnde offensiones exoriuntur. Animaduertant igitur etiā etiāque ii ad quos res pertinere potest. Nam quis mortalium hodierno tempore nosse satis videtur & agnoscere, quid sui sit muneris & officii in familia Domini? Verùm quod ad rem nuper designatam attinet, quis eorum qui rebus nouis cœptandis mūdum circumegerunt, discrimen peruidere potuit fiduciæ atque cōfidentiæ? Quis cū innumeram hominum multitudinem tanta religione alligauerit, solutum habere animum potest? qui quidem certè mentem torpentem non habeat ad religionis pulsus identidem incessentes animis, in re tam præcipiti suscipienda, tandiūque perferēda? Ecquisnam verò tenebrarum lucisque confinia sic certò tenet, vt disceptator harumce rerum sedere sine pauore atque horrore queat, in iudiciōque lubrico & abrupto? Quod vtinam eorum qui cardines tanti cœpti hæctenus versauerunt, quod multi commoliri certatim conati sunt, non aliquando ea mens fuerit, vt oculis auribusque seruirent populi ac procerum, ad res huiuscemodi excipiendas paulo appositiorum: nec verò decus ipsi quoddam opimum sperauerint, et affectarint, existimatione primū tentanda & obtrectāda ordinis cōsecrati, clauōq; regēdo Christianismi præfecti: deinde succedēte supra vōtū (vt opinor) conatu, prosternēda etiam & affligēda tot ætatū taliūque prudentia: tū autē eleuanda & cauillanda senatusconsultorum veterū auctoritate, pro numine quodam paracletico semper habita. cuius senatus patres cōscriptos cœlitū numerum

diuorūque auxisse, veri est simillimum, tum ob vitæ castimoniā, tum ob doctrinæ sanctimoniam. Omittō probrosē vexatos, ac per ora multitudinis traductos, coryphæos ordinis sacricolarum, scriptis contumeliosissimis. Mitto nomen orthodoxiæ, multorum stilis confossum, & maledictis penē contrucidatum. Hæc autem sine luculento atque insigni vulnere ac dedecore Christianismi, fieri nō potuerunt, ac sine conspicuo intertrimento rerum diuinarum fidei, disciplinæque euangelicæ. Cuius rei non iam argumentum est, sed certissimum documentum, flagitiosa vita plurimorum, eius dogmatis in summam assertorum. Cuius nominis tegmento, quasi que patrocínio, licere sibi putāt homines perditī & scelerati, quicquid collibuerit, non quicquid auctores sunt homines docti: vnde ius nihilominus impunitatis & licentiæ sumunt, hominum opinione intaxat, qui inuidiosi dogmatis præiudicio ducuntur, quæ multo maxima pars est. Qua in re existimanda, etsi æquis vtuntur apud nostros homines auctores ipsi architectique dogmatis, viris doctis atque grauib. non paucissimis: culpam tamē deprecari inuidiāque non possunt, ne iis quidem quæ ingeniosē ab ipsis & commodē disputata sunt. Fuit olim & sæculis iam multis solenne doctæ aut ingeniosæ dicacitati, in officinam sacerdotum declamitare, vt canonicæ disciplinæ cauponatricem, vt vtar verbo prisco: in ordinem verò sacris dedicatum, eoque nomine sacrosanctum inuehi, tanquā in foro cupiditatis magis, quā in atrio Domini negotiantem: nundinantem vnā cum pontificatibus atque antistitiis vacationes atque immunitates sacrarum functionum, veniāsque inertie. nam & eius ordinis mancipēs, institorēsque tonstrinæ maiorum ac minorum auspiciōrum, reprehendere videtur Apostolus in Epistola posteriore ad Corinthios, vt verbo eius vtar, τὸν λόγον τῆς θεῆς καπιλεύοντες. At verò præsidium castrorum Christi, exercituū Domini, ex arcibus regni eius cum præfectis ipsis eiecisse, præfecturāsque ipsas vnō verbo abrogauisse, exempli est absurdi, à taxiarchiæque dignitate ac decore vehementer abhorrentis & alieni: sine qua mundus in ἀκοσμίαν vertens, nomen suum obtinere iam non potest. Neque verò minus est illud vitæ dedecus (vt nihil de impietate dicam) quodd sacros profanosque homines eodem habent numero locoque: & rerum hominūque discrimina in lapide (quod dicitur) albo, alba amussi notant. Næ id est, vt alia omittam, non modò ad viuū (vt est in prouerbio) scalprum: sed etiam vltra omnis penē memorię scamata, stilum adigere confidentiæ. Quod si ij qui cœli luminaria

d. iiij.

stellasque cum detrahare non possent, nec extinguere, obscurauisse quodam modo eadem existimati sunt, non sine luculentis indiciis & argumentis: taménne Euangelii lumen retulisse vitæ tanto intervallo dicentur eandem ipsam ob causam, ingenia huius ætatis? Id enim secundarum partium telæ, tertiarumque textores, memoriæ prodere non veriti sunt. Horum autem in sententiam si publica transire prudentia passim institueret, quid causæ iam esset in posterum quo minus nihil tam consultum, agitaturn, disceptaturn esset, nihil sic semel definitum ac constitutum, quin denuo mox & ab integro reuocari in disceptationem, ad populique disquisitionem posset, simul ut cuilibet audaciori controuersum id facere visum esset? ita Christianismi cardines, non senatusconsultis auspiciato coacti, locisque constitutis, atque augurio cœlesti consecratis, ut moris est antiquissimi: sed ex opinione cuiusque verterentur, rerum compositarum retractatoris, temeraria manu factiosaque conflata. Sed enim non is sum ego: non ea res est, cuius rei litem meam facere consultò & meditatò instituerim: etiamsi non inuitus feci, testaturn ut relinquerem, quantum vicem publicam dolerem Christiani nominis: simul hominum ipsorum sanè doctorum & memorabilium alioqui, mea quidem sententia, & permultorum iudicio doctrinæque præstantium: tum autem literarum bonarum malè & incommodè ea de re audientium. Quid verò rursus, quid (inquam) si (ut sunt consilia prouidentix tam admirabilia, quàm mortalibus occulta) hoc motu, hac rerum nouarum molitione Deus optimus ac maximus parturit constitutionem Christianismi, reconcinnationemque antiquæ disciplinæ? Quid si maiestatem euangelii, fideique verbi læsam & imminutam ultum ire statuit: extinctamque charitatem aut perfrictione exanimatam? Denique, quid si non aliam censuræ fata salubris inuenere viam: tantique æterna pararit regna Deus Christo? Loquar enim hîc quoque per parodiam, quando mihi obuiam non importunè occurrit. magno certè & hominum & animarum numero adhuc constitit hoc argumentum, steritque non sine plausu aliquantisper ab omni parte theatri: nunc autem admurmuratione aduersa, maxima quidem ex parte, ob scelera factionum. Ad quorum autem actum eius peruenerimus, quis ausit aut possit affirmare? sperandum tamén à catastrophe proximè rem abesse: quæ utinam palinodix plus habeat, quàm tragœdiæ. quam in partem profectò necesse est animos ut inclinent ij, qui in scenam proferre primùm argumentum ipsum instituerunt,

si plausoris egent aulæa manentis, & vsque fessuri donec præco, vos
plaudite, dicat. Excitandus autem publicè priuatimque Iesus est, vt
ventis huiuscemodi tempestates cientibus, marique imperitet, incre-
pitis & cohibitis, sicque tràquillitas redeat. Peruelim autè, in naui
tantum vt ipse sua Christus somniculosè obdormierit, non etiam
sopore vehemèti obliuionis nostri captus sit: & (quod ominari no-
lim) fides semianimis in vniuersum & veternosa expergisci sine in-
signi noxa nequeat. Sed cum res ferè nulla (vt credimus) tã plenum
ius postliminii, tamque iustū habeat, quàm venia diuina, (id enim
subsidiū humanitati identidem aberranti Seruator ipse dedit) orāda
nobis erit exposcendāque pax superūm, nunquam non exorabilis
suppliciter pœnam imminentem deprecantibus. Quod mox for-
tasse futurum est, si ex vtrisque statiuis homines strenuissimi, paca-
tisque consiliis affines, in suffragium mittantur ad dirimendas fini-
ndāsque semel controuersias. Verum enimvero vt ad philosophiā
redeamus à nobis institutam, quam ego philotheoriam facile
appellauerim, homini qui ad id studium se comparauit, omneisque
suas facultates ingenii contulit, id omni ope faciendum esse censeo,
quod infrā dicturus sum. Nam cum vita philotheori militia quæ-
dam sit intestina, angustiis impeditis interdum, trepidisque consiliis
obnoxia: præsidia ipsum multa insignium oraculorum, elogiorū-
que diuinorum subsidia, simul virtutum exemplarium auxilia ha-
bere conquisita oportet, memoriæque mandata. Ex iis autem a-
ciem quandam instruere firmam & explicatam, quæ semper sit in
procinctu & parata aduersus impetus cupiditatis, ambitionis, & vo-
luptatis, identidem animo incessentiū, aduersus præstigias demonis,
oculis incurrentes hominum: aduersus theatrum vitæ civilis, vrba-
næque frequentia, illecebris permultis iisdemque validis infestum:
tum aduersus rerum aduersarū fortunæque acerbicatem: nec minus
aduersus hominum iniquitatem, maleuolentiam, atque maleficia,
fodicantia sæpenūmero patientiam, animūque vrentia: & verò ni-
hilo secius aduersus secundarū petulantia, quæ mea quidē sententia,
maiorē animaduersionē exigunt, atque vigilantiam. Hæc enim sunt
arma, hæc tela, hæc machinæ Stygii grassatoris in dolo tergemini: qui-
bus haud temerè euenit ipsis, vt paria sint aut philosophiæ placita,
aut rationis monita, quauis cōsultæ, meditatę & cōfirmatę: aut pru-
dētia humanæ cōsilia, quālibet cordatæ, atque exercitatione cōdoce
factæ. Contra quæ tela, sanè infesta & vulnifica, & necopinatò feri-
entia, eoque altius sauciātia, oculos etiā plerūque splendore inani vi-

treoque præstringentia: prisca rerum diuinarum prudentia propugnaculū positum semper habuit, & præsidium tutum in fide & spōsione Christianismi. Quo mirū est magis, & simul sanè dirum, quòd rerum diuinitus promissarum ætate hac nostra fides, emortuæ similis est. Quæ utinam ipsa singulis in nobis tantū sit intermortua. nam emori fides vniuersim non potest, quæ à spiritu diuino in Ecclesia semel animata est. Certè præ ut est insana cupiditas bonorum possessionis temporariæ, aut nulla, aut exilis est euanidæque fiducia in plerisque mortalibus æternorum bonorum. alterutra enim earum alteri concedat necesse est, cū vnà omnino eodem in homine satis esse nequeant, si quidem Pythagoræ cælesti auscultare velimus & fidem accommodare. Quocirca qui quærēdis & persequendis vtrisque bonis studere instituerunt pari animi contentione, ludere ii operam suam vtroque inceptant, qui philotheoriā cum philotimia copulant, qui philochristi simul esse & philochrysi meditātur: ii si qui sunt, riualia studia inter se, absurdè atque irritò labore cōciliare conantur, genis rerum ipsarum repugnantibus. Si duobus dominis seruire simul idem non potest, quod elogio veritatis testificanti non dubiè credendum est: quo tandem modo regno simul & tyrannidi? Quomodo autem regnum Dei eodem in pectore, tyrannisque avaritiæ, ambitus, & voluptatis hærebit, cæterorūque affectuum in anima grassantium? statuit enim Plato in nono Reipublice, virum bonum & sapientem, intestinum intra sese regnum: malum & insipientem, tyrannidem eodem modo habere. à quo non absolum est, quod Seruator ipse euangelicè prodidit & mirificè, regnum Dei intus in hominibus esse, quod de sanctis viris intelligendum Origenes censuit in tractatu de principijs. Itaque qui auream illam vitam viuere concupierint, quales sunt theoricæ philosophiæ studiosi, ii argenteæ vitæ salutem semel ut dicant necesse est, idque fide optima. Sed deprauatus sensus hominum, magisteriòque sinistro communis prudentiæ imbutus, cū cupiditati agglutinator est atque avaritiæ, cū ambitum ut beneficum ac largitorē honorū, ut fortunatorem hominū cōsectari institit, intelligere iam inde & perspicere nequit, illā se ut rubi fascem aculeatū amplecti, strictimque retinere. hūc ut vtriculū distentū atque inaniem cōprehendere: in quæ suæ spei summam, thesaurūque cōiecit auētis supra modū animi, & cupiditate perdit. Atqui huiusmodi placita sapiētiae ius gentiū prodidit: quod ciuile mox excipiens, eadem ipsa excoluit: tum plebs populūque magno studio sciuit: senatus auctor est factus: equestris ordo pedibus,

equis, velis in eam sententiam transiit & incubuit. tempore autem suo ac prouidentiae placito, Seruator mundi extitit, qui generi humano ea tyrannide oppresso, nuncium plaudendum & laureatum attulit: legesque euangela promulgata, & simul abrogato principi mundi eiusque tyrannidi imperio, nouis verò tabulis edictis & prolatis, regnū Dei esse iussit & sanxit in posterū: legesque ipsi regno consentaneas, & instituta dedit. Iam verò sacramento nouo & inaudito, omnes regni indigenas, incolas, aduenasque adigi, atque in verba sua iurare instituit: fidem porro certissimam sibi dare, ab eoque vicissim accipere. Ab eo igitur cū sacrarium veritatis mundo relictum esse sciamus & praedicemus: cū aditum sapientiae antea clausum, figurarūque & ænigmatum densissima septum obscuritate, patefactum eodem tempore & illustratum esse norimus, fateamur, & dicitemus: adhuc tamen haeremus in luto antiquae sapientiae, pedesque lotos in fonte purifico, & expeditos, rursus contaminamus aquis spurcis, tricisque implicamus. Qui si è puteis scripturae haurire aggredieremur, ipsosque puteos altius commentando, altiusque fodere, quibus quidem certè nostrum id facere promptum est: ipsa quae nunc esse prudentia plebi, senatui, equitibusque videtur, illa (inquā) ipsa saeculi sapientia, non dubiè amentia & insania, nedum stultitia iudicaretur, summarūque rerum inscientia. Nunc quotusquisque vel peritorum atque literatorū, in manibusque monumenta sacrosancta assiduè habentium, ea etiam saepenumero è suggestu enarrantium, non suauius aquas illas turbidas & populares gustat, in cratere ciuili sapientiae residues ac stagnantes, si modò cyathos treis è siphunculis ambitus aut cupiditatis hauserit, quam viuam illam aquam libat, è philotheorix iugis scatentem atque salientibus? Proh dii iam immortales, quid est, si hac demetia, si amentia, si vae cordia non est? praestigiae sunt haec certè Stygii illius fidei nostrae attentatoris: qui dolis miris, diris, caecis, ductare suos nouit fortunaeque alumnos, quos epulis illis semel perinescauit, è medio atque etiam è transfenna petitis, in eorum necem intēta & concinnata: tum portione supradicta, mellita magis ipsa, & oblita subdole, quam suoapte sapore natiuoque suauis, tyrannidi sensuum, sibi que auctorauit. nisi verò suaue reuera esse potest, quod amarulentia curarum permolestarum permixtum est, angorūque perennium. Fidem igitur aut emortuam, aut exanimi proximam eorum esse oportet, qui in tam manifesto rerum discrimine, longè deteriora eligunt, in eisque studium omne suum, animique intentionem consumunt.

At quotam partem nostrum eximere huic culpæ, atque etiam diræ noxiæ hallucinationis possumus : si quidem ad limatum examen & iudicium expendere ista volumus? Hic mihi in mentem venit regis cuiusdā Ægypti, Psammetichus (vt opinor) is fuit, qui vt Athenæus quodam loco retulit, cū scrutari arenas Libyæ statuisset: iuuenes aliquot adipfia, quam vocant, exercuit, qui aridis in locis sine noxa possent carere potione, & sitim non sentire. Hunc in modum qui in solitudine philosophiæ sapientiam quærere & inuestigare statuerunt, eos nihil sitire præter nectaream illam aquam oportet, quæ operantibus in vinea dominica plærunque funditur diuinitus: ad cætera verò omnia eosdem adipfos esse, in omnium rerum inopia, fide, spe, & charitate se tolerare. In ea autem vinea regnum illud Dei esse traditum est à prudentibus, ac iuris diuini consultissimis: in quo regno nos oportet consopitam fidem Christianismū iacentemque excitare & erigere. Huius porrò duo extāt hodie monumenta & documenta integra atque incolumia, perpetuòque exstābunt, quippe cedrinis in tabulis incisa: quæ cū ipsæ cariem nullam sentiunt, tum Libani fragrantiam magnopere referunt, naribus quidem ad ea non hebetibus quæ mysticè odorata sunt: & verò ad vnguentum illud imprimis æstimatum à vera philosophia, in caput olim ac pedes Christi Seruatoris effusum. Illis porrò in ipsis tabulis ac monumentis actorum prouidentia, certa fides, explorata spes, gestiens expectatio liberalium emeritorum, atque congiarii beatorum à Christo pronuntiati, cæli & terræ & vniuersi potenti: iacent illæ quidem in præsentī ob stuporem hominum, sed tamen semianimes iacent, exuscitarique facili & publicè & priuatim poterunt, ab illo exuscitandi exanimatorum auctore, quanuis etiam & quādiuuis emortuorum. Redeat tantū animus mundi ad sese in vniuersum: sin minus, redeat saltem animus hominum, philosophiæ fide bona studentium. tum rerum caducarum ille naturam rationis rectæ ponderibus expendat, non etiam sensuū vanissimis lancibus, mendosissimòque examine. Tum demum autem id futurum est, cū Deus optimus & maximus, qui sese non pridem animaduersorem neglectæ religionis acrem & lynceum exhibuit, minacemque nunc patrum vt videtur, ostendit: emendatorem parentemque præstare iis statuerit, quos filius eius Iesus fratrum appellatione comissina dignatus est. At verò nunc in eo sumus ferè, prudentia vt communis suis magis copiis fidere, acquiescerèque in rebus præsentibus, quàm diuinis promissis, futurisque bonis confidere videamur.

tur. Qui diffidit autem Christo, superiorum, inferiorum, mediolorumque potēti, vnicōque Domino, fidelis ille esse, aut videri quī potest? & qui fidelis non est Domino, quē nihil latēre potest, ab eodem ipso miser quidnam sperare audeat? Huiusmodi igitur homini quonā tandem pacto cōstabit expectationis suæ summa? siquidem fidem habet ipse stabilē immortalitatis animæ. Verum monumenta iam dicta cōditi Christianismi, fideique (vt ita dicā) rerum diuinarū & immortalitatis iactæ in terrā nouatam, disciplināque salutari cultam, duo sunt testamenta Dei, vtrūque summæ auctoritatis, & verò dubitationem omnem eximentis attentē cōmentantibus, assensusque cunctationē. atq; his tanquā duobus adminiculis adiutus philosophicus animus, rerum interiturarum contemptione imbutus, admirationēque æternarum, erigere sese sublimem potest. Cælum etiam primū suspicere certūque, tum eò paulatim viam inire à Seruatore sectam primo, vnoque, paritēq; munitā. Hanc igitur materiam obiectā habet theoria cōmentatio, sanē quā copiosam & inexhaustā, dignissimūq; vnum hoc omnium studiorū, in quo veteris hominis exuta senectute philosophus, quasi adulescere denuò incipiat, maioribusq; longē pomæriis finem & extremū curarum, vigiliarum, laborūq; suorū circumscribere. siquidem oracularia scripta, intelligentia mirabili, recōditisque sensibus excaturiunt, cōmentantis animi sitim semper intendentibus, & simul suauitatem hauriendi liquidissimas imagines cælestium rerum & visendarū, quæ intellectu percipi tātūm possunt. tum restibili fœcunditate fœta cōmentatio, alios atque alios intellectus parit, omnesque veraces, & solidos, sublimēq; rapientes, & in his quidem ipsis (vt dicā quod animo concipio) tanquā veritatis sanctariis, Themidis illius cælestis (quod diximus alibi) quoddam est oraculum, quā consiliariam Græci sua voce cognominarunt, quasi præsidem, potentēq; consiliorum homini salutarium. Ad hoc igitur oraculum supplices ac venerabūdi, magnāq; adire cum religione debemus, atque animaduersione extatica, si studiosi sumus. Nam si hac vtemur antistite salutis & cōsultrice, si eius responsa & cōsilia memoria complectemur, sinūque feruido fouebimus: haud dubiè antidota hinc referemus aduersus illas escas, exitialibus illicitis oblitās animarum aucupis, voluptatē, ambitum, cupiditatem, rerū secundarum festiuitatem: suspectam semper ipsam viris olim prudentissimis, iurisque diuini peritissimis. Verum homini studioso, qui quidem salutis auspiciis philosophiæ scholam ineundā duxerit: Themide auctore intra luminosam porticum orthodoxiæ philosophandum,

rerum illam multarum, magnarū, mirabilium capacissimā, ac supra humanæ mentis fastigium sublimium: hancque porticū philosophiæ egredi non debet, ut quidem diutulè immoretur, is qui euthymiam, quam vocāt, indagare omnibus vestigiis, assequi que concupierit, ut pignus summi boni, cuius ipsius umbrā tantū fallacemque imaginem, prisca philosophia summopere admirata est. Hoc qui facere efficaciter, appositè, constanter, ac consultè institerit: nimirū ipse inter diuorum iam & mortalium conditionem, mediam quandam vitam sublimemque, quasi semideorum egerit, quippe qui ad summi boni fructum æternum spem suam erigere, ad cælum cælōrum intentionem cōtemplationemque possit: quæ merces est emeritorū Dei militum, & appetendi terminus, ut inquit Augustinus in libro de cognitione veræ vitæ. Huic porro securitatem illam, tranquillitatemque philosophiæ consecranti, in Ægyptum non longius quàm res poscit expatandum, ut Gregorius inquit, cognomento theologus: nec in Assyriam curiosius peregrinandum. procul etiam inde abeundū, solitudinemque versus migrādum bidui aut tridui: si quidem priuata hominis cuiusque ratio non grauetur hoc admittere. quippe in regionibus illis maximè, tyrannus ille tartariæ sedis præses, excursores multos & peruigiles, animarūque sicarios habet, intentos & imminenteis ad omnem occasionem disturbandi fani dominici, atque depeculandi. Neque verò ideo labascere eorū oportet fiduciam, qui intra præsidia sanctioris philosophiæ se abdiderunt, quòd intra septa quoque eiusdem sæpe cientur tumultus. Etenim sacrosanctus esse nemo potest in militia vitæ, antequam missionem adeptus est: nec petitam illam adeptus est, sed oblatam diuinitus, emeritam iuxta & causariam. & asylum nullum sanctum est aut clausum cæcis illis prædonibus & sicariis. Quando ne Paulus quidē ille athleta lectissimus, multarūque palmarum pugil & insignium, impetrare rudem huius molestiæ potuit, sæpenumero incessentis ministerio suo fungenti: cum interim id iterum tertiumque suppliciter ipse flagitasset à Christo, indulgentissimo quidem illo Domino, sed tamen quasi lanista delectorū suorum, quanquā apud herum ipsum gratia summa ut mancipium scitum & eximium, singularique flagrabat. cæterum immunitatis instar fuit homini sanctissimo, extra aleam esse præcipitem, intra præsidium posito tutelæ dominicæ. adeò locus nullus inaccessus est proserpentibus illis noxis, nemòque prudens in vacatione supina debet acquiescere petitionum cæcarum diri gladiatoris, infesti semper aut imminentis mortalium securitati. Ita sua est philosophiæ quoque

palæstra, obeunda illa quidē nec opinato sæpe, iccircoque non sine trepidatione & velut in tumultu. Sed quanti Interesse censes, ex tuo ipse propugnaculo è philosophiæ castello, ex arce antè munita, hostem iam magnam partem exarmatum propulses: an in locū equum, imò verò in arenam aduersarij descēdas: tutēque pedibus vix insistēs, equitem (vt aiunt) prælio laceffas campestri in planitie? Et vt pugiles olim campestres certo quodam victu atque necessario vti solebant, ad corroborandos & confirmādos lacertos: sic philosophicum victū accommodatum esse oportet ad alendam vim animi, virtutēque vegetādam: *συλθεγωγίαν* Græci vocāt: cuius etiam ipsius alumnæ sunt insignes virtutes & præcipuæ. Iam verò qui sublimes illas sententias tropósque oraculorum, haurire cōmentando, & concoquere ad fanitatem animæ velit, ex iisque firmam persuasionem concipere doctrinæ seruatoria, & fixam opinionem rerū sempiternarum: is utiq; stomacho vt seruiat sapientiæ necesse est, plurimūque indulgeat. Non etiam vt scenæ, popularique plausui: non primorum ordinum secundorūque palato: non denique iudicio communis prudentiæ, quibus rebus vrbanā celebritas, conuentūsque atriensis finguntur, temperantur, reguntur. hæc enim naturarum consensum inter se nullum habent, quam sympathiam Græci vocant. Nisi verò credere possumus florida illa morū sermonisque pigmenta, quibus homines vrbanitati studentes, disciplinæque atriēsi, theatro (vt dicitur) & scenæ ingenium Roscianū, & comitatem venditant, fucatā atque inanem, ad stomachum facere theoricæ philosophiæ, quæ veritate tantū gaudet, & candida simplicitate. quippe quæ diuinū verbum pro epulis animi opiparis & suauibus deuorās, dente prius intellectus mystici commanducatum, ineptias illas ostentatrices despuat vt fatuas, ad imposturam spectantes, exitiālemq; ludificationem: quæ duæ res cum fraterna charitate, ciuilique societate & legitima dissident. Scenica verò ista studia atque histrionica, ciuilis sunt prudentiæ eiūsque alumnorū, simul omnium quos iuuat & ipsos subdole mentis tectoriis, interdūque sceleratæ, fucum Deo (vt ipsi putant) atque hominibus facere. quippe qui vrbanitate ac lepōre ad fraudulentam simulationem attemperato gaudeant, verborūque lenocinio asseruienti: & verò comitate populari, obuio cuique exposita, atque aucupe gratiæ, cum obsequiosa quidem illa, sed ludificatrix deditioe sui: denique cis aras, trans aras, atque per aras parasitica assensione, cū interesse sua putant: quo vno ipsi termino ius, bonum, æquum, honestum, definiendum censent.



His videas in ipsis, si obseruare vacet, versicolores vultus & chameleonteam pro re nata extemporalémque mutationem, vt inquit Aristoteles. Stomatica autē sunt ista scilicet adiumenta vanitatis, conciliantia gratiam vrbauitatis: ori vtique fingendo & concinnando, non item stomacho salubriter afficiendo, præcordiisq; morbidis sanandis accommodata. Sed enim Deus (ô vanitas humana stoliditate prædita) Deus (inquam) dignoscere cautus est, quid solidum crepet, & pictæ rectoria linguæ. is spectator est, is explorator, is existimator mentiū, & pertetator. Verū qui huiuscemodi nugis sensus habent perimbutos: vix est aureis illi vt pronas habere postea possint, vacantesq; ad auscultationē differentis sapientiæ & veritatis. Talésq; sunt ij fortasse, quos Christus, id est veritas ipsa diuina, nō leuiter cōpellans, à concionibus suis modo quodā summouit, cū inter sermocinandum sæpenumero exaudibili voce dixit, Qui habet aures ad audiendū, audiat. ad aures enim tātū acroamaticas auscultationisq; mystagogicæ, audientiā sibi fecit, cōstantēq; & æternam attentionem æternus sermo Dei, qui etiam sapientia est germana & sempiterna: idem salutis auctor architectusq; mortaliū. Minimè verò ad eorum aureis hominum suauē atque penetrabilem suadæ cælestis aculeū pertinere voluit, qui in diem viuētes, tēporarios fructus bonorum atq; honorū consecrantur, voluptariarūq; rerū. Tametsi quibus auscultare sacrosanctę philosophiæ cōtingit, emēdata vitę innocentisq; magistræ: quanti tādē æstimandū est ad vitam sine anxietate, sine tabifica ægritudine animi traducendā, quod sperare illis licet, vel spe potius certa vsuuenit antecapere, ac sibi metipsis repræsentare, immortalitatis cōditionē cumulātā veris bonis, rebūq; omnibus exaggeratā in primis expetēdis? Seponamus quęso nobis quotidie, seponamus (inquā) momentū tēpusculi succisui, vel semūciam tantū horæ carpamus, ab iis quæ maximè agimus vacuā & feriatā: tum cogitet vnusquisque quid sese futurū est, cū post peractas vires orbium cælestium, eorūque temporum, exuias suas animæ tandem recepturæ sunt, hæ in pœnam horrendam, illæ in præmiū beatissimum: vtræque tamen viuaces in perpetuum & porró. Hic cui non mirari subeat simul & miserari, mortalium sensus hebetes ad contemplationem æternitatis: qui quidem ea quæ moribus cōparata sunt, quæque in præcordiis mundi persidentia, ita inualuerunt, vt callum iam tot ætatum inconsiderantiæ, in communi non modò sensu, sed etiam prudentia duxerint, accuratè, perpensè, & exactè considerarit. Nam quis nostrum, cū sibi suam rem

ipse & præcipuam, maximè atque acerrimè agere videatur: id demum satis agit quò pertinent ac referuntur omnia quæ agimus, curamus, cõtendimus, & laboramus: nisi non eò spectant omnia vel nobis nõ animaduertentibus, aliásque res (vt aiunt) agentibus, commodissimè vt viuentes, desiderare rem vllam ad extremũ desinamus, vel exiguã. At nos sic in patriam, sic in coloniam beatitudine exaggeratã tendimus, vbi demum desiderandi quicquam finis est: vt pueri ludibũdi & erronei, qui cupidè ferè faciunt, sinuosos vt itineribus ac maximè deuiss, ad ludum literarium sese agant (vt est in sermone sæpe vulgi) potius quàm eò vt cõtendant, quò ire destinauerunt. Ab eadẽ ignoratione veritatis, & verò à stupore mētis, illud est, quòd in rebus secundis lætitia gestiente exultamus: quasi auspiciũ salutare acceperimus, id quod plerunque obliuionem æternæ vitæ affert. Quoto animi cuique tandẽ in rebus admodũ lætis, in extis (vt ita loquar) regibus ac magnificis, obseruari potuit species tumultuarii mortis vadi-
monii, quod vltimã denũciat necessitatem, cùm indeprecabilẽ, tum sæpe præcipitem? Enimuero Christus moriens in cruce, felle & aceto gustato, propinasse quoddam poculũ nobis videri potest, partim mētis acrimonię, ad cauẽdas mundi, vitãdãsq; fallacias: partim absinthii vitæ, nõ etiam mellis atq; deliciarũ, si quidẽ adherescere vestigiis eius cupimus, quibus in celũ mortalibus viã affectandã esse docuit inter concionandũ. Quis autẽ nostrũ nouit quo loco ac numero homines apud Deũ habeantur, in albũmq; destinatricis prouidẽtię relati sint: qui hĩc vel summo vel infimo ipsi numero mortalium habentur, vel splendido & obscuro? Nimirũ candidis nos & atris dies hominũ calculis adnotamus, ratiocinatione cæca plerunq; & præpostera. vsque adeò absurdè rationem rerum inire mundus nos instituit magister multitudinis: in cuius ludo sic ab ineunte ætatula versamur ad vltimos vsque actus vitæ, vt pœnitẽda semper pigendãque discamus, magna cum afflictatione animi. stultam hominum superficiariãque coniecturam: cum elogio summa fide prædito didicerimus, in caligine multa altissimãque iudicia Dei esse mersa. Homines certè multos beamus existimatione nostra, quasi per viam pomparum thesarũque ad immortalitatem famæ & memoriæ, quadrigis (vt aiunt) albis vehentes: cùm interim ad sceleratam ipsi portam re-
cta contendant iter, indẽque ad necem tandem rapiantur abominandam & sempiternam. talis est enim sapissime catastrophe thea-
tricæ iactationis industriæ, & ingenii, & solertiæ, in qua ciuilis au-
licãque prudentia specimen sui præbens, vestigia visenda perpetuã-

que relictum ire vitæ sperat, felicitatem per illustrem æmulandam-
 que transactæ. Quippe si lege sua agere seuerus idem & miseri-
 cors Dominus instituerit: eorum mortalium plurimi qui trium-
 phali porta ingressi, per ora stupentium transuecti sunt populi ac
 procerum, scelerata mox iidē porta, nefastoque exitu ex hac vita ex-
 cedunt. Sed (hei mihi) Christus nobis fidem facere hallucinationis
 nostræ, ob stuporem nostrum nequit, præposterique iudicij: qui
 mundo tot, tantos ipse, tam locupletes veritatis sponsores dedit,
 vadēsque capitales. Verum enimvero hominum stultitiam philo-
 sophia ridens, huiusmodi vitam docet laborum esse curarumque
 congeriem, & cumulum angorum, pyrāmque cupiditatis atque in-
 uidię exaggeratam. Inde autem nauissimus quisque atque strenui-
 simus iudicio communis prudentiæ, quàm plurimum sibi sumit, in-
 manticāmque pertusam ardentis auaritię ac perfluentem infar-
 ficque præclare rem gerere facerēque existimatur, & sua & imperi-
 torum sententia: cū interim irritō labore (vt illa demonstrat vita
 magistra) similique Danaidum torqueatur, qui inferis quondam
 destinatus est. Sed nullo thure litabis: hæreat in stultis breuis vt semū-
 cia recti, inquit in Satyra Persius. Humana igitur prudentia litem
 suam luculentē facit interdū, decretis existimandis, placitisque pro-
 uidentię: hominum etiam felicitatem fallaci rationum putatione
 colligit, rerum tantum secundarū modulis eam metiens. Mihi enim
 qui fortunæ obsecundanti vela pandere maiori cōtentione pergunt,
 terrenisque rebus vehementer adhærescere, similes esse vidētur feris
 circulo grandi sic alligatis aut inclusis, inde vt erumpere nequeant.
 Vt enim illæ cursim recursimque circulum ambientes, cū nihil
 promoueant, tamen sese semper exitum inuenturas aut solutionem
 sperant: sic ambitiosi hominis vita & cupiditate perciti, nihil aliud
 est, quàm orbis quidam & cōtinuatio curarū, laborum, anxietatum,
 feriem illi ærumnosæ vitæ perpetuam contextentium: cū interim
 ad bonorum summā adipiscendam, quam consecrari videtur, non
 proficiat hilum. Quid igitur in vestigatione summi boni, quod om-
 nes expectare nosmetipsos, in cælum identidem oculos attollentes,
 dicimus: opus est in Ægypti mediterranea descendere? quid vsque-
 quaque ibidem expatiari? Quid verò curiosē penetralia Ægyptiorū
 gentis lustrare, indigna vtique & auersanda oculis, sanctioribus sa-
 cris purioribusque initiatis? Huiusmodi est ille fortasse descensus ad
 inferos animarum, quem Homerus vir Græcus, pœtarum omnium
 præstantissimus, æmulusque eius Virgilius noster finxerunt. quibus

in locis monstra varia esse perhibuerunt, hominúmque cupidorum, auarorum, ambientium supplicia constituerunt, quæ si oculis subii- cere cuiquam & perlustrare placeat, primo cuique fortunatorum in illas tenebras coniicere sese atque insinuare, multo vtique prom- ptius est, quàm eorundem paucis inde prudentibúsq; remeare, vel eorum quos ardens euexit ad sidera virtus. tenent enim media omnia syluæ, vt inquit ille. Quibus in syluis lustra sunt & cubilia eiusmodi ferarum, cupiditatis, auaritiæ, ambitionis, insolentiæ, tum salebræ multæ opacæ sunt, sinuosæque in deuia abducentes, lucis etiam superioris inficientes obliuione expatiatores homines, erro- nésque animos. Quãquam quid dixi in Ægyptum descendere? quod interdum atque per occasionẽ aut necessitatem facere, fortasse phi- losophia alûnis suis indulgeat & amâtib; sui: ceterum & catè & cir- cumspectè, suspensísque ingressibus ob pedicarl suspensionẽ. Quid ve- rò si homines ab eiurata Ægypti seruitute, exuuiísque eius in sacra la- uatione abiectis fermè cû detestatione, denuo ipsi nõ dico in Ægyptũ descẽdere sustinent, cõmerciisque alicuius gratia peregrinãtur: sed in Ægyptũ intimam trãsuerfi & præcipites ruũt, Ægypti tyrannorũ ne- xus vltro & cupidè rursus ineunt: qui insani affectus sunt, animi trã- quillitatis perturbatores? in ergastulis etiam eorum miseri cõsistãtur, assidua necessitate operis faciundi, ingenuis animis pudendi & de- spuendi? Hic rursus, híc nõ mirabimur rationis stuporem, torporẽ- que intellectus humani? Profectò sensus cõmunis & vita mortalium à vero auersa est, & veluti oculis mentis capta. Non Christos nos esse ipsi Domini, nõ vnctos oleo lætitiæ meminimus, diuinique spiritus, qui theatro isto nostrapte sponte vngamur oleo, anxietatis curio- sæque cõtentionis, theatróque asseruiẽtis, vt æmuli scilicet, vt disci- puli spiritus cupiditatis improbißimæ, Christianorũq; tantũ inane nomẽ circumferentes. nã instituta ciuilia atque vrbana & planè sæcu- laria, vt titulo ac primore specie Christiana sunt: ita cõsideratione li- mata atque exacta, antichristiana reperiuntur. Age, quotus est hodie quisque, vel ætate hac deprauata, & ad veritatis intelligentiã hebe- tata, nec iam ferri tãtum duritia, sed plumbi grauitate temperata: ho- minum dico non profligatissimorum, qui si vsuenerit, vt pro tuendis aris Christi aduersus impiam barbariem pugnandum sit, nõ libens in causam piam animam profusus sit? quin se (inquam) coniugem & pignora deuouere omnibus cum bonis paratus sit, si partes ortho- doxiæ in discrimen vocentur? vix decimus vt opinor, hominum quoque sui liberorũque paulo plus quàm pium est amantium. Sed

fac ut non minor pars tantum hominum Christianismi spem retinentium, nomen ad sacramentum illud cupidè datura sit. hoc nimis vehemens indicium est fidentis & infixæ suapte vi religionis Christianæ in animis hominū, hærentisque præcordiis glutino initiorum. Cur igitur aut quī fieri dicas, ut oraculis euangelicis, ut sententiis consensu nominis vniuersi Christiani sic receptis, ut auctoritatē (quod alibi sæpe dictū est) axiomaticam habeant, tamen assensionem Ephecticorū more philosophorum accommodare videamur? Contrā verò in iis rebus quæ oculatam fidem atque auritam habent, non ephecticum assensum, nō scepticū, ut olim Academici, sed dogmaticū catalepticūque largiamur? Quæ (malū) est ista peruerfitas opinionum? num sensuū locupletius est aut iuratius, quàm intellectus testimonium, cui magis credatur? Nunc autem trāsmittam auctoritatem oraculorū, quæ omnem ipsa prorsus hæitationem eximit hominibus sanę mētis, nec Sirenici illecebris sensibūisque affectis. Nemo hominem esse quenquam disciplinarum peritum, quin formis mathematicis, interuallis & angulis, eorūque theorematibus, fidem habendam certam & fixam esse ducat: ad quæ tamen comperienda, nulli sensuum testimonium ob id denunciatur ad iudicium philosophiæ, ut testificetur de fide demonstrationis eorum. & puncti quidem mathematici, & lineæ geometricæ scientia, cum ne assentiendi quidem cunctationem admittat inter artis discipulos, tamen ab intellectu longe plus, quàm à sensu mutuatur. Quanta autem sit sensuum fallacia, Academia placita docent, instituto Romani fori, iurisque dictionis ciuilis comprobata, si Ciceronis elogio credimus in ultimo Academicarum quæstionum. Quam nostram rationem (inquit) maiorum comprobatur diligentia, qui primum iurare ex animi sententia quemque voluerunt: deinde teneri si sciens falleret, quòd inscitia multa versaretur in vita. Tum qui testimonium diceret, ut arbitrati se diceret, etiam quod ipse vidisset. quæque iurati iudices cognouissent: ea non ut esse facta, sed ut videri pronunciarent. Et nos Christianismi mordicus retinentes, in iis quoque capitibus amplectendis Euangelicæ legis, hæsitatores aut sumus, aut esse nos ostendimus: quæ si in dubiū reuocentur, summa pietatis Christianæ hæreat necesse est? id autem ominari argumentando, nedum addubitando, vereor ne sceleris instar sit ingentis & expiandi: ita ad infantiam res ipsa nos redegit. Quapropter clausulam huius libri hīc facere coacti sumus, etsi rei indignitas ampliora postulabat, dicendaque affatim suggerere scribenti videbatur.

DE TRANSITV HELLENISMI

AD CHRISTIANISMVM,

LIB. SECVNDVS.



CHRYSOSTOMVS auctor magni splendidique nominis, in epistolam Pauli ad Romanos, laudationem diuini eius viri scribens, ait se non vereri Paulum ipsum mundi cor appellare, innumerabilem bonorum fontem, principium & elementum vitæ. per quem Deus, inquit, arcana miranda effatus est, quodque mirari possimus, maiora quam per semetipsum. Hæc mens diuini viri, immò verò hic animus vitæ, hæc mundi præcordia, Dei sapientia perimbuta, tincta, atque grauida, philosophiam theoriæ studiosam magnopere locupletarunt, atque etiam maximopere. quippe quæ commentationis rerum cælestium syluam, vastam, densam, opacamque aperuerint: in qua sylua velut indagine commentationis cingere cubile veritatis ipsius, summique boni legere vestigia possemus, in montem Olympum ferentia. Is porro Dei testimonio ornatus, quasi lectissimum spiritus diuini, cælestisque disciplinæ conceptaculum, & simul spectatum assumptus adyta sapientiæ, dignissimus est utique, cuius elogia & monumenta, qua de re nunc agitur, instar sint apud mortales decuriæ vnius aut alterius magistrorum, atque etiam centuriæ, è sinu prouidentie Dei, ex eiusque sapientie sanctuario prodeuntium. Quare qui huic veritatis antistiti, legis euangelæ interpreti, Seruatoris ipsius salutisque hypophetæ, auscultatorias aureis adhibere neglexerit, & acroamaticas, is è schola philosophiæ continuò explodendus est consensu prudentium: & verò è conuentu eiiciendus vniuersorum sacris Christianismi operantium, quam Ecclesiam quasi concionem sanctam piàmque, scriptura appellitauit. Atqui talis tantusque is magister in epistola ad Ephesios, filios diffidentie quos vocet non video, quibus iram Dei imminere idem testificatus est, ipse nisi homines Christianos nostri similes, præsertim huius temporis, quo tempore fides vel tantulum labascens, expiabilis utique indiget animaduersionis diuinæ & supplicii: post confirmatam consensu tot ætatum persuasionem diuini cultus, & pietatis eiusmodi quæ profitetur ipse Christianismus. Diffidentie enim filios, quæ ἀπειθοὺς Græcè dixit, eos appellat, non qui fidem abrogant atque auctori-

tatem sermoni euangelico, sed qui vel quicquam derogant ac detrahunt fidei atque auctoritati euangelicæ. In geometria cum elementa concesseris, necesse est ut theoremata quoque ex ipsis coagmentata itidem fatearis: & cum primum theorema, secundum, tertium, & deinceps, ut demonstrata dederis & concesseris, disciplina placita poscunt, ut reliqua etiam concedas, ut ordine posteriora, sic necessariò consequentia: alioqui tute improbus videbere, aut stare non poterit constitutio geometriæ, scientiæ cōpertissimæ. In theoria porrò disciplina & sacrosanctæ philosophiæ, quæ non lineas imaginarias, non formas quadamtenus opinabiles ut geometria, speculatur: sed diuinam ipsam maiestatem pro obiecto & subiecto commentationis habet, naturarū omnium certissimo, atque eo amplius res alias abstractas & cælestes ab ipso & in ipso sempiternas futuras: in ipsa igitur disciplina tantarum rerum contemplatrice, enunciata veritatis suapte auctoritate rata, ponimus utique omnium suffragio, ea quæ Deus idemque Dei filius, inter homines agens, sub corporis integumento ore suo pronunciauit, ac de patris voluntate spiritusque diuini aspiratione sanxit & promulgauit. Ita quicquid cum euangelicis præceptis aut interdictis discrepat, noxiæ diræ tandem fore inficiando non sumus. Atqui ipse ad quadrantem rationem reposciturum sese & exacturum, conceptis verbis palamque pronunciauit: scriptumque & consignatum ita reliquit, ut ne causari ignorance huiusce iuris & sanctionis, aut obliuionem excusare quouis modo possimus. Quid me igitur, quid te lector, quid vnoquoque futurum est nostrum, è moribus & institutis sensus cōmunis, vitæ suæ tenorem comparantium, quæ manifestè pugnare cum monumentis sapientiæ cælestis, legæque euangela intelligimus, cum sanctionis terribilis & capitalis clausula promulgata? & in tam dissoluta supinæque animaduersione, & incuria tum pollicitationū, tum minarum Domini, serui insigni nequitia præditi, audemus nobis promittere adeundæ hereditatis copiosissimæ facultatem, adoptiuis Dei promissam? Si scripturæ credimus, Dei filius & sermo, interpres prius fuit inter Deum & Abrahamum, quasi stipulatorem quendam delectæ vniuersitatis hominum, qui veritati & sapientiæ ut parenti, dicto audientes futuri erant, fidemque habituri. Iterum idem Dei filius interuentor fuit inter Deum patrem omnium & genus ipsum humanum, commerciique cælestis & æterni pactor atque transactor. Hoc porrò pactum fœdusque admirabile, non minus admirabili pignore sanctum est & confirmatum. Siquidem

Abrahamo quem diuinitas ipsa in deliciis habuit, ineffabilem Deus pollicitus hæreditatem, quo fiduciam ipsi, eiusque germanæ posteritati plenissimam faceret, sanctissimè adiurauit. Quid inquires, per Stygos paludem, dii cuius iurare timent & fallere numen? Minimè. Quid ergo? terram, mare, sidera? Ne id quidem. iurat per semetipsum Deus, ratum id pactum æternumque futurum, quando ne Deus quidem ipse, tametsi omnipotès, maius iurisiurandi pignus sanctiusque dare potuit: id enim Paulus ipse testatur & admiratur. Tametsi iusiurandum illud Deus non patriarchæ gratia pollicitationi suæ addidit: quippe cuius strenuam fidem nouerat & cunctatione vacuam, non præscientia modò diuina, sed etiam clarissimo recentique exemplo. Cæterum nostram aliorumque mortalium ignauissimam fidem prouidens, corneaque viscera Adamidarum, alumnorum perennaciæ atque contumaciæ: contra quam testimonium perhibet insignis ipsius patriarchæ fides, graue, clarum, & irrefutabile. Hic si quis me roget, cum receptissima sit meritò auctoritas scripturæ, cum interdum sensuum sublimium miracula inter commentandum in ipsa emicantia, fidem rerum diuinarum manifestam faciant: sic ex ænigmatibus illis diuini sermonis raptim coruscantia, quasi fulgetra quædam rapida, è nubibus altissimis erumpentia: denique cum exempla tot prodita sint certissimæ fidei à viris sanctissimis, quorum nos memoriam colimus ut venerandam & consecratam: hic igitur si quis quærat, cur adhuc affines esse pergimus apithiæ gentilitiæ, Nihil aliud habeo potius quod respondeam, nihil quod causificer, quam hebetem sensum communem & euanidum, quo nos magistro passim utimur, rerumque diuinarum humanarumque æstimatore. Nos enim tum Dei, tum eius sapientiæ odorem quendam, vel succisiuis horis commentando captamus, vel tantisper dum operam damus sacris auscultationibus: interimque dum odor rerum diuinarum quasi vnguenti suauissimi fragrat, admiratione earum & suauitate ducimur. Simulac autem res alias agere institimus (quod nunquam non fermè facimus) sensibusque vacare, de rebus vanissimis, aut certè ab illis diuersissimis, ad principatum animi referentibus, quasque ad senatum ciuilis prudentiæ: odor tunc ille natura fugax, protinus euanidus abit, & memoria eius interit. Nec verò ex eorum numero sumus, qui dicere cum Paulo potuerunt, Gratiam Deo habemus, qui odorem cognitionis Christi in omni loco manifestum per nos fecit. Etenim qui hoc dicebat, quocunque locorum ipse, gentiumque se conferebat, vnà quoque odorem cognitionis Dei, Christi que

disciplinæ circumferebat: videlicet illa est tyrannis principis mundi abrogata tantum à Christo inter filios Dei, qui in regno eius agunt. Quem principem idem apostolus ad Ephesios scribens, imperatorem huius sæculi, & potestatus aëris nuncupauit: ideo (vt cēset Chrysostomus) quod ipsi natura humana sese, partem quidem longè maximam, in nexum vltro dedit & mancipium: idque fit hodie ab ipsa, iudicio tam præpostero, ac de salute propria dirum in modum merito, vt Christo Dei filio nemo penè attentionem accommodet, etsi tanta nobis taliâque pollicenti, eadēque perpetua: principi autem ipsi mundi, confertim mortales sese agminatimque, tanquam duci proprio agglomerent, asseclâsque sese præbeant, præsentia quidem illis festiuâque, sed temporaria promittenti fallaciâque. Cuiusmodi auctoramento mortales obligati tyranno teterrimo, sacramenti immemores quo in verba Seruatoris adacti sumus, salutarem militiam regni Dei beatamque detrectamus, atque è numero delectorum Christi, aut certè euocatorum, in numeros protinus viui (vt dicitur) videntēsque transcribimur noxæ Stygiæ destinatorum. Miserrimum ac perditum, dirumque consilium. hancine vim cupiditatis, hanc ambitus, hanc voluptatis, eiusmodique annonæ militiæ infernalis, vt iis stipendiis allekti homines, nec cælestes postea numeros copiasque beatas recordentur, eorūque emerita stipendia, sempiterna futura? Hæ sunt scilicet præstigiæ & fallaciæ Caci illius Stygii, auersis vestigiis cæcisque, mortales in illud Orci specu vastum horrendumque rapientis. Lacescit enim in nobis acer ille instinctor, æmulationem, cupiditatem, lasciuiam, libidinem, aliosque igniculos cognatos inferorum, insitos naturæ deprauatæ: atque iis consternatæ & velut fanaticæ mentis œstris, cæcisque furiarum aculeis, aut præcipites agit homines, aut transuersos eos rapit in exitium æternum. Quem casum præcipitiūque tartareum, si vitare ipsi prouisum & auersari cupimus: oculos protinus retorquere ad Seruatorem oportet: qui in crucem mirificè sublatus, atque vndique conspicuus, expansis etiam vlnis sinum in suum nos ac præsidium euocat assidue: ac tergeminus quidem in persona atque in numine Deus, vnus in natura & substantia, à primordiali statim noxia, occlusos sapientiæ thesauros habuerat, mirèque inuolutos & obsignatos in oraculis suis. Iesus autem ipse Christus, nunquam sine præfatione Seruatoris hominum à nobis appellandus: idem Dei filius, & verbum, & sapientia eiusdem, in officina paracletica corpus humanum factus, clauem illam antea inauditam mundo attulit gazophylacii cælestis, scriniâque

referauit inexhaustæ sapientiæ atque beatissimæ. A cruce autem eius tanquam à perenni fonte salutis, à capiteque manantis per orbem fluminis veræ & æternæ sapientiæ, ducenda est ratio prima & vltima philosophiæ, commentationisque summa pertinentis ad theoriâ: quæ dubio procul ipsa contentione animi probi atque sublimis, attentioneque eiusdem perpetua dignissima est. Pandito nunc occlusa Deus, aureisque nostras ieiunas mysticæ disciplinæ, verbo suo mirifico ac spiritu impleat: eiusque vi aculeata suauiter, & flexanima stupentia præcordia cieat. Plus est enim infinitis partibus aspirans paracleti numen in oraculâ studio, quàm actio asseruiens & pronuntiatio, quamlibet animata in oratione humana: vt mirari definamus non perinde constare omnibus eius studii rationem, euentuque eodem cedere. Refert enim non quatenus quisque se ingurgitet aquis ex illo flumine exundantibus, sed quo spiritu afflatus, & quàm sitiens immortalis sapientiæ: tum homines quidâ crudi, concoquere non possunt aquas, haustas quidem sæpe audivitatis curiosæ congio magis, quàm fidei bonæ cyatho & charitatis Dei. nisi verò putare debemus bono stomacho eos esse, qui esculentam carnem Christi veram, & potulentum sanguinem, auribus admittere sine symbolo nequeunt, nedum scripturæ elogio renuunt, tôtque animarum sanctarum priscarumque auctoritati credere: quosque Christus ipse augustissimi sacramenti conditor, cum iis valere iussit, qui ipsum olim de hoc fermocinantē ferre non potuerunt: vt est apud diuinum illum Ioannem scriptum, à manu eius seruum fidum atque dilectissimum. Agedum igitur, agamus nos (inquam) quod agitur in vita præcipuè: siquidem rationalis animans, à ratione recta, non item ab obliqua & peruersa, finitionem suam accepit. Lignum ligno normaliter incubans, caduceum pacificatoris esse, non dicamus modò, sed ducamus etiam, ac mente permemori teneamus: quem inter diuinam humanamque naturam interuenisse, & diuinis elogiis, & traditæ per manus auspiciatò initiatas auctoritati non dubiè credimus. sic enim maiorum gentium senatus ille censuit, ætatumque heroicarum germana, docta, inspirata, incorruptaque prudentia. sic centuriæ primæ classis, diuinis ornamentis ac dignitate præditæ, ob idque non dubiè prærogatiuæ, sciuerunt ac iusserunt. sic capitali pignore cauerunt, sic fide sua ingenti & admiranda esse iusserunt, agmina illa numerosa testiū, vel innumera potius, qui vades pro Christo semetipsos offerre sæuissimis tyrānis ac truculentissimis minimè detrectarunt. Sic denique rei euidentia fateri nos cogit, quæ in oculos

quidem illa incurrit: sed hebetatos rationis rectæ conuiuentia, nebula insuper offusos à Caco exhalata ex antro illo tetro, tartaridarum domicilio, draconisque faucibus. Age igitur rursus, hoc insigne salutis, hoc symbolū pacis superū impetratæ, hanc notam, hoc monumentum adoptionis diuinæ, iūsque cernendæ hæreditatis optimæ atque beatissimæ, pro amuleto circumferamus alexicaco: in sinu id gestemus, apprimamus id præcordiis, videamúsque magnopere ne discinctis aut malè cinctis excidat. totos enim nosmetipsos contractu eius atque osculo, lustratos esse meritò confidimus: quippe qui illa veluti cælestis Herculis claua, tria Cerberi tetra capita, concisa atque elisa, ternas fauces contractas esse norimus, voluptatem, cupiditatē, fastum: quarū primæ voracissimæ, secundæ hiantissimæ, tertiæ sunt tumentissimæ. Orci quoque repagula antea intacta & immota, illo veluti sacro vecti cōuulsa citò scimus: custodiāsque vetustas vindice Seruatore extractas, quæ clausæ in caligine, desiderio lucis supernæ iandiu tenebantur. nam tulit hinc illis aliquādo optantibus ætas auxiliū aduentūque Dei: Alcidesque magnus ouans victoria venit, clauator diuinæ maiestatis: opima subinde spolia illaturus in ærarium cæleste, visendū, splendidū, & copiosum. Tum primū manes Cacus videre trementem, turbatūque animo. Hanc denique tesseram esse gloriari iure possumus, initi & contracti hospitii perpetui inter cælum & terram, Deum inter mortalesque, incolas huius orbis. Commercii cuius ergō, pæana sæpenumero nostrum canimus in obsecrationibus & precationibus, quæ fiunt in templis sanctissimis, interim dum pacem Dei superūque exposcimus. Scimus & in hoc ligno, lustralique adeò expiabilissimoque signo, duas inesse normas: ad quas omnem lapidem exploratum oportet, qui quidem quadraturus sit in structura fani mystici. Hoc idem porro lignum inuertere tute si institeris, trutinam statim exactam in eo inueneris, quæ tanquam in æquilibrio iustitiæ constituta, neutram in partem vergit. nam in libra iugum ita porrectum ut stet ad exactum æquilibrium, utrinque rectum vnū efficit, ut Aristoteles inquit in Mechanicis. ad eundemque modum brachia expansa in porrecto ligno, corpore in sublica ad perpendiculum extenso, singulos rectos utrinque figurant, & tanquam deliniant. In hoc lecto pœnarum Christus iacens, emptor ipse familiæ (ut verbo vetustissimo iuris utar) hæres in asse relictus æterni patrimonii, testamentum suum condidit, vel conditum potius confirmauit. in quo quidem testamento ab octo beatorum gradibus eos ipse reliquit exhæredes, quos

ciuilis prudentia felices, ac frugi homines esse iudicat: cum interim fidissimis suis amicis, quibus pacem suam dederat vt legatum vberimum & in primis expetendum, doloris atque æumnæ absinthium propinauerit in calice philotesio. Verum id genus supplicii (mirum id dictu, stupendumque meditati) seruile apud priscos & detestandum, à Christi Seruatoris morte cultuque venerandum, sacrosanctum, augustum esse cœpit, atque etiam laureatum, idque meritissimó. Siquidem Iesus Christus, è cruce velut ex ara quadam insigni, edita & conspicua, quasi è loco superiore, principem illum mundi cum copiis suis fudit, fugauit: ex arce etiam oraculari, in qua sibi numen ille diuinumque cultum vsurpauerat, luculentè deiecit, præcipitemque deturbauit. Opima præterea spolia eiusdem è regia retulit, vasa automata atque animantia, argentea aureaque, è medio atque è penetralibus Ægypti repetita, asportataque, ad ornamentu ædis suæ delegit, quam è lapidibus delectis, ex eodemque principatu ac tyrannide ereptis, statuerat iam olim ab æuo architectari, atque ædificandâ locare. Hic Ægypti ipse tyrannus gladio suo iugulatus est. Nam qui morte seruatoris funestum facere regnum Dei existimabat, omnia illic festa laureataque fecit, ipsius supplicio & asseclarum eius fidissimorum. Circa hoc diuinę maiestatis facinus, nobis semper memorabile & prædicandum: quo nec miraculum maius diuinitus ad hunc diem editum est, nec in posterum edendum: quod natura ipsa, cœlum, cœlique decus atque insigne, retro actu mirabili defectuque testata sunt: philosophia summi boni indagatrix & cupientissima, longè acrius cõmentari & speculari debet, quàm philosophia Græca, circa fines inquirendos bonorum & malorum quondam commentata est. Quos tamen vt vnaquæque ipsos maximè familia philosophica, proximè persequi sese existimauit, ita ferè auersis maximè vestigiis indagauisse postea inuenta est. Age, mitto nunc (quanquam id planum facere possem) nihil animo philosophico salubrius esse & magis exoptandum. Ecquid autem dignius summis ingeniis, ecqua verò commentatio suscipi maior, sublimior, capacior, longè, latè, altèque patentior, quàm ea potest speculatio, quę fines omneis mathematicos, extremaque rerum naturarumque complectitur? At Christi cognitionis studium in crucem acti, eiusque mysterii (vt Græci vocant) mirifica œconomia, non modò vnā aut alteram naturæ dimensionem, sed altitudinis duo extrema finibus suis ambit, quos ne vniuersi quidem globus valet capere atque comprehendere: vltra quod philosophia antiqua nihil

agnoscere voluit. Hanc scientiam Paulus ille (vt dictum est) clarissimus antistes sapientiæ, discipulis suis Ephesiis ominatur, ac diuinitus exposcit: Vt possitis (inquit) vnà cum omnibus sanctis comprehendere, quid latitudo, quid longitudo, quid altitudo, nosseque cognitionis Christi charitatem præstantissimam, quo impleamini & absoluamini ad totum vsque Dei complementum. Quibus ille verbis, vir diuinarum rerum consultissimus, seruatoriæ vim œconomiæ effectumque immensum exprimere mirè voluit & significantissimè, vt OEcumenius Græcus auctor, ex sententia Photii hominis acutissimi scripsit. OEconomia autem à Græcis theologis dicta est, verbi Dei vita, in corpore mortali existentis, cum theurgia mirifica totaque illa salutis hominum peragenda diuina prouincia, quã ipse libens seruaturam appellauerim, ab eo administrata secundum mandata præscriptaque Dei patris, à diuinis quondam vatibus mûdo prænuntiata. Longitudo significat ab omni æuo & ante tempora, cognitionem eius quod dictum est, apud homines, atque administrationem, à Deo præfinitam fuisse. Latitudo ex eo intelligitur, quòd in omnem gentem vis eius & potestas extensa est & propagata. ad eos enim qui ante legem, ad eos qui sub lege, ad eos qui post legem fuerunt, humanitatis Christi, & rerum ab ipso, Deo simul atque homine gestarum, beneficium & fructus efficacique spectauit. Altitudinis extrema eò pertinent, vt intelligamus, eundem Christum ad inferos descendisse, ad cælumque ascendisse, & simul primitias humanitatis beatissimæ super omneis gradus angelicos eundem sustulisse. Ad summam, in Christo cruci affixo, non modò fundamenta fidei iacta sunt, sed & substructio ipsa & exædificatio Christianismi, columen & fastigium religionis, eo firmamento nituntur: id enim pro axioma tenere nos oportet. Quod nisi fecerimus, aqua disputationis nostræ, ratioque adeò tota prorsus hærebit sanctioris philosophiæ ac theoricæ. nam & sanguinis Christi expiabile numen inde pendet, quo fœdus vnitatis mortalium cum superis atque immortalibus, sanctum est. Postremò hoc habet philosophia tanquam diuinæ cornu copiæ, vnde non alimenta modò theoriæ, sed etiam delicias suppeditet contemplationi æditæ & reconditæ: vnde diuitias summas animi studiosi promat, fidem, spẽ, charitatem: vnde in rebus acerbissimis, æquum animum, in secundis, vitæ contemptum. Est apud Platonem in apologia Socrates Delphico se oraculo differens sapientissimum hominem pronuntiatum esse, non aliam magis ob causam, quàm quòd nihil se scire

opinaretur, nisi vnum id ipsum, nihil se scire ipsum. Vas illud lectissimum summi ac cælestis Promethei, Paulus iam sæpe dictus, ad vnguem figuli ipsius absolutus, nihil se scire gloriatur, nisi Iesum Christum Seruatorem, eumque cruci suffixum. Vtrum igitur horum doctiorem, sapientiorem, rerum commodarum homini prudentiorem, arbitrari debemus? hunc claro elogio nouimus in cælum sublimem esse raptum, haustaque doctrina ex adytis sapientiæ, nobis oracula fudisse, diuinæque cōsilia enarrauisse, ea demum quæ in vulgus promulgare ac prodere, quatenusque licuit. à quo viro præcipuè, secundum quidem Deum simul hominemque Christum, factum est, vt studium sapientiæ in cælum è terra sublatum sit: quod contra Socrates è cœlo in terram deuocauerat, ad mores hominum componendos, quorum immortaleis esse animos ipse quoque censebat, si Platoni credimus. Profectò harum rerum commentatio cōgruens est homini philosopho, primæque & summa digna philosophia. cuius vnus & studii & contemplationis altitudinē, magnitudinem, amplitudinem, non dico exhaurire nequirent omnes philosophorum sectæ, numerosæque familiæ atque ingeniosissimæ: sed satis admirari, si nunc reuiuiscerent, rectamque religionis opinionem, quæ orthodoxia dicta est à Græcis, tuendam aggredierentur certatim & explicandam. Dei filius idem ratio & sermo & sapientia patris, cælitus delapsus è folio diuinæ maiestatis, cum humani generis gratia hominem iustum plenumque suscepisset: in eo homine ipso cætera nobis simili, ortus tantum priuilegio, & culpæ vacatione eximio atque immuni, agi in crucem, in crucem (inquam) agi, figi, extinguique sustinuit. Hoc cum longè maius sit beneficium erga mortales, atque luculentius, & verò admirabilius, quàm mundum condidisse, in eoque vitam ficto homini luteoque inspirasse: quotus quisque nunc hominum id recordari videtur animo satis grato atque rem perpendenti, vt quidē par erat agnoscere gratiæ magnitudinē? Nam cum magnopere inculcatum sit, & penè auribus infixum populi & primorū, hoc consilio prouidentie, beneficentissimè, honorificentissimè, summæque indulgentia cum homine diuinitus actum esse, iccircoque Christū id facere cum patre & spiritu cœlesti statuisse, naturam vt humanam secum sublatam in crucem, ibique restitutam immortalitatis primæuæ natalibus, in cælum deinde ordines adoptaret & transcriberet: nos tamen certatim id agimus (ô diram amentiam) certè quidem plerique qui in medio & publico viuimus, longissimè vt à cruce dominica liceat nobis esse, vitamque traducere.

At hoc quidnā est aliud (cōferre enim hīc pedem cum veritate tandem oportet) quā seruaturæ Christi acta aut abrogare, aut irrita facere? quā præcuntem nobis Deum viam salutis, destituere, in diuersūque iter contendere quā quisque potest maximè? O vitam hominum præposterè, ô exitialiter, ô perditè comparatam! tu cū Christi nomen, numen, doctrinam adores: cū expiabilem esse censeas & fateare: ita tamen vitam studiāque vitæ instituas (de me autem cum primis loquor) ab eius vt præceptis, institutis, exēplis abhorrere videre? Videamus per Deum ipsum immortalem Christum, immortalitatisque parentem, ne id ludificatoris sit assellæ, aut parum sanæ mentis. Nos stipendia facere auspiciis Seruatoris omnes videri, existimari, perhiberi volumus, vtpote sacramento mirabili in verba eius adaacti. Quis enim hoc non magnopere præ se ferre contendit? esseram etiam eiusdem militiæ, insignēque gestamen venerari gaudemus adorabundè. Ceterū ærumnulas, muniāque militiæ, quorum illa sunt indicia & monumenta, obire reuera abominamur, vt mala, vt incommoda (ô rem cum professione Christianismi discrepantem) vt homini omni ope opibūque depellenda & procuranda. Heu incertum & stolidum vitæ nostræ propositum, ac nihil omnino præferens quod spectet ad finem bonorum confectandum, malorum auersandum. Nisi verò non rebus affluentibus & lætis exultamus, gaudiōque perfundimur, vt salubribus & expetendis: tristibus & aduersis vultus ducimus & contrahimur, vt noxiis & longè reiectaneis. Adde quod diuum Paulū ipsius hypodidasalum sapientiæ, qui in cruci affixo meritò ponit omnia, & beatum ipsum, & æternarum rerum prudentem & consciū, tum fuisse dicimus maximè & credimus, cū de Christo philosopharetur, crucisque supplicio: & porrò inspectorem supernæ sapientiæ, arcanorūque eius mirabilium & visendorum. Age iam, cū diuorum reliquias miremur vt heroum, earūque loculos auro & gemmis ornare moribus receptum sit: qui velut calones Seruatoris, susceptam eius clauam ad extremum pertulerunt, partim non frigore, non æstu, non inedia fatiscentes: partim ne acerbissimis quidem pœnis cedentes, maioribūque humana patientia: sed cū eam ob rem memoria eorum publicè consecrata sit: cū priuatim beata, augusta, votis etiam imploranda ferè existimetur: quī fieri potest duntaxat fide bona, omnia vt è diametro opposita, omnibus vngulis (vt dicitur) captemus & aucupemur? nimirum, quod prudentia ista, quæ in publico mediōq; versatur (de Nestorea

loquor, & senatum principem) cū in perspicieḁdis vanitatibus Argō oculatior, in rebus temporariis Corculo illo ciue Romano cordatior sit, in diuinis tamen rebus æternisq̃ue existimandis, hebes, secors, excors esse, atque adeo væcors, manifestò deprehenditur. Age rursus, paulisper fateri verum, sustineamus: vt fit, cū fidiculis sordidatæ conscientiæ subacti, sacerdoti expiatori indicare nos contaminatæ mētis, & malè sibi consciæ, visum est. Quotus igitur iam quisque nostrum, de spe æternorum bonorum interdum percunctantibus, cuiusmodi, quantāque habeamus eorum expectationem atque desiderium, ex adyto cordis sui responsa dare iudicandus est? & non è limine potius ianuāque tantū eius templi, in quo templo verbum Dei veritatisq̃ue diuersari sustinet? & nos adoptionis liberi (ij enim esse verissimè gloriamur) hospitem admittere veritatē non veremur, non grauamur, non perhorrescimus, in diuersorium vanitatis, & simulationis, & perfidiæ? Nisi verò non est perfidia, fidem fallere, ab eoque reuera desciscere, in cuius verba solenni sacramento diximus. Enimuero illi duo falsi testes & vanissimi, sceleratīque mentis humanæ interpretes, vultus & lingua, mundum impleuerunt vanitate, præstigiis, & circumscriptionibus: quæ ludibria sunt aperta Christianismi, apud Deum quidem illa, criminosa atque capitalia: ceterū apud homines, laura atque vendibilia: si quidem ad verum loqui, non ad veritatis simulachra volumus. At id si aliàs vnquam, nunc omnino nobis faciendum est, tanquam in exhedra quadam sanctioris philosophiæ differentibus: atque id cum paucis tantū, iisdemque initiatis (vt aiunt) maioribus initiis, & profanis procul arbitris: sic enim existimari volo. Nam quid dissimules? quid te ad maiora referues? Num locus alius, num tempus, num argumentum appositius aliud esse potest? Iam verò Ioannes ille baptismi proditor primus, ab eoque nomen adeptus, quem vnum euāgelus, cœli aduena, pro cognitore dandum censuit mortalibus, vt idoneum & locupletem (ab hominibus enim Christus nondum agnoscebatur) quanquam cognitore non opus erat ei, qui tesseram circūferret indicem sui generis ac natalium, edendis tot talibusque theurgicæ miraculæ facinoribus. Et erat missus è cælo ad res humanas inspiciendas, potestate cum summa, summoque cum imperio. Verū ille ante ambulo veritatis & prænuncius, quodnam tandem initium adueniens dedit disciplinæ philosophicæ? Resipiscite (inquit, ad populum iuxta atque primores loquens) quandoquidem regnū cælorum appropinquauit. Resipiscētiam autem nemo nescius est (opinor) mæ-

stam, & veluti squalentem recordationem esse, ob errorem admissum in vita instituenda, atque in ratione comparanda ad functiones animæ commodas, naturæque rationali consentaneas & congruentes. At verò cui resipiscere contigerit resipiscencia euangelica, id est poenitendam esse admodum pigendamque Adamidarum vitam persentiscere: qui cum salutis appetentis præcursores philosophari, qui cum ipso denique Iesu Christo diuinitatis emissario & interprete, rationem vitæ beatæ inire instituerit: huic in primis expiandus ille Adamides vetustus est, qui in Dei comitatu obsolescit, cum aliàs, tum verò poenis ob secus vel admissa vel consulta & instituta, ab sese expetendis. Et qui è cælestis iam vitæ præceptis, quæ inter mortales inclaruit per Iesum Christum & prodita est, rediuium hominem suum formare concupierit: is suauem vt nexum disciplinæ euangelicæ, atque interpolatricis hominum, ineat necesse est. nanque hac vna ratione vitæ, tetro ex illo cæcòque ergastulo Stygij plagarij exire, in libertatèque poterit asseri arbitrii, dignam animo immortali, & præsertim philosophiæ cupidissimo. Liberum autem arbitrium cuiusmodi intelligam hinc testandum habeo, ne conflictari mihi contingat cum iis qui status controuersiam duriusculam nobis faciunt, aut cum illis qui decretis vel nouis, vel rediuiuis potius, in necessitatis compedes impegisse dicuntur: quos Christus vindex cælestis, liberali manu (vt antiquo verbo loquar) asseruerat, è catastâq; A Egyptiæ impotentæ & Hellenismi, ad pileum Hebraismi prius, deinde Euangelismi, euocauerat. Mihi quidem τὸ τε αὐτεξούσιον, καὶ τὸ ἐφ' ἡμῖν, καὶ πάλιν τὸ ὑπὸ τῆς προνοίας προσωρισμένον καὶ καθεστὸς, altrinsecus posita, eiusmodi disceptationem excitare videntur, quam propter intellectus humanus Pythium illud γινῶθι σεαυτὸν recordari debeat: deque ipsa controuersia, cuius Paulus disceptator esse arbitèrque veritus est, aut prorsus nihil, aut amplius atque amplius pronunciare in perpetuum. Quid enim iudicio mortali cū iis, quæ Deus ignota nobis esse voluit? Hoc autem nuper vir doctissimus, ac de literis eximiè meritis, quem nominare in præsentia supersedeo, rectè censuisse mihi visus est, in locum illum insignem scribens epistolæ diui Pauli ad Romanos, contrà quàm plerique arbitrabamur eum sentire, ob quædam quæ exierant ab eo præproperè, aut exciderant illi fortasse expressa studio amicorum. Ego verò existimo (vt alibi dictum est) eas contentiones, quæ hac de re quibusdāque de aliis exarserunt non ita pridem, studii plus habuisse (vt fert concitatae mentis impetus) simularisque philosophicæ, nō vnīs forsitan in partibus, quàm æquitatis

innocenter æmulæ, ac candoris animi, euangelico spiritu indolèque imbuti. quod pace dictum velim omnium ad quos id pertinere potest. Satis enim omnes nouimus quàm ægrè sibi temperare soleat strenua vincendi cupiditas: præsertim cum Marte suo splendentique freta est, & Palladis instinctu percita, geminis armis instructe. Haud equidem nescius sum, ita nos esse liberæ volūtatis, ut & motus animi nihilofecius, & temperatio habenæque; propositi ac consilii, apud hominem illa quidem, ceterum penes Deum sint, animorum utique potentem, & creatorem. Siquidem prouidentiae fascibus & auspiciis, arbitrii ductus, tenorque volūtatis, consensu omnium cedit non insipientium: utpote in quo viuamus, moueamur, & simus: quod idem Paulus ait. Nec ideo tamen quisquam est sanæ mentis, quin in perperam consultis, in temere susceptis, in secus admissis, simul ut resipuit, destitutum illico à Deo sese culpa sua aut scelere fateatur, perurgente cōscientia: quin pœnam eo nomine, à numine, ab homine deprecari vereatur, quasi non volēs ipse, insonsq; peccauerit, etiamsi imprudenter quasque imprudēs egerit. Quocirca putidum admodum est auribus lectorum & auditorum ac fastidii plenum, quòd quidam scriptores huius temporis, homines pereruditi in disciplinis elegantibus, libentius nihil faciunt, quàm ut libero arbitrio eiusque assertoribus proteruè conuiciantur, alternasque commentariorum paginas eodem argumento impleant, sese in hoc venditantes factioni, vernili penè dixerim loquacitate: ut non decantatior fuerit Orestes olim in fabulis scenicis, quàm arbitrii & iustitiæ humanæ per ludibrium mentio in libris theologicis. Neque verò sunt hæc acroamata tam scita, ut decies repetita placeant & centies. Neque fides & dilectio numeris omnibus absoluta, mellita sanè vocabula, suauioque digna, atris illis salibus discordiæ satyricisque aptè commendantur, aut conueniunt. Atqui, hæc ipsa nomina, honoris tantum causa Christianismi commendanda nominatim atque euangelii, sordere iam cœperunt, atque obsolescere usurpatione nimia. Equem enim iam pudet, non dico scriptorem memorabilem, sed vaniloquentiæ nunc celebris institorē illiteratum & officinarium, iustificam istam fidē, nulla non virtute vacuam, supinam & inertem, & verò sempiternæ vitæ securam, obuio cuique venditare, libello è sinu prompto? & homines non animam sed spiritum ducentes, & charitatis alumnos (ut quidem credi volunt) amarulentæ sarcasticæ sententiis non pudet, aut piget, rerum diuinarum commentarios scèdè contaminare: nimirū multa acrius & nauius oppugnarentur,

celerius & certius expugnarentur, in hac quidem certè specie, composita acie argumentorum, ac genere scribèdi didascalico: quàm petulanti maledictorum agmine, & vicissitudine rescribèdi acerba, & argumento dissona. Etenim moratas disputationes, qua de re nunc agitur (mea quidè sententia) non morosas esse conuenit, si numine afflatas esse volunt existimari: quod necesse est omnino iis qui persuadere cupiūt. Verùm enimuero philosophia nostra Christianismi alumna, admodum diuersa est, abhorrensque ab Stoica & arroganti: quæ nihil non tribuit & largitur humanæ sapiētiae, cum hæc nostra oraculari authoritate cōdocefacta, homini quanuis eximia ac felici natura prædito, quanlibet docto & sapienti, nihil opis & præsidii in cohorte sensuum, nihil in facultatibus animi esse censeat, quantūuis tranquilli, compositi, atque considerati, duntaxat ad summam bonorum adipiscendam: si quidem fiducia sui subnixus, vel vir, vel homo, pomœria egressus sit diuini præsidii: aut si tessera vigiliarū oblitus, securitatis culcitre indormiscere cœperit, tanquam sub tutela tutus sapientiæ philosophicæ. Offensatrix est enim casitatrixque adeò humana sapientia, adminiculique indigens supernè profectitii: non aliter atque inter velificandum nauta, tametsi non cessans & sollicitus, flatus tamen indiget obsecundantis, qui votis exoratur vt Dei indulgētia. Et nobis res est in vita cum angue peruigili, reptili, calcibus imminente, stolido primùm sensui quasque muliebri, obrepente: dein rationi quoque sensim masculæ ac meditatæ, sæpe etiam à calce sursum versus arrepende, eorūque tandem ceruicibus sese centuplicato circumplicante, qui hilares, nitidi, prætextati, conchyliati, tum sacris & profanis fascibus conspicui, turbam summovent longissimè popularium. Sator est idem messorque scelerum, ex improviso ferè imminens, omnes articulos callens, omneis aditus tenens circumueniendi hominum quanuis circūspectorum. Cæterum eo exitiabilior hostis, atque inimicus capitalior, quòd minus iis infestus est, vnde propius abest: id quod iam olim de vulpe in prouerbum venit. Nam quos in ère suo esse nouit, eos partim in tranquillitate quadam acquiescere atque securitate, partim altum somnum edormiscere prosperitatis sinit: nimirum feriarum vitæ vsuram, & laxamenti deliciarū, in nexu sempiterno durissimè exacturus. In vniuersum porrò generis humani noxiæ antiquissimæ & decantatissimæ, parens & auctor: quæq; diuinitus tantum expiabilis erat. qui ob superbiae immanissimæ facinus, cælestiū ordine motus iudicio Dei, primo amplissimòq; gradu dignitatis deiectus profeleno præcipitio

(vt Græco verbo dicam) malorum omnium vitiorumque semetem, per orbem terrarum vbique iecit ob inuidiam: ex qua messem perennem animarum iam inde à primordiis rerū facere instituit, atque in dies magis ac magis pergit, multiplicem & variam, & exaggeratissimam. In messe autem quam Seruator sibi facere suoque in agro instituerat, quem suo nomini nuncupauerat & consecrarat, annulo etiam suo sponsalicio obsignauerat, stragem semper edidit & populationem, sæculis multis calamitosissimam: & verò nunc maximè pergit edere luculentiorem indies, quā plebis, quā procerum. Id quod communis sensus animaduertere, partim alias res agitans, partim ad res stupens perpetuas & immortales, non potest. Pròh supreme conditor, ex tanta massa tuæ figlinæ quotam partem delegisti, quam in cohortem illam beatam fecerneres amicorum? Quis rationem inire hanc auspicetur sine horrore animi ac stupore? Verùm ille improbus, mortis immortalis conditor, à primordiis protinus, & à vitæ intellectusque tyrocinio, mentem humanam ad imaginem Dei factam, de statu deturbauit securæ ac beatæ innocentiae. In vno autem aut in altero homine liuoris sica feriendo, posteritatem totam in æuum sauciauit, lethali quidem illo, nec tamen inexpiabili vulnere. Etenim Dei filius, decreto æterno destinatus humanitati suscipiendæ, immortalitatisque morte sua mortalibus restituendæ, in crucem actus ab hominibus, (quod identidem inculcandum est auribus) naturam ipsam humanam, quam diuinæ sociabilem aduentu natalitio fecerat, in gradum ille quidem, sed tamen sic reposuit, vt caducam ipsa conditionem retinuerit, cum voluntate (vt suprà dictum) utroque versus quodam modo libera, tametsi obnoxia.

Hic locus est, parteis vbi se via findit in ambas. Et animaduertendum nobis est hoc in loco etiam etiāque, quò nobis hæc libera arbitrii, qualis est illa cunque, data sit: quanto cum discrimine ad finem properemus, & summam bonorum aut malorum: quàm decliui denique loco, quàm lubrico, quàm abrupto situm sit diuertium illud viarum, sursum semel, deorsumque ferentium: quandoquidem inde reditus nullus est (horrendum dictu) sperandus aut timendus in sempiternum, adeò metus nullus illuc, spes huc omnino nulla comes est. At vasculum nullum horoscopum mortis inuenire hominū solertia potuit, duntaxat non vanissimū, etsi summa industria cælestium motus corporum, statasque vices eorum conuersionum, scrupulari obseruatione comperit & prædixit, atque eo amplius momentaria. Philosophia autem euangelica non alio vel

solario vtitur, vel nocturno horoscopo, quàm tessera vigiliarum à Domino nobis data, qui excubias & matutinas, & vespertinas, antelucanasque edixit. Omnium enim horarū aduena est mortis nuncius: idem viator supremi tribunalis, interdumque vadator hominum, præceps atque tumultuosus. Proh diui nunc immortales, quodnam argumentum conuenientius esse potest, aut commodius commentationi philosophiæ? Certè sub armis eius, intraque præsidium philotheoriæ expeditos, à morte deprehèdi satius est, quàm sub fortunæ sarcinis, in campo ambitionis, in statuiis cupiditatis, in diuersoriis amœnis opprimi voluptatis. Verùm enimuero mentes ad diuina æternaque contemplanda conuersas, furia veteratrices, & improuisæ, atque vbique locorum grassatrices & maleficæ, variis auocamentis ac ludificationibus abducunt: opinionem vel fixam æternarum rerum labefactant: quippe quæ res gestas à Seruatore, actorumque seruaturæ auctoritatem, omnem etiam (vt suprà dictū est) œconomiam tametsi testatissimam, in opinione, in sensu, in fide tot ætatum, tanquam in æs incisam, monumentis marmoreis & cedrinis, æuoque nullo cessuris, insculptam, inculcatam etiam tot gentibus, & cordi (vt ita dicam) terrarum orbis inustam, tum fide, morte, cruore tot agminum deuotorum sanctam, fixam & affirmatam, tamen labefactare identidem aggrediantur, machinisque conuellere multifariam. Nam etsi fundamenta Christianismi Herculis columnis firmiora sunt in vniuersum, in singulis tamen mortalibus labantis animi tentationes identidem repetunt, molestaque negocia permultaque exhibent, nisi numen adsit præsentissimum. Tanta enim fuit magnitudo beneficii diuini erga homines, vt illi cedat prorsus humanæ mentis captus, in nullo non nostrum interdum eo repetente vitio, quam apithiam vocant. Quapropter (vt inquit Chrysostomus in epistolam Pauli ad Ephesios) longè admirabilius est Christum viuentibus legem euangelam persuasisse, quàm mortuos exuscitasse: id quod validis ille argumentis ostendit. O Economiam autem, ab ipso Christo administratæ, exactus intellectus eiusmodi est, vt de eo id dici possit, quod de dæmone Ægyptio Lucanus poëta scripsit, Nunquamque satis quæsitus Osiris. Tum de fide harum rerum certa, id Ouidianum non minus dicetur appositè, Semper enim perdunt, semper & inueniunt. Hæsitatio enim nostra, rei toties etiam à nobis iudicatæ quæstionem refert subinde renascentem. nec verò nostra fide quicquam eius rei promittere possumus, nisi Christus æternitatis sponsor, & Ecclesiæ sponsus, id sua quoque fide esse, fiduciâq;

fui iusserit. Et mens quidem humana atque ratiocinatio, vt mus in pice (quod prouerbialiter dicitur) in æternitatis contemplatione, in iisque conflictatur, quæ de Christo domino nostro, deo eodem atque pariter homine dicuntur: quæ de libero arbitrio, de sempiternis actis prouidentia, quos *περὶ τοῦ θεοῦ* Theologia vocat, vt inquit magnus Dionysius: à quibus ipsis vtique genealogiam illi duram necessitatis ducunt, qui liberi arbitrii appellationem nimio opere oderunt. Iure ciuili liber est homo non minus, & ingenuus, qui omnium legum nexu tenetur. Arbitrium igitur esto etiam liberum, licet ob noxam illam primordiale obnoxia sit condicione. Equidem hominem sic meritis suis, fidei fundamento nixis, saluum fieri puto, vt seruus suis nummis redemptus, liber olim fiebat. at seruus suos habere nummos nequaquam propriè dici potest, cum nihil mancipio sibi quærat & possideat: ne homo quidem liber arbitrium habere vllius rei potest, quod non magis Dei sit, proprium, quàm eius qui habet, suum. Proinde vt iure summo coniuente, seruus nummis è demensi sui reliquiis, confectis, ad libertatem: sic homo arbitrii sui adminiculo ad salutem æternam aspirare non prohibetur, indulgente prouidentia. Verùm in iis aliisque eiusmodi mens humana curiosius commentans, in asystata quæ dicuntur argumenta, incurrit, quorum exitum inuenire, explicationemque nemo potest. Quare in ea caligine speculationis deprehensis, quasi in æstu alternantis hæsitantiæ, opinationisque euariantis, ad sacram illam (vt iam dictum est) nobilemque anchoram *πρὸς θεὸν* respiciendum, in eaque subsidii certi fiducia secundum Deum collocanda est, vbi nullus temeritati atque errori locus est. Id quod mihi Paulus sæpe dictus. Theosophorum Plato, admonuisse videtur in epistola nobili quam ad Romanos scripsit: cum in Dei iustitiâ atque prouidentiam inquirere nos vetuit, selectarumque animarum, & reiectanearum iura, causasque disceptare. Neque enim analogia intercedit inter præsciētiam Dei consiliaque, & intellectum coniecturamque hominis, & oracularis elogii ponderibus, non humani sensus præiudicio, argumentationisque philosophicæ, rerum æternarum auctoritas & fides expendenda est. Mihi verò non modò curiosum, sed etiā fraudi ingenti videtur obnoxium, quod paulo antè dictum est, in ea inquirere, quæ Deus clam nobis esse voluit. Etenim multos olim mortales doctos alioqui viros & eximios, transuersos abripuit cōtentionum æstus, tuendis pertinaciter dogmatibus incōsultè susceptis. huiusmodique non ita pridem æstus, nescio quo primùm numine, an turbine excitatus, tantoque interuallo:

è re esse Christiani nominis, nobis probari nequit, omnibûsque (ut ipse reor) æstimantibus secutam inde atrocitatem digladiationum, extremâque exempla petulantia facinorosissima. Huius tamen indignitatis solatium vnum habemus, ne vndique vita pudenda sit & detestanda. Negari enim non potest, nisi ab imperitissimis, iisdemque literis verioribus iniquissimis, exoletâ iam & sordentis rusticitatis situm (quæ supercilio semper magis quàm sanctitate censa est) planè detersum esse hoc eodem tempore, qui scripturæ consecratæ obductus, per ætates permultas exortes literarum cognitionis linguarumque, luminibus non parum officiebat scholarum huius philosophiæ. Ingentem verò rursus iactum ab illis virtutis & honestatis, è nauis Domini factum esse: stragem calamitosam innocentia atque religionis, indidem enatâ esse: quæ mens cunque hominum, quod propositum cunque fuerit ipsius nouitatis designatorum, cum nemo inficiando esse possit, qui quidem non iniquus arbiter sit prodentis se veritatis: non video in rerum nouatione quicquam tanti fuisse, quamobrem gratulari sibi vita, nedum Christianismi summa debeat. nisi verò in vsum vitæ, in existimationem Christianismi, in dignitatem religionis esse potest, & mundo cõducibile, virtutum omnium chorum, quod decus est mortalitatis, doctrinæ philosophicæ summam tot seculis comparatâ, sapietia moratâ opinionem nulla non memoria augustam, è conuentu, è concione Seruatoris exigisse, explosisse, cõuiciosè exhibuisse: Ad iustificæ autem fidei adumbramentum, tanquam benefactorum omnium instar, & maleficiorum solum expiamentum, omnia redeigisse salutis subsidia: Excellentissimas denique virtutes, instituta vitæ præstantissima pro nihilo ducere, ut sordentis & obsoletas in conspectu Domini. Proh superi immortales, estne id animos hominum epulis accipere euangelicis & cælestibus, siliquas fallaces fidei & charitatis obuia & compitalitiæ, ieiunis obiicere: sicque lactatos homines imperitos, immunitate iusta & vacatione donare? Nam quotusquisque huius philosophiæ studioforum, præconium istud fidei iustificæ, sanè speciosum auditu ac magnificum, non tanquam congiarium quoddam opimum pronunciatum, excipit, vacationis operum, & licentiæ omnibus numeris solutæ timoris solliciti? eamque incuriæ inertis, perditæ securitatis, somniculosæ cessationis largitionem, ita acceptam refert doctrinæ recens editæ, ut iam vitæ disciplinam, morum seueritatem ridiculam esse putet, archaismumque deliri ac Saturnii redolentem? At ii huius liberalitatis auctores sunt, operisque faciundi vacationum largito-

res, qui donatiuis venialibus, tesseraeque vernalibus abolitionū pontificiarum, cum assensu multorū, plausūque primū refragati sunt: eo tamen blādiore (vt verum fateāmur) nouarum tabularum promulgatores, quod & gratis & vberius gratiam admetiūtur, & porro cum corollario in futurum quoque securitatis. Ecquis est autem sanæ mentis, qui causæ quicquam dicere ausit aut velit, quo minus vim illam saluificam, hominūque seruatricem, & deificam, mortalitas conscia suæ conditionis, acceptam referre debeat diuinæ indulgentiæ, non benefactis suis aut aliorum? Ecquis est porro, quin diuinæ naturæ fidem fixam, Christi que theurgiæ, fundamentum & fastigium esse cēseat spiritualis ædificij, quæ sedes est regni Dei? Sed tamen hæc ipsa fides, virtutum omnium sanè princeps, illarūque præsultrix & chorodidascalos, serie earum ipsarum & recte gaudet, vt comitatu sibi consentaneo & congruēti. Quin & chorum illum suum, gestamine crucis insignem & venerandum ab inertia & seignitie vindicans, munificem esse docet, ad functionesque vitæ obcundas instituit ad modos hieropsaltæ: qui non intus sibi que tantum ipse, sed extrā etiam atque omnibus cecinit. Hæc insignia, hæc decora, hos ritus religionis, si è ciuitate Dei persuasio gētium sustulerit, si mores antiquauerint, quid erit tum postea Ecclesia Domini? Nimirum officina quædā amplissima perditæ licentiæ, effrenis voluntatis asylum, vel libidinis potius, taberna voluptatis plena lenociniorum, cōubernium, collegium & sodalitas omnium vitiorum. quem ad finē haud dubiè huius philosophiæ studia spectant & manifestè vergūt, etsi alium ipse fuisse scopum eorum non dubito, qui primū hanc nobis telam ordiri institerunt. Quocirca hæc & alia his affinia acerba commentatione scribens, cum populo me agere testor imbuto perperam hac doctrina, cum eiūsque proteruis absurdisque defensoribus: non item fortasse cum auctoribus ipsis & nouarum rerū molitoribus. Quos mediussidius ipsos in maleficiorum inde quotidie nascentium reatu magis esse & inuidia, quàm in causa culpæque scelerata, per me licet vt omnes existiment, eorum sententiam, magis quàm verba attendentes. idque expugnari forsā posset, aut defendi, duntaxat quadam ex parte rerum, ad subsellia, aut in senatu prudentiæ, neutrā in partem procliuioris, tametsi vti nam ipsis in mentē non venisset: aut certè cautius fecissent & modestius, vt ex atrio Domini sacrosancto taxiarchiam tollerent, decus rerum & dignitatem, sacrarum æquè ac profanarū. Quid enim oculis vel orchestræ, vel ordinum, vel caueæ denique sobriæ & paulo

honestioris, approbare sese potest, in quo non sua constet ordinum
ipforum graduúmque descriptio ex qua maiestas orta est? Qua cum
ipsa (vt inquit Ouidius) confedere simul pudor & metus: omne vi-
deres Numen, ad hanc vultus composuisse suos. Hic enimvero re-
clamatuos scio quosdam, atque hoc, illud, aliúdque speciosè excu-
satuos, & verò vltro fortasse accusatuos: quasi meam hanc litem fa-
ciam priuatámque, hac ætate, contráque meum institutum, & præ-
sertim eiusmodi litem, cuius nec disceptator esse iure meo, ne dispu-
tator quidē possim. Sed tamen quid agerem, nihil minus mihi me-
ditanti euēnit, alióque iter contendenti, vt ad ruinam veritatis, ad
incendium sacrorum, ad naufragium religionis disciplinæque salu-
taris, occurrendum mihi esset, opellámque conferendum qualem-
cunque. An autem facinus istud auspicantibus vel fiduciæ vel au-
daciæ, cælestis auis, sancta ac sanctifica addixerit (vt augurali sermo-
ne loquar) Deus optimus maximus, iam iam ostensurus est, vt libens
coniicio: cuius numinis est vnus, auspicia rata irritáve facere om-
nium inceptorum. cuiusque admirabilis prouidentia beneficio, res
malo exemplo cœptæ, exordióque non probabili, vt quidem est iu-
dicium mortalium, bene interdū ac feliciter eueniunt cum stupore
ipforum. Exierunt nuper libri quidam bonis (vt speramus) auibis:
mihi quidem certè latis, qui penè neutrò propensius antea auspi-
cari institueram, cum de cælo seruarem pro meo instituto, attentè
fatis ac sollicitè. Hi cum in manus meas hac prodentis incidissent,
forte quadam oblata, non quæsitæ & rogata (neque enim contro-
uersæ inter doctos agitata cognitor esse accuratus cogitabam, &
succisui temporis tantum lector iandudum esse cœperá, non modò
commentator) Verum eos libros percurrere mihi cum contigisset,
primum ea de re homines non leuiter amare cœpi, alterum præser-
tim à quo nunquam animo alienus fueram ob ingenium hominis
doctrinámque eximiam, etsi à studio partium illarum non nihil dis-
sidebam: deinde nobis literisque gratulatus sum, quòd res contro-
uersas spectare ad concordiam quadamtenus existimaui: siue illa fu-
tura est multo æquior conditio dissensionum, & expiabilior. seda-
tioribus tantum animis opus esse mihi visum est: stomachisque non
ita crudis vtrinq;. Hactenus impetu & clamore & præcipiti impres-
sione res gesta sit, quandò ita res nata est: placidioribus iam modis
argumenti tanto interuallo reducti agenda est tragœdia, si quidem
est peragenda. Est autem eius generis argumentum, quod vtroque
versus fecundè tractari, & facundè etiam possit magna quidem ex

parte: sed vtinam tranquillè quoque ac compositè. id quod tum demum futurum est, cum modos ipsis actoribus fecerit æmulatio digna Christianismo. In causam vtrinque insignes ac numerosæ aduocationes subscripserunt: illinc tamen plures studio præcipiti aut inconsulto. In illam etiam partem nostrorum hominum transi-
 tiones, meticolosè quidem illæ atque mustitabundè, sed tamen crebrò factæ sunt, & tanquam palabundè. Vsq; eadeo quædam sunt sic à communi persuatione auersa, vt tamen ea controuersa fecerit festiua nouitatis facies, quæ aut erronibus animis, aut volucris mirè lenocinatur. cum eo quoq; quòd illinc copiarum ex euocatis ac volonibus conflatae sunt, quæ ad pileum insolitæ libertatis & inauditæ cupidè conuolauerunt. Mihi verò cum non paucis id permolestum fuit, & simul periniquum esse visum est: quòd literarum bonarum opinio nostrarum iuxta atque peregrinarum, in inuidiam vnà quoque cum inuisis dogmatibus, in discriménque vocatae sunt eam ob rem, perinde vt in crimen. siquidem quàm maximè hîc visa est feruere contentio, atque illa ex parte per occasiones passim eualescere (aut casus enim temerarius interdum, aut hominum culpa victoriæ impotentium, hîc quoque quodāmodo *νῆκιν ἐτεροαλιεύα* fecit) tam maxima flagrauit inuidia ad populum primorésq;, literarum splendor restitutus ac rediuius. O quàm iniquè iudicium sensus communis vel natura vel moribus comparatum est. Verùm huiusmodi studiorum erat nostrorum conditio, iniqua quidem illa, ac tantum non pœnitenda, sed tamen vt sperare meliora liceret ac lætiora. Ecce autem (pròh Chrîste splendor diuinitatis, decus humanitatis) facinus, scelus, nefas, literis ipsis ex æquo penè indignum & importunum, non vernaculum quidem ipsum, neque nostræ fœturæ: sed importatum audacia proiecta, vt mihi cōpertum est: cæterum ætatis nostræ probrum olim futurū, nisi diuinā benignitate verterit in clausulam malorum: id quod sperare ipsi non de nihilo cœpimus. Nobis igitur hæc scribētibus, hydra quædā cæcæ ac vrsanę peruicaciæ, quę in tenebris alebatur, in hac vrbe repentè, aliisque multis nobilibus in oppidis extitit ac prodiit: factionisq; inuisæ ac lucifugæ, pleærque literarum ignaræ, corda, sensus, ora, sic insanè, sic dirè peruagata est, vnus vt & alter Hercules, claua, ferro, flammæque rem gerentes, satis esse non possent, si superstites essent, tetro ac multiplici monstro, plurimorumque capitum, conficiendo & extinguendo. Etenim coniuratae impietatis dirisque deuotæ homines, scelus ausi confidentius, quàm illi quondam Athenis Hermarum accisores &

demutatores, eadem nocte cōdicta compluribus in oppidis, iisque disiunctissimis, ex composito, & veluti eodē furoris signo sublato, proscribere sustinuerunt, edictisq; maledicis configere, decus & columen pignusque Christianismi. Et furialis quidem ille genius, cui ne Christus quidem ipse seruatura hīc fungens, omnisque imperio præditus, ita fuit sacrosanctus, quin eius innocentiam tentaret numeris omnibus absolutam, nuper ad sacrosancti charisterii maiestatem non modò imminuendā, sed etiam obterendam accinctus & proculcandam, inuenire potuit qui manus conscelerare tanto piaculo non vererentur: nempe temporis conditionem nactus prope modum fide cassi, mundo nihil minus agente, quàm ea quæ antiquissimæ fuere curæ sæculis melioribus. ac post Triumviratum quidem illum morte è medio sublato, qui ad errorem antiquum denovo asserendum ab ipso designatus fuerat, supparis audaciæ complureis alios substituit, qui prouinciæ succederent flagitiosæ eadem peruicacia. Gliscente deinde scelerum profectu vt natura fert malorum, Aium quidem illum loquentem, sed Stygiū allegauit, è sinu suo productum, appositissimum emissarium ad enecandam fidem Christianismi, in ea prouincia in qua maximè valere adhuc orthodoxia vigeréque videbatur. Vt breuib; absoluam, post sollicitationes multas, variāsque hominum nostratum, quasque iam labantibus animis complurium, repentè Aium Locutium è faucibus Orci excitum, diris ipsi; sororibus diriozem, in ora populi inhalauit gentilis Christianismi, recta & sincera religione imbuti in vniuersum, vt qui maximè. diceret crapulam quādam Ditis patris esse, Mephitim eructantis prodigiosæ ac piacularis impietatis. In præsentiaque sollicitudinis publicæ summa, in eo erat præcipuè occupata, vt gens sanæ persuasionis alumna, extinguenda catharmatum multitudine, atque è medio omni ope summouenda, quasi manu quadam Orci emissaria, gratiam à Christo Seruatore ineat expiabilem, cuius maiestas paucis hebdomadibus læsa fuerat scelestissimè. infauit hospitalitatem impietatis translatitiæ, quæ eam contagionem attulit. O quænā satis terra discedere, quod chasma dehiscere illis Triumviris potuit, ne nominatu quidem dignis: eorūque mox hypodidascalis poterit, nisi citò resipuerint? quod equidē non despero. Itāne verò Herculis ærurnarum instar fore sibi putauere æquales nostri mortales, sollicitasse inferos ad dogmatis eius monstrū in lucem denovo reducendū? Quæ (malū) tanta illis esse potuit philosophandi commentandive infania? Siccine huius ætatis philosophiā feriatam

esse infeliciter, & vitæ exitiabiliter, vt in ritus rectè atq; ordine conditos, augustarúmque ætatum consultis comprobatos, inquirere ausi sint perpauci terræ filij? Siccine ἐρεβδιφῶντας (vtar enim verbo Aristophanis) omnia rimari iuuit, vt sese humo tollerent homines pumiliones, vt Herculis & Liberi, nostræ memoriæ æqualium, terminos superasse famámque viderentur? Ex eorú autem aliorúmque curiositate nimia & audaci, errorum odyssæa primum Christianismo, deinde scelerum ilias & piaculorum enata: quæ cælum terræ miscuit, & chaos penè reduxit. Exitit haud ita pridem ingenii mediocris homo, qui cupidine gloriæ accensus, cæca & præcipiti, ne ad Musarum conuiuium venisse ἀσυμβόλως diceretur, symbolum attulit commentitium, quod à magistris suis acceptum hominibus absurdissimis, longo vsu suum fecit: longè futurus vtique felicior, si vmbra tantùm esse, atq; ad epulas venire philosophiæ, a symbolos maluisset & inglorius. O mores huius ætatis. Hanc cine amentia? Hunc cine prudetiæ communis ac publicæ contemptum? Itane verò homines vāgrandes, cū sese in tragicam proceritatem cothurno sustulerint arrogantia, in cælum arietare verticibus audebunt insanissimis? sanctissimarum ætatum prudentiam atque doctissimarum, compellare vt deliram scriptis suis non verebuntur? Atqui præclara illa scripta, pigmentis inanibus iudicium hominum fallentia, quæ Saturno consecrasse se putauerūt, Vulcano quotidie magno plausu dedicantur cum eorum professoribus. Quin & vno edicto omnibus in prouinciis, primo quoque tempore animaduersionis diuinæ, aut sensim fortasse, conflagraturi sunt per resipiscientiam publicam. quæ aut futura est vtique ipsa propediem, aut ad extremum actum fabulæ rerum humanarum ventum est. Id quod significare videtur conuiuens in hisce facinoribus, vel conuiuenti similis potius, ludorum ipsa feriorúmque inspectrix & præses prouidentia, locorum etiam personarúmque designatrix: & verò omnium vt potens & moderatrix, ita rectè ac secus actorum ac consultorum arbitra peruigil, & æstimatrix. Quisnam igitur furiatarum concionum, quis perditarum coitionum nefas præstaturus est? quis porro pessundatæ & conuiciis conculcatæ mysterii mysteriorum reuerentiæ? hoc est enim quod magnus Dionysius τελετὴν τελετῶν appellauit, quasi piamentum piamentorum, sacramentum sacramentorum: & Synesius ἀπόρρητον τελετὴν, id est sanctiorem expiationē & reconditiorem. Egregii verò philosophi, atque de literis sacris æquè ac profanis meriti, qui ne nomenclatori quidem (vt aiunt) in patria antè noti, etiam

inclarescere huiusmodi docendis tragœdiis, vbiq̃ gentium, concupiuerunt & sperauerunt, etiã ne cùm scenam in diuersum verterent theologicæ sapientiæ? etiã cum offensione tercapitali ad superos mortalesq̃ offensuros se viderent? O diram vœcordiam. en rerum humanarum diuinarumq̃ magistram philosophiam: en disciplinam, fidei & charitatis Dei, tertio quoque verbo commendatricem: numine (credo) grauidam paracletico, quæ nobis pepererit dogmata huiuscemodi. Et cùm nefastæ illius doctrinæ promulgatio repagula fregit reuerentiæ Dei: tum commentarii licentiosi, alii super alios certatim elucubrat, ad vltima impietatis exempla, diuinarumq̃ rerum contemptationis, quamplurimos perduxerunt. Ius & fas vnà cum Dei metu deiecta sunt passim è vitæ priuatæ gubernaculis, ex quo licentioris religionis patrocinium, viri docti suscepisse visi sunt. Priuatę vitæ dico? quid si etiã multis in locis publicæ? Cedente enim ex Ecclesia Christi rituum priscorum disciplina, ceremoniarumq̃ receptarum opinione ab istis exhibitata, concessit vnà quoque fides, non è foro tantum vanalium, & è nundinis, sed etiã è præcordiis hominum: nempe quasi decoctrix pollicitationum domini. Est autem hic ordo rerum atq; processus, vt licentiam istam, solutam legum canonicarum vinculis, & cultus immunem religionis, euestigio sequatur cauillatio prouidentia, cum incuria salutis: quod luculenta docuerunt experimēta. At verò in primis id rancidum est auditu ac putidū: quod tacere non quiui prorsus cùm maximè cuperem. Nam fides & dilectio euangelica, augustæ quidem illæ virtutes, omniumq̃ virtutum longè principes, cæterum hac ætate, his moribus, his hominibus, non nisi de nomine cognitæ, benefactorum omnium, institutorumq̃ egregiorum splendorem, vmbra quadam nomenclaturæ, vt ampla in speciem ipsa & vendibili, sic euanida reapse & futili, obscuraauerunt. his enim vocabulis sanè plausibilibus ac sonantibus, commentarii facti sunt aliquorum, ad fastidium vsque aurium, offensionemq̃ lectorum, cum eleuatione improba & propemodum scurrili humanæ virtutis & iustitiæ. Ita vitiorum omnium colluuiōi, scriptorum verborumq̃ impudentiæ, & graueolentiæ dogmatum, quæ nullum non paulo sagaciorem offendit, Minerua (si diis placeat) pepalum suum obtendere non grauabitur? In quo peplo virtutes illæ primores solæ iam attextæ sunt, vel verius prætextæ, magna cum inuidia literarum elegantie, cùm nostræ, tum peregrinæ. Nam (proh Dei hominumq̃ fidem) quis fauere iam lingua, quis

temperare stilo possit in tanta indignitate sacrorum pollutorum? Indignitatem dico? Quid si autem ad vltimum ventum est discriminum? quippe cū de aris, de focus sanctioribus, de templis Deo sacratis dimicandum sit? de pignore denique immortalitatis beatissimæ, & tanquam de palladio Christiani nominis periclitandum? Sidera quis mundūque velit spectare cadentē, Expers ipse metus? quis cū ruat arduus æther, Terra labet mixto coëuntis pondere mundi, Compressas tenuisse manus? Vel quòd Theodidactorum appellatio ætate deterrima nata est, ac nullo metallo digna, mundo in nequitiam, in perfidiam, in diuinæ sponsonis diffidentiā, in nihil non erroris denique vergente & præcipiti, in nullum non nefas intrepidè ruenti: eccui hoc tandem stomachum non moueat, qui quidem ipse fibras corneas non habeat? Nostriſne moribus credemus euangelæ legis mysteria, benignius esse quàm antiquorum liberaliſque credita? familiarius & simpliciſ apertæ? at verò priscæ sanctitati, tanquam rusticiori, quamlibet rerum mirificarum designatrici, operta illa fuisse, aut ab oculis auersa? Cur igitur Christus sui ac veritatis testimonium capitale, eorum sæculorum animis denunciauit, si de arcanis altioribus celatos illos voluit? Mirum verò nisi per paucis hominibus nuper credimus, sanctissimis (credo) antistitibus theosophiæ, datum esse diuinitus, vt figuras, vt tropos oraculares intelligerent penitus, vt diuini iuris nodos soli, vt legum ænigmata soluerent, vt ratarum irritarūque legum discrimen certum tenerent: denique vt ceremoniarum ritus, ecclesiæ domini effata præirent solennia, quæ maiores illos olim maximosque præterierunt. ætas igitur nostra Θεολογικούς sapientes edidit: superiores omnes ætates homines ἀνθεολογικούς, eosdēque Ληρολογικούς. vitam credo, Deus ὁ Θεός esse voluit, quæ sero demum temporis nouissimi ac præcipitis, theosophiam cognouerit. Scilicet is superis labor est: aut fuit heri primū aut nudiustertius. Theologici senatus conscriptos spiritus Dei paracletus germanam paulo antè docuit rationem colendi sui, ac promerendæ gratiæ celestis & viuificæ: ad eam autem maiorum olim gentium patres, quamlibet vitæ sanctimonia memorabiles, aspirare non potuerunt. Vel hoc quis non credat, qui huius temporis instituta, qui vitam, qui zelum æstimarit hominū inclarescere quoquo modo cupientiū, ne dicam cacozeliam? At enim non magistrorū hīc crimē, sed discipulorū coarguimus: operā suam ipsis odioſè veditantium, & verò inuitis atque respuentibus, hieronicarū præmia, olympiæque vincentiū, cum improbè, tum verò inuidiosè decernentiū.

Esto sanè: hoc crimen sit turbæ ineptè assentatricis, & tanquam
 operarum quarûdam vilium suffragia sua nummo sestertio addicen-
 tium. id enim mihi libens doctrinæ hominum merito persuadeo.
 verùm eo saltem nomine in culpa sunt ipsi non leuissima, quòd fu-
 turum rei euentum prouisum habere perspectumque debuerunt.
 Atqui vel id fuit recordandum, quòd cùm carceribus sese effudere
 quadrigæ, Addunt in spatia, & frustra retinacula tendens, Fertur
 equis auriga, nec audit vulgus habenas. Nam quis iam nauem retro
 inhibeat, quæ fertur in scopulos, cùm remiges obsurduerunt? cùm
 vectorum plurimi seruari nō cupiunt? Tum illud extemplo occurrit
 hæc cernentibus, neque extemplo tantum & confestim, sed etiam
 ex Ecclesia conferctim, καὶ ὁ γὰρ καὶ ὁ γὰρ, quod prisco sermone ce-
 lebratum est, in discipulos huiuscemodi. Turbæ igitur ingeniū, æsti-
 matum oportuit, quæ cursim in eam sententiam ire pergit, cæcāque
 & præcipiti ferri cupiditate, quam satis constat non tam secundum
 libertatem pronunciatam esse, quàm secundum licentiam vindicias
 dedisse legum metu solutam humanarū iuxta diuinarūque: aduer-
 sus quod censuit prudentia memoriæ consecratæ, & venerationi
 semper habitæ. At eius vnus auctoritatis fiducia, magna hominum
 multitudo, benigna & liberalis interpretes eorum quæ scripta sunt de
 iure immunitatis Christianismi: πῶς ἔφθην ἐπιπληῶσα ὑπὲρ τὰ ἐσοικαµέναι,
 vt est in prouerbio, Proh superi, rem præcipitem (identidem enim
 rapior in stuporem) rem nouitatis inaudite, & fortasse omni ope pro-
 curandæ, quàmque propter lustrari ædes Domini ciuitasque san-
 ctissima debeat. Nimirum aut finis rerum adest, aut censura ista vel
 noua vel rediuiua quadam ex parte, tam multiplex, tot capitū, tanto
 interuallo denuo nata, breui interierit, aut stili sui modum valde
 temperauerit. Vnāne litura deleuerit, circumscripserit, obliterarit le-
 ges, ritus, mores, vsus, in communi sensu vitæ, in prudentia tot æta-
 tum inustos? veterrimæ sapientiæ subscriptione elogiōque compro-
 batos? Per me quidem esto, vt quædam circumscripserit vt superua-
 canea, quædam vt obreptitia præterierit, nonnulla vt spuria notarit,
 siue conuiuentibus illa, siue somniculosis obreperint religioni tem-
 perandæ præfectis, ne quid durius dicam: Sensum etiam ipsum cō-
 munem circumspectiorem in modū acriorēque conformauerit:
 superstitione porrò futilium ceremoniarum, aut emortuorum quo-
 rundam rituum homines non imperitos soluerit: quæ hætenus ob-
 strictam passim tenebant communem etiam prudentiam nexu o-
 pinabili, atque inueterato. Hæc atque alia quædam huiusmodi per

me licet, & per multos, vt nō modò festiuè ac plausibiliter fecerit, sed etiam commodè ac commendabiliter. Quòd autem blandiente incepti plausu, ad viuum altius sensim atque altius stilum suum sic impressit, aut impressisse certè videtur, Christianismi vt disciplinam non tam ad disquisitionem senatus cōsultiorum hominum doctiorumque vocarit, quàm momici eam conuentus tabellis subiecerit: id verò intolerandæ est confidentiæ atque iniquitatis, si qui tueri velint: capitalisque adeò erroris, si qui auscultare illis obstinauerint. Nisi verò Deum ingenia tot ætatum, nisi annorum sexcentorum sapientiam, & verò altero tanto maiorem tarditatis damnassee credendum est, sic excordis & stupidæ, comprehendere cuncti vt nequierint vim verbi euangelici: vnum autem & alterum tantū nostros æquales, intelligentiæ puræ restituisse suam contrā sententiam, qua sententia cætera multitudo cultrix Christianismi, eiusdemque alumna, tam grauitè ad hoc æui mulctata est. aut nisi seculi deterrimi philosophiæ prouidentia, veram, meram, & (vt aiunt) ipsissimam sapiētiam, familiariter & indulgenter ostendit, vt æmulæ fortasse supra alias fidei apostolicæ, aquisque (vt ita dicam) inambulantis, & priscæ sanctitati, insignibusque capitibus Christianismi, inuolutā ipsam edidit, vel imaginariam potius exhibuit spectandam & ludificatriculam. Acta (credo) hominum mirifica, vitæque exemplaris, fidem multitudini facit eorundem doctrinæ numine præsentissimo sanctæ & consignatæ. Felix profectò seculum, si ita est: illique ipsi homines deliciæ sunt Domini: neque ii quidem modò apud Deum gratiosi, sed eorum plerique multo magis discipuli: quippe qui omnibus penè numeris immunitatis donati sint diuinitus, vt quidem audimus, & interdum vidimus plerosque interpretari: quanquam ætate ferrea terrigenarumque nati: macti quidem illi cælestis priuilegii promulgatores, iuris diuini interpretes, blandi & populares. beata verò vasa Domini, sic à prouidentia electa: queis haurire solis liquidam illam aquam datum sit è puteis consecratæ sapientiæ, quæque post annos plus mille ac ducentos capere prima potuerint sensum, vsum, & fructum manantis inde doctrinæ. Et anchoram, si diuis placet, Christianismi, cū ecclesiæ Christi iactatæ & fluctuanti, tū fidei labefactæ & charitati Dei iam cōclamatæ, nouæ istius philosophiæ axiomata iecerūt: quod eorū quidam sentire, scribere, dictitareque videtur apertissimè. At hæc tamē disciplina, quālibet sanctę familiæ mater atque religiosæ, thiasum tamē vnā quoque peperit, in theatrōque edidit, Satyrorū Eleusinia venerāda irridentiū,

audacia sanè impia & detestanda optimæ partis mortalium opinione. O malè, ô absurdè, ô intolerantissimè factum, quod paucorū causa doleo, hominum doctissimorū eorundemque dignissimorum qui ingeniorum suorum specimina cōmendabilius ederent, publicèque fructuosius: quod fortasse facturi sunt, cū Deo visum fuerit Vertunum illum abditum circumagere providentiæ. Pulchrè exorsam esse telam noui operis, in sermone erat hominum, atque etiam opinione: cornicum statim oculos confixisse doctrinæ nouæ acumen ferebatur: at mox blandiente prætextatorum quoque ac purpuratorum plausu, modum tenere ardor animorum oblitus est, vt est mortalium ferè natura comparata, cū quidem Marte suo potius instincta est ipsa quàm diuinitus. Sermonis autem impotentia plurimum quidem illa offensionis habuit: sed eorum præcipuè culpa, actorum sanè ineptorum, qui Mimo subseruientes, partem quidem non contemnendam iucundo aliquandiu multis & plausibili, dum coryphæis suis succinūt, summa proteruitate vocum sententiarumque vsi sunt, & exquisitissima. Id enim non modò magnum frigus attulit dramati noui operis: quod pulchrè steterat re calēti: sed etiam puncta multa, eadēque classica, in summam causę detraxit. Accedit quòd factiosum vulgus, occultarum concionum cestro vel coitionum potius extimulatum, vehementius flammam aluit inuidiæ, faces alias super alias suggerens patrandis eo nomine facinoribus. quæ flamma cū apud nos casu magis nescio quo consedissee, quàm inopia materiæ putaretur: (quippe factionis studio non obscure inualescente, minúsque in dies ac minus criminose) inuidia suppressa aliquandiu, nocte vna erupit magnum in incēdium, nihil minus expectantibus: quo euēnit vt plures in securitate acquiescentes, partim deprehensi sint, partim semisomni euaserint, ac non nihil ambusti, ex incēdio tumultuosissimo. Iamque nobis hæc prodentibus, multitudo non cōtemnenda Vcalegontū, nō tantū eo casu flagrare inuidia, sed etiā flāmis cōflagrare, quod dolumus, cœperat. plures enim sceleris conuicti fuerūt, nec tamen nisi ad extremum confessi, quàm pro opinione hominum ac fama quæ præcesserat. vt nisi præsentissimo numine, atque præter expectationē hominū detecta esset coniuratio, & patefacta in ipso tēporis articulo, res non ad dissensionem tantū ciuiū de re summa Christianismi, sed ad direptionem & cædem mox spectare videretur. Maledicorum autem partim, malefici quoque esse ita affectauerant, vt proscribēdæ passim orthodoxiæ, cōfigendique verbis & maledicentia libellari atque progrāmatica,

sanctissimi crusti & consecrati, partes sibi depoposcerint: non contenti tacita atque ignaua sceleris conscientia, nisi tragico facinore piacularique admissio, pariter quoque cum animis manus arsuras consceleraret: sicque multitudinem eundem in furorem traherent. partim etiam eorum viam in cælum inferum affectauerant Herculis OEtæi Calanorumque exemplo. Cæterum utrosque pœnituit, puduitque ad extremum, elatæ funere religionis probæ quantum in ipsis fuerat: id quod ipsi testari certissime possumus, quos vehementer misertum est hominum pœnis exagitationum temerata, & compellata capitaliter, perque compita traducta, victimæ, Dei verbo consecrata. Illud vix dixeris indignumne sit magis, an ridiculum: quod homunculi permulti non planè trientales, in partes descendere feroculè instituerat, vel ascendere potius: atque in digitos erecti, sic causam totam complecti, ut hoc vno ingenii sui documento, sibi metipsis viri magni, stultis etiam hominibus aliqui esse viderentur. Iam dudumque vel pridem hæc ratio cœperat esse inter alias celebris ingenium & industriam proferendi, in mediumque prodeundi, hominibus præsertim literarum nesciis. quos rhapsodos paucis mensibus, an diebus fieri moris erat locorum scripturæ communium, in libellis decantatorum in dies aliis super alios exeuntibus, hosque pensiles circumferre cum pugione solenne erat nebulonibus, aut in loculis tunicarum conditos, sicunde metus erat. horum autem ilias nobis orta est paucis annis, atque huiusmodi inscriptionum, quas propter vadimonia deferi possent, quod olim Plinius dixit. Equidem doctorum causa auctorumque nollem factum, chalcotyporum ut officinæ vacassent libris vernacula lingua scriptis, passim editis ac publicatis. id quod eorum refert maxime, qui meriti sunt in primis, ut tanquam insignia familiarum enumerentur huius philosophiæ, qualis est illa cunque. Nam veluti tractata notam labemque remittunt Atramenta, ferè lectores crimine fœdo Splendida scripta linunt, aut si malunt ipsi, candida. quanquam & latius multa leguntur, quæ criticam manum poscere doctiorum ac prudentiorum existimantur: notamque spuriorum manere indignorumque germana familia. Aduersariarum quidam partium, quanquam non admodum ille quidem atrox causæ inimicus in summam, ut præ se ferre videbatur: sed ridiculis gaudens, cauillando aiebat, è semine nouarum rerum iacto nationem quādam Thaumantidarum extitisse protinus. sic enim appellabat, qui stultorum admiratione magis, quam suapte vi creuissent. in quorum disciplina, fluxa tantum

esset & euanida veritatis species, religionisque probæ scita magis & vendibilis, quàm rata & probabilis adumbratio. simul fidei & charitatis simulachra mogno-gramma, ideis haudquaquam solidiora, non aliter atque in ea cælesti specie, quæ Thaumantis ob id dicta est, oculorū ludibria pro veris rebus cedunt, apud homines quidem naturæ rerum inscios. Hæc hominis forsan cauillatoris verba videri possunt, vel causæ magis inuidiosæ iniqui, quàm animi è sententia loquentis, quod quidem ad aliqua pertinet, ad aliquosque eorum. & fateri tamen oportet vel defensores ipsos patronosque nouitatis, vnus & alterius mortalis fiducia (siue illa fuit confidentia, vt plurimi censuerunt) prodito audaciæ exemplo, mentem, linguam, stilum, temeritatēque factiosæ multitudinis, soluta passim fuisse liberatāque prorsus Dei reuerentia atque religione: vnāque effrenatam esse proteruitatem morum, petulantiam & lasciuiam. Quare in sæcula non ituram auctore tantæ nequitiae philosophiam, omnino credibile est. sæcularem enim patientiam huiuscemodi rebus prouidentia non solet accommodare. At enim, hæc ego nunquam mandavi, dices olim, nec talia suasi. Credo equidem cordi tibi hæc nunquam fuisse, quisquis es literarum sacrarum studium candidè prosecutus: plurimosque doctorum ita opinari arbitror. nemo tamen non illud statim excusanti intorserit ipsi auctori, si quidem secum agi placidè patiatur. Mentis causa malæ tamē est, & origo penes te: quippe qui elementa prima condideris, vnde fanaticū vulgus axiomata prima mutuatum est disciplinæ impiæ & detestandæ, quæ discendo quoque in dies dirior fit, & putidior. Iam verò quòd viris bonis, doctrina & facundia claris, lautāque Musarum supellectili copiosis & ornatis, in concionibus inuidiosè, in consiliis penè criminose obiicitur: quòd homines his ornamentis nobiles, ad labefactanda orthodoxiæ placita accincti sint: quòd sobrii ac meditati, subductaque (vt aiunt) ratione, pessundare religionem priscam, ritusque antiquissimos tentarint, atque probatissimos: succincti & freti linguarum cognitione: id tandem non viderint ipsi quò pertineat? quò gentium, quò errorum, malorumque euasurum sit, nisi obuiam mox itum sit consensu literis imcūbentium? si quidem togata multitudo, prætextatorum ordo, atque senatorius, holosericatorū denique natio, & cohors torquatorum, despuere literarum elegatiam perrexerint, vt cōtaminatam errore translatitio? Quorsum tandem? inquit. Nempe vt iubere actutum atque vbique necesse sit, literas ipsas valere cum peregrina eruditione, errorum importatrice mul-

titudinis opinione, atque etiam paucorum ac procerum. Quotus enim quisque in iis iam studiis acquiescere in animum inducet, quæ populi præiudicio, optimatum assensu, decretis criticorum damnata esse viderit, atque in exilium acta? At verò hoc consilio quid abruptius? quid nobis deploratius? quid ingeniis præstatoribus calamitosius? quid vitæ denique; damnosius esse potest, & exitialis? Proinde si semen à fruge, si semetis à messe cognoscitur, si ab euentis rerum consilia huiusmodi æstimanda sunt: quàm auspicatò susceptam esse rerum nouarum molitionem, quibus omnibus exorsam esse telam istam ac detexam dicemus, quæ plus atrocis contentionis attulit Ecclesiæ, stragisque religionis, quàm illud olim malum discordiæ Illo ac Troianis importasse, Græciæque dicitur? Et sic quoque natum heri ac nudius tertius Euangelium aut in medium primum allatum nos credere oportet, quod ille Triumvir scripsit, multique subscripserunt? Scilicet Lucina nascentis denuo veritatis ac sapientiæ fuit, doctrina enata Stygiis ex oraculis. Nam quæ putemus alium quàm tenebrarum antistitem, choragum eius fuisse fabulæ, quæ Titanica magis impietate, quàm tragædiæ interpolatæ mægonio nobilitata, à cuneis paucis assensum, à plurimis abominationem retulit? At is tanquam philosophiæ salem sese cum suis illis nobilibus collegis attulisse gloriabatur, ut quidem colligi ex eius verborum arrogantia potest: Deique & hominum fidem identidem implorabat, quod philosophiæ studiosi respuerent eum salem ut noxium & venenatum, quem ipse & candidum, & theosophiæ priscæ probatum videri contenderet: & verò è Seruatoris mensa epulòque petitur. En animam & mentem cum qua dii nocte loquuntur. En condimentum, quo natalem Euangelii recens nati, celebrare philosophia debeat. O insanam & capitalem philosophiam, iugulati iandiu dogmatis exuscitatricem: quæ non modò res ancipites & olim controuersas, Academici moris venia disputare, sed res etiam præcipientes & nefarias constituere & decernere ausa sit. Huiusmodi est igitur hominum sapiëntia, qui Ecclesia antiqua disturbata, nouam edificiis spiritualis rationem nobis informauerunt: quam ad normam ex legis licetiæ, ad regulam Lesbiam, & pro cuiusque libidine temperandam, vel deprauandam potius, ad perpendicularum denique; exegerunt ventis omnibus agitatam, euariantium dogmatum ad arbitrium cuiusque legislatoris, legis & prophetarum interpretis perditissimi. Est autem opere præcium commentum attendere Stygii machinatoris: & simul exordium & omnes actus fabulæ, quæ à focii

facie prima & comica (vt ita dicam) fronte, ad cothurni non dico grauitatem, sed atrocitatem diram erupit. Homines enim nouandarum rerum cupidi, paulatim id fecerunt, vt sponſam Domini primum, parentem vnicam Chriſtianismi, eiúsque clientelæ in fide Chriſti poſitæ, veluti iam anum ac ſenio delirantem, iugulare inſtiterent ſuo ſibi gladio, (vt ſolenne eſt ferè impiarum factionum conditoribus:) id eſt verbo diuino, ſuſum deorſumque verſato, Eccleſiæ auctoritatem placitæque abrogare. Deinde matrem ſibi aliam vt adoptarent moribus ſuis appoſitiorem, quam veram Domini patrem eſſe delictamque contendentes, ex ea Dominum ipſum Chriſtum non liberos ſuſcepiffe ſtatuērunt, ſed obnoxia mentis ſeruos, nexæque vinculis duræ neceſſitatis. cæterum eoſdem immunitate præditos operis faciundi, acquieſcere in cubili iuſſerunt fidentis Deo ſecuritatis: in dilectionisque complexu inanis & euanidæ. Ex hac prole, *ἡ δαυμανιδῶν* alia rursus enata *ἡ φιλοσυμβόλον* deterior natio, ex iisque mox *ἡ μισευχαρίτων* prognata, tanquam ex aſpide vipera. Porro autem ſi perrexero, vereor *ἡ ἀδέων* nationem ominari: *καὶ τῆ μετενομαζικῶν*, qui & *μετεμψυχωμαζικοὶ* dicti ſunt. O fidem perditam. Videant obſecro, videant (inquam) etiam etiãque, qui præmium ſperauerunt tyrannicidii, ne in inuidiam eis ſpes euadat odiũque parricidii. Niſi non eſt parricidium, diuorum ipſam matrem de cælo detraxiſſe, vt eſt Latinè loquendi cõſuetudo: de gradu (inquam) dignitatis, exiſtimationis, & maietatis, Eccleſiam Dei patrem deturbare voluiſſe. Vide quid promouerit non paulo curioſior in ritus inueteratos inquiſitio. nam dum in ſpõſe Domini mores à crepundiis eiꝯ inquirunt: dum gemino (quod dicitur) ab ouo exædificationem Eccleſiæ Dei repetunt, paulo *ἀναλύτικώτερον* vtique philoſophando, religionē Chriſtianismi ad chaos reduxerunt Academia. & dum operis expolitionem detergent homines (vt videri volunt) anthypocritæ: velut ornamentum aſciritium ac religionis lenocinium: operis ipſius compagem ſymmetriãque diſſoluerũt. ita fit, vt qui ſe ſolos cum familia ſua, in filios Dei adoptauere, quod ex eorꝯ ſcriptis apparet, dæmonidæ ipſi permultis Titanũque gentiles magis eſſe videantur. Hi ſunt autem qui vnitatem ſponſalium cœleſtium ſcindētes, Chriſtum ipſum digamum quodammodo faciunt, cū ſit pſeũdogamia verius eorꝯ Eccleſia. Egone vt credam eam eſſe filiorꝯ Dei matrem, quæ monſtra tot ediderit? cuius vtinam puerperæ loci iam eſſent eiectitii. quos etiam mortales non puduit, tabulis obſignatis agere ætatum heroicarum cum

prudentia, & verò cum paracletico numine disceptare, conciliorum
 præsides. Itane verò antistites ipsi soli diuinitus designati sunt, intel-
 ligentiæ verbi Dei, nunc primum cœlo delapsæ? pròh superi: im-
 potentiam animorum incredibilem. Religio prisca, & mille ac du-
 centorum amplius annorum canitie venerabilis, cum prudentia e-
 iusdem temporis, per prouincias nuper in triumphum ducta est ab
 istis, & contumeliosè traducta, ouante licentia nostri sæculi: ob vi-
 ctoriamque audaciæ intolerantissimæ, ornamenta triumphalia iis
 decreta sunt, qui peristyliorum vestitum abiecerant. quorum vtinā
 ipsorum argenteis linguis aurea quoque corda responderent con-
 gruenter: quod credi ipsi volunt. Verbi Dei mentio subinde in o-
 re est, & in stilo, summa cum admiratione ipsius: quæ res oculorum
 aciem vulgi suo splendore sic perstringit, vt quod agitur hac præ-
 stigia, cernere nō valeat. Quotus autē quisque hominum φιλορημόνων,
 philologia quoque illa præditus est, quam in sermone præfert ista
 rhapsodorum natio? Quasi verò verborum inanis venditatrix, at-
 que institoria verbi commendatio, amatoribus veris ipsius conue-
 niat & cultoribus. certè quidem quosdam vidimus, quosdam etiam
 legimus in verbo verba dantes apertissimè. Nemo nostrum inficias
 it, victoriam verbi Dei ad extremum futuram: omniāque humana
 instituta, manus ei dare debere summa cum æquitate animi, atque
 reuerentia. Sed ita demum verbum Domini sui sponsa agnoscere
 didicit, cum numine conditum est interpretationis paracleticæ. id
 quod Dominus nos docere videtur, capite sexto Ioannis euangelii.
 idque homines certi nuper non ignorantes, vnum & alterū & pau-
 cissimos, antistites tanti oraculi, tamque patentis prouinciæ inspe-
 ctōres, designandos curauere, libera quidem illos cum potestate, sed
 suffragio confuso populi, liberalitate lactati immunitatis operum
 indictorum constitutionibus antiquissimis conciliorum, atque pō-
 tificiis. quibus conciliis atque pontificibus illi statim designati im-
 perium abrogauerunt in præteritum, in instans, & in futurum, vt-
 pote vitio creatis ignorantia verbi. quæ legum abrogatarum pro-
 mulgatio, licet apud nos translatitia, paulatim tamen repens, eous-
 que eualuit, vt quæ haud ita pridem & semper παράνομα nobis erāt,
 nunc vt πύργησα à multis nostrorū hominum excepta sint. Ex pig-
 mentis autem illis imaginariæ veritatis, ex elementis doctrinæ sci-
 tē adulteratæ ab hominibus doctis, ira iusta, an iniusta percitis, de-
 terrimi subantistites & imperitissimi, cinnum attemperarunt, vel
 verius miscuerunt peruersarum opinionum, errorisque varii ac
 h. iiij.

multiplicis, atque in multis etiam absurdi & ridiculi. is autem nihilominus vnus haëtenus nomen tenuit, vt conditoris: magnam partem fortasse dogma non agnoscentis, atque etiam dissentientis. Et quemadmodum Epeus ille opifex equi fatalis, Homeri carmine nobilitatus, omen tulit & inuidiam euerfæ Troiæ à proceribus Græciæ, qui in equo ligneo delituerant: sic ille quamlibet doctus alioquin atque memorabilis, inuidia perpetua flagraturus est alienorum quoque scelerum ac scriptorum, siquid ei acciderit antequam illud restinxerit incendium, quo incendio nunc ardet luculenta pars finium Christianismi. Neque verò viris bonis ac prudentibus, qui quidem catastrophæ considerarint licentioris huius dramatis, hoc persuadere quisquam poterit, quod τὸνδε τὸν ἱστορικὸν ἐπὶ τοῦ ἐποιοῦσεν σὺν ἀθηνῶν. quippe facinoris huius quale est illud cunque exitus, index est certissimus iudicii diuini: ex quo præcipuè ratio atque indicatio constat, operæque precium humanorum huiusmodi consiliorum, si quidem constatura est. Nam pròh superum atque hominum fidem, quodnam sperare præmium. Sed enim porrò iam vltra clepsydram elatus sum: quam mihi supra admensus eram, indignitate vtique scelerum transuersum me agente, quæ in præsentia nata, insistere me coegerunt, cum rectà contendere iter instituissem. Quare ad institutum cursum ab excessu redeundum est: quem mihi non cupienti prorsus iniunxit persona ipsius Aii Locutii, quam equidem haëtenus inducere grauatus eram, cunctatusque fueram, quādiu quod excusare habebā. Nuncque ea quæ scripsi, è plano dixisse vtique videbor ipse, vt mihi persuadeo: non quasi è suggestu, aut tanquam è subsellio quodam superiore. Neque enim eorum sum, qui in album ascribi affectauerim scriptorum suo iure disceptantium tantarum rerum controuersiam. Quapropter necessitate me soluam in alteram quoque partem non nihil declamitandi, vel cum patronis eius potius legitimis atque ordinariis expostulandi, quòd paulo minus æqui sint in suum cuique tribuendo: ne hîc quoque imprudens stilum, quasi specillum adigam, altius quàm pro data mihi dandæ concessu lectorum auditorumque venia, qui fines non ignorant modumque meæ cognitionis. Sunt autem non pauci, qui in nostris exterisque veluti criticis ac censoribus orthodoxiæ, magnopere desiderent æquitatis aures comitatisque philosophicæ. quippe qui auscultationem accommodare plerumque grauentur iis de rebus animi causa, atque etiam animæ disputantibus, aut etiam tantum percunctantibus,

quæ inter peritissimos non nihil controuersæ sunt, quædam etiam iam olim controuersiosissimæ. Ferre autem non queunt homines quidam eruditione non qualibet præditi, se non vi argumentorum, non auctoritatum consecratarum pòdere premi (vt quidem ipsi vociferantur) cæterùm præscriptione trisæculari iniquè summoueri, aliquantóque ampliore, à causæ dictione. Enimuero indignum esse, nec vltra tolerandum, quòd obsoletis fascibus nullorùmque iam auspiciorum, quæsitæ auctoritatis nomenclatura tantum gradationis, concedere hætenus oportuit maiestatem aut dignitatē instructioris philosophiæ, ac multo ornatoris. Quem tandem inueniet (inquiunt) tam longa potentia finem? Ecquando sese abdicaturi sunt illi æquo animo, dictatura ista Pythagorea, atque omniũ artium cunctarum disciplinarum scientiarùmque censura? omnium dictorum, scriptorum, ac professionum pro potestate arbitra? non ex boni æquique sententia, non ex antiquissimæ memoriæ doctissimæque responsis, sed ex placitis illius iudicia pronunciante exhedræ argutatricis: in qua plus supercilii semper fuit, caperatæque frótis, quàm dignitatis Arcopagiticæ, probæque seueritatis. Atqui insolentis magisterii fastu atque imperio sese exuant ipsi necesse est, si viri boni videri volunt & credi, vt congruit eorum philosophiæ, dictaque vt præcipuè, non dicentes iudicent antiquo præiudicio inuisæ nouitatis. Neque enim virorum esse bonorum vti præscriptione quantilibet temporis, si minus est in causa bonæ fidei, quàm iuris summi, iniuriæque permixti. Hæc est ferè summa eorum quæ Aius ille loquens logodædalia magis improba, quàm facundia iusta præditus, vltro citròque altercatione circulari aut cubicularia dictitat: non etiam triuiali & circunforanea. qua de cōtrouersia nuper cùm communis prudentia in consilium hominum sermone familiari mitteretur, populique sensus communis in suffragium: longè quidem superior erat ea causa, honestatis morũ patrocinio, quæ ab antiquitate stabat, inueteratæque forma religionis & pietatis. Alterius autem partis numerosa aduocatio, duobus validis adminiculis, causam iure tum scripto, tum moribus recepto, luculenter infirmiolem, sustentabat, studio ingenti libertatis legibus solutæ conciliariis, pontificumque sanctionibus: quanquam nec ciuilem in modum ac legitimam informatæ reipublicæ congruentis, nec optimatum uitæ, deinde tabularum nouarum nomine, tanquam vitæ beatæ certissimo omine: dulci quidem illo & sanè festiuo primore statim specie, cæterùm mox plausibili tantum ac iucundo legis diuinæ decoctoribus.

Hos autem fidem bonam agnoscere, & vnà quoque eam cum ciuili charitate complecti, agrè persuaderi potest optimæ parti mortalium. Erant etiam nonnulli in vtrorunque fauorem ambigui, & Ephecticorum similes: quidam etiam non Scepticorum dispares & deliberatium. Quibus addubitationem extemplo dempsit atrox illa coniuratio, sanè oppressa mirificè, illa verò & numine deprehensa manifesto atque memorabili. Et quando tamen iuris dicendi ratio, de sententia communis sensus, & fortasse prudentiæ pronuncians, ita comparata est, vt causa cum suapte ipsa specie, tum verò cardine controuersię firmamentoque superior: tamen quadam in parte labet, atque inferiori cedat (in vtriusque enim partis argumentationibus, interdum aqua illa quidem ratiocinationis hæret: sed illius pes in luto dogmatis fudit longè altius & fœdius) sed quādo tamen in his pręliis ancipitem Mars acrior interdum victoriam facit: licet bello quidem vinci orthodoxia ab æmula sua non possit, quam nonnulli loxodoxiam nuncupant: peruelim equidem, & optarim votis etiam conceptis, literarum saltem honoris causa (vt nihil hīc aliud dicam) hominūque illorum gratia egregiè doctorum, in diem vt trifecularem lis hæc comperendinetur: quæ aut temporum iniquitate, aut aliam ob causam dirimi coactis omnibus decuriis iudicum legitimorum nequit. Id tamen interim recepero bona vtrorunque venia, interim vt vindiciæ dentur secundum eam partem, quæ & rebus auspicatò iudicatis à maioribus, & iure luculentiore nixa est: tum autem quæ sponsores vindiciarum promptius dare potest, quæ prædes longè plures exploratæ fidei & locupletes. Interim forsan viderint homines singuli & vniuersi ad quos res controuersa pertinet, quid sui sit officii, quæ partes decidendæ rei sint, quæ vnīs adiudicari tota atque integra non potest consensu alterorum, in hoc fortasse non prorsus iniquorum, siquidem scriptitandi rescriptitandique vicissitudine iurgiosa & gladiatoria, Christianismus lacerari, eiūsque existimatio potest: reconcinnari & constitui orthodoxia non potest. Quod igitur faustum, felix, fortunatum his atque illis sit, viritim & vniuersim, hoc Homeri carmine cludendam hanc digressionem esse duxi. hocque erit exodium inserti operi acroamatis, cuiusmodi à Græcis vocantur ἐπεισόδια.

Ὡς ἔστις ἔκτεν θεῶν, ἔκτ' ἀνθρώπων ἀπόλοιτο,
καὶ χόλος ὅστ' ἐφένκε πολὺ φρονάωδρ χαλεπῆναι.
Ὅσ τε πολὺ γλυκίωρ μέλιτος καταλειβομένοιο
ἀνδρῶν ἐν σῆδεσσιν ἀέξεται ἥν τε καπνός.

Verùm vt iam satis ac nimium forsitan expatiati, ad institutã viam reuertamur. Multis & aliis modis teterrimus idem ac vaferrimus criminator Orci, negocium facessere mortalibus solitus est. Nunc enim titillat corpulentum hominem atque aspectabilem, instinctu voluptario atque proteruitatis: sicque intestinum hominem interpellat atque intus conditũ, ad philosophiam theoricam incubiturum. Interdũ cæca cupiditate transuersum agit vtrunque: nonnunquam cæstro vindictæ extimulatũ, vel æmulationis improbæ, præcipientem rapit eum iam impotentem sui. Est quando placidè ac leniter insinuans, & quasi per obreptionem penitus admissus, circum præcordia ludit, non sine grandi noxa, vtpote lasciuiæ grassans, appulsu minimè atroci in speciem, & parum tumultuoso, ob idque minus suspecto. Est rursus cùm occasionem nactus, eas intus intemperias ciccat, vt vel rationis frænosc admittere affectus impotentes sui respuant: ac si quoquo modo insertos illos non respuerint, genuino tamen eos (vt aiunt) eorũque echinos lupatæque commordeant. tum verò præcipientes deinde vâsanique ferantur, vt effreni & furiata mēte. Quid quod eiusmodi est ille captator astutia præditus & solertia perdita, vt vnde minimè ab eo tibi metuendum censeas, inde maximè formidolosus sit pugilibus experientissimis? Denique instinctor ille fraudulentus & versipellis, nulla non arte instructus est cæca, surda, & Vulcania, ad hominum captionem. quo impensiore cura nobis si sapientiam audire institerimus, excubiisque acrioribus appulsus eius obseruabitur. Certè quidem homini philosopho, vtcunque fines Ægypti confiniæque egresso, ac iam in arce philotheoriæ commentanti, omniũque horarum excubitori, licet edita illa è specula intueri huiusmodi grassatorem: in triuiis vitæ, in atriis principum, in cupiditatis, in ambitus, in voluptatis diuerforiis, in erroris conciliabulis peruolitantem: eorum verò verticibus plerũque oberrantem, qui apicibus honorum sic inter animanteis bipedes insignes sunt & eminentes, vt vpupæ insignitæ sunt inter alias volucres. Ad exercitationem autem hominibus datus est, marcentiũque animorum & iacentium extimulationem, animarum iste contrectator proteruissimus. mentium vel bonarum ac castarum interdum conscclerator ac constuprator: tranquillitatis animi perui-gil sollicitator, intestina pacis turbator infestissimus: lictor exterioris, carnifex interioris hominis: oppugnator patientiæ: constantie labefactor: fidei attentator: temerator innocentie. Cum bellua tam importuna, cum volucre tam obscæna, cum mania, cum intem-

peria tam foeda, tam terribili, tam immani, nec tamen aspectabili, aut aliàs incurrente sensui, singulare certamen & passim & identidem vnicuique nostrum præditum est diuinitus, indictumque, valenti iuxtà ægrotòque, noctu & interdiu, in celebritate vitæ & in secessu, denique per omnes vitæ actus ab ineunte ætatura tyrociniòque rationis. Et cum multa quidem eius tela sint, omniàque capitalia, iugulum etiam ferè conditi intus hominis, vitaliàque petètia: exitius tamen quosdam voluptate euertit, quosdam cupiditate, quosdam væcordi iracundia. Atque alius quidem alio telo citius aut nocentius, alius tardius aut leuius sauciatur: cæterum malum subinde rebellans & indomitum, nec remediis ita cedens, vt dormire sapiens in vtranque (vt dicitur) sine crimine arrogantia possit, vel capitalis negligentia: ne si succinctus quidem sit copiis omnibus philosophia. nulli enim non metuendum ab illa cæca assiduâque furiarum trium gladiatura, quarum exacuti mucrones, venenòque illiti, in aureis, in oculos, in os, in omneis partes blandè & iucundè incurrentes, ad viscera tandem fidunt & vitalia. interimque homo securus, velut è ludicro quodam innoxio digressus, illa subter cæcum vulnus habet: cum intactum sese esse atque integrum putet: vsque adeò Stygius ille Proteus, omnia transformat sese in miracula rerum. Multifariâ igitur plagis cæcis mortales expositi, quoniam modo iocis, ludis, cauillis indulgere, quando genium suum curare molliter & delicatè sine culpa socordia, tanquam in alta securitate, possunt? At nos inter sacrum saxumque constituti (quod fuit quondam in prouerbio) tamen nihil minus quàm hoc agere solemus: ridere verò, cachinari, nugari sustinemus. Atqui nisi cautè, prudenter, circumspectè, & tanquam è castello philosophia huiusmodi impetus excipiantur, nisi assiduæ petitiones caueantur cæcæ gladiaturæ: ad vitalia fortasse impetu primo penetrauerint, vel sensim perfederint: si quidem in re præsentì à nobis floccipendantur. Et earum quidem petitionum aliæ (vt res natæ fuerint) aliis nocentiores erunt: vt verbi causa, libido prima aut voluptatis, aut cuiusuis alius incessentis cupiditatis, strictim hominem pepulit: hoc tanquam peccati elementum est. altera est autem vel libido tâtum vel cupido inchoata: & velut per summa titillans, aut leuiter appulsa: haud dum tamen admissa penitus in præcordia, quod iam primordium est culpæ. At verò tertia est flagitiosa eo amplius, atque scelestâ, animo iam incessens plena cum assensione, quæ dein patretur ipsa necne, non magnopere refert, quod quidem ad animam per-

tinet fauciam iam & comprehensam. Hoc genus vt capitale victo,
 sic victori apud Deum homini palmarium: etiam si id esse diuini be-
 neficii, partem quidem longè maximam potissimamque, nouimus.
 siquidem liberi arbitrii facultates, in peculio quidem illas (vt sic di-
 cam) habemus: cæterum eas esse nouimus Domini in mancipio: vt-
 pote qui in seruitute natos nos esse meminerimus, obnoxiamque con-
 ditione. & vt in quenque incubare numini paracleto visum est: is
 demum fidei, charitatis, ac bonæ voluntatis plenus est. cæteris porro
 culpæ notis vacare, supra hominis est fastigium: à quibus intactum
 hominem euadere aut incolumem, cœlestis est prorsus vacationis,
 mortalique fastigio sublimioris. Nec verò in procliui situm est, ne in
 philosophiæ quidem contubernio, vitiorum igniculos, vitæ ob no-
 xam datæ insitos & cognatos, extinguere: naturæ ipsius petulantiam
 compescere, vel comprimere potius: denique primordia tollere vi-
 ciorum, & (vt scripturæ verbis loquar) delere primigenia Ægyptio-
 rum. Id quod si egrè paucisque conceditur, alumni philosophiæ, qui
 ad curandum animum ipsi vehementer incubuerunt, corpusque per-
 domandum: quid futurum est illis tandem, qui carni indulgere, in
 corpus proficere & crescere, non item in animum cupiunt & con-
 tendunt? Cùm autem animarum ille captator, plagas suas & pedicas
 tendere & explicare omnibus in viis, semitis, diuerticulisque, solitus
 sit: tum verò in triuiis vitæ plurimum, in compitisque id facit, quæ
 ciuiles sunt celebritates, conuentusque insignes tum splendore per-
 sonarum, tum concursu hominum. In iis enim multitudinem habet
 obuiam ad prædam & expositam, & verò sese ipsi dedentem ultro
 prædoni ad captionem ac fraudem: quippe incautam & immemo-
 rem conditionis suæ, insidiâsque non suspicantem. Quo fit vt in ba-
 silicis, in atriis, in locis frequentibus, & in regiis, & apertius tendat
 animarum ille auceps, & simplicius: cæterum plagis maioribus &
 perplexioribus, in quas sæpenumero sciētes prudentesque homines,
 ceruices primùm erectas & conspicuas inferunt, deinde penitus ipsi
 toti insinuant & irremeabiliter: atque ita (ô cæca mens hominū) vt
 visendi illi sibimetipsis & admirandi, & nō potius miserandi ob id
 esse videātur: illi verò vt plausus quoque captent inde spectantis stu-
 pidæ multitudinis. Neque enim in theatris huiuscemodi metus est
 ipsis vllus ferè à bellua reptili: nec obseruare vacat animæ pericu-
 lum, iis qui in scenis amplioribus, oculis seruiunt plausitantium.
 Quin & eorum magna pars qui in foro honorario quæstoriōque
 negociantur, suis ipsi aucupiis æmulorum tendiculisque intēti sunt:

nihil minus pensi habentes, quàm ea quæ de superis inferisque audiunt. Miseram verò & conturbatam, perditam & profligatissimam hominum rationem: quos prudentes, quos consideratos, quos æmulandos, quos denique (vt vno verbo cuncta complectar) frugi esse homines vrbani sensus iudicat: atriensis eo amplius, numine quodam benigno, benefico, ac fortunatorio præditos. Age verò, vt iam in vniuersum loquar, vita ipsa ciuilis & quæstoria, in qua nauissimus quisque ac maximè industrius ingenii specimen præbet, fatique sui conditionem experiri contendit: quidnam aliud est ipsa, partē quidem longè maximam (si quidem limatam ad veritatem loqui placet) quàm hominum studium, varium quidem illud & multiplex: sed eodem tamen spectans, patrimoniis augendis & propagandis, facultatibus cumulandis, ac sine modo exaggerandis, acerrimè intentum? quàm legitima, quàm frugi (si diuis placet) circumscriptio: ac legum ipsa morumque auctoritate freta? quàm inflammata hominum cupiditas plus habendi, audendi, ac pollendi, in captionem, in necem, in spolia & exuias imminens? Quorum tandem? ciuium & municipū, popularium, tribulium atque curialium: gentiliū præterea & cognatorū. Ad summā (vt planè & verè dicam) quàm quædam Christi legis antinomia: quæ lex cultū ac studium charitatis discere inter adoptiuos Dei sanxit? Quid autem illa panegyrica vita hominum personatorum, quos pseudoprofopos vocant: qui theatri ac scenæ cuiusque imperii & monarchiæ incolæ sunt aut accolæ: qui non legibus, nō plebiscitis, non senatusconsultis, non prudentum responsis, nō sacris sanctionibus & canonicis, sed curiata lege solum euangelæ obrogata, atque in diem viuūt: duntaxat quod ad animū attinet? nōne eorū cōuersatio si in vniuersum attenderis, cōciliabulum esse arbitrare & iudicabis, erroris hallucinationisque, demētis & deuii, tum autem æternarum rerū obliuionis & incuriæ? vbi nulla est vnquam canities cupiditatis: vbi perpetua adolescentia hiantis auaritiæ: vbi nulla emerita sunt vnquam stipendia impudentiæ & ironiæ: postremò vbi ambitus Eurystheo imperiosior, nullam non ærumnam iniungit gloriæ candidatis & cōpetitoribus. At hoc est studium legitimum ciuilis sapientiæ, hoc gymnasium hominū ingenio industriæque præstantiū. Hæc & huiusmodi alia Christianismi auocamenta perspicientes quondā homines multi, rerū diuinarū prudentes, iurisque salutaris cōsulti, excedere è celebritate vitæ, atque è medio, instituerunt, & tanquā foro cedere erroris, mercatūque exi-
tialis: vtpote in quo cernerēt lictores Orci lorariosque, vsquequaque

peruolitare. Eorum autem partim ad vitam abstrusam se contulerunt & soliuagam: partim societatem coierunt sodalitiam, in commune commentantes, atque in sociabili philosophia acquiescentes. Quod hominū consilium ad tranquillam vitam & salubrem agendam captum, ab aliquibus improbatum est: nimis fortasse animantibus, ac de hominis interioris integumento humaniorem in modum merentibus. sensoriis enim corporis, quæ fenestrarum vicem obtinet, clatri abditæ philosophiæ admoti sunt ad sensuum compefcendam temeritatem & cohibendam, falsa sæpe & vana pro veris referentium ad principatum animi. Sed non è qualibet vitæ conditione & instituto consiliū id capi potest: neque cuius naturæ commodum est & opportunū è medio sic discedere, intrâque peristylia sacra philosophiam amplecti. quanquam rursus philosophia non facile semetipsa frui potest, si ei quotidie in forum atque in basilicas prodeundum est, nedum si in publicū: quantominus autem ipsa philothesoria medulla philosophiæ? Et quemadmodū ii qui ad literarum studia animū applicandū duxerunt, non quā vrbes habitantur frequentissimè, habere sua solent domicilia: ne aut strepitu viciniæ, aut vsus mutui necessitate, aut officiorum ciuiliū obeundorum, interpelletur eorum contentio: sic qui sartū tectum asseruare animum, à malèque suada noxa quàm minimè libatum, cupiunt, iis id præcipuè faciendum est quoad eius fieri potest non incōmodissimè, rerum ut æternarum studio, quàm plurimū: caducarum ut curæ, quàm minimum tribuant. Perpetuam tamen esse rerum illarum antipathiam vsque adeò non puto, quin & togatæ aliquando esse huic philosophiæ, & prætextatæ liceat, interdūque sericatæ, cum ita vsuenerit, personā ut sustinere equestrem ipsi opportunū ac decorum sit, quod sine captione quidē fiat, imminutioneque eius integritatis, & ubique fide optima. Cæterum rara avis in terris, nigròque simillima cygno. Et quibus hoc semel certum est, quid illis iam cum foro iucundum & suaue esse potest? & qui ad Mariā bona fide constituit, quò iam cum Martha cōsuescere potest, negociūque habere? Nimirum nō nihil periculi est, ne incestus hic quidā sit, in philosophiæ sanctitatē admissus, aut certè in eius dignitatē. Nam quid germanæ & iustæ philosophiæ, solitudinis alumna, cū vrbica, cum atriēsi turba, cū strepitu celebritatis? denique quid cū stoliditate mūdi, cumque sensu cōmunis temeritate, nō tam agentis vitæ, quàm semper satagēris, si res ad verū existimetur? immo verò satin salue in illa viciorū errorūque colluuiione, animus iam sui iuris existens, diu versari potest atque

peregrinari, citra imminutionem quidem atque intertrimentum simplicitatis suæ? Siquidem sensus temerarii, atque obturbatores tumultuosi principatus animi, adire solent ad eum assiduè, ut iudicem eorum atque disceptatorem quæ referuntur ab ipsis. ac sæpe quidem illi officiose adire, ac pro potestate, pro munere à natura ipsis iniuncto: sed sæpius sic obturbare, sic adstrepere rerum causas, qualitates, quantitates, pondera æstimanti & expédenti, vix ut satis apud sese animus queat esse, ut munere suo ac magistratu summo possit rectè atque ordine fungi. Quare nisi interdictis continentia atque abstinentia, tanquam præturam gerentis in administratione eius status quam theocratiam vocant, sensuum licentia coerceatur, atque obnuntiatio assidua quasi salutaris auspicii diremptrix, inhibeat: principatus quidem ipse nec liberum, nec rectum rerum ipsarum quæ in senatu suo agitantur & disceptantur, iudicium habere potest. Atqui hoc apertis interioris curiæ foribus, & verò hiantibus, & res alias atque alias appulsas, intrò cupidè conferctimque admittentibus, fieri nequit commodissimè. Adde quòd obnuntiatores illi, plerunque præcipientes, sæpe etiam (ut dictum est) tumultuosi, falsum modum renunciare rerum solent: vanas magnitudines fingere, ac pondera commentitia. Vnde fit, ut animus trepidis nunciis vanisque consternatus, extra cancellos sui tribunalis exeat, aliasque res actitet, nihil ad id pertinēteis qua de re cum primis agendum est. Apud se verò esse quo tandem modo potest animus ipse, peregre semper agens, multiuagus, erro, vulgiuagus, expatiator, palabundus, excursor? Quomodo autem inspector? quo curiosus? quo denique perlustrator? emissarius? circumspectator? Circumspectum verò & consideratum esse cupidum Christianismi, cultoremque eius institutorum oportet: auribus ad rumores vanitatès que torpentibus: non circumspectatorem, non oculis proteruis, non temerè emissitiis, non rebus visis cupidè incumbētibus: non auscultatorem blateronum, non captatorem rumorum, non auditorem auidum Aii Locutii, auctoris vanissimi: non ludi denique philosophiæ desertorem, non emanforem, nec verò atriorum accolam, nec conuenarum ciuitatis incolam, ne finitimum quidem. Id quod homines quidam, quasi diuaticati per oppidanæ vitæ confiniū attriensisque, faciunt: ut alterum illic pedem (quod prouerbialiter aiunt) alterum hîc habeant: eorum animalium similes, quæ ancipitem vitam agunt, ob idque amphibia dicta sunt. Siquidem huiusmodi homines, quo vehementius augendis fortunis suis ac ornâdis intenti

sunt, eo inconsiderantiores esse solent rerum in spe positarum, quarum pignus nullum expectationis, sua sententia locuples & idoneum, oculis obuersatur ipsorum. Nam inter planos huius vitæ, hic quem mundum veritas ipsa vocauit, mirificus est hominû circumscriptor, atque à rationis suasionibus abductor: quanuis meditati sint ipsi, quanlibet animo confirmato. tum autem operam plurimam nauat idem quasi necessitudine coniunctus, satori illi scelestum & messori, primigeniæque noxæ auctori & suasori: qui passim terram versans humanam, in eaque sementem noxiam ac pestiferam factitans, semine sublecto euangelico, propter vias tamen regias & curules, vt sementes ipse facit grandiores, sic messes inde auferit longè vberiores. non perinde verò id euenit secundum viam sacram, asperam quidem illam, nec itidem patentem, atque equestribus copiis impedimentisque permeabilem, sed longè magis reductam ab orchestra chori Stygii & Eumenidum. eam verò circa ipsam, pleraque nunc vasta, inculta, desertisque simillima cernimus. mores enim in militarem viam atque vehicularem vehementer incubuerunt. quasi verò sub sarcinis commodius, cùmque impedimentis, iter expeditius contendatur ad immortalitatem. Quocirca vt nunc sunt mores comparati, & studia vitæ ciuilis atque in medio positæ: ecquis est qui dubitet aut neget, animarum longam seriem & consertam, quandam veluti restim ductantium errabundæ saltationis atque deuiæ, noctu & interdiu, fauces in illas Ditis hiantissimas, furiis dirum carmen modulantibus, obtortis collis rapi? Simulachrum fortasse Christianismi publica frons retinet, germana verò religio atque pietas indies exolescunt, & conspicuè fugiunt. Sanctitatis tantum & fidei nomina insigniæque retinemus, & tanquam illarum exuuias in cælum reuersarum. & sic quoque eò viam affectare vnusquisque nostrum præ se fert? antiquissimamque eam curam habere perfrecta frôte dictitat? Itane verò pietatis imagine adumbrata placari Deum credimus & speramus? Stat contrà ratio (inquit ille) & secretam gannit in aurem. Heu fœdam erroris tetrâmq; caliginem, quæ finibus quoque & visceribus Christiani nominis, è faucibus Herebi inhalata est. adeò in cœlum attollere mentis oculos & figere nequimus, quò inter primos aspirare, eosque demum forsan, elogia testificantur euangelica, qui & mundum, & ea quæ mundi sunt, aspernanda duxerunt. Anaxagoras celebris nominis philosophus, omnia tenebris circumfusa esse dicebat. Empedocles angustas sensuum esse semitas conquerebatur, vt inquit Lactantius.

Democritus veritatem in puteo quodam alto obrutam esse aiebat. Socrates philosophiæ propè parens, inscitiam pro doctrina mirè profitebatur. Quid igitur aduentus diuinæ sapientiæ mundo, quid cœlestis descensus veritatis vitæ profuit, si ignorationis nostræ tenebris non illuxit? si veritatem philosophicam è puteo caligante non in lucem semel extraxit? scientiam in ævum mortales non docuit? Restat id demum, vt contenebrasse denuo cauſando perhibeamus. at id fateri haud scio an impium sit: atque etiam ineptū & absurdum: cū lux eius non minus nubilo quàm sereno, non secus in tenebris Cimmeriis, atque in Oriente luceat. Equidem diem vltimum adueſperasse potius censuerim, mundūque iam præcipitem, & verò decrepitum ac delirum, indicare, ominari, significare occasum suum appetentem, interitūque. Certè quidem mente captum mundum esse inficiando non sumus, qui sapientiam & veritatem, beatissimæ vitæ partem, è manibus, è moribus, è medio abiecerit, pro iisque errorem dirum & stultitiam cupidè suscepit, ne dicam insaniam. Proh Christe, proh superi, proh dii iam beati & immortales, quid est, si hæc amentia non est, iustaque dementia? nos fauces Orci libenter accolentes, transitum tandem in illum Abrahamæ sinum sperare sustinemus velut Abrahamidæ? Aliquando igitur Christianismi constituendi ratio nobis ineunda est, dum in spatio sumus, dum prima aut recta senectus: dum superest Lachesi quod torqueat. Occasio non modò volucris & rapida, sed feræ quodammodo etiam naturæ est: vt volucres quædam quæ quavis domesticæ sint, euolandi tamen & reuolandi consuetudinem certam non habent: quare primo cuique arripienti cedunt occupationis iure, vt tradunt iurisperiti. Dies nos, noctes, & horas fati circumſtat inexorabile vadimonium, spiritum exacturi quem naturæ debemus. at in tumultuaria mortis ac trepida denunciatione, anima vti non potest præſentis animi consilio. Accingendum igitur ad commentationem finis primo quoque tempore, & quæ Dædala Circe incantamenti ſuis ac maleficiis immutauit, ea philosophiæ sacre excantamenti in integrum restituenda sunt, aut certè in meliorem statum reuocanda atque ſalubriorem, quodam quasi poſtliminio ad ſeſe atque ad principatum redeuntis animi. (Circen autem nunc appello, errorem vulgiuagum, & prudentiam communem, opinione falſa beatæ vitæ imbutam, rerūque expetendarum, qui mundus (vt opinor) à ſcriptura dicitur). Sic enim omni ope cōtendendum est: ſi quidem conſtare nobis fructū cupimus ærum-

nosæ huius vitæ, ac re ipsa calamitosæ. Nisi verò nescimus ipsi, vel verius nō recordamur, Christianismū vitam esse lustralē, sordidatā, sollicitam, & peruigilem: atque expiatricem vetusti illius hominis supini & veterinosi. Ac mihi quidem huius vitæ rationem pro capto æstimanti, vnusquisque nostrum sui quidem certè non nesciorum, non immemorum, peregrinantis videtur animum speciēmq̃ præ se ferre, meliores in sedes amœnioresque tendentis ac festinantis. Has autem dicere ipsas sedes possis, illarum penè similes, quas olim dixerunt insulas beatorum: si tamen vmbra rerum, rebus ipsis comparandæ sunt. Verū cū mare inter nos & illas interiectum sit, varium, scopulosum, vndique agitatum multifariam & æstuosum: nauis nobis disciplinæ socialis ac ciuilis à Seruatore relicta est Ecclesię conditore, quæ nautico ministerio, instrumēto, gubernaculisque instructa fuit ab ipso, aut eius auspiciis: & simul formulis attemperata ritibusque sanctis hortamentorum. tum vectorum multitudini loca partim per ordines descripta: partim promiscuè attributa, infra, supra, & in medio. Flatum etiam à puppi pollicitus est, ad exoptatūque locum vectores perlaturum, si clauum rectum tenere, sinūsque spiritui afflaturō pandere, Ecclesia perrexisset. Quod cū in exercitoribus nauis & magistris ferè positum esset, fluctibus vt secundis flatibusque procederet nauigatio: in eo tamen ordine multa deformata fuisse iam pridem fama vulgavit: tum magistrorum avaritia, tum vectorum primæ classis studiis & incuria: qui fortunæ candidatis antiquissima quæque munera puppis & proræ fruenda permittere soliti sunt, cupiditatique hominum dilargiri potius & condonare, quàm reapse commendare fungenda rectè atque ordine. ex quo factum, vt canonum canicies vel caries potius, nulli iam vsui sit: sed velut anus delira è foro explosa sit, & ad scrinia bibliothecarum reiecta. de ponte enim iandiu comitiorum paracleti deiecta est disciplina canonica: vt annis sexaginta maior atque etiam sexcentis. vt non sit magnopere mirandum quod quidam subridiculè dixit in re parum festiua, lamentisque digna, potius quàm ridicula. aiebat autem minus esse deformitatis propemodum & licentiæ in agricolarum ordine, quàm in sacricolarum. Vtinam autem reliquias saltē & cineres funere propè elata iam fidei teneremus, à qua fide fideles suos Dominus dispensatores quosdam vocauit. qui enthei animi, qui æmulationis piæ: qui spiritus, qui Dei pleni, Ecclesiæ quondam columen, decus & ornamentum erant. nunc vix atque etiam iandiu, tectoriū inane Ecclesia,

colorem & simulachrum retinet conditæ & demonstratæ à Christo religionis: si quidem vniuersitatis iudicium è parte multo maxima facimus. Et quidem quorundam (aiebat ille) beatorum interdum miserescere me subit: qui recordari nequeunt, cum vnum & alterum ambiunt honorum consecratorum, sese procos esse Hippodamiæ: & verò præcipitis magis ambitus atque proiectionis semel se atque iterum aleam experiri, quàm illi olim proci, quorum cupiditati cum fortunæ (vt assolet) improbitas subscripsit, reclamante ob rerum indignitatem, & quasi quiritante bonorum grauiumque natione, obdormiuisse interim videtur prouidentia, vt est stultitia multitudinis. Sic autem ferè videmus summæ rerum humanarum gubernacula, orbisque actus vniuersi conuersionem, non ad coniecturam hominum, non ad bonorum æquorumque votum, non ad prudentum & consultorum iudicium respondentia: nec ideo suas leges tamen ac certas non habentia, causasque nobis abditas euentorum. quippe in numine & maiestate sitas ipsius prouidentia, concordis in vniuerso discordia temperatricis: sine qua nihil factum esse in naturis productis nouimus, dicimus, & credimus. tametsi fors & fortuna, cum in vniuersum probitatis & æquitatis carnifex, dignitatisque & ordinis humanis in rebus abrogatrix atque deletrix: tum verò rationum philosophiæ conturbatrix, quantumuis subductarum, interdumque disiectrix: prouidentia conuiuentiam exprobrare solet ad vulgus, incuria similem, sæpe cum cōuicio. Illa uerò & temporum sæpe conditione adiuta, principumque hominum voluntate parum cordata: vel verius animi secura libidine, periculum magnum creat mortalium innumeræ multitudini, ac fraudem captionemque nonnunquam capitalem. habenas enim rerum stulti & imperiti, quæ maxima pars est hominum, cælitus mandatas temeritati putant, non item diuinitus. permotique & perculsi summa indignitate administratorum perperam magistratum, sacrorum iuxta & profanorum, benignitates has esse censent natalitiorum siderum, feriente prouidentia aut alias res agente. Nullum tamen capitalius crimen est cæci illius ac volubilis existimati quondam numinis, è tenebris altissimis forsitan oriundi ac densissimis, quàm quòd vt in quenque incubuit etiam virum bonum, dignumque cui homines bene cuperent, improbum eum ferè protinus & insolentem facit, si arête complexum sit. Non hîc in eo immorabor, quod Aristoteles inquit in decimo (vt opinor) Ethicorum: virtutem omnium rerum expetendarum, iucundarumque, & tristium,

mensuram veram esse : tantique vnumquodque bonorum esse ad verum perpensum , quanti vir bonus & sapiens id æstimare solet. ex quo fit, vt fortuita ista bona metiri ac definire sapientiæ arbitratu præceptisque debeamus : malaque & auersanda eadem ratione. Ita si fortunæ indulgentia ex stultis insanos facit : & ex non ita sanè malis hominibus, improbos : quid est quamobrem in ius accersere eam inculpate possimus apud Deum, aut etiam ad philosophiæ iudicium & arbitrium, si noxam ipsa fortasse in pignoribus nostris nocuerit, si pauperiem in lare familiari fecerit, si votis nostris proterius secunda non affuerit? Quid verò (quod inficiando nō sumus) si mare procellosum nauigantibus, & æstuosum, iactus omnium rerum sæpe faciendus est vt incolumes euadant, quod Nazanzenus ait : beare etiam fortunatissimum quenque sententia nostra cum multitudine pergemus? Desinamus igitur nodum in scirpo, quod dicitur : id est animi tranquillitatem & mentis securitatem, quæ bona sunt philosophiæ, inter fortunæ beneficia quærere & expectere, quæ nemo vnquam veræ sapientiæ studens, in ære suo numeranda esse censuit. Aurum olim annularium abiectum esse Romæ legimus, ob indignitatem Flauii scribæ, qui ædilis curulis factus est, præteritis consularium filiis. nostro autem tempore cum & magistratus primarii, atque insignes honores ordinis amplissimi sacro-
larum, viris imperitis nonnunquam (ne dicam non optimis) aut sæpe conferantur, neque id quidem modo, sed etiam cumulate congerantur : ingentique cum indignatione Nemeseos & Adrastæ : nunquid causæ est, quin homines literis & existimatione censi, libros abiiciant, calamos frangant, forulos comburant, philosophiæ salutem, nec minus moratæ dicant, quàm literatæ : si succensere ipsi iniquitati temporis, si irasci iuris distributiui negligentibus in animum inducant principibus viris atque pontificibus? At ita Deo visum est, ob idque mussitandum magna cum æquitate animi, si quidem sapereimus. quis enim nouit, cum vtris commodius & præstantius, his an illis agatur, diuinitus? Quapropter ad consilia Dei : ad acta prouidentiae, quæ ponderibus suis cælestibus, & nobis incognitis, causarum momenta examinat, hominumque tum merita nouit, tum illis commoda & incommoda : humani intellectus aciem conuiuere multò consultius est, quàm audacius ex aduerso homines obtuenteis mulctari cæcitate. Quam in fraudem sæpe incidunt, qui trans cælum quasi vitreū & perlucidum, vim intelligentiæ suæ perspicere posse cōfidunt. Proinde qui ad cæci numinis aram & versatilis,

vota magna cum religione faciunt, si parum idonei sunt ad numerum eius augendum sodalitatis philosophicæ, qua de nunc sermo nobis est. Cum eo quoque, quod Christus sapientiæ magister, censuram nouam & inauditam inter mortales gerens, dictaturamque veram ac nobis commemorandam, rerum ad beatam vitam pertinentium, fortunatos homines & copiosos omnibus è gradibus deiecit beatorum nomenclaturæ. Hoc certè omnibus in confesso est: quod qui philosophari fide bona institerunt, quo minore pomærio constituendæ vitæ summam, tuendæque œconomix circumscripserunt, (intra quod tamen egestatis gurgustium tegetemque non cludo) non modò securius, asyloque propius tranquillitatis agunt: sed etiam expeditius ærumnosi curriculum certaminis permetiuntur. At nullus finitor humanæ cupiditati tam commodè ad salutem, tam congruenter ad philosophiam, statuere modum potest, quàm Dei prouidentia: si tamen hanc ei curam permittere nobis persuaferimus, aliâque res interim ipsi curæ antiquioris agamus. An obliuisci tandem theosophiæ cupidus homo potest, quo ex loco Seruator salutem nobis æternam pepererit: qua ex formula tum mortis, tum vitæ, aditum nobis in cœlum, ostiumque beatæ & immortalis securitatis patefecerit: id est exaggeratæ numeris omnibus felicitatis? Iam verò æquitas animi, si in rem futura est cuiusquam, nimirum è re maximè futura est existimationeque hominis philosophi. atqui in ea plus inuenies subsidii tandem, quàm in impotenti affectu: præsidiique longè plus, quàm in ciendis animi intemperis impatientiæque tragædiis. Nam cum nulla sit actio prodita mortalibus ob iniuriam fortunæ, nimirum non cum Deo expostulanda est ob rerum indignitatem, prouidentix vt conuiuentis patientia, sed à Deo postulanda potius in aduersis æquanimitas, ne vulnus fortunæ scalpendo inconsideratius, exulceremus acerbè atque dilaceremus. vnguis est enim in vlcere, impotentia sermonis in iniuria fortunæ. Postremò mortalium vita certamen est quoddam vmbatile Stygio cum sicario, & cum fortuna carnifice philosophiæ: hostibus cum infestis, tum cæcis, tū improuisis: qui prælio in vita sæpenumero, bello nō ante mortem vincuntur. Sua est autem vnicuique palma victori in æuū destinata: suum interim vnicuique stipendio tanquā æs attributum consolationis diuinæ. At verò bello finito, & peregrè redeuntibus, certū & fixum domiciliū constitutum est, ad fructū pacis atque securitatis æternæ iam atque beatissimæ. Desinamus igitur cū imperitis atque æquanimittatis nesciis, stomachosè in fortunam inuehi, vel verius

subamarè compellare prouidentiam quasi pseudopronceam, sub appellationis fortunæ integumento. Quod enim nunc grauamur & querimur, nulla non memoria fuit, humanis vt in rebus in vniuersum, & verò summis vt in rerum actibus, temeritas casuum, forsque illa fortuna nuncupata, magnopere pollerent. Quin & in æde Domini nonnullos, quos videmus reuerentiæ supremæ titulo insignitos, satis urbanè quidam pro concione, esse tanquam vasa dicebat aurea, ad ornatum in altari domini, non ad vsum exposita: sicut in ædibus priuatis vasa à Græcis ἀναθηματικά dicta: quæ in ornamento tantummodo sunt abaci, & vt est apud Homerum, ἀναθηματα δούλος, non in ordinem etiam redacta instrumenti conuiualis: spectandæque magis ipsa domi, quàm utilia. Huius deformitatis causam attulit primum supremorum Domini dispensatorum incuria (aut si quid aliud fuit, vel culpæ vel criminis) quibus summa naus anchora (vt aiunt) ab ipso credita esse existimatur. Siquidem ex quo primum regendorum administratorum facultatem, à comitiis paracleticis abductam, muneris illi sui tantum fecerunt & arbitrii: ima summis (quod aiunt) quodammodo permixta sunt. Sponso enim Ecclesia prouinciatim ex eo tempore habere cœpit, magna ex parte homines non delectos, sed quoslibet: peculiatos quidem illos atque numularios, cæterum nullo ære memorabili censos duntaxat euangelico: dotis etiam magis sponsalitiæ atque eius obuentionū, quàm sponсарum ipsarum cupidos & amantes. Hoc autem quid est aliud, quàm prædes domino dare actum primariorum, sponsoresque rei summæ, homines infimæ classis in sua ciuitate? inde illa nunc quiritatio factiosæ multitudinis, Dei, diuū, hominūque fidē implorantium: sub eiūsq; inuidiæ titulo, rei; indignitatis, imperio tribunitiæ potestatis parere recusantium, tamen augusto & pro numine habito consensu tot ætatum. Enimuero imperitiæ iam esse atque rusticitatis: non orthodoxe, non prisce pietatis: imperia ab istis accipere, qui apertè mandata Domini floccipendant. nisi verò non ludibrium est (fremunt illi, aut cauillantur) disciplinæ euangelicæ, saturationum, gnathonum, curgulionum auctoritate aut voce, ieiunia nobis indici: ac pro temperantiæ magistris, sacræque philosophiæ interpretibus, dipnosophistas plerunque nos habere, & antistites Liberalium. Et cum eò quidem iam mores euaserint, in tanto iuristum ciuilibis, tum pontificii studio, in ratione vt priuata, cum Catonibus testatò paciscamur & cautiissimè: isti in dominica ratione, tanta inertia incuriæque præditi sunt, vt vel Fimbriis ac nepotibus

committant primarum partium actus, atque in tenebris cum iis miscent dispendio incredibili dominici patrimonii. Sed sint hæc & alia quæ dicuntur, aliqua ex parte vera: (neque enim eorum apologiam scribere institui: quanquam fartam tectam in primis velim maiestatem numinis Ecclesiæ, à Christo causam habentis.) ut igitur non immeritò homines tantis in rebus rectorum incuriam grauentur (ne quid amplius dicam), num ea satis idonea causa est, quam propter sacrosanctæ potestatis reuerentiam calcare debeamus? omnemque ordinem ipsum maledictis configere ac despuere? ita enim rerum humanarum conditio natura constituta est, nihil ut minus situm & cariem vetustatis contrahat, quam boni mores, quam emendati ritus & compositi. Alia igitur (ut mihi quidem videtur) ineunda erat ratio rem lapsam constituendi, æmulationisque piæ ac probabilis redolentior. Quod non dubiè futurum erat, si quantum studia apud singulos, & quiduis inceptandi impetus valent: tantum Christi charitas in publicum valeret prouinciata. Quæ quippe vacat studiis odiisque carenti humanum lugere genus: quod de Catone à Lucano dictum est. Cuius iandiu viri germanum genus interiit: & pseudocatonum pro eo passim enata gens est mundo, degenerante iam pridem Christi charitatis indole, sic publicam vicem dolentis, ut priuata ac propriæ rationem præ illa, propè nullam habeat. Proinde ad suprà dictam rerum deformitatem, aliàsque complureis, cum vasorum vasculorumque omnium Prometheus patientiam tandiu accommodet: quid causæ est tandem, quin vasa ipsa etiam vtilissima, acquiescere in suo ministerio debeant, potius quam rumpi stomachando? Verùm enim uero ut ad nauigationis mentionem longo satis interuallo redeam, quanquam & iacturæ animarum, & naufragii causæ, & rursus salutis atque incolumitatis, in cura & industria, & rursus in torpore atque inertia exercitorum naus sitæ sunt cuiusque prouinciæ, eorumque qui ab ipsis magistri in naui designati sunt: prospicere sibi tamen vnumquenque oportet. Quis enim alienæ fidei salutem suam ita creditam credat, ut in securitate sui acquiescere debeat, qui quidē ipse vehi naui se meminert, quæ vasti ponti fluctibus scopulisque exposita sit? Quasi verò si videre mihi contingat eos qui ad clauum sedent, eumque ipsum fortasse, cui primarum & secundarum partium inspectio mandata est, alto somno sopitos, aut perforos tabulatæque animi causa in ambulanteis, securos sui suorumque periculi cælitus denunciati: ipse quoque suppari sopori & inertiae indulgere debeam, salutisque

meæ rationem quanlibet habere atque translatitiam. Quid si contrà eò acrius tibi consulere debeas, quòd auspiciis ductorum deficiente tuòsque gregales sentias? Ita fert autem religionis ratio à Christo constitutæ Seruatore mortalium, cura vt sui singulis antiquissima esse debeat: deinde coniunctorum necessitudine religionis, & communitate initiorum. Ac tametsi parentum & liberorum beneuolentiam, hominum etiam cognatione & beneficentia, & simul officiorum vicissitudine deuinctorum gradationem, atque ordinem amicitia, lex Christi Seruatoris non sustulit: propinquitatis tamen atque germanitatis charitatem, arctam, exquisitam, & (vt alibi dictum est) dioscuream, intercedere inter homines alienos quoque vel genere, vel municipii iure, ignotòsque statuit: & porrò lege sanxit. Sublatam insuper & præcisam illam exceptionem voluit iuris gentium & Hellenismi, extraquam si is quicum mihi negotium est, capitali me odio persecutus fuerit: aut capitali me fraude quoquo pacto implicuerit. Quod ius Christianismi, nulla ex memoria, nullis è moribus gentium, aut institutis philosophiæ, translatitium esse constat, sed nouum & inauditum. neque verò è terra, sed è cælo oriundum est, vt tute hominem quemuis, iisdem tantùm sacris tecum initiatum, cætera alienum & incognitum, & porrò malè tibi cupientem, non modò tibi iustum amicum, sed alterum te esse ducas: & cum sis Pylades, Orestem eum esse censeas: nec minus illi alteri, quàm tibimet ipsi cupias, faueas, commodites. adeò Christianismi exortus veluti nata fidelibus hora, diuidit in geminos concordia fata duorum. neque duorum tantùm, sed multorum quoque & plurimorum, quasi germanorum geminorùmque. Hic, hinc superi, hinc (inquam) quis est qui culpa vacare possit? Quis inter nos Aristides euangelicus? quis porrò ad normam euangeli vir exactus? quis ad ædificationem ædis Dei quadratus? quis ad examen Domini vir est æquus & bonus? quis verò ad perpendiculum crucis Christi rectus est? quis porrò suffragium meritis ipsius filii Dei, vt atramento mentis, vt liuoris loligine vacuus, quod illi Israelitæ cōtigit, quem ipse Iesus Christus suo suffragio ornauit? ecquis huiusmodi nunc extat? in vrbana conuersatione, in oppidana, in comopolitana, in vico, in rusculo, in gurgustio, in peristyllo denique monastico? equidem vix est opinor in Timoneo. Nam in atrien-sibus conuenticulis lex charitatis nunquam fortasse trinundino iusto promulgata est: cum ibi rara & exilia eius vestigia compareant: nisi subdolæ & intus atræ, ironiæque adulteratæ. Certè nunquam

illic rata fatis fuit ea lex, si quidem è memoria nostra, atque ex a-
uorum, coniecturam in præteritum facere institerimus. id quod ut
ipse faciam, non ægrè qui volet mihi persuaferit, qui genium auli-
cum non vnus tantum generis, nec vnus ætatis, aut lustrarim ocu-
lis, aut fatis meminerim. Hactenus enim illic beneuolentia valet,
atque semper valuit, porro etiam valebit, ita ferente genio conuen-
ticuli quatenus & quandiu inter æmulos, inter mutuò semel offen-
sos, inter perditè sæpe exosos, fucatae amicitiae suum operæ habent
pretium, olimque habuerunt. Neque verò in simulationis æde ve-
ritas coli piè potest: neque charitas contubernalis esse cupiditatis
auidæ atque æmulatricis. Quæ cum è cratere ipsa redundante sæ-
pe hauriat opulentiae inexhaustæ, è siphone tamen bibere, aut è
gutto sugere ipsa sibi videtur, quasi malignè fundente fortuna, aut
largitionis genio. In eo conuentu & similibus, quas officinas esse
videmus tabernasque humanæ prudentiæ, cum pudorem impu-
dentia, sermonis candorem versutiloquentia, veritatem vanilo-
quentia, bonum & æquum iniquitas & improbitas loco mo-
ueant: omnique gradu, ordine, statu, auctoritate, & ponte deni-
que deiiciant: ibi negocium habere studia philosophiæ quæ pos-
sunt, nisi molestissimum? Ibidem ergo maneat qui nigra in can-
dida vertere, atque ima summis miscere didicerunt. in Calypsus (in-
quam) maneat diuersorio, in quo mortales ingeniosi, candidam
simplicitatis infontis & ingenuæ deponentes, qua in genitali laua-
tione amicti sunt, versicolore ipsi pro ea habitum cum sexculy-
xea calliditate sumunt. deinde sophismatis & antisophismatis atri-
sibus & palatinis, strophis atque antistrophis instructi, ibidem so-
lennibus & ediscendis, fortunam sibi finxisse scitè ac strenuè di-
cuntur. Non ignoro virtutis speciem interdum ibi conspici illustrè
& vendibilem. hoc dico, virtutes ibi plærunque personatas esse,
ad vsumque exemptiles, & Roscianas. quippe vbi tam friget veri-
loquium atque etiam offendit, quàm plausu excipitur scita assenta-
tio. Proinde, procul inde, per inquam procul abscedant necesse est
phileuangelii & planiloqui, qui veritatis cultores sunt atque simpli-
citatibus: vbi philirones & flexiloqui, primarum & secundarum acto-
res, & tertiarum esse plausibiliter cernuntur. In vniuersum Diony-
siaci (ut Græci dicunt) artifices, è schola ludiorum, vbi ciuium incō-
modis & necibus sua commoda augere non modò solenne est, sed
etiam plaudendum & palmarium. Lex autem beneuolentiæ supra-
dictæ hoc habet magnopere memorabile, imprimisq; accuradum,

(utpote in tabula summa scriptum, secundum & proxime diuini cultus præceptum, quàm maximè fieri potest dedititii atque deuotitii, in quo præcepto Christianismi imum est fundamentum & fastigium) hanc inquam, habet lex Christi tanquam appendicem primi capitis, ut qui in ciuitate professi sunt quæ theocratia regitur, sic animo comparati sint, ciuicam ut coronam ab omnibus & singulis mereri cupiant & gaudeant, ubi res nata cunque tulerit ut id possint facere: à propinquis iuxta alienisque, ab amicis itidem & inimicis. Charitas enim Christi amussis est alba in lapide albo, ut est in prouerbio. quippe quæ necessitudinem Pyladeam, ut vinculum Ecclesiæ, vnitatisque retinaculū, sanctissimè instituerit, quod quidem ad beneficentiam attinet & beneuolentiam. Christi porro nomen, insigniaque crucifixi Christi, in deliciis habet tantum: & velut vnicos amores suos ardentissimè exosculari gaudet, atque etiam suariari. in eo summi boni pignus habere se certissimū summa cum fiducia credit, in eoque falli non potest. Age iam, hanc cum esse summam religionis & pietatis orthodoxia constituerit: cum id è loco superiore docentes religionis interpretes audiamus: cum è loco inferiore, secunda nos admurmuratione hoc dicentibus assentiamur: cum publico consensu, cum legibus & regum & pontificum id capite sanctum sit, dirisque insuper imprecationibus, siquis eius dogmatis quicquam labefactare ausus sit: iam verò cum morituris nobis hoc maximè in mentem venire & persuasissimum esse, cum in Christi cruci affixi amplexu animam agere summo opere exoptemus: postremò cum eos quibus id diuina benignitate euenit, rectè, commodè, & feliciter vita functos esse perhibeamus: nobisque metipsis soleamus & charissimis id ominari, liberis ac propinquis: nec verò manes funere elatorum rectè conditos esse censeamus, nisi super humatorum tumulum cippumque monumenti, crux pro ornamento amuletoque dirarum erecta sit: hic iam quid dicam? vndenam ista tandem mentium, opinionumque peruersitas? vnde sensus communis & prudentiæ ciuilis tam deuia, tam cæca contentio, ut aliud in vita expetendum, & equis verò velisque; consecrandū, aliud in morte pro summi boni pignore existimemus? Sūma certè hæc dementia est, hominique verè philosophanti incurrere oculis, & miseranda: ut non mirum sit nobis, veluti mēte captis, bonis interdictū esse, quæ quidem sanè vera germanaque bona sint: nec in fortunæ infidæ ac perfidæ mancipio posita. eorumque tantum nobis vsus & potestas permissa, quæ longè officiunt plus

animo quàm proficiunt, & simul quæ animæ corpori fœdè lenocinanti, sepiſſimè negocium exhibet anxietate plenum. Nam quotus quisque nostrum sacris initiatorum, æternitatem promittentibus & immortalitatem, vsque adeò de se liberisq; sollicitus est, vtrum suū illorūque nomina in albo cælesti perscripta sint designatorum Christi: atque idem ipse de eo angitur, vt inter alumnos fortunæ, beneficiariosque fati, adoptatum sibi esse ipsisque eueniat? Age nunc in diuersum: ecquis est mediocri cognitione imbutus, aut etiam leui opinione rerum sempiternarum, quin probè intelligat, atque ex animi sententia, si vrgeas fateatur, multo deterius & miserabilius cum illis actum esse, qui inter reiectaneos prouidentiaē relati sunt, quàm cum calamitosissimis hominum in vita, qui spem habent beatitatis? Itaque tum demum resipiscere incipimus, cū Atropos apparitrix rigidissima, migrandum esse innuit, serò, an adhuc tempestiuè, nescio: certè difficillimo tempore, & sepe grauissimo. Hoc igitur teneamus vt elementum philosophiæ primæ: naturam humanam, tuere olim non potuisse fidem suam, nec nunc posse Stygio fœneratori oppigneratam & nexam, nisi fidei crucifixi interuentu, qui constitutum chirographi alioquin indelebilis, è loco superiore pro singulis ac vniuersis fecit. Ceterum per euariantium affectuum iactationem, quasi per mare (vt diximus) vadosum, scopulosum & procellosum: per pontum quoque & per euripum, per breuia & per alta, vela nobis facienda sunt. Remigio etiam nauigandum, ad quod ipsum strenuè & nauiter nobis incumbendum est, flatibus quoque secundis non minus quàm aduersis. Nec ideo tamen à naufragio nimio per metuendū est, quod quidem attinet ad summā rei nauticæ: quippe nauigio non fragili, non solutili, cæterum è materia crucis dominicæ cælesti manu edificato, tabulis nouis cedrinisq; coagmentato, clauis insuper illis compactili & cōfirmato, qui in Seruatoris sanguine temperati sunt. His autem ipsis fides Christianismi sic validè, sic firmiter fixa est, vt conuelli nulla vi possit in perpetuum, non inferna, non superna, ne si tartarea quidem ergastula soluantur, si Titanica stemmata, si nomenclaturæ Hesiodicæ monstra in populos emittantur. Quo minus nobis metuendum est hodie à rerum nouarum molitionibus, animos sollicitatibus sanctiorum ætatum senatusconsultis acquiescentes: quas indies alias atque alias videmus exoriri, exorturasque fama adhuc perhibet, & temporis licentia præ se fert, ad vsque vltima indignitatis exempla, nisi publicæ curæ vigilēs viderint, ne quid ipsa res Christiana sibi permissa detrimenti capiat.

Etenim auspiciis Christi exercetur nauigatio, qui cum vbique habeat imperium dictatorium, nec minus id obtineat in hostico & infesto, quàm in pacato & composito: nauem tandem ipsam cum delectis vectoribus incolumen appulsum iri pollicitus est, vel si Palinuri somniculosè, si etià veternosè obdormierint ingenti cum sua fraude. Singulis tantum id uidendum est, ne iactum earum rerum faciant, sine quibus ad portum hospitem atque amœnũ nemo admitti potest. Retinenda enim (vt dictũ est) mordicus capita duo prima Christianismi: qui sic decem ipse tabulis legis constat, cariem nunquam sensuris: nusquam remissionem seueritatis iam æternæ, atque in omnes æquè pollentis: vt in prima secundaque tabula, totius legis summa, ab euangelio legislatore posita sit, & constituta. Summopere igitur homini philosopho cauendum est, ne in tempestate, ne in turbine, ne in æstuosa iactatione (cuiusmodi iandiu populum ordinésque exercent) iactũ inexpiabilẽ summæ Christianismi iactat. ne in vadis hæsitatiæ quasi expes & deprehensus hæreat. Quod etsi non minus sereno & tranquillo, quàm nubilo cælo impendentique procella euenit incautè & supinè nauigantibus: nunc tamen vigilantius obseruandum est, ex quo opinionum quarundam (vt dictum est) peruersarum nebulae, nullo sæpe auctore sparsæ, certum cæli conspectũ passim iis ademerunt, qui ad oculũ tantum & astrolabum cælestia perpendunt. Nec verò diebus (vt dicitur) halcyoniis, in vtranque aurem dormiendum est. nam eò tempore maximè marinam ontra suspecta sunt sapientibus, atque formidolosa. His adde, quod & bono & firmo stomacho esse oportet, animique æquitate prædito, vim aduersus & iniurias tum hominum, tum fortunæ: nec nausea (vt ita dicam) indignationis atque stomachatione rumpi. Vtenim grauitè plerunque hæc deuorentur, velut res amarulentæ: admotis tamen quasi fomētis, sanctioris philosophiæ præceptis ac documentis, commodè concoquuntur. Hoc porrò etiam in loco ab Homericæ philosophiæ mutuari quippiam nostra non grauabitur orthodoxia. apud quem poëtam Vlixes aduersus Sirenium capitaleis illecebras, consilium Circes, quam ipse deam vocat, secutum se esse commemorat, eoque consilio & ipsum & socios perniciem certissimam effugisse. Inter monstra enim maris huius sæculi, curriculique vitæ actuosæ & fluctuantis, quod nobis vel breui vel longo traiectu, vel mediocri transmittendum est pro cuiusque vitæ fuso: Sirenes plenissimæ sunt periculi, vitatũque difficillimæ. Ausculetur igitur Vlyxes, philosophiæ non priscæ terrenæque

discipulus: sed theoricæ potius, de cæloque seruantis quam Græci vocant *θεωροκόπων*. Vir prudens utique rerû salutarium ac diuini iuris consultus, de sua salute propinquorumque & sociorum anxius: tum appulsus in patriam suauissimi cupidissimus. Siquidem sacrosancta philosophia, quæ velut in mari hortator hortari solet, salubria hortamenta dare nobis nō desinit *πρὸς μελιχρόα νόσον*, eaque inculcare assiduo magisterio. Sirenes autem sunt hoc tēpore, mea quidem sententia, ut etiam olim fuerunt, iucunditates & illecebræ urbani conuictus atque prætoriani: cuiuscunque etiam hominum celebrioris cōuentus, in quo ciuilis prudentia venditare se, iactareque solita est, suis cum multis variisque facultatibus ingenii, animique expolitionibus. In his enim nominis claritas ambitiosè quæsitæ, oculos præstringit sensus & prudentiæ quæ communis dicitur, splendore quodam, in re præsentī quidem illo sanè micanti & æmulando: sed veluti vitreo & sensim euanido, si sustinere pergas. Et Sirenes quidem, quāquam olim dictæ sunt aurium voluptates, ut Gorgones oculorum (quarum nulla ad sese hominē rapit violentius, quàm laudatio cuiusque suis auribus deuorata, ut inquit apud Xenophontem Socrates) Sirenas nihilominus nunc esse duco aut certè dici posse, urbanæ vitæ illicia & atriensis, & cuiuscunque conuentus ac conuictus celebris, ad popularitatis aucupium plaususque institutæ & comparatæ. In his sunt autem, morum ad rationem temporis locorumque & fortunæ concinnatio atque compositio: affectionum corporis, eiusque habitus & cultus elegantia & lautitia: lepos, facundia & venustas in fermocinatione, studiosa & aucupatrix fauoris & gratiæ: ambitus strenuus & sibi semper instans, popularis auræ petitor, & famæ candidatus: denique omnia vitæ lautioris ac nitidæ munia, functiones, officia, obsequia, ad venditationem sui theatricam exquisita, cōcinnata, & perpolita. At hæc reuera formulæ sunt fuci, senatui, populo, equestrique ordini, vitæque (ut dicitur) & mundo factitandi. hæc artificia probitatis adulterandæ & charitatis, atque emētiendæ suauitatis morū, beneuolentiæ euāgelicæ, ludibria inaniæque simulachra, quæ alienis iuxta familiaribusque obuia est (ut alibi diximus) & morigera. Quarū ex rerum mixtura cinnus ille conficitur morū, quā urbanitatem appellamus aulicam, vēdibiliter quidem ille, & mirè ad speciem, sed inaniter reuera & in modū futilem attēperatus, nihil prorsus aut æqui boni referēs, aut charitatis Christi. Multa autem huiuscemodi vendibiliter inter hominēs fiunt: ac secundo rumore plausuque excipiuntur: quæ auersa tamen aui inauspicatæque fieri, sapientiæ non

dubium est, quæ de celo seruire instituit, sursumque suspicere. vsque adeò regnum Christi, ab institutis humanæ prudentiæ dissidet. Et hæc est ferè formula eius Sirenis, quam aulicam facundiam dicimus: non magis locum significare volentes, id est eius incunabula, quàm ludificationis artificium, quod latissimè pateat. hæc autem in iudicio philosophiæ nec facundia est reuera, nec morû elegantia: sed aretalogia potius hominum circumscriptrix: auribus putida & molesta simplicitatis amantissimis (cuiusmodi sunt aures præceptoris euangelii auscultatorum) audiendæ veritati, non item vanitati, pronæ & defæcata. Huic siue fallendi artificio, siue actui scenico è schola disciplinæ salutaris protinus explodendo, conuenit amiculum anceps atque geminum simulatione subdola dissimulantiæque contextum, tinctum succo supparasitantis præpotentibus impudentiæ: quam (vt fert vsus) induunt fallendi artifices in hanc aut illam superficiem. ad desultorios enim mores ea vita maximè comparata est. In vniuersum autem nugarum institores, fumosæ charitatis ac tepidæ venditores duntaxat apud homines in atriensibus cõuenticulis adhuc hospites ac peregrinos. quibus nullum est negotiũ ipsis, nulla necessitudo cum veritate germana, cũ simplicitate Christiana, denique cum fide bona, & cum candore hominis interioris. Nihilosecius tamen ars est moribus iandiu receptissima in omni penè ordine, sacro iuxta (si diis placet) profanòque: sui ac certi generis lenocinio temperata, capitalique mangonio. Hac liberaliorem paulo genium habet, imposturæque nõ ita maleficæ, blandiloquẽtula tantum comitas, & prensatrix hominum: ludibundis oculis, & mimo scitè seruientibus. quæ salutationum largitrix prolixarum & sesquipedalium, amplexus etiam arctos ingeminare solet, nec verò grauatè sese dedere, vt in quenque incurrit qui quidem aliquo sit in numero: cæterum captandæ magis (vt fit) gratiæ, quàm doli mali, fucique in necem hominum captionemque facitandi, cupida & artifex. Vtraque tamen si ad verum æstimare res volumus, amicitia, iustæ & beneuolentiæ nescia atque neglectrix: & meditata tantum vanæque veritatis assimulatrix. sed quæ inter artis aulicæ tamen ediscenda sit progymnasmata, iis quidem qui officinæ ambitionis formandũ atque perpoliendum genium suũ dederunt. Quibus etiam vt appendix accedit ea quam Græci glossocharitiam vocat, sermonis quidẽ illâ largitione, sed veritatis atque operæ parsimonia morigeratẽ. Ad huiusmodi verò morum mendosam rationem, corporis animique degeneres affectiones, ad personatæ vitæ

ductum, nihilque sui proferētis, non naturæ procliuitate: non igniculis illis innatis: non instinctu spontaneo suoque mores cientur hominū: sed praua æmulatione, sed prudentiæ communis magisterio, & sensu insititio. cacozelia Græcè dicitur, viciū in verbis, in sententia, in pronuntiatione: in toto denique homine ipso, qui in Christi sacramento nuncium vanitati remisit. Natura enim duce ad veras & simplices actiones ferimur, ut in pueris patet, in iisque hominibus, quos Græci ~~ἐνδοξοι~~ vocant: nō ad imagines veritatis, emēticiāque inaniter rerum officiorūque simulachra. inde illud oraculum Christi apud Matth. Nisi efficiamini (inquit) sicut puer iste, non intrabitis in regnū cælorum. quibus verbis, ut Ambrosius adnotauit in quadam Homilia, infantiam morum Dominus significauit, affectuūque maleficorū animi vacuitatem. Quapropter ab Hellenismo errorum præceptore, simulachrorum cultore, nugarum opifice, ad veritatis cultum atque simplicitatis, philosophia nos reuocare clara voce videtur, ut pote quæ theosophiæ germana sit & socia. At nunc ut mores in assimulationē verterunt, planēque inualuerunt, non amicorum, non ciuium, non virorum bonorum officium, ciuiles vsus actionēque: nec verò (quod præcipuū est) vnguentum Christianismi initiorum redolent: quo & caput & pectus, anticāque pars hominis Christiani, posticāque delibutæ sunt. Amicorum dico mores & priuatorum? quid si ne magistratuum quidem, honorēque gerentium? quid si nec sacerdotū? heu pietas, heu prisca fides, etiam autem ne sacerdotū quidem? etiam inquam. Nisi verò non videmus passim, è suggestu, è loco superiore, pro cōcione, instituta Christianismi, exēpla continētiae, sententias euangelicas mirificè cōmendari atque deprædicari: tum in studia avaritiæ, in honorum gerendorū, in cupiditatem rerum caducarum magno sudore, ingenti laterum contentione, Stentorea voce inuehi: & plerosque tamen eorum mox flagrare audimus infamia cupiditatis perditæ atque ambitionis, simul ut occasio quædam festiua candidam hominibus pridie squalentibus aut pullatis induit. Porro equidem progredi in religionem traxissem, nisi conspicuam rei indignitatem hoc ita clamitare cernerem, ut silentio prætermittere sine præuaricatione nequirem. Scenicorum, histrionum, ludionum actiones, pro veris functionibus legitimisque habere nos homines anthypocritæ clamittant. idque mores iam recepti non obscure præ se ferunt, in profanis, in sacris, in apertis, in opertis. Age verò, quando eousque cunctus sum trahente rerum serie, ut vel momi personam,

vel Aij loquentis assumendam aliquantis per habuerim, licet mihi ille nec humeris aptè, nec stomacho non agrè sedere possint, hanc aut illam ut sustineam, hoc quoque in loco necesse est, ac si quando alibi fortasse scribendi ratio instituta id tulerit. Homines quidam primum pauci, egregijs illi quidem ingenijs ac literis, sed liberioribus præditi, & tanquam ex asylo apertè, acerbè, atque vocalissimè conuiciantes, mores & ritus hypocriticos, (utrum enim eorum verbo) momicæ asperitatis salibus perfricantes, nihil nec sibi propemodum reliquum nec posteris fecerunt ad imminuendam opinionem sacrarum functionum, lædendamque maiestatem ordinis consecrati atque consecratoris. A quibus audaciam mutuati alij deinceps atque alij ex turba hominum miscellanea, conuicium facere apertè non desinunt primariæ hominum nationi, populūque imbuere eorum contemptione. eoque iam res euasit indignitatis & licentiæ, ut non tam pontifices nos habere partem quidem longe maximam, quam propontifices dicant aut significant: (neque enim quæ atrociora sunt, proferenda esse duxi) non tam præfules, quam præfulares viros: non pontificatibus, non antistitiis, non primatibus in cœnobiis, non assiduis iustisque functionibus munera obeuntes, ut collegas & sodales: non sacris denique magistratibus, non flaminibus, non archiflaminibus fungentes, in sua sorte singulos atque ordine. Quanquam non propontifices tantum singulos mortales (quod olim receptum est, ex quo assiduitatum veniæ, munerumque in æde Domini fungendorum vacationes, in commercio hominum esse cœpere) sed etiam propontificibus habemus, quasi Ianos quosdam geminos & tergeminos, aut quasi reliquias quasdam generis illius ἐκαστοῦ χέρος. Hæc verò ab hominibus ita dicuntur, ad lienem ut fortasse exagitandum, non etiam ut ad precordia pertinere videantur opinione imbuenda colendæ sanctius religionis. Sed sint speciose dicta, nec abhorrenter prorsus à veritate, (licebit autem persona quoque Aij loquentis iam exuta, quippiam huiusmodi rerum fateri in sinu philosophiæ). Spectamus enim & ipsi permultos eiusmodi sacerdotes, (vel in oculos illi incurrunt nostros potius) nihil aliud penè, quam titulorum honorumque potentes, opimorumque fructuum: eoque nomine palam & cum ordinis inuidia sibimetipsis gratulantes, cætera nebulonibus similes, vertice tantum summo nouacula perstricto, aut forfice libato in speciem capillo atque defunctoriæ. Ut igitur hæc esse vera quidam ex parte fateamur, tamen non tam culpæ hominum, quam

conditioni temporum tribuenda sunt apud æquissimos iudices. Nam quis mortaliū ordo in vita sic officiosè ac decenter constitutus est, vt huic ordini licentiam exprobrare infamiámque videatur? Quin & prisca innocentia multum debuit disciplinæ primùm adolescenti, & deinde iam adultæ. Nihil autem minus ferendæ est ætati, quàm disciplina morum rectè atque ordine constituta, etiam si semel iterúmque recocta sit. Eodè ferè pertinet, quòd pro monachis, & monachorū primis & coryphæis, fartiles ali dicuntur homines, quasi in macaron insulis, fruentes illarum redditibus opimis. qui legum canonúmque sanctionibus, tanquam præsidii sacrosanctis, diligētius adhuc & certius asseruati sunt, quàm illa olim mala Hesperidū cantatissima. Felix hominum genus, quibus vt feriatis epulonibus, omniū maximè mortaliū, *ἀσπαρτα καὶ ἀνέροτα πάντα φύονται*, quòd est apud Homerum. En quò philosophia Christianismi delapsa est: id est, vt ipsi interpretantur, ab heroicis virtutibus ad ironicas ceremonias: exoletis iam & propemodum deletis veritatis rerum tantitatisque vestigiis: si quidem ad normā priscæ seueritatis explorare res volumus. Monumenta tantum ad hoc quæ asseruata sunt, clara quidem illa & memorabilia, ceterum rari vsus aut etiam nullius: visendæque potius & admiranda, quàm æmulationem sui cōcitantia. mirum vt ad modum non sit fortasse, operum humanorum indicaturam vsque adeò euiluisse, eorum iudicio qui omnia fidei vni tribuūt. quippe quæ tectorio scenicæ hypocriseos inducta, intus sint inania spiritúque vacua. Ab Ecclesia autem Christi, si fidē, si charitatem veram tollas: quid iam aliud erit, quàm nauis in mari æstuoso & scopuloso, prora & puppi cassa? Verum vt ad rem redeamus: eiusmodi sermonis in vita ciuili, actionum subdolarum, ministeriorumque artificia: tum ad veritatem adulterandam, tum ad officiorum vicissitudinē dolo malo inficiendam, inuenta & comparata: quàm è diametro opposita sint, non modò candori euangelico, sed etiam innocentiae moratæ, quis nostrum non clarissimè perspicit? cui quidem fraudem contendere cum æquitate vacauerit. Siquidem Christi Seruatoris doctrina eiúsque discipulorum, doli mali inter homines & vaniloquentiæ quoddam fuit euericulum, vt Ciceronis verbo loquar. At nunc æquo & bono imbuti mores, & simplicitate tincti pro nihilo ducuntur, atque etiam ridentur, vt exoleti & obsolescentes imperiti rerum homines: prudentiæque ciuilis & atriorum incola summam morum sanitatem vitium esse censet, vitæque incommodare. Lege

Lege autem veritatis promulgata, & charitatis, rerum mirificarum
 opificis: aqua & igni interdictum erat viciis contrariis simplicita-
 ti morum atque integritati, societatis ciuilis iura abrogantibus. Et
 veritas quidem ac sapientia Dei, tum plebem olim sibi circumfusam,
 tum discipulos suos alloquens, placida ferè & leni oratione uteba-
 tur: ad scenicos autem homines fictosque, ad versutiloquos & ca-
 ptatores, pugnacem illum sermonem, & altercatricem fundebat o-
 rationem, minacem insuper cum maledicto. Certè quidem Serua-
 tor nullum crimen frequentius contumeliosiusque obiecit, sermo-
 cinando cum primoribus sacerdotum, quàm assimulationem san-
 ctitatis & probitatis. nec sibi inter hominum mores quicquam ma-
 gis cordi esse, quàm apertam simplicitatem declarauit, cum æqua-
 bilitate in ordinem se cogente: duntaxat non vacuam cælestium
 rerum sapientia. At nos omnia exquirimus & consecretamur figu-
 rata, subdolè litæque tectorio vultuosæ versutiæ & præstigiatrix.
 Quid autem in vita ciuili atque aulica primarum, secundarum, ter-
 tiarumque partium homines, aliud quàm fabulas agunt, prætexta-
 tas, togatas, tabernarias & planipedes: choragorum vice fungenti-
 bus sensu communi & prudentia, designatrice fortuna? nam quo-
 ta pars actuum ciuiliū & prætorianorum, quota officiorum pri-
 uatorum, pura est & vacans simulationis fuco, & vanitatis lenocin-
 io? Neque verò veritatem in hoc libro, vtranque in partem testi-
 monio nostro fraudare præuaricāter sustinuimus: cum personā Aii
 supradicti induisse nos meminissemus. O vita, *ἄσέ σε δούμων* & *ἀίγεναν*,
 morumque facies adulterina, germanas virtutes è medio sustulit.
 Magister ille populi procerumque mundus, mendosis actionibus
 inuicem circumscribere docet homines. at vetat id spiritus doctor,
 ad Ephesios scribens. Religio & pietas, eorumque diuersorium aut
 certè domicilium, prosopopœiarum theatricarum simulachris pro
 insignibus vasis plerumque exornata sunt, quod homines permul-
 ti palàm vociferantur. quæ simulachra colere nos oportet nihilo-
 minus & venerari, siquid mei iudicii est, vt exuuiis angusta & sacro-
 sancta primordialis germanæque religionis. tamen si ij ex eorum nu-
 mero sunt, aut ex eorum natione potius, quibus Christus semetip-
 sum non credebat, quondam inter homines verba faciens, ideo vt
 Ioannes testatus est consiliorum eius conscius, quòd eos non mi-
 nus intus aut non aliter in corde, atque in cute nosset, vtpote cui
 nihil prorsus occultum esset. Verùm his atque huiuscemodi mul-
 titudinis imperitæ ludificamentis, homines quidam prætexta fasci-

búsque spectabiles: quidam lituis, infulis, trabeísque insignes & venerandi, cum aut scitè vtuntur, aut appositè rationibus suis ad animi obsequium, non ad officii functionem subductis: fucum sese facere mortalitati putant, imperiorum maiestate adductæ, aut religione obstrictæ: cum reuera ludibria pietatis Christo Seruatori pēdant, pro cultu & obsequiis, munerumque sacerdotii functionibus feriis, & spiritu non vacantibus. Has veritatis imagines & sanctitatis, vtinam idolomastiges homines censura sua tantum notassent: non etiam Seruatoris diuæque eius parentis simulachra ex æde Domini deiecissent, contra morem maiorum. Sed enim vereor lege vt agere euangela iam liceat ad subsellia ciuilis iudicii, non tantum communis & togati, sed etiam prætextati & infulati. præcipuè verò ad confessum prudentiæ, quæ maioribus auspiciis subnixa est & stabilita. quæ etsi iuri multum tribuit honorario, æquitatem tamen eius iuris affinem aut sustulit, aut magna ex parte deleuit & antiquauit. Age verò, naturæne instinctu, an æmula procliuitate euenit in mores recepta iure gentium, vt in suo quisque ordine cupiat, concutur, & gestiat primam classem ducere? vt primas ferre partes honoris & compendii? & cum id ex animi sententia cuipiam contigerit, ille vt in proximum protinus ordinem sursum versus adoptari, & deinceps in alium aliūque aueat, scansili serie ambitus & perpetua? nec verò antè auere & discupere desinat, quoad in præcipientem tandem altitudinem ardor cupiditatis euadat? Atqui horum hominum sitim ardentem extinguere difficilius est fortunæ, omnia in spem cadentia iis largiendo, quàm gliscentis incendii vim sistere guttuli stillicidio. Quanam igitur parte hominis, circuncisam vitam esse Christianam dicemus? Vbi autem illa cordis circuncisio, cuius commēdator est idem Paulus in epistola ad Romanos entheo spiritu in primis scripta? vbi porrò pura voluntas? vbi facta testaque mens hominis à spiritu cupiditatis improbæ? An corde tandem circuncisi sunt, qui sibi finem quærēdi possidendique, qui fastigium attollendi modum præstituerne nequeunt? Non ignoro hæc & huiusmodi acroamata, aurium non esse ciuiliū, nedum prætorianarū: atq; haud scio an nunquā fuerint, nusquamque. Quare mihi met ipse hæc cano vel philosophiæ iam sæpe dictæ potius, cuius vix tamen ipse limen summo pede attigi. Inde autē est illa Sirenenata, omnium pellacissima, auctoritas & imperium in summo actu rerū tum sacro, tum ciuili: quæ homines non perlicit solum ad sese & pertrahit: vnde nomen inditum Sirenibus: sed transuersos agit etiam, porròque

in Charybdin rapit plerunque, sitis bonorū atque honorum inexplebilis. Quem sanè ad gurgitem cupiditatis qui penitus rapti sunt, intróque merfi: rarissimum est postea existere vt denuo possint, indeque emergere, vt legum iurisque meminisse velint, aut diuini aut humani: ne mortalitatis quidem illi in rebus rationem inceptandis & exequendis habere, nedum immortalitatis. Hæc fors vitæ idola aurea & argentea colit, ex iisque numina sibi aliena à Christo Seruatore facit atque abhorrentia, vt manifestum est animaduertentibus. Neque id quidem modò, sed etiam assensione obnoxia atque clientelari, atque eo amplius, assentatione quasi parasitica, ordinis hominum prætextati & infulati, diuinos honores propè dixerim adepta est, vt ἰσοθεός, hominūque fortunatrix, in quorum ordinum sententiam togata multitudo & militaris, pedibus non dubiè trans-euntes: illos in catalogum si non semideorum, certè τῶν ὑπερανθρώπων referre non dubitarunt cultu atque supplicationibus. Quapropter hæc Siren quanlibet penatium censuūque amplificatrix: quanuis hominum ornatrix atque beatifica: velis tamen & remis sapienti fugienda est, æternorum tantū bonorum admiratori & verè idolomastigi huiusmodi simulachrorum, quæ ἰσοθεός coli sine scelere nequeunt. Et quidam talis actus vitæ, quo florentior apparet oculis theatricis, eo minus fructus habet iudicio philosophiæ, prophanæ quoque, rerūque diuinarum nesciæ. Siquidem qui rerum potiuntur, qui fata regunt cuiusque prouinciæ, & cupere ipsi solent & satagere magis deinceps atque magis: augeſcentēque indies captura, auiditate, vehementius affici. id quod si in ordine equestri apud Deum capitale, in senatorio sceleratum est ob idolorum cultū quæ in corde circumferuntur: id in natione sacrosancta, à curaque rerum externarum euangelicis institutis summotā, quo nomine appellabimus? Scio me paradoxa scribere, atque etiam antidoxa vitæ in medio positæ, ad quam ratio mea comparata est. Sed actus quoquomodo peragendus est, quoad personam posuero, quam mihi ad scribenda hæc induit amor atque admiratio germanæ philosophiæ, etsi perleuiter mihi exilitérque cognita. Hoc dico quod fando audire aliquando memini: si quorundam hominum ex eo ordine insolentia, fastus, & cupiditas à regno Dei abhorrentia, tantum apud superos Nemeseos, apud inferos plausus excitauere, quanta apud mortales inuidia flagrare memoria nostra superiorēque cœpere: causam nullam videri, cur tam beati putentur esse & æmulandi à nobis, quàm titulosè & obseruanter salutantur à multis. Christus

æquabilitatis vindex atque ciuilis isonomiæ, diuitias & fastum in ordinem redegit : tum extorres regno suo & ciuitate domoque esse iussit : & verò in penates suos illos æternos patriosque , vix admissum iri palàm eos contestatus est qui copiis affluerent . Quocirca res supra modum secundæ, quæ oculorū nostræ mentis aciem splendore suo præstringunt , nullo penè loco numeroque rerum expendarum, iudicio hominum iuris diuini consultissimorum, habitæ sunt omni ætate. Verùm vt est peruersitas sensus humani, multa & centumuiralibus iudiciis, & senatusconsultis , atque etiam Areopagitarum sententiis , inter prima & præcipua censa sunt, quæ philosophia diuinitus instituta ad quintam classem reiecit. Sequitur & alia Siren, sæpenumero comes aut socia superioris, vel verius secundaria. rationem enim suam habet ab illius seiunctam, sed tamen secundum illam illecebrosissima, exaggerata titulorum nomenclatura, supra ordines erigens quorundam fastigium, cùm æquarionis ipsa (vt superior) nescia, tum verò æquè in obliuionem mortales atque ignorationem sui aliorumque adducens, quos carminibus suis affecit. Constat eius hypostasis nitore & lautitia vitæ : extructis principem in modum mensis, opimo victu, Syracusanoque & adipali, cœnarum adiucialium abaco, instrumento Luculli conuiuatoris splendido & redundante. Huius fastus appendices sunt, tum hæretis vestigiis clientelæ manus ancillans, ad omnesque nutus supparasitans : tum comitatus multiplex atque miscellaneus , regem suum pastoremque stipantium gnathonicorum philosophorum. In huius comitatu & familia quosdam quasi seruos ab oblectamentis videas, quosdam à ridiculis , à fabulamentis , à cauillationibus , nonnullos etiam fortasse ab obtrectionibus , aut scommatibus ridiculosis, sed aculeum ignominie relinquentibus . Mitto qui à variis esse solent tacendisque voluptatibus regi parasitico : nullum vt sit tempus , quo tempore non scitè , & tanquam frugaliter conteratur ocium , quod habent pro negotio beati illi homines & copiosissimi. vtpote quibus ad procurandum genium, propositi sui summam vitæque instituti applicare vacarit & contigerit . nulla etiam vt sit (significantiùs enim loquar) eorum fruendorum intercapedo, quæ prudentiæ mundi bona & expetenda videntur: contrà sapientiæ cælesti, mala & auersanda. Heu perditas vitæ rationes (iterum enim & sæpius paradoxologiæ indulgebo animo meo obsequens) heu pessimè meritos mortales de potiore parte sui . Felicè mne hanc vitam , an flagitiosam esse censemus ? Heu prudentiæ nostræ dictata

exitiosa, atque anteuangelismo planè congruentia. nisi verò hominis est euangelium exosculantis & amplexantis (vt Græci dicunt) *πρόστα τὸν βίον διανοιγέειν*. Iussusne optare vir verè prudēs, à Deo quicquid vellet, hanc sortem vitæ peteret? cæcum vitæ ciuilis atque in celebritate positæ, consilium & propositum. Quid enim? mentisne compotes sunt rerum diuinarum æternarumque consciæ, qui huiusmodi vitæ æmulatione ducuntur? At beata nobis & æmulanda videtur vita opibus circumfluens. Nam quotusquisque hominum paulo nauiorum vacat eo crimine, eorum quidem certè qui in eo peccare potuerunt? Cùm interim improbissimus quisque huius petitor conditionis, perditæque ambiens, tamen vt Cæsaris candidatus simulet se petere. Quotus autem quisque nostrum meditatatur, aut meminit in vita instituenda, decantata illa paradoxa, oraculæque certissima cælestis sapientiæ, Beati pauperes spiritu? & quæ sequuntur. Immo verò pro paralogis habet, nō modò pro paradoxis? Quis porrò illud non modò philosophicum, sed etiam philostauricum attendit, eodem ore veritatis pronunciatum, Beati qui persecutionem patiuntur? At hæc sunt verba Christi, vnigeni filij Dei: patrimonii sui opimi atque beatissimi auctorem facientis præconio exaudibili, atque etiam olim exaudito per vniuersum orbem. Quid igitur tam discrepat ab suo opposito, quàm professio nostra dissidet à vitæ proposito? Nam cùm nos omnes Christigenarum professione gaudeamus, cùm adoptionis cælestis iura habere nos gloriemur, ab altero natali manantia: paucissimi tamen nostrum ea licenda tanti ducunt, quæ æstimari humana mente nequeunt, ac sub admirationem tantum cadunt, quanti ea esse putant, quæ cùm suapte natura spernenda sunt, tum precario solum iure obnoxioque possidentur. Nimirum Sirenium Stygiarum carminibus aures hominum obfesse ac delinire, monita veritatis, hortamentaque cœlestia, vt iis contraria respuunt. illudque est scilicet præscitum prædictumque propheticum, ab illo euangelistarum vertice quodam loco citatum, Domine quis credidit auditui nostro, & brachium Domini cui reuelatum est? Quo brachio vis ac virtus sermonis euangelici significatur. Quare fides, tametsi in omnium sermone est, ac per ora populi, senatus, atque equitum volitat, vt festiua & amplectenda: iustam tamen hospitalitatem, atque etiam iusta longè inferiorem, in corde perpauorum inuenit è multitudine delectorum. iisque demum Iesus sese indicat vt discipulis suis, manifestoque ostendit, vt est apud eundem, cap. quartodecimo, non etiam mundo, id est potè-

tibus, copiosis, & illustribus, à regno Dei abhorrētibus: qui mūdi sunt ipsius decus & ornamentum. Siquidem procerum motus hæc cuncta sequuntur: humanū paucis viuit genus, vt apud Lucanum Cæsar inquit. Agē, quid habent iam mores simile conditioni hominum & habitui, ob noxam admissam intus ægrescentiū? Quid vel tantulum habet vita moribus hominum instituta, mœstæ lustralisque pœnitentiæ, quæ nobis indiēta est, edictōque perpetuo iniuncta? nam sterno-typticam istam, quasi que histrionicam, qua in speciē vtimur more quodam solēni, nihil moratur Deus, planctus est enim Pharisaismi, atque etiam Hellenismi verius, quàm expiabilis resipiscentia Chriani-
nismi, atque præcordialis. Potēstne igitur quicquā è diametro cuiquam magis esse, quàm hilaria perennia, ærumnosæ vitæ opposita sunt, & velut cruci affixæ? Atqui hanc Christus ipse Seruator & Dominus, christis suis denunciauit, id est nobis omnibus genitali spiritu rediuiuis: idque imperandi verbis, atque in formulam necessitatis conceptis. quippe qui crucem suam tollere vnumquenque iusserit, qui quidem iisdem vestigiis aut eorum æmulis, viam in cœlū post ipsum affectarit. Hic aqua illa purifica, vetustique hominis expiatrix, hæreat necesse est: nisi crimen hoc esse capitale fateamur, cuius criminis comperti longè plurimi mortalium, & manifesti sumus. Ita si pœnam deprecamur æternam, ad aram nobis misericordiæ rectā confugiendum, omnibus quidem illam nunquāque non patentem, sed resipiscentibus. At verò qui resipiscunt, stultè sese de semetipsis consuluisse perperāque agnoscunt. id quod in primis necesse est vt faciant, qui Sirenibus mundi sese pertrectandos dederunt, atque deliniendos. Meminerint autem (quæso) semper lectores, huiuscemodi disputationes ad vulgus non valere, putentque intra porticum philosophiæ, à qua tamen procul absum, hæc à me dicta esse, non in atrio honoris, non in officina ciuilis cupiditatis, non in campo honestæ ambitionis, non in conuenticulis alumnorum sensus communis, cuius alumni sumus: quod ineptire planè esset, non commodè & appositè tantis de rebus differere. Proinde qui Christianismi dogma sociare cum Hellenismi atque gentilitio sperat, id est cum Aristippeo, circuncisionisque præcordialis nescio & exorti, is (vt opinor) non diffidet, se cauum à conuexo dirimere etiam posse, aut vtrobique operam ludere non grauabitur. tametsi illa non difficiliora sunt fortasse, quàm à Christi cruce difficile est ærumnarum agmen, rerūque aduersarum molestiam dissociare. At verò sine cruce Christi ad beatam vitam subuolare, eos demum

credendum est, quibus æterna diuinitas gratiam Adraſtiæ legis fecerit. qua lege pater ipse cœlestis, filium suum teneri dilectum & vnigenum ante omneis voluit. Quo apparere potest quanto in errore vita verſetur, & promissorū Christi in quanta diffidentia: qua nulla maior esse insania, nulla capitalior culpa potest. Me miserū cūm hæc dico, & vt dico, sentire etiam cogor, ita enim viuus vidēſque (quod dicitur). sed reliqua ominari vereor. Verūm duæ iam dictę sortes vitæ, earūque Sirenes, rerum fluxarum temporariam possessionem, perpetuam faciunt destinatione mentis, cotrà quā hominū natura, rerūque ipsarum constitutum est. Vsum etiam & fructum peculiarem & precarium, vt suum, vt liberum, vt propriū, atque optimo iure possidēt: cūm nihil non profectitiū, nihil non temeritati obnoxiiū casuīque, habere nos sciamus. exitior tamen est eorum securitas, qui dubias cœnas ructantes, redditus consecratos & fiduciarios, iure vel potiore, vt sanctos, vt Domini nota insignibūſque impressos, vt profanis manibus intactos, quā auita patrimonia possidere se ducūt. nempe quasi in referendis rationibus eadem conditione futuri sint homines pecuniosi atque peculiati. Hic hic atrociores, hic existūt, ordinis illi dedicati obrectatores. Quid enim (aiunt illi) futurum est tandem, si ij qui sese christos Christi esse præcipuos, ac penè solos perhibent, & tanquam è cohorte Seruatoris prætoria, aut principe ac signifera, genialibus sacris initiati magis esse quā Christianis, videri non verentur? Quod si redūdantes copię nusquam non ferē, nunquāque non incommode; hanc deformitatē faciunt in atrio sacrosancto, quod hætenus sartum ac tectum ab omni iniuria, Christi reuerentia præstitit: quem tandem non subeat impetus, si non in eorum sententiam tranſeūdi qui licentius quā par est censorium stilum adigunt, vel momicum potius, in extremum ordinem: tamen secus de illis existimandi? Quem etiam non nihil censendi de cornu illo copię tandem exhauriendo, quod plenius fit indies & tumentius, decedente innocentia? Audiant igitur ij ad quos ea res pertinet, audiant (inquam) fremitum Aij Locutij, ne fortē ad secessionem spectet haud aspernendam, ad nationisque sacrosanctæ exuendam fœdē reuerentiam. aiunt enim (vt est huius temporis confidentia) vel vociferantur potius, non antē redituram religionis constitutę faciem spiritūque fortasse (si quando rediturus est, iūsque habiturus postliminij,) quā fastus & cupiditatis sportæ, vix scias superfluentes magis an perfluentes, ad sportulas redierint ciuiles

aut canonicas. tum demum enim fore inquirunt, ut quod nunc paucis satis esse non potest, plurimis sufficiat isonomiæ beneficio, proportionem quidem geometrica attemperatę. Verum hæc & alia eodem spectantia, mox forsitan viderint ij quorum est inspectio summa pecuniarum Domini, atque etiam vinearum recte atque ordine repastinandarum & excolendarum. At etiam ne qua indignatio desit (quod si palam dicere religio est, hinc tamen infodiam) ex istorum natione præcipue esse dicuntur, qui nulla exempla beati pauperis esse putant, iuuenesque hortantur ut illam ire viam pergant. Quos tamen (ne stomachentur æqui animi) aut eorum permultos, ita morte obeunteis videas: tantis ut ex copiis, egentibus exiguum stipendium, propinquis atque necessariis legata præcipua æris alieni relinquunt. Agere porro, quis nunc natalibus vel obscuris ac plebeis ortus, si maiore quodam fato præditus, sericum sese filum aut purpureum unum, fortitum esse in colitrium sororum experiri coeperit, vel augurio liberalioris spei atque festiuioris, in animum induxerit: non statim titulos gradibus scandere in cælum gloriæ theatralis nititur, in ordinemque semetipsum beatorum omni ope adoptare, & mox in collegium semideorum? Quis hominum fortunatorum non prandere videri vult ut Crassus (quod aiebant) & cenare? non ut Lucullus ædificare? Quis superuacaneos census, annuosque proventus, in statuis quæsitos cupiditatis: quis emerita ambitionis stipendia, eiusque germanæ sororis & vterinæ, quam *ἀνθρωπολαγεία* vocant, non in delicias, in voluptatem, non in saginam denique vertit inertium amorum: in farturamque conterit desidiæ, quam Sirenem improbam vocauit Horatius? Hæc equitem, hæc populū, hæc sacrum forma senatū, excepto sapiente tenet. Quis verò rursus non intelligit, non videt, non perspicit, Colosseos quosdam homines, stipatos clientelis agminibusque succinctos, quo vulgo putantur beatiore, quo religiosius adeuntur à multis & coluntur, eò inuisos magis esse vulgo, suisque interdum cultoribus, turbæque circumfusi, ob tædium obseruationis, eorumque fastidium? Eò verò propius sæpe abesse à furiali illo conuentu, ubi Tartarus ipse bis patet in præceps tantum, & quæ sequuntur: quo magis in cælo esse (ut est Latine loquendi consuetudo) iudicio populi ordinumque existimantur? Multa certe moribus hominum, rumore secundo plausuque excipiuntur, in theatro vite urbanæ & atriorum: quæ in regno Christi quo de regno nunc loquimur, aduersante numine fieri nemo negare potest. Quare animaduertere lectores oportet, non

pręcepta me vite, non hortamenta his commemorandis scribere, quorum in primis egens ipse sum atque insciens: sed in rebus huiuscemodi potius cum lectore non quolibet, animi causa animęque commentandis, æstimare, quàm è diuerso vita, atque etiam è regione comparata sit ab ea ratione disciplinę, in quam disciplinã iureiurando adacti sumus ipsi lustrico sacramento. Potestne tandẽ homo nouus, in officina diuini spiritus reconcinnatus, sine scelere hæc expetere, ea omni ope consecrari: quæ spiritus illi Stygij, cupiditatis, ambitus, elationis magistri, vt regni sui ac tyrannidis firmamenta, in mundum introduxerunt? Atque ex eorum quidem hominum natione sunt Lotophagorum proceres: qui in imum maris fidunt, asinaria mola premente ceruices istas quanuis arduas, superbas & inflexas. ad quorum fortasse sortem Christus humilitatis decus euangelico tropo allusit: tanquam in mari merfi curarum terrenarum & inanium, cælum iam ipsi suspicere eternitatẽque nequeant. Idne autem satis animaduerrere posse videntur aut meminisse, partim qui honores sibi ciuiles, donatos fortunę beneficentia, non creditos esse censent cælesti prouidentia: partim qui pontificatus, antistitia, aliąque sacerdotia, (sic enim nunc redditus annui, non munera officiosa ministeriáque vocantur) non fidei commissa antiquę pietatis esse interpretantur, sed legata quędam ludicra iucunditatis, ad vtendum, fruendum, liguriandum relicta: ad curandũque aliàs molliter oblectandũque genium? Hi sunt qui in altissima securitate eterni æui quęrunt, & tanquam optimis ab auctoribus & locupletissimis accipiunt, ea bona, quę in nullius hominis mancipio sunt, etiam si esse cœperunt iandiu in commercio. Cũ interim ij quos ipsi auctores laudant suos ac largitores tot tantorũque titulorum, in pari aquiescant maioręque supinitate. nempe tanquam prędibus ac prędiis (vt dicitur) & Seruatori ipsi, & populo plebique animarum, cautum sit huiusmodi liberalitatibus. Scilicet ius & fas nomina monosyllaba, honori haberi non magnopere solita sunt ab ordine grandium mortalium, insignitęque extantium super æquabilitatem ciuilem. Et verò classes etiam ipsas, & populum (vt verum fateamur) in ordinem magis cogit, atque ad æqui bonique reuerentiam redigit, tenuitas fortunarum atque mediocritas, quàm Domini timor, Christianismique pietas. Iure enim ciuili gentiũque, quo iure nominis quoque Christiani, vt quondam, fines adhuc reguntur: mortales fermẽ omnes tollunt animos submittuntque, pro modo & captu fortunę

l. iiij.

fortunarumque. Quin & ex euentibus rerum splendidis aut ob-
 scuris, æqui plerumque homines atque iniqui fiunt: ne gratuitam
 putemus fortis fortunatricis benignitatem: vt mirum non sit, tam
 arduum esse diuitibus & copiosis in regnum Dei ingressum, quod
 Dominus olim testatus est. Aliud est etiam & prorsus diuersum ip-
 sius fortunæ hominumque consilium & institutum. Siquidem
 apud eos quos bonos æquosque credimus, bona nostra deponere
 solemus & gaudemus. Illa verò aleatrix cæca, furda, volubilis, &
 præceps consilij, libentius sua commendat malis atque nequitia
 præditis. quippe quæ iniquos homines (vt dictum est) facere, atque
 improbos, ex æquis bonisque consueuerit. Aristoteles quodam in
 problemate ludibundus, quamnam ob causam (inquit) paupertas
 frequentius ad bonos diuertit, quàm ad malos? Nempe quòd
 cum omnibus inuisam se norit esse, bonos tamen melius sese &
 commodius vsuros intelligit: vt qui mala vertere in meliora no-
 uerint. id quod philosophia quoque carminibus suis facit in mo-
 ribus hominum, qui quidem eam audire sibi persuaferint. Verùm
 monstra iam dicta illecebrarum iisdem parentibus orta sunt, cum
 anxio corporis curandi studio, & incuria mentis. ex eoque fonte
 error ille manauit, qui per orbem effusus veras ac germanas virtu-
 tes adobruit Christianismi, ritus antiquos obliterauit, æqualeis
 actionum mirificarum. quibus tamen virtutibus fidem magna ex
 parte abrogauerunt ætates deterrimæ, morésque degeneres Christi
 adoptiuorum. Hic enim uero præterire Sirenes reliquas statueram:
 sed earum vna præstò sese sistens, in oculosque incurans in aures-
 que, præuaricationem obiicere mihi visa est, aut crimen obliuio-
 nis: præsertim quòd hoc tempore magnum ac numerosum post se
 trahat comitatum, nitoréque conspicuum, & luxus elegantia. est
 autem illa, summa venustate ac lautitia prædita, germana Cupi-
 dinis: cum omni ipsa genere lenocinij ad animos perlectandos in-
 structa, tum Veneris cestro succincta, carminibus Homeri nobili-
 tato *ποικίλω. ἐν δὲ ὅις θελήσῃα πάντα τέτυκται. ἐν δ' ἐν ἢ φιλότης, ἐν δ' ἰμερθ, ἐν δ' ὁα-
 ρις, πέρφασις, ἢ τ' ἐκλε. φενόρι πύκα πὸρ φρονέοντων.* Huius Sirenis carminibus,
 sexus vterque hominis afficitur non ægerrimè. Hæc omnes Vene-
 ris fermocinationes, gestus, appellationes, tactus, affectiones, nu-
 tus, petitiones, lusus, proteruitates nouit. eiusdem disciplina ludi-
 bundos aspectus, oculorum coniectus, niætationum prolusiones,
 Veneris lacestandæ præludia complectitur. omnes denique amo-
 ris licendi emerendique fermunculos, verborum velitatiunculas,

urbánitates, lepóres, discipulos suos docet, qui ad ludum eius ventitant. ad summam, hæc Cupidinē ipsum eiconicum (vt dicitur) ethicumque effingit & exprimit. Huiusmodi porrò lenociniis actuum, vultuum ac verborum, totiusque corporis affectuum, vernaculis & nostratibus, satis quidem illis acribus atque proteruis, suauiterque aculeatis & vrticosis, accessit haud ita pridem, rhythmorum Italismi genius, tanquam ars quædam venustæ dialecticæ, & Cupidinis eloquætiæ, lepos orationis amatorix, Pithò hypocritica, omnium philtororum vim superans: depereunteis amatores simulans, animosque despondenteis ecstatici amoris insania. Huiuscemodi cinctu virgines & mulieres complusculæ ornatae, atque ad certamen iucundissimum accinctæ, eoque sibi ornatu amantibusque placentes, venditione sui gaudent iuuenum æmuloꝝ, esse se in magistræ, in heræ, in dominæ mancipio (sic enim est hominum oratio) certatim profectum dedititios sese deuotosque clientulos adiurantium: non tam sancto forsitan serioque, quàm proteruo venustoque iureiurando. Seruili enim auctoramento certant æmuli aut priores aut primas herilis amoris promereri: sicque macti esse gratia, quæ summa est votorum amantium. Huius & illius obseruantix indulgere, atque ei addictum esse vocant, qua cum negotium habere ocii instituerint, amorisque commercium: & verò (si Seruatori placeat) seruitutem seruire conditionis dedititiæ, nexûsque Cupidinis. Hoc autem (quæso) homini sacrorum initialium memori, vtrum est vitam inter Christigenas spiritu vernantes agere, an inter Adamidas veteris hominis deliciis indulgere? exuuias abiectas contra fidẽ sacramenti resumere? perennes verò ferias vanitatis proteruissimę instaurare post resipiscentiam? Quotus porrò quisque, quotaque, hac Sirene non caperetur quam Iuno HomERICA, etsi candidis vlnis amabilis & eximia, tamen à Venere quondam vtẽdam sibi esse rogandam existimauit: cùm Iouem suum amore præsentaneo acríque inflammandum haberet? Non sum nescius ista vrbánitatis causa sapius, exercendæque animi causa facundiæ, atque proteruitati honestæ, quàm ad Veneris patrandaẽ spem fieri: ideoque in mores recepta esse hominum, pro negotio iusto ocium quouis modo deliciasum conterentium. & quidem sine intertrimento integritatis puellarum ac matronarum, plerunque id factitari videmus. Sed tamen eiusmodi vaniloquentia, auribus circuncisis atque euangelicis tam putida est, (quarum est hæc auscultatio) vt inter ludicrum certamen seriũque, nõ ita multum interesse videatur. Nam

vriticam feram qui tractant incautius, vredinem tandem sentiunt. Vtrobique etiam ludicri designator, commissor, applausorque, nefastus est genius, ex amantibus interdum amentes efficiens: atque in occasionem semper imminens catastrophæ atrocioris, quàm ut eò pertinere posse. & euadere institutus actus placide, lususque videatur. Quod si oculi quorundam hominum fascino afficiunt eos in quos incubuerint: limos illos aspectus & proteruulos, subassentientesque respectus, nec hebetes esse nec inertes sanè credibile est. si tamen illos aspectus appellare debemus, qui oculi sunt verius emissitii: secum deferentes partem animi, vicissimque assensus non nihil referentes. Adde quòd aliis quoque modis vrbani-
 tate plurifariam lenocinante, eiusque institutis, virginum mentes & matronarum aliàs incorruptæ, nonnunquam afficiuntur, ut parcissimè loquar. Certè aphrodisiorum ceremoniis quamlibet in mores hominum receptis deliciis studentium, dissidentes sunt admodum ritus initiales Christianismi. In vniuersum verò vrbani-
 tatis affectionem in sermone nimiam, quod iuuentutis lautæ & elegantis præcipuum est studium: Apostolus ad Ephesios scribens, σαπὲν λόγον appellat, quasi putrem sermonem & marcidum. est autem putre, quod iam vsum nullum præbere potest, ut inquit Chrysostomus in epistolam eiusdem ad Timotheum. Putris est igitur & quasi vermiculosa in Christianismi disciplina, in homine spiritu imbuto & numine, huiusmodi lepos aut proterus aut aliàs improbæ ac maleficæ vrbani-
 tatis & comitatis: ut denique verusti hominis exuuiæ, abiiciendæ procul, non modò deponendæ. Tales sunt igitur permultæ animarum plagulæ, tum apertæ, tum cæcæ, ideòque magis cauendæ, ab illo quidem animarum aucupe & captatore in mundo dispositæ: minimè autem nobis suspectæ atque formidolosæ. Quibus tamen captandis atque irretiendis oculū ille adiecit toruum ac Titanicū: si quidem aspectabilis esset oculis mortalibus. sed ciuilis hic sensus, vulgiuagæque prudētia, plausus captans theatricos, captio-
 nis horredæ securitate gaudent: totaque aut plurima est mens humana in cura rerū nihil ad animorum conditionem pertinentium: quæ vtranque in partē ipsa, futura est sempiterna. Certè si planè & ad verū loqui licet (ut iā dictū est) in aure philosophiæ pudor, pudicitia, modus, modestia, candor morū & germanitas, officiorū puritas, de gradu dejecta sunt existimationis priscae, propemodumque prostrata: ius & fas obtrita sunt, atque etiam hypocrisis cōscelerata, si quidem ad amulsum mores explorarentur euangelicam. Hæsitantia

fidem, contemptus religionem, licentia perdita Dei timorem excepit. Vnde autem abest offendendi religio, vnde Dei reuerentia, equis ibi dubitat examen insidere crabronum Stygiorum, homini intestino mordicus perditæque inhærentium? Mundus igitur (quod mirari philosophia sapius dicta, & miserari possit) frequentissimè habitatur ab Tithono illo, homine veterrimo, Hellenismi alumno: in veritatis disciplina Christianismi que dormitatore & veteroso, etiam intra pomœria sanctissimæ ciuitatis. Rarissimè autem idem mundus incolitur ab homine rediuuiuo, manûque cælesti recocto atque reconcinnato, quem spirituales scripta sacra à spiritu genitum nominant. Atque eiusmodi sunt beati illi designati, ab æuo in album relati destinatricis prouidentiae, verè que Christigenæ, qui sensui communi assensionem semel renunciarunt, atque optima fide pro iis que demum Dei filius apud patrem deprecator esse voluit, cõsue in fidem suam à delectu è mundo factò, in patrociniûmque suscepit: vt non mirum sit, tametsi valde dirum, paucos esse electos, qui aures habeant ipsi veritati & sapientiæ efficaciter exaudiendæ. Proinde mundus est, à quo Iesus ipse Christus, Deus idem & homo, existens alienus, alienatos quoque suos voluit, (quod eius ille seruus à manu, testatus est) quanquam in meditullio orbis terrarum natus esset. Hic idem est ille mundus, cuius sapientiam meram esse stultitiam apud superos, cælestium ille rerum ac diuinarum Paulus non tantum auctor maximus, atque interpres consultissimus, sed arbiter eo amplius & spectator quondam factus, testis est grauissimus, ac summa fide præditus. Denique mundus hic est, cuius sapientiæ genius, Argus est in rebus temporariis & opinabilibus: Tiresias & Phineus in æternis, ac certis certioribus. quippe qui spiritus sapientiam quæ cœlitus delapsa est, ineptiam esse putet, & vertat in vicium estimatione sensus communis & lucifugi: quod idem auctor ad Corinthios scripsit. Quapropter & germanæ virtutes, & solida solum bona, meritissimòque expetenda: & verò velis, remis, equis (vt aiunt) persequenda iis qui sanæ mentis sunt: à vita tamen ciuili atque urbana veluti repudiata, è medio summotæ sunt: idque comitiis (vt ita dicam) curiatis, tributis, centuriatis, equitum populique assensu: nec verò sine senatus, sine ordinis amplissimi luculenta auctoritate, cum profani, tum verò sacrosancti: succidaneæque pro illis receptæ sunt, imaginaria bona, falsa, & adumbrata. Ita ad prudentiæ humanæ scita atque dictata iam reuoluti sumus, quæ à Christo Seruatore confixa palàm atque traducta, omninoque abrogata inter suos

fuerant, ut è faucibus Orci enata, ut oraculis refragantia cælestis sapientiæ. Atqui stultitiam ipsa summam humanæ redarguit sapientiæ, & porro amentiam illi exprobrat & vœcordiam. Ita in eiusdem fide atque auctoritate, nisi in huius maris traiectu, consilia vitæ sita, rationumque nostrarum summam subductam habuerimus, constantérque collocatam, (id quod Themis iam dicta, auctor est ad oraculum eius religiose adeuntibus) ad portum aspirare quî tandem poterimus Coloniae beatissimæ, aspiraturósque sperare nosmetipsos ad extremum? Cùm autem ita ferat & ciuile vitæ tenor, & in celebritate versantis vel vrbica vel aulica ratio, ac mundi iam sæpe dictum magisterium, ut solertissimus quisque hominum & acerrimus, à pueritia protinus, aut certè ea ab ineunte ætate quæ in medium proferre sese potest, speciménque indolis suæ dare, ad speculum ut semetipsum affingat communis sensus & prudentiæ: mores etiam suos comparet, corporisque affectus, ut æmulos eius & simiolo: meritò inde euenit, eiusdem ut nutritij alumni, nutritisque eiusdem vberibus lactari, eodem quoque lacte erroris imbuantur. Est autem hæc disciplina sic moribus propemodum constituta, atque si præfultrice stultitia & chorum instituyente, iuuentus magno studio restim perpetuam neceret, singulique certatim ad eam se adiungerent, tum eundem orbem voluerent erroneæ disciplinæ, à sapientiæque deuix. Quam vitæ stultitiam Democritus olim risisse, alter ille è contrario defleuisse dicuntur. Cæterum Threnodus vates Hebræus eandem lamentatus est miserabili carmine, non iam ut ineptiam & stultitiam, sed diram planè ut amentiam & vœcordiam. Quod utinam satis animaduerneremus, ut rei tantæ par erat animum incumbere, curæ haud dubiè antiquissimæ, omnibúsque præuertendæ. Nā quid aliud penè omnes agimus, vitam ciuilem ambitiosamque agendo, nisi post lotionē lustralem, certatim & studiose ad illuuiem redimus? Verùm philosophicæ exhedræ atq; abstrusioris huiusmodi est commentatio, non disputationis symposiacæ atque exterioris: quod sæpe nobis contestandum est. & quidem, dixeris hæc inter varicosos centuriones, Cōtinuò crassum ridet Vulpeius ingens. Quāquam quid dico inter centuriones? immo verò primores inter ordinum, inter vertices populi, inter decora reipublicæ, hæc & similia astruere si cœperis, confestim tollent equites peditésque cachinnū. at hoc quid est aliud quàm comicus risus in tragœdia atrocissima? An Deum diuósque renidere censemus, nobis que arridere, cùm in vineam Domini semina transferri videntes, aut ex campo ambitus,

aut ex hortis voluptatis, aut è seminario hominum sacerdotalis innocentie famam agnoscere verecundantium, in eo nos cauillandi argumenta libentes arripimus, ridiculisque gaudemus? Homines in amore Christi riuales, vt inter se amantissimè affecti sunt, ita Christi æmulatione præditi, vicemque publicam dolentes: minimè ista risu, sed gemitu potius prosequuntur, malisque omnibus. Hic etsi vereri subit, ne mihi in hoc opere vitio vertatur philhomeria (cuius tamen crimè diuus Ambrosius in explanatione scripture, in sermone de cruce minimè veritus est) versuram nihilominus iterum faciemus ab eodem ipso poëta, nec importunam (vt reor) nec vsura dispendiosa. Vlyxi igitur iam dicto, non polytheie quidem ipsi, sed orthodoxie alumno, cui nonnulli arbitrati sunt ad significationem prouidentis hominis nomen esse inditum: ego verò ab etymo nominis coniecturam faciens, viatoris nomen esse philosophi censeo, de salute sua bene in via, sociorumque merentis. Verùm illi Vlyxi hoc magnopere videndum, ab ipsis ne Sirenibus in transitu ira retineatur, salutem vt suam posthabendam esse amcenis digressionibus viae compendiosæ & salutaris, cum vulgo mortalium omnis generis atque ordinis, sentire videatur. Et quando tamen homini literarum non vulgariū amantissimo (ad id enim genus tantum hominum habere me nunc sermonem ipse memini, testatumque volui) in vastissimo pelago oberrandum est, eodemque pleno Sireniceis perlectamentis: exemplum ab illo ingeniorum principe, & simul auctore summo philosophiæ vetustissimæ, rogandum est nobis vtendum: vel sumendum potius occupationis iure: si quidem tenere nos formulam vsurpandi iuris huius potuerimus. Et olim quidem illa tanta, tam ampla copia, tam variè locuples, in medium exposita est: & tamen adhuc libata potius ipsa videri potest, quàm imminuta. Cæterum non cuiusuis, nec nostrum est fortasse, Corinthum illam adire, vt est in prouerbio. Quemadmodum igitur Vlyxes olim Ithacensis, vsus consilio magæ Circes, Sirenium cantus suaues quidem illos vehementer & iucundos, sed non minus exitiales & vitandos, quasi per transennam audiuisse dictus est ab Homero: eundem ipsum in modum hominē suscepti sacramenti tanti memorem, principatum animi sui ad malum nauis alligare, vinculis legis euangelicæ, eiusque seueritatis oportet. Sine eo autem malo fidei certæ ac opificis & iusticæ, in cruce Domini fixæ & cōfirmatæ, officia cuncta nautica, ministeria omnia quālibet culta in speciem: armamenta insuper, gubernaculāque ipsa, tum vniuersi instrumenti pietatis

descriptio theATRICA & distinctio, nihil ad rem pertinent qua de re maximè & in primis agitur: nihil (inquam) vectoribus ad finem propositum illis, aut certè proponendum conferunt. Quod malus autem in naui est: hoc est crux in Ecclesia, vt inquit Ambrosius. Vlyxem porro Homerus socios suos incolumes, auribus obstructis transmississe cecinit, vt efferatos à Circe (quæ mihi prudentia communis est) Cyceonis potu, & tanquam veneficio quodam magico: hoc dicere nunc possis cinnum vrbauitatis aulicæ, atque eius affinis æmulæque, tametsi oppidanæ. Quo cinno leuiter inebriata iuuentus, elegantis vanitatis studiosa, plausus captare solet lepôris morum & facundiæ: in eoque studio ingenium animûmque exercere omni contentione. Verûm hausto errore sensus communis vario & multiplici, capaces iam non erant Sirenum musicarum auditionis, Vlyxis Homericici socii: nam & vera se scire, & ficta gloriabantur. cæterûm pro veris fallentia, quod Hesiodus etiam commemorauit in poemate Theogoniæ, sub nomine musarum. Eundem igitur in modum, philosophum sanctioris sapientiæ cupidum & discipulum, animi principatum, suûmque adeò hominem intestinum, ita comparatum habere oportet, sensus vt ille suos omneis in potestate habeat: vel obstructos vel apertos ad præscriptum rationis, tanquam comites & administratos ipsius. nimirum vt exurdatis auribus, vt oculis hebetatis, cæteris etiam vt sensibus aut enectis aut torpefactis, qui à mundi contagione deprauati, quasi que ab oculo Megæræ fascinati sunt, inuidiæ Stygiæ (adde etiam & fortasse à diuturniore contubernio Musarum profanarum) spiritui tandem illi genitali cupidè sinus pandat, in patriam propellenti per portum euthanasie. Quem ad finem ipsum vnum summûmque, sanctioris philosophiæ studium à prudentibus non dubiè institutum est. Et philosophus quidem prouectus, qui iam habitum virtutis consecutus est: quanquam tangitur voluptate ob lectionis amœnitatem, nonnihil etiam sæpe titillatur ob imagines rerum quæ cõmentanti occurrunt intellectui: sensus tamen petulantiam plærunque dicto habet audientem sapientiæ atque obtemperantem, vtpote domitam iam & infractam. Vnde fit, vt subiectum primum secundo præualeat, & materia formæ concedat: id quod hominis fert ratio, nature sue conscii ac memoris. Imperiti verò nulla lege rationis rectæ vincti, ita demum pericula maris citra noxam euadunt memorabilem, si sensu vacent illecebrarum, ad perniciem certam viatores pertrahētium. Nam Sirenes supradictæ, velut aureolis quibusdam

catellis delinimentorum suorum, aures auditorum permulsas, sensusque deuinciunt: sicque de statu mentis impotentes iam sui mortales deiiciunt. At ex eo demum statu, tanquam ex edito quodam loco, recta potest esse iustaque veritatis atque sapientiæ cælestis contemplatio & intelligentia. Quid autem inde sequatur nemo ferè non videt. Iam verò medicamenta Circes esculenta & poculenta, apud eundem Homerum mortales immutasse legimus, in animantesque brutas vertisse diuersorum generum. Hæc ego nunc veneficia referenda esse censeo ad cupiditatis immodicæ quæstum, stipendiæque ambitus, tum ad fortunæ ingentiores cæcæque largitiones. Quarum rerum pharmacopolium, in conuentibus esse præcipuè regiarum, luculentum & copiosum, nemo est quin nesciat. Eorum porro venenorum mentis atque animi, tantam vim esse virisque eodem ex ipso poëta intelligimus, eorum vt antidotum vnum tantum atque antipharmacum à priscis repertum sit ac proditum: quod ipse moly vocat. idque non hominum inuentioni, non fortuito casui: sed diuinæ potius benignitati acceptum esse referendum, auctor ipse censuerit. Cuius fabulæ allegoria, cum vocabuli molyos etymologia, ad reconditoris disciplinæ traditionem relata est, quæ per Mercurium administrata esse dicitur, rectæ rationis illum interpretem & magistrum. Cùm igitur natura humana quoquo versus admodum versatilis sit, eaque de causa & Proteum & Vertumnus aliqui eam appellatam esse putarint, si commentationi philosophicæ moly illud cæleste, diuinæ indulgentiæ allapsu accesserit: etiam vt Circes pocula doctrinæ sacrosanctæ anteuenterint, postliminio tamen rationis rectæ, genitalem in formam quodam modo restituemur inter polis humanitatis, tametsi interpolandorum mortalium officina spiritalis, non iterum patet homini. Sub nomine autem molyos herbæ Homerus philosophiæ doctrinam significasse symbolicè creditur à doctissimis. Cuius vim eam esse (vt volunt) arbitratus est ille vir mortalium ingeniosissimus, eamque facultatem, mores vt hominum degeneres & efferratos aut veterinarios factos, atque pecuarios, sibi tandè illa, naturæque humanæ restitueret. Id quod si de Hellenica philosophia dictum est, quæ mortalium reuera inuentum fuit, quanto nos congruentius id tribuere diuinæ disciplinæ potuimus? Inter moly enim nostrum atque moly Homericum, cùm plurimum, tum hoc refert, quòd illud è puteis sapientiæ cælestis: hoc è terra effoditur, humanisque inuentis. Quare plus est oxymoriæ in vita & moribus

Hellenismi philosophia, quàm veræ solidæque sapientia. Ad hominem verò philosophum perficiendum, qui ad regulam euangelicam, ad normam (vt sic dicam) atque perpendiculū crucis dominicæ eiusdemque seruatoriæ respondeat, quales illi fuerūt heroes apostolici, primæ classis ac sensus spiritalis ciues in ciuitate cælesti: eorūque fortasse euestigio sequaces conscripti in centurias primæ proximas: non satis est, opus esse Promethei, hominem fictum quoquo modo, & planè lutū & corpus: cuiusmodi maxima pars est mortaliū Christiani dogmatis retinentium. Ne animantem quidem esse satis est, vel animalē potius, nimiumque animæ tribuentē: sunt enim quamplurimi, qui longè plus animæ, quàm animi ac spiritus habeant. Necesse est autem eo amplius, spiramento insignitum esse, & velut absolutum vltima manu sapientia: id quod fit, cū Minerua cælestis, Prometheo naturæ, spiritus diuini opificium atque expolitionem addit. At talis philosophus vel verius theosophus, nihil aliud curæ habet, nihil animo cōplectitur, nisi Deum: nihil amat nisi Christum, vt quem propter & mensam numulariam, vt olim vnus è duodecim, & publicani sensa pro derelicto habere semel constituerit. Aliud est autem ad effigiem Dei factum esse, quod omnibus mortalibus contigit, qui ratione præditi sunt: aliud ad similitudinē Dei informari, quod significat ad amussim euāgelicam vitā suam exigere, vt inquit Basiliius homilia decima in hexaameron. & hæc est disciplina (vt ipse inquit) Christianismi, *ἡ δὲ ὁμοίωσις κατὰ τὸ ἐνδεχόμενον ἀνθρώπου φύσει*. Quæ oculos in capite habere philotheorum docet, cellaque contemplari & cælestia, non terrena caducaque meditari, vt idē homilia sequenti dixit, è sententia Ecclesiastæ. *τῶ σοφῷ γὰρ οἱ ὀφθαλμοὶ ἐν τῇ κεφαλῇ αὐτοῦ*. Verum enimvero cū sit omnis nauigatio in mari periculosa, ideoque à quibusdam sapientum magnopere damnata: tamen cū hæc qua de paulo antè agebamus, omnibus nobis sit proposita: nisi si quis in vitæ tyrocinio, atque in ipsa statim crepidine continentis, fato suo fungitur: tutissimum est (opinor) tractum maris consecretari quàm minimè æstuosum, tempestatibúsque obnoxium: quoad fieri potest, procul à Sirenibus illis vehementioribus: quique cordatis hominibus & consideratioribus minus sit metuentus. Nam magnæ parti hominum ingenio & industria pollentium, atque etiam multo maximæ, scio id probari vix vnquam posse. quippe qui vela consiliorum suorum & studiorum, cupiditati, quæstui, ambitioni pandere, ac factorum fauori, sicque pelago medio vel imminente procella se credere, gnauissimi hominis esse

feant, atque etiam consultissimi. Mea verò sententia, & multorum,
 quibus id hominibus, mediocri, aut modica potius, Parcarum beni-
 gnitate contigit, vt non tam latè sparsis fusisque facultatibus quàm
 digestis explicatisque, & composito magis quàm copioso vitæ de-
 gendæ instrumento, hoc mare vt transmitterent: ij & commodius
 viaticati, & felicius instructi ad eam expeditionem sunt, quæ per tot
 monstra vitæ, tot æstus, tot scopulos nobis exanclanda est. Subdu-
 ctis enim (vt videtur) & expeditis rationibus peregrè euntibus opus
 est, ne ad itinerum laborem, vasorum quoque redundantium custo-
 dia accedat, curaque impedimentorum. Quicquid autem opulencia,
 quantumque secum trahat, quamlibet amplos fines census sui me-
 tetur: viatorium est nihilominus instrumentum vitæ, atque diuer-
 forium, non stationarium atque domicilii. Christus inter alia mul-
 ta quæ noua instituit censuram mundi exercens, ius stirpium atque
 gentilitarū in populo rediuuuo sustulit, & adoptionis induxit. Qua-
 re etli principum & magistratuum imperium, atque auctoritatem
 prærogatiuam, doctrina sua sanxit, ne rerum humanarum ordo an-
 tiquaretur: voluntatum tamen ciuiliū æquationem sensuūque
 suasit, in ordinem se cogentium, fraternaque charitate inuicem sese
 non grauare dederunt. Proinde in huiusmodi ciuilitate, quæ theo-
 cratiæ fundamētis nixa est, & charitate Christi coagmentata, si qui-
 dem rationem elementorum suorum tenet: quid ciuem super ci-
 ues capite atque humeris extare, & veluti populares suos & adopti-
 uos fratres, calcibus obterere tantopere iuuat? Quid luxu, quid fa-
 stu, quid lare familiari prælauto ac splendido opus est? Quid instru-
 mento vitæ cumulado supra fastigium ciuile, atque vltra modum
 exaggerato? præsertim cum Dominus auaritiā hominum compe-
 scere volens, apud Lucam scriptorem euangelicum dicat, vitæ nostræ
 præsidium & fiduciam, nequaquam in eo sita esse quod circumfluit,
 & abundat. Certè quidem vtcunque & quantiscunque finibus, ho-
 minum cupiditas quærendi consilia possidendique metetur, certus
 est tamen modus vnicuique instituto vitæ, ratione ciuili frugalita-
 tēque præstitutus: non communi quidem ille sensu ac vulgiuago
 attemperādus, sed sanctiore potius atque philosophico nedum phi-
 lostaurico. Nam quæ prudentiæ communi commoda sunt atque
 vtenilia, eadem rationi philosophiæ reiectanea sunt atque impedi-
 menta. Ita putandæ rationes nostræ falce philosophica: rescindē-
 da quæ luxuriant: effundenda erogatoriis beneficentiæ piæ modulis
 quæ redundant: siquidem præputati & circuncisi desiderii hominē

Christianum esse oportet, quod Dominus præcepit, non modò studiosum philosophiæ. Quo detestabilior est atque deploratio eorum vitæ ratio, qui in summa colligenda facultatum suarum, ne aliena quidem subducunt & malè parta. Quasi verò non is demum inter Dei adoptiuos locuples sit, qui auro probo, puro, suo (vt fuit olim in prouerbio) diues est, indèque munificentiae misericordis sacrificium Deo facere solitus est. Et hæctenus ita loquor, quasi theoria philosophia, modulos suos & decempedam, à ciuili prudentia, aut à Peripatetica disciplina, mutuari debeat ad constituendos possessionum suarum fines, ad censúsque ac pignorum temperandam mensuram : non quasi Diogenis animo calcare rerum caducarum mancipia eam deceat, Socratisque stomacho inopiam & pauperiem ferre, in pignoribus suis factam, in aliisque facultatibus. nisi verò iuris prædicatorii studium, nexorumque ciuiliū atque mancipiorum hæreditatum & caducorum scientiam cum studio iuris celestis, quærendæque & cernendæ hæreditatis, à Christo suis ac legitimis desponsæ, consociari posse sine collisione credimus, mutuæque offensione. Quod si nunc iuris huius auctoritas fortè & seueritas, in controuersiam (vt est licentia huius ætatis) aut in dubium à communi prudentia quouis modo reuocetur : ecqua lex tandem (quæso) ecqua sanctio, aut rata magis aut seuera esse potest, ob idque reuerenda, quàm ea quæ verbo Dei promulgata est ? quàm quæ in cruce Seruatoris fixa ? quæ sanguine Christi sancta ? nisi si nobis persuadere institerimus, longissimi temporis incuria, ac trisæculari hominum, alteroque tanto, sesquialteroque fortasse, diuturniore seordia, aut refigi legem illam potuisse, aut vsu contrario tandem obsoleuisse. Sed scilicet liberum cum libera, philosophum cum theoria, commentari hæc & huiuscemodi oportet, quæ rem habere non possunt commodissimè cum obnoxia conditione ciuiliū studiorum, nedum atriensium : id quod nos experimenta quotidiana docent. Etenim disciplina euangelica, cuius alumnus esse debet quasi que verna discipulus, homo philotheorus, quoddam est amplum euericulus cupiditatis, ambitionis, avaritiæ, voluptatis, omnisque stultitiæ, vanitatis & ineptiæ : quæ materia obiecta est & proposita ciuili prudentiæ, discipulisque Circes illius variarum animantium opificis, quæ Dædala eam ob causam à Virgilio appellata est. Quippe Dominus noster Iesus Christus, cum ad dissoluendam principis mundi tyrannidem supernè missus esset, non Seruatoris tantum munere legisque latoris functus est, sed etiam dictaturæ honore & impe-

rio, & præterea censuræ (vt dictum est) memorabili seueritate. Et tribu quidem ipse Israelitica mouit cupiditatem, ambitum, hiantem auaritiam, eiúsque studiosos cultorésque, vt circūcisionis cordis expertes. In album etiam centuriarum cælestium, classiúmque beatarum, referri eos vetuit, qui ad Honoris ædem, ad aram fortis Fortunæ, frequentius supplicatum irent, ac religiosius, quàm ad Themidis supradictæ oracula consulenda, impetrandæque responsa ex adyto supernæ prouidentiæ. Tum qui vanitatis æra merere mallent sub imperatore ambitu, principis mundi legato, quàm in statuiis rectæ philosophiæ, vallo crucis munitis & circundatis, stipendia facere, ærumnosæ quidem ad tempus militiæ, sed tamen contemplatrici, præmiæque expectantis visenda & amplissima: eos quidem ille dirutos esse iussit atque pronunciauit, ære illo cælesti legionum beatarum, ad emeritæque sempiterna militia missarum. Nam quid aliud est tandem vita Christi, disciplinæque euangelica, quàm censura seuerissîma prudentiæ ciuilis, quàm acris refutatio humanæ sapientiæ? quàm hypocritici fastus, quàm ironiæ sacerdotalis, acerba castigatio & traductio? Dominus noster ipse, Christus, virtutis præmonstrator nobis fuit, & simul prægustator, & propinator omnium amaritudinum vitæ, atque acerbis. Omnes iniuriarum, contumeliarum, pœnarum indignitates, oculis, auribus, ore, capite, corpore, manibus, pedibus hausit: & nos omnibus sensibus voluptates exquirimus? Vtrum est hoc tandem parentare Christo, pro nobis in crucem acto? Quid verò humana sapientia, tanta corporis vexatione, assidua animi contentione proficit, nisi chirographum nexus æterni rursus in palimpsesto interiore scribit? Quid igitur profuit ex Ægypto ire, ac mare per medium transire, si iterum in nexum Ægypti, in ergastula tyrannidis remigramus? si ibidem addicti iterum nexique acquiescimus? Anima cum ad lustralem immersionem accedit, nuncium ipsa protinus Ægyptio sponso remittit: suas res etiam ipsum sibi habere, conceptis ea de causa verbis, ac solennibus, iubet: vt in cælestis manum sponsi mancipiúmque veniat, vt olim loquebantur. hoc faciens salutem multam mundo eiúsque fastui dicere se testatur. Ad Ægyptium igitur illum cum ita reuertitur, vt eius sodalitate, contubernio, comitatu gaudeat & delectetur: nõne infidam sese Christo, vel perfidam potius ostendit esse? si quidem ipsi desponsa erat omnibus cum suis facultatibus. At prudentiæ ciuilis discipuli, sic hiantis cupiditatis ingluuiem, diurnis & nocturnis laboribus, contubernalibus turis, parasitis & concubinis anxie-

tatibus, explere nequicquam contendunt & fatiare, vt crâteres implere vastos Erebi tyrânus ille Stygius. Quî fieri potest igitur, nobis vt constet ratio Christianismi, si nobiscum iustitia diuina, lege agere summa, suâque velit? nisi verò Deum toto ex corde, toto ex animo, omnibus numeris amoris amat, qui vix eius cultui atque meditationi tertias partes intentionis tribuit, nedum cōtentionis. Nos flendo, ridendo, lætando, tristando, sperando atque timendo, & dies & annos ducimus, per inanes, futiles, irritos motus animæ atque affectus, nihil quicquam (vt plurimum) ad summam rei pertinentes, quæ in primis in vita accuranda est. Qui tamen vtinam ipsi ad rem tantum non facerent, non etiam plerumque officerent vehemēter. Quo fit vt qui cordati, corculi, cati, circumspecti sunt fluxis in rebus & mox interituris: iidem hebetes ipsi, bardi, inconsiderantes, & verò morionum similes sint, (quod mirum an dirum sit ipsum magis, nescio) in rebus æstimandis primæ notæ atque auctoritatis, inter homines quidem certè cælestium rerum consultos, veritatique prudentissimos. Nōne videmus operosissimam esse communem prudentiam & accuratissimam circumfluentibus in rebus & superuacaneis? contrà verò somniculosam eandem & oscitantem in conducibilibus maxime atque necessariis? Laborat enim industria mortalium & solertia, vt hîc redundet vita: non vt commodè quoque & expedite ad vsum fructumque bonorum sit instructa: minimè verò vt olim atque in sempiternum, omnibus numeris beatitudinis cumulata se gaudeat. Diram, & capitalem mortalium inscitiam rerum summopere expetendarum. Nos bonorum possessionem vnde liberi, & liberi quidem Dei patris, charissimi atque beatissimi, nō agnoscimus, aut agnitam certè petimus, vt Cæsaris (quod dicitur) in comitiis olim candidati, petebant. At verò bonorum possessionem vnde serui & obnoxii, & exhæredes patris, magno ambitu petimus, omni que animi contentione. Hoc quid est autem? Hoc (inquam) quidnam est, si summa imprudentia, si inscitia perdita non est & profligata? sacrosancta philosophia res diuinas & prius inauditas, non docuit tantummodo homines: sed dedocuit etiam quæ terrena sapientia Stygio errore imbuta docuerat. At mundus iam immemor, ad priscam ignorance æternitatis reuolutus est, ad luteamque adeò quandam scientiam, pinguem & corpulentam. Quid igitur Hellenismi profani transcriptio ad Christianismi circuncisionem profecit, si ambitum, si cupiditatem, si elationem mentis, si amorem, si sitim ardentissimam rerum placitis diuinis damnatarum

atque abrogatarum, æquè vt antè incircuncisa habemus? Philosophiæ veteris auctoritas, etsi verba Græciæ reapse, eiúsque discipulis dedit, componere tamen mores permultorum, superuacuâque desideria amputare potuit: sapientiæ cælestis gladius non poterit, tametsi acutissimus? Heu pietas, heu prisca fides, quò tandem gentium illæ, à quòque amandatæ sunt? Christus Dei filius, quasi harmostes quidam diuinus (vt Græca voce dicam) cum summa mirificâque potestate in mundum missus, ad rempublicam humani generis cõstituendam, quæ diuinam iam manum nõ obscure poscebat ac flagitabat: cùm leges & instituta vitæ ad normam exegisset, ad regulam atque perpendiculum diuinæ sapiëntiæ: duodecim viros sibi legauit, vnúmque præterea insignem, è prouincia sua decedens. Cùm autem eorum vestigiis impressæ omnes mundi regiones fuissent, veritatísque sensu tinctæ earum nationes: hominum subinde incuria, dæmonúmque solertia, memoriam eius monumentâque deleuit in parte mûdi longè maxima. Cætera verò in parte, quam incolunt Christiani, vestigiorum eius exiles notæ magis ad hunc diem, quàm vestigia ipsa clara & luculenta manserunt. quippe quæ in obsoleta iam via tantum agnosci certò possint, & vel solitudine, vel hominũ infrequentia desita: certè quidem nunc procul remota & abscedète à via prætoria, cõsulari & populari, quæ incurrūt in vrbes aliâque hominum cõuenticula, tanquam in cõpita quædam mundi. Iis autem nunc in ipsis viis, si quis acrius obseruauerit, non expressam imaginẽ germanæ illius & puræ religionis ac pietatis, non iustæ persuasionis rerum à Christo Dei verbo proditarũ effigiem informatam, sed veluti simulachrum eius videbit prima manu deformatum, vel carie verius vetustatis exesum, nec liniamenta asseruans. Nam obductus iam situs libris ritualibus, monumentísque primordiorum Christianismi, atque eius architecturæ, quadam quasi vetustatis præscriptione summouet ac longe depellit eos, qui sanctitatem & vitæ innocentiam, & sacerdotii denique maiestatem, ab exemplis illis mirificis ac prædicandis repetunt. Et cùm memoria quidem nostra sibi indulgere in vniuersum haud ita pridem institit, in iis quæ ad cultum atque obseruantiam priscae pietatis pertinent, & porrò ad obseruationem rituum atque ceremoniarum, spiritus lōgè plus quàm fastus præferentium: tum verò mores receptissimi principibus adblandiuntur sacri perinde ordinis atque profani: si tamen profani homines dici propriè possunt, qui oleo initiali delibuti sunt. Simul interpretes legis assentatores, moribus præpotentium adstipulantur

responſorum indulgentia. nimirum tanquam Deus cui perſona nulla eximia eſt, ſi diuo Paulo credimus, non æquè rigidè penſum à primis ordinibus, vt ab aliis exacturus ſit: ne dicam etiam rigidius. Quòd ſi ad veritatē loqui placet limatam euangelicè, an non omnes hoc tempore mortales numularii facti ſunt, in mundi conciliabulis, in Ægypti mercatu, in Babylonis foro negociātes: non Chriſto collybum ipſi, ſed dæmoni factitantes? ii etiam (ſi diuis placet) cui talenta ſua Chriſtus ipſe commiſit, in rem ſuam ſuorumque, non in hoſtium vertenda? Ita chronocrator huius ætatis (vt Genethliologi loquuntur) Mercurius eſt ille Stygius, non caduceator, ſed locutatus. At is fidem tantum Græcam (vt Comicus Plautus inquit) ſequitur, repræſentatumque precium: nec ſpei quicquam ille aut expectationi credit: ne miremur concuſſam his ſæculis & collabefactam oraculorum fidem. Hi mores, hi ſenſus, non illorum ſunt temporum, quæ mortaleis tot inſignes, maiorēſque humano faſtigio, mirificentiſſimis facinoribus diuinis que ediderunt. non earum etiam ſunt animarum, quas è ſinu ſuo prouidentia ad Chriſtianismi illustrationem emiſit. non earum Chriſti ouium de quibus ipſe dixit, Meæ ſunt illæ, nemōque rapiet eas de manu mea. non eorum hominum, quibus idem ipſe teſtimonium ſui ad tribunal ſæuitiæ, ad carnificinas crudelitatis impiæ, ad phalarifimum denique tyrannicum denunciauit: qui in ſolem (vt dicitur) & puluerem prodeuntes, cruenta tādē præmia, eadēque beatiffima promeriti ſunt. non eorū etiam ſunt ii mores philoſophorum, qui in palæſtra virtutis, atque in vmbraculis innocentia, Chriſto ſe deuouerūt, à mundo emācipati. poſtremò non Chriſti pediffequorum, non eorum quos ipſe ſtaurophoros eſſe iuſſit, vt ſui ſimiliores eſſent, cū eam viam ingrederentur quam ipſe præmonſtrare præirēque inſtiterat ad ſuperos iter affectantibus, vt pote qui per manus & pedes ipſius Ieſu Chriſti, cruci quoque ſuffixi fuiſſe viderentur ipſi. Proh ſupreme Seruator (inquit Aius ille loquax) vbi iam fides apoſtolica, vndarū inambulatrix? Quonam mores æquales eiſce fidei abierunt? non ſignare quidem aut partiti limite campum fas erat: in medium quærebant omnia. Nunc autem & iam pridem tam friget in ſinu Chriſtianismi charitas, quàm feruet in eius tutoribus & nutriciis ambitus & cupiditas. Qui vni & alteri magiſtratui, honori, muneri deſponſi ſunt: in alium ſtatim aut alium, atque etiam ad alios aliāque nullo fine animum adiiciunt. & quaſi anteriores ſponſas funere extulerint, denuo proci fiunt, ſimul etiam complurium: cū interim, ſi diuis placet,

homines polygami, cælibes esse moribus ac legibus existimentur. & huiuscemodi (inquit) mortales farragine rerū secundarum obesos, inter alumnos paracleti ad cælum euolatu- ros, credere nos cum ipsis ac confidere debemus? Anne est hoc tandem militantis Domino populi tabernacula rectè atque ordine metari, principiis omnia tribuere, præsertim inertibus magna quidem ex parte atque supinis? Nam cum res hodie dominica ad triarios apertè redierit, si in summam iudicium facimus: principes tamen institerūt laxissimè cum antesignanis tendere in castris Christianismi, atque etiam statiuorum decora & insignia summouere improbissimè. Ordines enim alios, ordinumque singulos munifices, videmus promiscuè, nullaque lege prisca compositos, ad ordeum (multitudinem quidem longè maximam) redactos esse: cum istorum singuli (si diis placet) integrarum legionum frumentū vt euocati Christi, annonasque accipiant, quæ genium suum farciant. Quibus utinam ipsis tanti esset in officio esse, quàm in officiis esse cupiunt. Quomodo autem ingredi per portam illam angustam sic suffarcinati, sic titulosi, vsque adeo peculiati contendunt (quod Dominus ipse præcepit) homines quidem illi officiosissimi, sed ab officiando rei summæ potius, quàm ab efficiendo dicti? Hæc certè & alia huiusmodi, conuiualium sermonum argumenta, & sæpe concionum: nec passim, nec apertè, quasque recepto iure fierent quâ sacro, quâ profano, nisi genius ille hominum effascinator, quem mundum appellare scripturæ auctoritate solemus, visu suo venefico, conditi intus hominis vires sensusque inficeret & enecaret. In cuius celebritate & frequentia, sic petulanter vitam, sic inerter degimus, vt serui nequam & verberones: qui herilis metus ac seueritatis obliti, tantisper, dum Dominus peregrè rediturus est, in diemque à nobis incertum expectatur, non Liberalia modò ipsi (quod dicitur) agimus, sed propemodum Bacchanalia. Proinde quibus contigit per expeditam vitæ conditionem, minora & pauciora in hoc traiectu maris pericula adire: quibus placido genere vitæ quasi tranquillis vndis prouehi: quibus offensionum ciuiliū scopulos, contentionum & simultatum tempestates, in foro, in atrio, in toga, in prætexta, in infulis vitare: nec verò in vadis hædere studii cuiuspiam iucundi, morantis viatorem in mansione diuersoria: cum iis mihi certè prouidentia egisse videtur non incommodissimè. Quippe in qua viuendi sorte, in negotio quoque vacet, consilia vitæ agendæ dirigere ad scopum philosophiæ commentatricis mortis, immortalitatis utique beatif-

simæ studiosæ & candidatæ. Nihil enim refert, modò fieri possit, in Basilicane, in aula, in æde sacra, in porticu, domi denique tuæ philosophere, an in secessu aut exhedra peristylli. In cuiusmodi secessum, ut præcipiti forsitan consilio non pauci, aut aliàs inconsulti, quod exitus sæpe docet: sic plures inita diu subductaque ratione se suaque conferunt, tanquam ad resipiscentium asylum: & velut ad portum tranquillitatis se recipiunt, grauati & exosi iactationem huius maris, æstuumque molestiam. Tum stagnante sinu, gaudent ibi vertice raso, Garrula securi narrare pericula nauatæ. Cæterum inuidia iandiu flagrat ea natio, quasi Calypsò quandam atram, ironiæ vel germanam vel affinem, pro numine colendam alexicaco imperitæ multitudini præbeant. Quod aliquorum forsan crimen, in fonti tamen impingitur multitudini. Equidem, ut à caluo ad caluum (quod dicitur) iniqui est iudicis & præcipitis, eodem iure censere: ita à raso ad rasum damnare, vel nota mulctare ignominia tum atratos, tum albatos, præcipitis utique famæ præiudicium sequentes, non satis æquorum esse arbitror hominum, sed censuram subiratam offensamque exercentium, de re tot sæculorum taliumque consensu comprobata.

DE TRANSITV HELLENISMI

AD CHRISTIANISMVM,

LIB. TERTIVS.

QUANTUM quod superiore libro dicere institueramus, philosophia multiplicem personam induere possit, & verò pro re nata interdum aut theatri gradibus, aut orchestræ consentaneam: natura tamen amica est ipsa, & cōsuetudine gaudens abstrusæ vitæ, è medióque summotæ Ægypti & Babylonis. ac tametsi in primis palmarium est, in tempestate, in trepidatione, in fluctuatione vehementi & iactatione, gubernacula minimè manu mentis misisse rationisque: quibus tamen oram legere placidam proclive est, nec alto se committere, interimque nihilo intempestivius ad destinatum portum venire: iis utique conditio rei nauticæ felicior est, tranquilliorque multo & consultius. Huiusmodi autem vita est eorum, qui cum possent in hominum frequentia, & conuentibus celeberrimis, & velut in triuiis vitæ specimen sui edere, suarumque facultatum: id tamen meditata ratione, constantique animo repudiarunt, nec multitudini mortaliū innotescere gerendorum honorum industria & solertia, aut aliàs concupiuerunt. Quam ob causam contemplatrix vita, & mortis obeundę commentatrix, rerum sempiternarum studiosa & admiratrix, non ab re ut peregrinantis animi via, immunis in primis & libera, à sapientissimis mortalium vehementer concupita est: quibusque eam suscipere contigit, aliquandiūque gustare, ab iis est ferè ipsa ad extremum retenta. Nam quibus sic vitam degere licet & cordi est: præterquam quòd compendium magnum curarum, angorum, conflictationum, ægritudinum multarum & acerbarum faciunt: in mundo quoque ipsi, atque in mari ita versantur inundantis vrbes multitudinis & æstuantis, ut tamen in statione & secessu se contineant, ab externis tecti securique tempestatibus, vndarumque iactatione. Quod tamen & ipsum rursus non vsquequaque perpetuum est, ne hoc genus vitæ ut vnum & eximium, vindicare velle videamur ab omni vel noxa, vel offensione memorabili. impingitur enim nonnunquam, & inter oram legendam, atque etiam proxime portum. adeò nihil nec semper nec cuius, nec vndique tutum est, noxæque Stygię sacrosanctum, quę nusquam non insinuat.

Veruntamen in secessu, à conflictantisque turbæ ac sese collidentis recessu, animus hominis studiosi, sapius, placidius, & plenius feriat-
 tus est commentationi philosophiæ. & hæc est disciplina vnica,
 quæ ad vitam nos viamque theoricam repetendam condocet facit
 & instituit: è qua via quondam decessit misera mortalitas, per hal-
 lucinationem & insipientiam. Ac complures quidem homines in-
 geniosi, in vmbraculo speculatricis & piæ vitæ, cum ad eam medita-
 tionem constanter incubuissent, interim apud mortales obscuri &
 inglorii, victo demum illo dirarum tenebrarum principe, mundó-
 que eius præstigiatore, cælum ipsi ouantes ingressi sunt ad extre-
 mum, ingenti cum plausu theatri supernatis, visendi & sempiterni.
 Tantum autem vitium fuit humanæ rationi oblatum in primordiis
 rerum, ab illo importuno, obscæno, atque inauspicato animarum
 vitiatore, vt quauis abluta noxia in purifica immersione & animo-
 rum smectica, tamen inusta multa caducæ conditionis, animæ
 semper hæreat stigma (vt ita dicam) diuinæ iustitiæ. Ita quòd sup-
 plicio Seruatoris factum est, animæ vt humanæ conditio, quæ ab
 illo primordiali casu, tot ætatibus iacuit vt prostrata, per fidem ipsa
 sacratissimæque initia Christianismi, quæ supplicium illud Christi
 mirificum peperit, in gradum salutis atque immortalitatis beatissi-
 mæ reposita sit, ab Orcique mancipio, & nexu diræ noxæ, vindicata
 in arbitrium sui: id securitatem homini supinam minimè præstare
 debet, sed Dei timorem addere summum potius, atque vigilantiam.
 & porrò tantæ rei diuinitus administratæ animaduersionem inten-
 dere, assiduam, perennem, & sollicitam. Neque enim humana ratio,
 vt spiritus sacrosancti beneficio in smegmate initiali, tyrannidi su-
 pradiætæ exempta est: ita suis quoque protinus legibus reddita est:
 neque vulnere perpurgato, ad integritatem etiam mortalitas redi-
 re obducta cicatrice potuit. Nec verò eadem conditione vt quon-
 dam ante noxiam admissam primordiale, nec optimo (vt tunc)
 iure tranquillitatis, animum suum possidet: quia immunitas vnà
 quoque non redhibita ab inexpiabili bello fuit, vel externo vel in-
 testino. Proinde meminisse etiam etiámque oportet, ita nos in li-
 bertatem à Domino nostro, eodémque vindice, assertos esse, vt li-
 bertini tamen generis adhuc simus, non ingenui: quippe quorum
 olim maiores ob noxam dati fuerint, peccandi verò conditione, ca-
 sitandique, & porrò præcipitem in locum ruendi, sic imbutos per-
 mansisse: pedetentim vt ingredi per viam eodem ab ipso Domino
 ducéque præmonstratam, magnæque cum religione debeamus, &

cautione. Ita & philotheorix studium, & vita ipsa hominum qui philotheori sunt, potius quàm philosophi, nihil est aliud quàm resipiscencia iam dicta, cum admiratione ac speculatione theurgix, sanè Dædalæ & mirificæ: partim ante Christi aduentum editæ, partim ab eo iam ipso, Deo pariter & homine nato, administratæ, ad humanum genus tandem immortalitate, beatitate, atque diuinitate donandum. Superi immortales, quodnam studium hoc dignius? quod amplius esse potest? quæ verò commentatio augustior exco-
Igitari, in quam incumbere toto pectore mortales ingeniosissimi, tota mente, omnium animi facultatum intentione, neruorum denique cunctorum intellectus contentione, aut debeant aut possint? denique in qua Homericam vim ingenii ac verborum amplitudinem, poëtæ heroici: cothurnum altissimum, tragici: magnitudinem sententiarum, maiestatem differendi, expatiantem amplissimamque facundiam philosophi Academici, si ita visum esset prouidentix, debuerint & potuerint exhauriendam ducere? Quid autem si nec amœnior vlla, nec suauior inuenitur experiundo, nec verò salubrior? Et sapientis quidem vitam, commentationem esse mortis priscorum probatissimi philosophorum, ratione nescio qua suspicati sint, nisi quòd sic natura constitutum est: is est veritatis & sapientix genius, vt apud eos quoque plærunq; sese probet, olímque probauerit, quibus eadem ipsa vel veritas vel sapientia, cognita nunquam fuit. Philosophiam autem euangelicam, axiomaticam ego appellare institui, propter conditoris ipsius auctoritatem, qui parens est veritatis primæ atque sapientix. Quem etiam appellandum posthac censeo Ipsum, id est *αὐτὸν*, non translatio ab antiquitate nomine, sed suo vnus & proprio: ita vt Ipsum id est *αὐτὸν*, vnum & absolutum subiectum intelligamus, eximia natura ac dignitate notum. Qui non vnus modò Ipse, id est Deus Dominúsque absolutè vocari, vt infrà, suprà, nusquàmque non imperitans suo iure, sed etiam Pithagoras debet, vtpote cuius sermo mirabilis, Pithûs acie mucronéque excusus sit: qui cordis, qui cotis, qui denique lapidis ac silicis duritiam penetret, cùm in aures insinuauit diuinitus perpurgatas atque perterebratas. Nam quòd huius ætatis corda ipso gladio sic acuto penetrari, eorúmque cupiditates circuncidi non possunt, in causâ est vtique ira Dei culpa nostra concitata: non acies verbi eius hebetata, quæ semper eadem est. Deus autem non paulo offensior est & iratior flagranti & vasa sanæ cupiditati nostræ, cuius ingluuiem auctem nihil implere potest: simul ætatis nostræ iniquitas, quæ ad summum

penè euasit, multifariam varia, efficit, vaginam vt tantum verbi Dei tractare assuescamus, non vt latentem intus gladium animaduertere & admirari. Nam historiam tantum euangelicam, & theurgiam Christi contextum recitantes aut audiētes, illicet acquiescimus: nec quid iis significetur, quid nobis denuncietur, quò pertineant quæ lecta sunt & decantata, recordari curamus & contendimus. Quare verbum ipsum tametsi suapte vi animatum, animansque vehemēter inter mortuos homines, tamen velut inanime atque hebes auribus deuoramus stupidis ac torpentibus: nullumque aculeum persuasione fixæ, nullos feruentis charitatis igniculos, aut certè exiles illos semique sopitos retinentibus, nec ad præcordia porrò eosdem transmittentibus. Verum philosophiæ euangelicæ, quæ ab elementis ad summa theoremata, serie conferta est axiomaticum (quanquam eorum multa fermè sunt paradoxa, vt dictum est, & antidoxa communi hominum prudentiæ) quantus sit vsus studiosissimis salubris scientiæ, hinc intelligi potest. prudentissimi enim atque sapientissimi iudicio mortalium existimati, si ad normam illam diuinam æstimentur, id est si ad veritatis summæ libram eorum sapientia pendatur, Anticyræ annona egere protinus videbuntur. Et prudentia quidem ista humana, cum nasturtio (vt ita dicā) sanctæ philosophiæ ac sanctificæ, cumque contemplationis epulis animū suum alere vegetareque deberet in via discriminum plenissima: mandragora interrim & papauere vescitur in rerum æternarum disciplina confectanda. Vnde fit, vt Mercurius ille Stygius, lethæis escis mortales inescatos, errorum etiam exitialium cinno inebriatos, insuper virga aurea argenteaque consopiat, in cubili luxus supinos, salutisque incuriæ, ac spei vitæ longæ: inde verò vt sæpissimè in lacum illum nequicquam nobis decantatum detrahat, diuitum, inopum, senum, iuuenum, infantium, stultorum ac prudentium, imperitorum iuxta doctorumque colluione plenū, nec vnquam redūdantem. Nam (proh suprema prouidentia) quid de iis sperandū est (quæ multo maxima pars est hominum) qui non antè ad Deum apostrophē faciunt, eamque consternabilem: quàm ad extremā catastrophē vitæ ventum est, vel fabulæ potius & imaginis vitæ? Quumque in theatro vitæ ordines sint distincti, togati & prætextati, infulati & paludati, apicibus honorū quidam homines insignibusque magistratuū conspicui, quidā diademático gestamine eximii, quidā tiara augusti, quidam purpura sacrosancti, alii sub aliis velamentis honori & venerationi habiti, & simul loca cuique ordini atque homini attributa iure gentium

& ciuili atque pontificio: illic tamen omnes eodē iure sunt, eadem cōditione. nec vt vectorū nunc discrimina sunt in vniuersa ecclesiarū nauī, sic miserorū delectus erit tunc in lacu custodiarum Orci. Ad id igitur, quò omnia uitæ humanæ consilia referri debent adipiscendū, quod finem & extremum prisca vocauit philosophia, nō magnopere refert, quali quantāve nauicula, quāmq̃ splēdidē aut ieiunē instructa, vnusquisque animus humanus vectus sit. Id demum autem refert, quā opportunē, quā hospitali tempore, quā gratiose ad portum peruenerit finēmq̃ nauigandi: è quo portu finēque, ad finem illum optandum expetendūmq̃ peruenitur. Quantum est autem hominem studiosum, in theoriæ contubernio, alioquin etiam suauī & amœno, cogitatione antecapere certa, stabili, fixa, denique in rem propē præsentem animum ipsum sistente, qui status hominis post mortem futurus sit, si in Iesum ipsum Christum, eiúsque pollicitationes, si in sinum Abrahæ omneis suas spes contulerit & direxerit? si vniuersum animi censum facultatēsq̃, suo cum omni thesauro, cum vniuersis opibus, in gremium charitatis Christi coniecerit & effuderit? Nullum enim castellum, nullum conditorium, nulla arx munita, nullum præsidium tam firmum, tam fidele horum custodiæ esse potest, quā fanum fidei Christianismi, excubiis septum atque peruigiliis philosophiæ, omnium dierum atque horarum. Mors est enim homini sic extrema (vt dictum est) æternāque bona fide commentato, eruptio è carcere, exilii terminus, ærumnosæ peregrinitaris clausula, ad portum exoptatum appulsus: postremo prementis oneris prægrauisq̃ excussio, fictilis & putris corporis abiectio. Tum demum autem eques securus, ex equo descendit natura consternabili, interdūmq̃ lymphato, interdum furiis iracundiæ, cæstro sæpenumero Veneris incitato. Tunc miles fidelis, paucis licet stipendiis (vt sæpe euenit) confectis: tamen vt emeritus militia dura mittitur. Tunc etiam seruituti corporis naturæ lege addictus, eiúsque obsequiis quasi ob noxam datus animus, morte veluti vindice, nexu permolesto, vrentēque mortales bonæ spei, soluitur, quasi que manumittitur. Ibi iam discriminum finis, immuntias fortunæ temeritatis. Ibi curarum anxietatūmq̃ depositio in sempiternum. iam egrotationum, dolorum, timorum, ægritudinum, æterna vacuitas. Ibidem caliginis & tenebrarum exitus: in patriam verò atque in lucem progressus atque aditus. Inde demum natura humana veram & iustam vitam beatāmq̃ auspicatur. Tunc primū semetipsum animus nosse

incipit, efféque quod nunquam desiturus est. Is denique sperandi finis, quando spem atque expectationem gestienteis, rata, fixa, æternâque adeptio summi boni excipit. tûmque demû pro vsu & fructu, propria possessio & hæreditas beatissima cedit: pro incolatu ciuitas: pro opinione ac fide cõprehensio & scientia: pro ludibriis sensuum, rerum visendarum conspectus, perceptio & fructus: veritas expressa & eminens pro adumbrata: tranquillitas pro tempestate: quies pro inquiete vita: post sensuum vicissitudinem, post affectuum varietatem, perpetua mentis æquabilisque constantia, & fiducia, comperâque possessio veritatis atque sapientiæ, quæ epulæ sunt animi suauissimæ. Iam verò post vniuersi solutionem, post interitum spatiorum atque intercapedinum temporis, rediuiua corporis animique societas: pro tempore perpetuitas: pro instanti, prætereunti, venturòque, non alia iam atque alia præsentis & futuri excipiens instantia. cæterùm præsentis ac proprii summi boni perpetuus tenor, simul præteriti desiderio vacans, simul expectatione futuri non suspensa, in corporis (quod miremur) animique consensu plenissimo. Postremò pro amphitheatro, infinitum diuinitate plenum: pro spectaculo scena Mosis aperta, visenda & spectabilis. Simul ipsa iam vera lucidâque theoria, vmbratilem hanc nostram sequitur & imaginariam. denique (vt omnia vno verbo complectar) mortem & miseriam excipit beatitudinis & immortalitatis summa. *Εὐεὶ δὲ καὶ ἀεὶς δὲ*, quæ Latinû nomē non habent, pro ea quæ in terra *εὐδωκία* falsò dicitur, quæ que tanquam finis & extremum bonorum est communi prudentiæ, sed fluxum & euanidum. Hæc, tot, tantæque in expectatione posita sunt emeritorû stipendiorum Christianismi, quæ cœlo delapsus euāgelus antea inaudita, pro testimonio palàm, pro concione sæpe, pro imperio, pro potestate, pro numine, pro ede, pro tēplo summi Dei pronūciauit: idque cõceptis verbis in asseuerationē, oraculi fide multem augustioro. Ob audientibus autem (me miserû qui hæc scribo) aliudque (vt dicitur) agētibz, omnia prædixit atque interminatus est contraria, ac per diametrum (vt aiūt) opposita. Vtenim illi lætitiis lætabuntur omnibus, iisdemque sempiternis: sic hi viceuerfa mœstitiis mœrebunt, numeris omnibus æternitatis & miseriam coagmentatis. At nos vtraque (ô perditas cæcæ vitæ, ô deploratas rationes) sūsque deque facimus: vt quidē inferbuerūt studia ciuilia, ad bona ista fluxa, temeraria, caducâque cõsectanda: in fide quidē ipsa fortunæ fallacis ac circumscriptricis hominum, non in Christi Seruatoris posita pronūciatoris tum veracissimi, tum locupletissimi. Hic quid agat recta

philosophia, germanâque ratione instituta, quid (inquam) agat theosophia cum sensu communi, cum prudentia urbana & ciuili? Quid cum aularum incola sapientia? Illa, summi boni spem, æternitatis expectationem, Critolai libra: hæ Aristippi pendunt trutina. Illa ad infinitum bonum consiliorum suorum summam actionumque refert: hæ mortalium domicilio omnia circūscribunt, vt quidem præ se ferunt apertissimè. denique his anima cum palato, illi spiritus tantum sapit, cætera stupentibus longè propria sunt. Illa eadem vitam secularem, tanquam lustrale quoddam munus necessitatis esse censet, corpori seruientis ad animæ tuendum diuersorium, citò emigraturæ: hæ vsum vitæ habitationemque precariam, æternitatis instar habent: peregrinitatisque viatico, quasi summo bono incubant, & perpetuo. Illa interim Ambrosia & nectare alumnos suos alit: hæ scæno & stipulis, & inanibus quisquiliis animos pascunt hominum vt iumentorum, siti semper aridos. Verum quod dicere institueram, sapientis vitam antiqui philosophi, admirandam summopere, æmulandamque iccirco censuerunt, quod in ea demum virtutum omnium summam vsumque esse posse dicerent & contenderent. Sapientem enim vnum per prudentiam mundum hunc, & omnia quæ mundi sunt, præ rerum diuinarum scientia atque speculatione, despicienda ducere & aspernanda: quibus in rebus ipsi animi contentionem ingenique, omnem & vniuersam, figendam esse censebant. Illum etiam per temperantiam rebus omnibus abstinere, quibus corporis curandi ratio vacare potest non incommodè. per fortitudinem non terri metu mortis, non doloris, non rerum aduersarum, vt qui mentem habeat abstractam à commercio sensuum, in editoque sitam. Atqui iisdem ex rebus iustitia conflatur, omneis ipsa numeros complexa innocentia. Huiusmodi autem fuit (vt quidem ipse reor) eorum virtus, quos scriptura, summa auctoritate prædita, iustos esse viros elogio suo testata est, quasi ad libellam æquos, & ad perpendiculum rectos. Hos porro treis philosophiæ quasi cardines, sequitur ipsa tanquam agmen colligens virtutum, sapientia, cuius gentilis est ille sapiens, quo de nunc antiquorum è sententia loquimur: in veritatis illa perspicientia contemplationeque summi boni vehementer occupata. Hic enimvero felicitis & beatæ sortis mortalium, parum mihi prudentes consultique homines quidam visi sunt, qui vel è statione vitæ compositæ, è mediòque reductæ, vel ipso è portu senectutis iam emeritæ, rursus in æstum munerum ciuiliū, vel in ambitus iactationem aut urbici aut atriorum, scientes prudentesque

referuntur. Nam quibus id inuitis & gementibus euenit (quod solenne est & fuit semper plurimis eorum, causari vel impudētissimè, quibusdam etiam adiurare sanctissimè) sed quibus id contingit minimè affectantibus, iis equidem censeo magnopere esse condolendum : & verò tanquam pro ærumnosis, calamitosoque quodam casu oppressis, preces frequentandas esse, obsecrationesque supplices. Quem enim eorum non misereat, qui quidem inire cupiat gratiam ab ipso legislatore, qui legem tulit ac sanxit germanæ charitatis & misericordiæ? Verum enimvero nequaquam ego tantum theoricæ philosophiæ, ac verè propriæque sapientiæ studiosæ,tribuendum censuerim, quanquam doctrinarum principi, ne heroicæ quidem (propè dixerim) vitæ discipulorum eius, quantum prisca mendosaque philosophia suo sapienti tribuisse dicitur, omnes ut sensuum motus sapiens in potestate habere existimeretur : sibi met ut ipse omnium instar esse, secum vno ineundam rationem habere ad beatitudinem adipiscendam : denique omnia ut semetipso longè inferiora ducere non dubitet. Vaniloquentiæ certè sunt ista placita à porticu nomen habentis, indignæ sanè vel nomine ipso philosophiæ, quod sibi vni quondam ipsa vindicasse dicitur. Hæc illa est autem magistra, quæ sui sapientis alumnique ideam commentitiam in cælum celebrando sustulit : in numerumque formarum beatarum propemodum adoptauit, ut humano maiorem fastigio. At philosophia hæc sacra, axiomatica fide cælestique elogio subnixa, non ab hominum illa quidem inuentis, non à demonstrationum lineamentis, cæterum à numine cælesti ius atque auctoritatem habens, cuique theurgia mirifica pro argumento apodeictico diuinitatis fuit : vnum sapientem suo iure nouit Ipsum (ut Pythagoristæ quondam loquebantur) vnum iustum, vnum absolutum bonum : vnum (inquam) Ipsum nouit, qui Ipse omnes virtutis numeros suo apte ingenio, suapte natura complectitur : quique statim Ipsius appellatione, ut propria, ut peculiari, ut absoluta, ut omnes numeros significationis complexa, notus est : vnicum exemplar ipsum virtutis, veritatis, atque sapientiæ, ad quod formas ipsas virtutum primarias & exemplares effingi atque exprimi oporteret, si quidem exprimi possent. Sub ipsius enim nomine fulta à semetipsa auctoritas, augusta maiestas, sacrosancta veri fides, ipsa suo numine nixa, fixa, firmissima, omne externum respuens indicium & argumentum, intelligitur, significatur, & exprimitur. Quanquam si argumentorum & demonstrationis res esset, typorum cum ectypis compositio, indiscretæque similitudo

signorum cum significatis, symbolorū cum rebus representatis, prædictionum cum euentis, conuenientissima comparatio, ad vnguē-que exacta commissio respondens, omnem inficiationis ansam præciciens: haud dubiam vim haberent grammicarum apodeixeon, vt mathematici vocāt. Mihi autē fides certa & cōsignata summæ Christianismi, sic in scriptura cōdita videtur esse, tum diuinitus edita, tum per manus ipsas Dei, eiúsque legatorū tradita & hypodidascalorum, vt ignis à natura in silice inclusus est, aut in aliquo uis igniario. Vt enim corpora igniaria mortalibus data sunt ab initio, non vt ignauissimo cuique atque inertissimo, ignis, vsus, rei maximè ad vitam necessariæ, in promptu & ad manum, nullo labore, & sine inquisitione esset, sed vt varias vsus meditando extunderet artes: sic rerum æternarum, & veritatis ab ipso proditæ Dei filio, auctoritas, æstimatio, firmitas, demonstratio: summi denique boni, omnibúsque numeris cumulati maiestas, atque eiusdem indicatio, si liceri institerimus iusta contentione, in monumentis historiæ theurgicæ nobis proposita sunt, ab orbe statim condito res gestas prouidentię commemorantis. Atqui huiuscemodi sapientiæ doctrina, in scriptura, quasi in lapide, in silice, in re dura, interdúmque menti refractaria, cœlitus hominum generi iccirco prodita est, vt silicis venis abstrusum excuderet ignem. atterere enim intellectum scripturæ, & affricare validè & assiduè opus est, fomitēque bonæ mentis, atque orthodoxiæ hærentis, promptum & paratum habere, ad scintillas luminis excipiendas accuratè, & intentè, atque religiose. Verùm id plærunque ita segniter & oscitanter facimus, inde emicantes vt igniculi, in fomite sensim emoriantur, vt futili & inutili. Profectò id mirum est, certúmque adeò stuporis hominum indicium: quòd cum sapientiæ sacrarium in medio situm sit, omnibúsque sic expositum, vt cuique bona fide pulsanti aperiatur: homines tamen permulti cum literarum studiosi, tum verò philosophiæ nominis studiique cupidissimi, cognoscere germanam veritatem non magnopere contendunt, quæ intus nō dubiè clausa est: cum eaq; cognita familiarius indies consuescere negligūt, tractare etiam & osculari, confertisq; digitis retinere & amplexari. Nisi verò siquid pulchrius sapientia cælesti, si iucundius, si suauius quicquam animis esse potest, si benignius morigerum, ac sese liberalius indulgens amanti-bus, secūdo quidem numine salutis, philosophiæ studium capefferibus. Quantum porrò numen, quàm mirificum genium veritatis habuisse, Christianismi promulgationem olim existimare de-

bemus, quæ polytheiam vetustissimam abrogare per orbem terrarum potuerit? quæ omnia fana oraculâque deorum exaugurare? quæ iura gentium, quæ cognationum, quæ gentilitatum delere? quæ naturæ commendationis vim, quæ mortem iuxta vitamque pro nihilo esse ducendas, persuadere? Sed scilicet ut Christus è cælo euangelus, sapiëntiæ promulgator fuerat: ita Orci emissarius, ex Erebo obnunciator, atque ipsi germanæ sapiëntiæ & veritati oppositus anteuangelus, auspicia diremit sensim & obturbauit inualescētis philosophiæ, contemplatricis æternitatis, de cælóque seruantis. cuius solertia factum est, dira atque animabus exitiali, ut mundus qui tanquam ludus esse debebat scholasticus, animantium ratione præditorum, diuersorumque mortalium ad Dei cognitionem conditorum: conciliabulum factum sit errorum & vanitatum, è cælo in terram studium hominum detrahentium. Verùm (ut eò reuertamur) philosophia prisca, alumnâque Hellenismi, insolētissimè verba mortalibus dederat, inane ac ridiculum simulachrum commenta isothei cuiusdam sapiëntis, ut Homericum verbum vsurpem. qui vir iudicio eius sapiens, numerosque omnes exquisitæ rationis afsecutus, vitæ suæ tenorem in offensâ serie catorthomatum contexeret, rectorumque officiorum: sicque nunquam peccator, nunquam non inculpatus, vitam ageret. id quod vni tantùm cõtigit Ipsi, quem sapiëntiæ auctorem, virtutum consumatarum parentem ac conditorem esse nouimus, vitiorumque deletorem. Quòd si quibus ab eodem Ipso datum est singulari indulgentia, ut sensuum petulantiam, ut motus animi præcipites & abruptos, aut dementes & inconsultos, in potestate, quasque vinculis vinctos haberēt Domini deique reuerentiæ: non minoris id donum utique æstimandũ est, quàm illud cõmentitium Æoli regis deique poëtici, qui ventorũ sic potens esse dictus est, omneis ut eos in virem quasi in carcerẽ compactos, Vlyxi nauigaturo dederit, ut est apud eundem Homerum: vnũque tantũ ventum à puppi flantem vinculis illis exemerit, in patriam ferentem, cuius incredibili tenebatur Vlyxes desiderio. Immunitas est hæc singularis omnino & eximia, rarissimique exempli. quod olim prouidentia in diua eiusdem Ipsius parente Dei atque hominis, non modò à partu salutis integra atque intacta, sed etiam à nãui natalitii cõditione immuni, ut credimus: atque in vna fortasse præterea, aut in altera anima, aliquãdo vsurpauit. Certè Paulo suo Dominus, cùm mãcipio nouitio & gratisimo, tum verò fictili lectissimo, iterum id & tertium pernegauit, poscenti & flagitanti argentis mo-

lestiæ vacationem. idque post rerum cœlestium inspectionem negavit, ne intellectui quidem humano, nedum oculis cedentium. gratiâque tantum tutelarem ei dedit, muneris pernegati succidaneam, digitum transuersum (vt aiunt) ab eo non discedentem. Ita fert autem humanæ conditio infirmitatis, & ratiocinatio hallucinatrix, tranquillo, vt interdum, interdum etiam in portu vt impingamus. quippe cum nusquam non, nunquamque non, tempestatem intus Æolus cieat, non Hipпотades ille Homericus, sed tartarides. Huic enim Æoli nomen à mobilitate mirabili, & versutia sanè quàm versatili, conuenit. Tametsi tum maximè Vlyxi stoliditas sociorum suorum, animoque sensuum proteruitas, esse debet formidolosa, subdola cum ridet placidi pellacia ponti, vt inquit Lucretius. Improvisò enim nonnunquam tempestas fœda ac procellosa cietur, eoque nocentior est, quo minus erat suspecta. Nam quæ tempestas, quis præster, quis turbo ignitus in aëre, torrentior est aut atrocior, quàm bilis in homine, cum repente efferbuit? At verò ægritudo animi ori obducit tetra nubila tristitiæ, vultuosos homines efficiens. Excandescencia cælum & terras, rationem & appetitum brutum miscens, toruè intuetur & minaciter, ex oculisque eiaculatur fulgetra terribilia atque coruscantia, toto cum ardentis ab ore scintillæ absistunt, oculis micat acribus ignis. Qui etiam si ipse in felle amarulento, quasi in nube procellosa collectus, ad vindictæ præcipitis fulmina exarserit: impetu iam inde cæco amentique furens, per omne fas, nefas, ius, iniuriâque fertur, calcata atque obtrita iuris humani diuinique reuerentia. Ecce tibi opposita è parte lætitia gestiens, quæ aliquem ob successum, immodicam sæpe affert oris intempestiuâque ferenitatem. Siquidem & frontem indecorè diffundit & exporrigit, intusque liquefacit animum fluxa ac dissoluta affectione. Iam verò spes non dubia, iam deplorata expectatio, in eodem pectore alternantes, faciem hominis ad lætitiâ ambiguan ac tristitiâ, quasi habitum cæli incerti reddunt & ancipitis. Hæc cum naturæ sponte in minore mundo fiunt, innatisque in homine vitiorum fomitibus, perinde vt in mundo maiore cæloque crassiore existit sæpe intemperies: tum furie illæ infernæ, temerariis è causis nocendi materiam nactæ, in mente composita nonnunquam, nihilque tale suspicante, varios cient turbines, ab iisque periculum capitale creant animæ: nisi ad sacræ philosophiæ præsidia, tanquam ad Asylum certissimum, is qui tumultu cæco oppressus est, perfugium sibi comparauerit. Verum vt aliptæ ex-

ercendis corporibus vtilis sunt & appositi: sic animis exercendis sollicitationes illæ mentium compositarum, sæpe sunt non incommodissime. Nam absque infestis earū crebrisque incessionibus esset, multi supina quiete somniculosæque gaudentes: nec opinato opprimerentur tumultu, ab illo vigilum Cimmeriorum præfecto, qui ab eo Græcum nomen inuēnit, quod delationes rerum capitalium apud Deum facit. Is cum optimo cuique atque cordatissimo negotium exhibere cæcum, intestinum & perpetuum gaudeat: excordibus tamen ferè eiusmodi molestiæ fœneratur immunitatem. in qua immunitate incauti mortales securique, acquiescentes, rerum repente capitalium rei ab eo facti, apud Deum clementem simul ac severum iudicem, damnatique, subinde permittuntur lorariis imminentibus, in horrendam illam sedem pœnarum miseri furiarumque deportandi, semel atque in sempiternum. Hoc cum ab ipso, cuius nullum verbum non ratum est futurum, cum à Deo, cum ab ipsa veritate denique præditum sit, palàm etiam atque pro concione, pro sententia, pro potestate dictatoria semel pronunciatum: trino insuper nundino (vt ita dicam) promulgatum: verum cum hoc nihil testatius, nihil consignatius esse possit: & verò cum in actis adhuc Seruatoris perscriptum, in tabulis perpetuis proscriptum sit & expositum: ecquid causæ est tandem, quin mundus ab eodem Ipso sæpe contumeliosè dictus, qui & sensus & prudentia communis à nobis appellatur, tametsi animans permultorum sit capitum, nec aureis tamen ipse habere, nec oculos videatur? ne sensum quidem vllum non stupidum, non torpentem, non emortuum, ad res dignoscendas animæ commodissimas, eidemque nocentissimas? Ecquid (inquam) causæ est, quin nostrum unusquisque qui communi sensu regimur, nec secum ipse religiose, nec cum propinquis, necessitudinèque initiali coniunctis, candidè, nec cum ipsa sapientia: cum Deoque non impiè, non irreuerenter agere manifestò cōpertus sit: nec tamen ob id atrox præconium cæleste perhorrescere? Hactenus certè iustitia valet hodierno tempore, vt quæ sunt Cæsaris Cæsari, non item quæ Dei sunt, Deo reddat. Huiusmodi sunt præstigiae emissariorum mundi principis: sic mortales fallunt Sirenū blandimenta, quas multi fugitantes (vt iam diximus) dederunt se solitariae philosophiæ. Ardua est enim & impeditissima umbratilis illa palæstra, cum ciuilis vitæ theatro coniuncta est aut finitima. Ex Ægypto igitur excedendum, è Babylone erumpendum: & vt rem diuinam tranquillius Domino attentiusque faciamus,

vnus diei saltem iter abeundum est, atque etiam plusculum, si interesse animæ salutisque visum fuerit. Id quod agrè, & respectantes identidem, auersisque propemodum vestigiis faciunt, qui arctiorum necessitudinum nodis, aut commerciorum nexis, cum ipsa Ægypto coniuncti sunt. Nam honoris compedes, & vincula ambitus atque cupiditatis, tum siqua sunt alia argentea atque aurea retinacula, nec abrumpere iam valet, nec soluere philosophia. Aurea verò huic similis (si credimus) & argentea erat scilicet illa vita, quæ à poëtis decantata est, admirationique habita: aureisque hanc vitam in terris Saturnus agebat. Mihi autem qui totos se in ambitus æumnas dedunt, quasi Empedoclidæ quidam videntur esse, qui aut gloriæ inanis aut pecuniæ quærendæ desiderio, in craterem Ætnæ similem se coniiciunt, vt ad mortem vsque ardeant. nam vt inde in Phlegetontem ipsum sidant, ominari vereor. Certè quidem qui è compositis & explicatis vitæ rationibus, ad gestientem illam cupiditatem omnes animi facultates effundunt, qui omni contentione incumbunt ad patrimonium suum aliorumque nonnunquam coaceruandum, aut qui ad fastigium attollendū laris sui familiaris: non absimiles ipsi sunt eorum quondam curiosorum hominum, qui ad oraculum Trophonii, antrumque teterrimum, descendere sustinebant nulla digna de causa. Placentulas enim crustulæque melita secum ferentes, iisque sperantes reptilia mulsum ire, quæ introeuntibus occurrebant obuiam: capitalem in fraudem sese coniicere non prouidebant animo, in antrum intrò se dantes sinuosum & cauernosum: quo ex antro eodem exitu aditūque vti, homini contigit antè nemini, vt auctor est Philostratus. Atqui hos præposteram vitæ rationem sequi, atque etiam peruersam nemo non intelligit, qui quidem peritus sit, pauloque accuratius eorum subducere rationem institerit. Etenim nec nauatæ industriæ rebus illis, nec impèsi temporis, nec contritæ ætatis, nec æumnarum interim exhaustarum rationem ipsis constare faciliè deprehenderit. Fortuna enim vt choragus imperitus, temerè induit vnicuique in proscenium prodeūti, personam nec habilem ipsi sapissime nec utilem. & vt fictrix sit hominum ipsa, vt Prometheus fuisse dicitur, non tamen formatrix est etiam eorum, vt est philosophiæ genius. Adde quòd interim Christianismi stipendia non procedunt, iis qui castris Hellenismi, qui præputio (vt sic dicam) cupiditatis, nimio opere auctorati sunt. Sed enim legis euangelæ duo prima capita & precipua, moribus propè antiquata sunt ordinum primariorum. Multum-

que in vniuersum per (inquam multum) sæcula iam decoxerunt Christianismo, tum fidei bonæ, tum spei, tum charitatis. Proh diui immortales, iudicium nostrum hebetissimum, immo verò prudentiæ iudiciū, non iam cōmunis, sed prætextatæ, sed purpuratæ ac tra-beatæ, principibûsque personis insignitæ & conspicuæ. Nanque si caliginem humani iudicii tanti ista bona licentis, tute dempseris aliquantisper: quod philosophia facit in æuum: fortunata vtique ista conditio vitæ & amplissima, quæ splendore suo oculos nostros præstringit, vt futilis & aspernanda continuò iacebit. Ad eundémque fermè modum fulgor ille fortunatæ vitæ conciderit, vt adamas fuligine sublita micans, carbunculûsque in funda flagrans bratteola substrata, gemmeo decore & fulgetro exuuntur, ab illo si atrum, ab hoc si purpureum substramen exemeris: sicque, demum fucum factû oculis miraberis. Quin & colossicos illos homines, capite (vt sic dicam) minutos inuenies, si quidem ad viuum vsque specillum philosophiæ demiseris, ad explorandum fortunatæ vitæ, fascibus istis succinctæ, vitium & miseriam. Quippe vt cognationis iura gentilitatisque retineant, & ciuitatem tamen & libertatem amittunt, qui Sisyphium saxû magno cum sudore subuoluunt, interdumque horrore. assiduos enim eos & peruigiles antistites esse fortis fortunatricis necesse est: si vicissim ipsi assiduos comites habere flamines suos cupiunt, qui suo stipatu spectandos homines æmulandósque faciunt. His adde quòd duabus illi rebus mulctati sunt, quas Democritus sola esse, aut summa bona putabat, *ἐνθυμία* & *ἀναιμία*. quo apparere potest quanto cum dispendio ocium honestum & compositum, negotio permutetur interdum, lauto quidem illo in speciem & splendido, sed tamen reuera futili & vitreo. Testor hîc, vt alibi sæpe feci, hoc acroama theatricum non esse, sed Academię potius aut Peripati abstrusi. Verùm si degenerem istam rationem, quæ vita in medio posita, ciuilis, urbana, aulicæque reguntur, philosophia semel è mente hominis absterferit, rectæque rationi & quasi natalitiæ hominem ipsum restituerit: ilicet prudentia communis verterit in stultitiam. Alioquin autem vt mores iam ad rationem peruersam incubuerunt, nullo thure litabis, hæreat in stultis breuis vt semuncia recti. Iam verò animaduertere nos oportet, quòd vt tentationes sunt permultæ ægrotationum in corpore: sic tentationes furiarum in homine interiore, plurimæ illæ quidem & perennes, sed cæcæ & abditæ, nec ab arteriæ micatu æstimabiles. quales sunt volupratis incessentis ac titillantis affectiones, auaritię atque cupiditatis

stimuli, & cuiuscunque permotionis procacis & petulantis. Incessit igitur mortalibus aut voluptaria, aut alia æquè improba proteruâque cupiditas: meminerint philosophiæ alumni specimen sui dandum esse oculis Dei spectatoris atque superum, sub præsidioque Domini tantum: norint se, ac sibi persuadeant dimicatu-ros citra noxam memorabilem. & quidem quanvis aliquandiu athleta dominicus certamen experiatur durum atque acerbum, lætabitur tamen deinde, sibi-que gratulabitur, quòd ea ærumna exercitior factus sit. Cùm autem alia aliis grauiora sunt certamina, tum verò rerum vehementer aduersarum colluctatio cum equitate animi, dolorisque vrentis commissio cum pertolerantia, fœdum sæpe spectaculum edit cœlitum ordinibus, etiam si fœdius interdū quàm exitiabilius. Labat enim plerunque in atroci conflictatione virtus, quæ nondum planè tyrocinium posuit: ad dolorisque impetum quatitur & vibrat constantia fidei, etiam meditata, etiam in alieno antea certamine ad palmam cohortatrix strenua & assidua. nulla porrò pars virtutis minus ad experimenta respondet. In nulla ferè vitæ parte sapius vanitatis profana philosophia, luculentiusque manifesta semper fuit. Adde quòd intelligentiæ humanæ modus, ad prouidentia diuinæ consilia perspicenda incumbens, sæpenumero cedit obscuritati. tum elogiorum sacrorum liberalitas, consolationisque supernæ fomenta, eos nonnunquam destituunt, qui fiduciam plenam non habent, sed pro modo tantum coniecturæ suæ sapiunt, communisque prudentiæ. utpote quæ iudicia rerum faciat ex euentorum varietate magis quàm ex oraculorum auctoritate. Vnde fit, ut vel ad fortunæ fauientis impetum, vel ad noxæ pertentantis appulsum, vel ad mœstitiæ vehementis aculeum, mens humana torpeat, quasi stupore perculsa atque hæsitantia. Mihi certè hoc velut carcinoma hominis interioris aliquando visum est, quod nec lenimento æquanimi-tatis, nec scalpello fortitudinis, nec cauterio philosophiæ, ita vel mitigari, vel tolli, vel domari tandem possit, ut subinde non rebellet, sæpe etiam increseat, & magis ferum redeat. id quod à doctis ac meditati minus, ab experiētibus & in eo exercitatis longè melius intelligitur. fomentis igitur magis ac lenimentis philosophiæ, quàm imperio coercetur rationis atque seueritate. Lectio autem scripturæ oracularis, assiduâq; commētatio, valida depultrix est hæsitatiæ: fidei verò & fiduciæ blanda cōciliatrix cùm securitate perfusæ, tum eodem in ipso acquiescentis quem sæpe iam diximus, ut auctore certissimo speratæ æternitatis. adde etiam spei bonæ ratæque suppeditatrix.

At fortis fortunæ genius, felicitatis temporariæ rerumque secundarum largitor, vel creditor durus potius & fœnerator, idem quoque importator est æternæ calamitatis ac detestandæ sortis. Hîc rursus in mentem venit commentanti, hominum secordiæ dicam an vacordiæ? qui in existimatione & arbitrato rerum ad vitam beatissimam spectantium & ferentiû, tanta inertia, inscitia, torpore præditi sunt, animique marcore, quarum inspectionem Deus cum naturæ excellentia, menti humanæ dedit. Qui si paulò cordatiores essemus, nequaquam præposterum amorem coleremus, malâque pro bonis tantopere expeteremus. Quis autem nostrum nescit, quis non sæpe fateri cogitur vrgente conscientia, delicias vitæ, rerumque secundarum blandimenta, nec bona esse nec commoda, sed bonorum imagines verius, & ludibria sensuum, illicitâque cordis perniciosissima? Quis verò nō dicere seriò solet, res aduersas, vitæque molestias, flagra esse Domini, pistrinâque salutis, quibus familiam sibi charâ, desponsam & adoptatam, in officio continet? Seuerum enim esse parentem eundem ac dominû accepimus, & familiæ amantissimû: ab eoque seruos eosdem frugi atque liberos vapulare sapius, quàm nequam & abdicandos. Non sumus porrò nescii ærumnosam esse viam virtutis, elogio quoque prisce sapiëntiæ, ob idque penè à via vehiculari, prætoria & militari diuersam atque auersam, quæ à multitudine mortalium stolidâ & satagente tritæ sunt. Videlicet plumbei sumus homines, non aurei, non argentei, qui in fornace aduersarum rerum liqueamus, non purgemur & exploremur. Atqui compertum habemus, Seruatorem ipsum nostrû, cuius demum auspiciis vtentibus & fretis sperare fas est aditum cæli, hac eadem via vestigia fecisse perpetua, cùm hîc studium sapientiæ disciplinamque institueret, quam resipiscentiam appetentis salutis prænuncius, quasi que speculator mundi præmissus, appellauerat primus. Nec verò pedissequos Domini ipsius seruos & circumpedes, à manu quoque & à secretis, denique sodalitiâ manum, cohortem insuper amicorû & comitum, quos honoratissimo loco semper númeroque habuit, fratresque salutauit: & porrò eos ipsos è quibus centurias ipse primas conscripsit, cohortesque firmissimas aduersus tot gentium tantarumque efferatam multitudinem, non omneis (inquam) illas nationis beatissimæ primitias, eadem disciplina in cælum affectasse viam atque adeptas esse, inficias ire aut possumus aut volumus. Hæc & alia eodem pertinentia cùm probè sciamus ipsi, & vt nobis comperta identidem cōmemoremus: cùm eo demû nomine memoria

illorum vt consecratam colamus & veneremur : quid causæ esse dicemus, quamobrem nullus nostrum, quanquam Christianismi discipulorum, dieculam vel vnam, pistrinum resipiscentiæ euangelicæ, poenâsque pendentis Domino conscientiæ, versare, eorum æmulatione sustineat, animi cum æquitate? At diuos ipsos iam immortalis, ipsos etiam vades Christi in re capitali, in quæstione acerbissima factos, atque atrocissima, ad eam molam versandam libentes se & hilares dedisse credimus : in eaque ærumna, quasi in eo pietatis munere perfungendo, ad extremum vsque spiritum tolerauisse. alios inopiam rerum omnium qua vita carere potest, consertis (vt dicitur) pectinatim manibus, totius corporis animique contentione, pro pignore summi boni amplexos esse, & tanquam pro tessera fortis beatissimæ. Quarum rerum omnia si abnuenda nobis, si votis conceptis & nuncupatis procuranda existimamus & depellenda, vt malarum & noxiarum, id quod palam atque exaudibili voce facimus, ad hostes atque ad inimicos ea reiicientes : cur sanctarum animarum exuias eas ob res consecratas, osculo dignas religioso ducimus? idque iure ac meritò facimus? Cur crucis Christi assulas, ramenta, scobem, sicubi nos esse nactos cōfidimus, pro amuletogestamus depulsorio? Atqui hæc ærumnosæ vitæ, cōflictatæ, ac vexatæ, indicia sunt & monumenta. Specillum hoc profectò præcordiale, nullo fortasse minus certum & acre, inter alia permulta nobis admouit Deus, ad explorandam vel refellendam potius & demonstrandam fiduciæ nostræ conditam intus infirmitatem atque futilitatem. Quæ (malum) est ista sensus ciuilis prauitasne dicam, an peruersitas? Nos fidem ipsi dedimus, sacramento enim adacti sumus in tinctura lauationeque mystica, ab eo instituta : vicissimque fidem ab ipso accepimus, testatam, scriptam, & obsignatam. Quotus autem quisque nostrum fœdere stat & pacto, inito die suo lustrico? Nimirum sceleris instar est perfidiosi & capitalis, accepto dextræ diuinæ pignore, in eo minimè acquiescere. Amentia est nefaria, in optione bonorum, & vitæ conditionis, fidem sequi (vt ita dicam) Mercurialem potius, & oculatam, ac circunforaneam, quam in spe propinqua positam, quam spem ille Ipse absolutè dictus, fide sua esse iussit : nec verò fide sua vnus (quanquam erat abundè) sed fide tot testium, pignoribus & capite oppositis, repromittere non grauatorum quæ ille pollicitus est. Tametsi Ipsius cum sponsionem dico : omnes numeros certæ & exploratæ & compertæ fiduciæ significo, qua nulla maior esse aut excogitari potest. Siquidem vnus

Ipse est, qui fidei conditor est, qui veritatis genius, & ratio substantiæ eius est : qui nullius non promissi potentissimus. At nos ab eodem Ipso auctore, summi Dei filio & institore, bonorum æternorum spem Græca mercamur fide (vt Plauti verbo loquar) non Christiana, & pietatis cultoribus conueniente. Quid autem in causa est diræ huius mutationis ac degeneris? Circumstat nos demonstratorum theurgicarum fides, grammicis illis certiorum, atque mathematicis : quæ confessionem nobis exprimit hærentibus, non item assensionem. An expectamus illud tempus ad confirmandam opinionem, cum iam non veritatis argumēta validiora, sed horror nos mortis vadantis ad iudicium, circumstabit? cum iudex Ipse omnium, pro imperio summo, pro potestate dictatoria, seueritate fortasse cæcoria & Cassiana, vim illam lictorum Erebi, corporis animique carnicum futurorum, lege agere iubebit Adrastræ? Credamus igitur obsecro, per Ipsum, per superos, per illos iam diuos & immortales : credamus (inquam) quæ de superna infernaque æternitate, prædicta sunt prodiæque diuinitus. nec assensione super sedendum putemus, donec in rem præsentem abducamur cum illa multitudine innumerabili Ephecticorum : horret enim animus dicere, dum obtorta gula trahamur, rapiamur, & auferamur. Atqui vbi iam theca animæ, vel exanguis senio vel infracta, vel præmaturè rupta non moratur animam, vereor vt integrum sit resipiscere. In leges, in instituta, in fidem Christianismi semel iurati sumus : sacramento Domini & monarchæ solius, & rerum potentis humanarum cœlestiumque, conceptis verbis diximus : videamus quæso etiam etiãque, ne de rebus testatissimis addubitando, à susceptæque persuasionis paracleti spiritus interuentu, quouis modo desciscendo, inexpiabili religione criminæque nos obligemus. Scelus est enim, scelus (inquam) & nefas est, tantam rem comperendinare, cum de causa liquere illico nobis debeat. Quos verò sic obligatos perduellis ille perpetuus natus est, eos agere transuersos ac præcipites ferre solet, per sceleratam viã, per deuia, per auia : procúlque à vestigiis Christi, indèq; ad Charonium (quod vocant) antrũ detrudere ad extremũ, vt Lotophagos in vita, & immemores patriæ. Appellat autẽ ambigentes primùm mortales, in Christianismòq; labantes, de reuerētia diuini numinis exuēda, de timore ac religione calcandis. Nempe quasi Dei prouidentia immortalis, aliud curans, nec mortalium rebus inspiciēdis vacet, nec votis eorum exaudiendis feriata sit, ipsa suis pollens opibus, nihil indiga nostri, quod dixit poëta Epicureus auctor apud quosdam

grauissimus (vt rumor est incredibilis) animorum mortalitatis. De-
 inde glaucoma cupiditatis, omniuagique erroris nebulam ob ocu-
 los Cacus ille obiiiciens, excacatos tandem deducit in abrupta vae-
 cordis licentiæ, quæ instar est Atheiæ. Cor autem humanum, bona-
 rum & malarum cogitationum consiliiorumque receptaculû, prout
 his aut illis aditum ac liberam sedem dederit, ita de anima optimè
 vel deterrimè consulit. id quod ita demum in potestate est hominis
 philosophi, si id non de suo sibimet ipse spondere, sed de Domini
 beneficentia meminit, quem cordis cuiusque nostrum claustra in
 manu habere præpotenti certum est. Quin & scopulis eiusdem Do-
 mini iis opus est, qui domicilium suæ mentis bene versum & mun-
 dum seruare cõcupierint. Scopulæ autem virgæ sunt colligatæ, qui-
 bus quisquiliæ recrementaque rerum vtilium, id est redundantia,
 circumuerruntur: quibûsque sordes excutiuntur è conclauiibus, quæ
 ad honoratos conuiuas hospitesque lautè accipiendos, sternuntur
 & exornantur. Quonam igitur modo verbum Dei accipere com-
 modè atque efficaciter possunt, idque in rem suam atque animæ
 vertere, qui dieculam vnā ferari, ne diei quidem vnciam, animo
 quisquilioso soliti sunt, à cogitationibus, curis, desideriis que fla-
 grantissimis rerum dissidentium cum theoria, acriterque pugnan-
 tium? Ita, inter cælipetas profiteri hæc hominum natio, censerique
 iure nequit, quæ viam veritatis & vitæ ingredi vehementer detre-
 ctat, quam ærurnosam diximus, in cælumque ferentem per mœ-
 rentem pœnitentiam. Atqui diuinitus ipsa nobis primùm, ore an-
 teambulonis verbi Dei indicta est: deinde ab ipso verbo palam ac
 pro imperio iniuncta. Sed quotus iam quisque nostrum tanti resipi-
 scere & pœnitere vult emere, vel tantulo potius, quod venit olim
 in prouerbum? Vsq̃ue adeò damnosi negociatores atque inscii su-
 mus, qui foro vti rerum sempiternarum non didicimus, non cupi-
 mus, non discere laboramus. adeò cælestis ille Orpheus, qui lenire
 tigres, qui cicures reddere leones, qui saxa mouere sono testudinis
 potuit Musarum æternarum, flectere mentes humanas desiit silice
 duriores. vsque adeò Sirenium auocamentis, & blandimentis vitæ,
 auersas aureis habemus ab auscultatione magistræ sapientiæ. vsque
 cò denique eloquentia ipsius Pithagoræ, Suadæ parentis & condi-
 toris, diuinæque orationis facultas: quæ torrente spiritus admirabili
 totum per orbem exæstuante, brutas animanteis efferasque verius
 quàm homines, ad concionem suam sacram celebrandam rapuit:
 flexanima iam non est, saxifragumque illud verbû Dei, carunculas

præcordiales penetrare nunc exanimés & emortuas nequit: tantum interest inter delectitias copias prouidentiae, & multitudinē reiectaneam, apud quam Pithò oracularis (quod Comicus Græcus inquit)
 & πείθει, & δὴ ἢ πείθει. Heu pietas, heu prisca fides, quò tandem abierunt gentium? in cælúmne remigrarunt? paulatim igitur ad superos Aethra recessit hac comite fide scilicet prisca, heroicarúmque ætatum, atque duæ pariter fugère sorores. Verum enimvero qui virgas diuinas atque emendatrices experti sunt, in rebúsque aduersis callû duxerunt patientiæ: iis casus calamitosi, damnâque facultates atterentia, omne etiam genus conflictationis & molestiæ, quædam velut tributa sunt, quæ mancipia frugi, Dominóque fidelia, è peculio suo sanctiore pendere iure euangelico debent, arbitrato Domini, vnâque accessionem æquitatis animi. Etenim Dominus ipse vsura luculenta testatus est versuram se facturum à familia sua, quæ in rebus quidem huiuscemodi scenerari non grauaretur hilarem patientiam. Quo liquere satis potest, quantum compendium in futurum ii faciant, qui in rebus acerbis atque etiam vrentibus, Domino se dedentes ad pœnam, insuper ab officio seruili non discedunt, non modò flagra Dei non expostulant vt iniuriam fortunæ, aut iniquitatem queruntur sortis natalitiæ. Atqui intelligimus, si animaduerrere vacat, esse omnino optabilius, bonorum istorum iacturam æquo animo, quasi in tempestate leuandæ naus causa, & salutis ergò facere, quàm in naue exaggerata & prægrauata, vita periclitari: & verò vita illa, beata immortalique futura. Nam bonorum aut corporis, aut externorum, aut vtrorunque dispendium, æquo animo acceptum, quidnam aliud est ipsum, quàm quod in diem fati ab omnibus dependendum est (qui dies iam inde à vitæ rudimentis cedere omnibus horis cœpit lege mortalitatis) ante diem paulum representare non nolle, idque Domino scenerari sesquicentesimo scenore, longèque ampliore? Qui autem quærendarum possessionum, dominatum, & prædiorum, augendarúmque facultatum, & gerendorum honorum cupiditati, nuncium remittentes, fortunámque suas sibi res habere iubentes, ad bonorum æternorum cupidinem, & ad philosophiæ Christipetæ studium incumbere institerunt: ii mihi videtur creditorem illi quidem, sed optima atque plaudenda vertere conditione. Siquidem rationum suarum diaria atque calendaria, ab Orci ipsi mensa, dirisque institoribus eius atque numulariis, ad eius mensam creditoris transcribunt, qui condonare omnia solet benignissimè iis qui soluendo non sunt (quæ multo maxima pars est

hominum, ne quid amplius dicam) nisi meditentur debitores ipsi ac decoctores, etiam inficiatores esse. Quanto igitur consultius est & commodius, nomina à Christo parente facere æqui animi atque patientiæ, nexum etiam fide bona inire abstinentiæ legisque reuerentiæ, quam versuram repræsentatæ felicitatis facere ab hiantibus illis faucibus Orci, animarum voracissimis? Sed enim ut est apud auctorem priscum, his populus ridet, multumque torosa iuuentus, ingeminat tremulos naso crispantē cachinnos. vulgòque gladium verbi Dei, qui Caucasias rupes olim secuit, qui iura gentium naturæque rescidit, *ἐπεὶ πλεόοντα* facimus urbanitate scelestissima. Malim equidem hoc loco Heraclitus ille videri, quàm Democritus, qui risu irrifūque prosequabatur civilem prudentiam. Nam in rebus hisce ridentes, eorum videntur esse mihi similes, quos aliquando in gladiatorum spectaculis aiunt, traiectis gladio præcordiis, moriendo risisse. Sit autem hæc disputationis nostræ summa: rerum secundarum tenorem plerumque in Orci fauces insinuare ac desinere, unde pedem sursum retulisse præter vnum Ipsum, adhuc nemo cōpertus est, quod quidem proditum sit diuinā auctoritate: aduersarum verò rerum atque patientiæ tyrocinium, in senectutem differre velle, summæ esse omnino imprudentiæ: quod elogiis clavis testatum est cælestis sapientiæ. At cui plurimis velut emeritis stipendiis rerum aduersarum tolerantia, nihilominus ad extremum fides constitit, felix verò ille planè ob infelicitatem. Cuius utinam sententiæ memoria efficax & strenua, quàm cordatissimo cuique mortalium cordi est, tam in corde nobis inusta esset cautere diuinę providentiæ. Sed nihil æquè controuersum est fortasse inter philosophiam Christigenam, ac prudentiam communem. Homines enim à consuetudine vitæ inusta, à cogitatione secundarum rerum blāda atque iucunda, abducere non minus penè est difficile, quàm qualitates à materia dirimere commentando, aut mentem ab anima: & hominem minimè aspectabilem à corpulento & tractabili. quæ notha quadam intelligentia fieri, philosophia censet humana, parumque nobis familiari. Quare in rebus diuinis commentandis, non tam anima quàm animo ac spiritu opus est. Ut autem ad id redeam quod dicere cœperam, non magnopere mirū est, ipsum mundi naufragi conseruatorem, rerum aduersarum tolerantiam insonantem à nobis exigere, qui cum sua sodalitate non mitius egerit, ut superius dictum est, quàm sodalitatem à patre sibi datam & cōmendatam, salibus illis amicitiaë quotidianis dignatus est, qui sunt apud

Græcos in prouerbio: iis etiam ipsis è mensa cælestis sapientiæ trās-
latitiis. Quippe qua cum sodalitate, fraternitatis & beneuolentiæ
summæ necessitudinem tacitam pepigerat, protinus à primore con-
gressu: qui etiam homines obscuros, tyrannorum atque impietatis
verberones, cognitores suos, veritatísque antistites mundo dederit:
ipsis etiam cruentum testimonium & capitale, ad furentis sæuitiæ
concilia denunciarit. Qui ipse crucifer esse, ac furcifer traduci per
ora multitudinis, post contumelias verborum, post iniurias verbe-
rum, post lorarios acerbissimos, fustuariúmque sustinuerit. Denique
qui omnia exempla pœnarum pertulerit ante supplicium illud, lō-
gè omnium facinorum tum vi atque efficientia amplissimum, tum
multifariam illustrissimum, superis item & inferis, cælo & elemen-
tis, stupore naturæ luctúque testatissimum. Quæ omnia æterno se-
natusconsulto prouidentia, idcirco decreta fuerant, simul vt morta-
libus statueretur exemplum diuinæ & cælestis sapientiæ, mortali &
fluxæ è regione obuersæ: simul, lex vt sanciretur apud homines æqua-
nimis patientiæ in rebus acerbissimis. Qua utique parte theurgicæ,
exemplariq; domini patientia, tyrānus ille mundi clarissimè triūpha-
tus est, vnà cum suis illis copiis Cimmeriis ac teterrimis, cum om-
ni clientela crudelitatis, sæuitiæ, impietatis impurissimæ. Pandito
nunc Heliconæ Deus. Num tibi si linguæ centum sint, oraque cen-
tum, ferrea vox: possis ipse pro rei indignitate exclamare in mores,
in torporem, in veternum, in marcorem, in perfidiam diram fœdi-
fragæ vitæ, communisq; prudentiæ? Incipe Calliope, si tamen
nobis adesse potes. Ecquisnam igitur datæ dextræ tanto taliq; mun-
di vindici & assertori, ab eoque acceptæ fidei, videtur nunc memi-
nisse? num cui in mentē venire inter curas ciuiles, præmiorum pœna-
rúmque potest haud dubiè nos manentium? nonne omnes fermè
lethæa potione inebriati, à sensu communi propinata, somnū obdor-
miuimus amnestiæ Stygiæ, in lecto incuriæ perditæ, in culcitra supi-
næ conclamataque desidiæ? Id adedò è vita cognoscere quiuis potest
in medio posita. Mortales pusilli, ter & quater & centies ausi capi-
talia, & rei non dico comperendinati, sed in diem, in horas amplia-
ti, etiam genio indulgere, symphoniacos poscere, ædes, prætoria, pe-
nates architectari æmulos regiarum sustinent? nec euentum iudicii
formidant appetētis, suppliciiq; sempiterni? Qui resipiscentiā mœ-
rentem & lugubrem ordine & professione præferentes, sordidatis
& squalentibus similes esse debebant: in auro, in purpura, in pom-
pa, in theATRICA transuectione sublimes ac stipati, eaque specie

conspicui esse cupiunt? habitu etiam propemodum. & cultu triumphali, omnium oculis designari? Ita toga pura innocentiae priscæ, candidaque sacerdotum demissæ simplicitatis, ad togam pictam, propemodumque palmatam, ad prætextam superbam fascium profanorum euaserunt, mundo degenerante. O mores olim iam degeneres, ac discrepantes ab ordine Christigenarum, nedum sacrificialium. tametsi in nullo non ordine initiorum amnestia Christianismi disciplinam obruit, fidæque eius mirificam efficaciam. Quid enim? Sed consultius (ut opinor) fecerimus, si quæ exprimere nunc oratione nec opportunè, nec festiuè possumus: Timanthi illius pictoris exemplo, contegamus silentii velamento. Iure igitur & merito Hercules ille noster, Ipsæque Deo genitus, cæli & mundi decus: cælo etiam delapsus ad iuuandos mortales, vel ad seruandos potius animos immortales, ad internicionem generis sui iandiu pereuntes: idem ærurnarum mirabilium atque inauditarum confector, ad imumque exhaustor: Iolaos quoque suos & comites, ærurnos esse iussit, vestigiæque sua per pauperiem, per ignominiam, per mudi contemptionem legere eos docuit, ad beatam vitam rectè non dubie ærentia. Nam ipse in cruce æs alienum obæratæ inferis mortalitatis dissoluerat: eiûsque chirographum è loco superiore & conspicuo inenarrabili beneficio expunxerat, nulla præscriptione temporis, nulla exceptione alioqui refutabile. Neque autem qui eorum quos diximus, omniumque adeò Domini asseclarum successores se profitentur esse, hæreditatem tantum honorum bonorumque creuere, ut eorum non paucissimi persuasisse sibi præ se ferunt: quorum è numero illi sunt, qui credunt ingens pauperiem vitiû, ut inquit Horatius. neque non iisdem ipsi legibus in eorum locum vicésque suffecti sunt, quanuis iam desitas moribus & obsoletas, qui in procuratione animarum rationeque dominica strenuè & pugnaciter olim testificati, aut inculpatè & innocenter pietatem colentes, eadem in ipsa demortui sunt. Siquidem instituta euangelica, non in personas, non in tempora, non in homines tantum æquales heroicarum ætatum, ut quidam iuris eius prudentes censere nunc videntur: sed in res ipsas potius, quas de rebus nunc agitur: & vero in omnem posteritatem, perpetuòque scripta sunt, nimirum ut frugalitas antiqua & cæstoria, ut charitas vice publica flagrans, ut curæ, ut angores, ut mores sanctissimi, perpetui sint comites atque asseclæ fascium sacrosanctorum: id quod diplomata hodie quoque præfantur pôtificia, sollicitæ sanctitatis priscam formulam asseruantia. Verum id recordari

atque animaduvertere ii nō queunt, qui sibi magis quàm Christo rem gerere statuerunt. Quare quid illis tandem futurum esse censemus, quorum fides collabefacta vibrantique simillima, versuram tandem soluendam minimè ipsos cogitare demonstrat: eamque non suis tantum ipsorum, sed omnium etiam nominibus, quibus pericula creantur capitalia eorum vel exemplo vel inertia. scēnato etiam nunc atque vsura incuriæ grauissima, officiorum neglectorum reliquamenta trahi. Scilicet eò iam mortales euasisse incuriæ manifestum est, temporum nequitia, nihil vt magnopere referre nunc putetur disciplinæ Christi constitutio: dummodo vsu & fructu opimarum obuentio num potiantur primæ & secundæ classis homines, magna pars Christianismi proceres, supina futuri æui securitate somniculosaque præditi, atque eo nomine sæpenumero nobiles & celebrati. At verò eam ipsi charitatem Christo debent in primis, quæ nec arare ipsa sibi, nec serere, nec metere didicit: nec tamen vnquam cessare. Vni quippe vacat, studiis odiisque carenti, humanum lugere genus cæca cupiditate actum. Hæc est autem vna virtus secundum fidem rectam, & fixam, quæ sinum Abrahæ expendere, Orci fauces occludere mortalitati possit. Quod si scelus est Christum & veritatem in testificatione vadimonioque capitali, testimonio suo fraudare, animæ suæ parcentem, & vitæ blandimentis adductum: fidem ipsi nō præstare promissam, ambitioni, cupiditati, voluptati seruientem, animoque obsequentem, sensibus suis indulgenti & addicto, quo nomine appellabimus? Profectò diuitiæ seruorum, & affluentia exuberans in ministerio Domini, inopiæ ac penuriæ patroni & assertoris, res sunt infausti nominis atque ominis, ad eius amicitiam gratiamque conciliandam. Quid verò si nihil quicquam pensi habere non obscurissimi homines præ se ferunt, quonam pacto ad extremum cum rationibus dominicis paria facturi sint? At difficile est ipsum seruili quoque frugalitati, vt quidem est opinio eiusdem ordinis sapientissimorum, qui tabulas huiusmodi rationum conficere diligenter soliti sunt. Videlicet seruorum huiusmodi fides, vel herum ipsum sibimet tabulas non conficere censet, vel accepta certè & expensa sibi, in rationes referre iam negligentius atque conuiuentius: quod summæ est amentia: vel deploratam spem habet, quod vltimè est miseria: vel spei subsidiū sibi fingit in clemētia eiusdem heri. At is exacturū sese nomina huiusmodi ad vltimū quadrantē testatus est. Vtrū est hoc igitur vitæ agēde rationes instituere, & eas temperare ad prædicta præscriptaque dominica? an alogistiam

potius quam vocant, in re perdita & profligata, aut in ratione impedita conturbatâque meditari? Atqui id seruorum est nequam & pistrino destinatorum, ergastulôque tetro, perpetuo & miserrimo: aut fugam circumspectantium, & tanquam vasa colligentium. At verò fugitiuus nullus esse potest omnia pro imperio obtinentis domini, vniuersa oculis perlustrantis, supera, infera, in mediôque posita, exposita iuxtâ atque condita. Ita nihil reliquum est ad spem expectationémque certam dominici imperii contemptoribus, nisi vt ad Erebi asylum se proripiant, pœnarum domicilium, dirum, horrendum & sempiternum. Proh diui immortales, præcipientes vitæ abruptâsque rationes. Christi prouincia fuit regnum euertere cupiditatis, astringere charitatis & beneuolentiæ: ii autem qui se christos Christi esse gloriantur (de multis loquor, non de omnibus) ii etiam qui inter magistros censentur eius pecuariæ, eoque nomine honori (vt par est) & venerationi habentur, capitalis auaritiæ exempla prodere non verentur sæpissime in medio eius atrio, sed quasi in theatro. Quanquam quid mirum (aiebat quidam satyriscus è proscenio) si ii qui in ouile Domini per posticum ingressi, vel pseudothyrum potius, à Domino olim obstruatum, & multis atatibus nulli peruium: sic fucum aliquando sponsæ Christi ac dilectæ fecerunt, vt Iupiter ille Terentianus, per impluuium aureo imbri delapsus, Danaë fucum fecit? Vtinam tanti esset in regnum cœlorum introire, in eoque inambulare, versari, & permanere, sensus communis iudicio: quanti esse videmus clauium eius arbitrium ac censuram, æstimatione istius ordinis prudentiæ, Christi fascibus Augusti, meritôque eius ipsius amplissimi. Age iam, quò pertinere tandem, quid significare, quid polliceri, quid minari apologos illos sacros putamus euangeli Seruatoris, quos audire cùm recitantur, inter rem diuinam faciendum videmur magna cum attentione, quibûsque auscultare aure admodum religiosa? num acroamata esse illa, num rhapsodias censemus, retinendæ multitudinis causa & oblectandæ, inter sacra dicatas atque ceremonias? Vtinam tam tenaces animi nostri essent monitorum sapientiæ, diuinarûmque prædictionum memores, quàm rerum multarum nihil ad summam felicitatis humanæ pertinentium, ne dicam incommodissimarum, capaces sunt atque comprehensores. Sed nos velut vasa figuli, vel rimis perfluentia, vel luti vitio acceptum liquorem sensim remittentia, vel à clibano adhuc cruda extracta: rerum diuinarum intelligentiam conceptam, atque opinionem, si non protinus, at alias res agitando, paulatim

evanescere finimus, ex animisque nostris exolescere. ex quo fit, vt
 cum ad res minus secundas, ad iniurias vel hominum vel fortunæ
 perpetiendas, ad dolores ventum est : cum ad iram, auaritiam, am-
 bitionemve compescendam : cum ad gestientem voluptatem, arcē-
 dam & comprimendam : tum denique, tum (inquam) vt friuola,
 tum vt futilia vasa reperiamur. quippe sonat vitium percussa : ma-
 lignè respondet, viridi non cocta fidelia limo. At nos probè me-
 ditati & accincti ad certamen nobis esse videbamus in prima sta-
 tim commentatione, quasque in vmbratili quadam prolusione.
 Causa est autem (vt opinor) quòd nos vt degener proles Abrahæ,
 & fide cassa, animæ multum, corporis plurimum, animi & spiritus
 parum, per (inquam) parum aut nihil animi & spiritus habemus ac
 retinemus. Tum demum verò anima animus esse cœperit & spiri-
 tus, cum philotheoriæ studio informata fuerit, prona & aspirante
 Dei benignitate. Est enim philosophia eorum recoctrix hominum,
 qui post Christianismum susceptum, iterum relapsi sunt in Helle-
 nismum : qui veluti colubri sunt exutam senectutem denuò resu-
 mentes : quod plerique facimus. Capitaliores tamen sunt, qui sa-
 pientiæ monita, dictatæque veritatis deuorantes in præsentia, vt iu-
 cunda & suauia : dein non regustantes ea, nec saluam illam reuo-
 cantes sale diuino conditam, nihilo meliores inde fiunt : tanquam
 stupente palato cupiditatis aut voluptatis ad epulas mystagogicas,
 quamlibet ambrosiam vehementer respicientes. Alii conclamati fa-
 stidii auditores, aut aliàs obauditores : auribus etiam fortasse redun-
 dantibus Sirenum incantamentis, appulsam sapientiæ cœlestis audi-
 tionem continuò respuunt. Quæ etiam si ab illis quoquo pacto at-
 que ægrè intrò admissa fuerit, tamen ad stomachum callosum, mor-
 ticinisque assuetum, non magnopere facit suauitas illa doctrinæ cœ-
 lestis & immortalis, sermonisque Dei sapor, viui & animantis. Eo-
 rum verò deterrimi illi sunt, qui velut atrophia laborantes, alimen-
 tum animæ non sentiunt in tabe pertinaci. Hos nimirum ipsos,
 ipsa si cupierit salus, seruare non poterit, vt quodam loco inquit Co-
 micus. Atque huius quidem formæ plurimi sunt, auriti illi quidem,
 atque acres noxiarum Sirenum cantibus exaudiendis, urbanisque
 salibus summopere dociles : cæterum auditu mulctari ad veritatis
 perceptionem, mystica & miranda, falsa, salutariæque docentem.
 Hæc natio τὰ εἰδωλὰ καὶ τὰ ἐπώα, cum Lucretio argumenta esse putant
 scenica & theatrica. Ad huiuscemodi auditores sapientia Dei, cum
 populo, cum primoribus, cum plebe, cum ordinibus agens : nega-

bat tamen sese orationem habere cū palām proloqueretur. At prudentia vulgiuaga, homines quosdam Gratiarum lacte nutritos, earūque numine afflatos in nugis perdiscendis, lautos & elegantes esse, & æmulandos ducit, tanquam ad vitam agendam commodē & feliciter fictos. Nobis igitur qui Hellenismi sensibus perimbutum cor habemus, munienda via est verbo Dei, secādāque semita aduentanti sapientiæ: id quod Ioannes ille soliuagus in solitudine clamitando monebat esse faciendum, vt Origenes inquit. In corpore autem humano partes duæ capacissimæ, quasque officinæ animæ, cōuerrendæ sunt diligenter: summæque cum attentione præparandæ, ad verbi ipsius aduentum inuitandum apud nos, atque excipiendum: altera voluntatum & cogitationum, in corde: altera sensorum atque animi cōceptuum, in cerebro: nihil vt statuamus ipsi ac velimus, nihil vt in mente versemus, quod non sit consentaneum disciplinæ verbi Dei & Christi, atque orthodoxiæ. est enim cor humanum veluti fons quidam perennis, vnde sermo interior & exterior, quasi ductus aquæ fertur, vt inquit Basilius. éstque sermo noster, quasi partus quidam mentis nostræ, imaginóque ipsius: vt verbū diuinū, imago est patris expressissima. Sermo etiam humanus, mentis vim & facultatem secum fert, aut similitudine eas refert, cū tamen in mente vt Christus in patre, nihilo minus maneat. Sed naturæ candorem atque simplicitatem in plurimis mortalium adulterant mēdosa oratio, vultusque ei subseruiens, vani mētis indices, & charitatis euangelicæ internicio. Auscultandum verò nobis in primis esse sapientiæ, nobilis ille auctor sapientiæ studii admonuit, qui sapientis cognomentum ob excellentiam inuēnit. Is enim quasi pædagogus quidam communis prudentiæ, si docilem ipsa se præberet, cū sæculis ipse multis natus esset ante allapsus in mundum ipsius sapientiæ, de ipsa ita inquit in prouerbiis suis, Lignum vitæ est iis qui apprehēsam omni ope retinuerint, nec eos ipsa fallit qui senixi fuerint. Eiusdem ille verò sapientiæ vel nomen tantū & vmbra odorari & admirari visus est, cū eam non nouisset, qui in satyra olim scripsit, Petite hinc iuuenēsque senēsque finem animo certum, miseris que viatica canis. Hæc est vna denique ipsa quæ suauibus suis canticis excantare facilè possit mala mundi carmina, quæ Sirenes sæpe dictæ, ad perniciem summam incantauerunt incautius in mari euagantium. Cæterū aurium discutere prius torporem necesse est, quæ ad spiritalia acroamata obsurduerunt atque salutaria: & encētum oportet humanæ prudentiæ sensum, si ibidem pollere numen

cupimus diuinæ sapiētiae. siquidem luculento dissidio illarum naturæ discrepant, velut ortus & natales earundem. Hellenismi autem sapientia duxit bellum olim magis, quàm gessit cum viciis & erroribus vitæ, vel indixit tantum potius gladius autem sapientiae diuinæ bellum ipsum decreuit & confecit, quacunque impressionem fecit. Proinde oportet discipulum sapientiae auribus circuncisis esse (quod antea dictum est) si ex eius magistrae doctrina, animi sui spiritusque conditionem facturus est meliorem atque beatiorum. Cultor enim iuuenum purgatas inserit aures fruge Cleantea, inquit idem Persius, de philosopho prisco loquens. quanto magis igitur euangelus ipse profanas aures atque erraticas, mysticis insiturus est auribus, à spiritusque oriundis, si operam ei demus bonam atque strenuam, fidei quoque bonae comitem? Quapropter non iam in iugis Parnassi nobis cum musis res habenda: non in Porticu, non in Academia, non in ambulatione arguta, de vita beata disputandum est: sed in schola euangelii, in olympo theoriae, & velut in qua paradiso theosophicae contemplationis philosophandum, siue philomorari potius id appellare placet communis sensus interpretatione: sic enim scriptura significasse dixisseque videtur. Hoc autem genus philosophiae, mundi que iudicio philomoriae, in sanctario sapientiae commentari, sanctiorumque animorum in officina debet, in animus magis quàm anima excolitur: vbi facies subactae mentis nouatur, ad meliorem frugem salubrioremque accipiendam atque reddendam. Admonitos autem lectores velim, id quod alibi non semel admonui, ad eos me nunc verba facere, qui vasa Aegyptiorum aurea & argentea rogauerunt vtenda, quae nunquam restituerent. ideoque idonei sunt qui mysticae sapientiae ac transmarinae iam discipuli fiant: quales fortasse sunt, qui in Socratico sinu (vt idem inquit Persius) elementa philosophiae edocti sunt, quorum studia non paruis tantum (vt dicitur apud Graecos) sed magnis etiam mysteriis matura sunt aut adulta. ad quos gentilis ille supradictus sapientiae, idem philosophiae caelipete mystagogus, ita inquit, Vir qui errauerit in via doctrinae, in coetu gigantum demorabitur. vel vt apud Graecos legitur, Vir qui aberrauerit à via iustitiae, in conuentu gigantum requiescet. Gigantum populus homines sunt rerigenae, inficiatores prouidentiae, atque immortalitatis animae, & contemptores diuinitatis. Quam ob causam à poetis quondam dicti sunt Deos è caelo deiicere voluisse. Homines vasto corpore, immani ventre, nullo penè pectore: quorum pedes in draconum

volumina desinere proditum est: quod significat nihil illos supernum & cæleste, nihil cogitare diuinum: perpetuum verò eorum vitæ processum humi repere, ad inferosque vergere, vt scripsit Macrobius. Omnino terræ filii, nulla cælū necessitudine, nulla contingentes superos affinitate, nullum cum Deo commercium habentes. materiariæ (vt ita dicam) & carnariæ animæ, cum terræque prorsus concretæ. quales sunt plærumque homines adipe rerum secundarum obesi, ingenii interdum multum, mentis & spiritus non perinde habentes. Quorum genus aut generis indolem, penitus & radicitus post apertum cælum & Dei cōuersationem inter mortales, non periisse, mirum est. Tales etiam sunt illi, quos diuus ille Paulus, diuersorium numinis paracleti cælestium rerum indicis, progeniem appellat apithiæ, homines corneis præcordiorum fibris, nullam in Deo fiduciam habentes: nec ab eo metuendum esse quicquam censentes, non magis quàm ab Erebo, diri illius erroris & detestandi, atque ignorationis Dei vesanæ, parente & auctore. Nobis autem adhuc in doctrina verbi Dei pueris, qui discendi rudimenta in cunabulis posuimus profanæ philosophiæ, quibus in ipsis tamen et si terrestribus, animus tamen alitur & vegetatur, ad beatæ vitæ cupiditatem atque æternæ, aliud consilium capiendum esse censeo. Nam sapientiæ Græcorum magisterium, regendi principatus animi prouinciam obtinere imperio consulari & censorio potest: non item dictatorio, quod maiorum est auspiciorum, numinèque præditorum paracletico. Quocirca strenuissimo cuique philotheoriæ studioso, quæ beatitudinem illam pollicetur æternam, hoc omni animi contentione faciendum est, in orthodoxiæ vt portum recta via, à maiorum (vt dicitur) gentium Philotheoris inita atque munita, sese conferat, omnibus cum suis animæ facultatibus. vt qui meminisse debeat, lustrico se natali, atque initiali die, & verò in lucis veræ vitæque tyrocinio, ex Ægypto migrasse, tuncque Christigenā & cælitum affinem, è terrigena factum. Huius philosophiæ summa, quanquam copiosam, variam, amœnam commentationem habet, atque admirabilem: quanuis omnium studiorum atque scientiarum claritatem suo splendore dubio procul obscuret: tamen in crucis contemplatione, in Christi que in eam sublatis theurgia atque œconomia, cum animaduertenda, tum animo comprehendenda complectendâque vertitur, qui cardo est Christianismi, quod firmamentū religionis, quod columē pietatis, quod decus polytheiæ falsæ, fugatæ, prostratæ, è mundoque explosæ. denique quod im-

mortalitatis pignus est, quæ fiducia, quæ fides, humani generis transcriptionis in numeros cælitum, primanos, secundanos, & tertianos. Ab eoque velut fonte ac capite salutaris sapientiæ, omnis ratio philosophandi in theoria manat, indeque à nobis arcessanda est. eò etiã semper reuoluenda speculatio, siquando, aut si tantulũ aqua theosophiæ, eiúsque theorematum hæserit in obice quopiam obiacete, ut est mentis humanæ instabilitas. Hæc illa est, illa (inquam) est victima, quam in crucem sublatam ab hominibus ingratis atque impiis, diuinitatis vnitas, ternario distincta personarum, piacularem hostiam esse ac salutarem mundo voluit. si quidem hanc pro palladio in primordiis rerum amisso, pro numine læso, effigiem statuere, nefas quæ triste piaret: nefas (inquam) contempti interdicti diuini ut expiaret, commissæque mulctæ eternæ & calamitosissimæ dispendium sarciret. Hoc illud est arcanum, quod ab æterno soli naturæ diuinæ notum fuit: cæteris omnibus absconditum à mundi tyrocinio, superis iuxta atque inferis, quod Paulus idem ad Colossenses scripsit. solisque sanctis Dei locuples œconomia eiúsdẽ mysterii, in Christo semper abdita, innotuit quondã inter gentes & nationes, iis-que demũ quas Deus aperire quod conditũ erat, voluit. Hic ego centenas ausim deposcere mentes, ad commentationẽ vnus huius loci, cum mihi animo obuersatur tantæ rei imago: cum mihi in mentem venit, non dico mundi quædam insignis aut temporum inclinatio ad res nouas edendas, sed rerum humanarum summæ, stupenda & inaudita inenarrabilisque conuersio, quæ ad tristis illius mulctæ capitalisque antiquationem incubuit, humanique generis selectorum inter diuos & superos adlectionem. cum æterna prouidentia in gratiam natura cum humana redeunte, noxa & offensio in gratiam verterunt atque benignitatem. cum pater ille cælestis, filium suum minorem, asotum & erronem, familia quondam abdicatum, longo pòst interuallo, rursus in familiam fremente maiore filio inuidentèque asciuit: ex patruoque pater, ex Demea Mitio factus, gratuita indulgentia supplicem festiuâque excepit. cum mundi liberator, & sociam ciuitatem, & stipendiarias omneis prouincias, eodem iure immunitatis esse voluit: nouarumque tabularum legem in vniuersum tulit aduersus Orci nexus atque calendaria. denique cum Deus homo natus, homines commercio cæli vicissim, diuinitatisque communione donauit. Quo ipso in miraculo, illud alterum extitit miraculum, quòd tãta, tam admirabilis, naturæque nouatrix, orbis rerum cõuersio, surda & cæca fuit, paucissimisque mortalium

vel visa vel exaudita, utpote mundo res alias aliásque agente. Peperit enim in loco obscuro salutem homini providentia, pusillísque in cunabulis eduxit: quam in vtero aternitatis à principio parturierat. tum noctis cōticinio & in brumæ tenebris, natus est Diphyes ille Cecrops, solque è cælo & terra diuina manu coagmentatus: qui breui orbem terrarum nominis sui claritate impleuit, numinísque maiestate. O rem mentium excelsarum capacissimam, & retinentissimam. Hic cū vestigia quidem sui impressissima per totum orbem terrarum, monumentaque reliquerit illustrissima: hominum tamen inertia capitali, stuporéque damnosissimo, eadem ipsa fugere vestigia exolescereque cœperunt, & simul monumentorum auctoritas quanlibet consecrata, sensim obsolescere. & cū cæli quidem motus ad mortis eius miraculum obtorpuerit, sol splendoris defectu laborauerit: durum tamen animantium genus homines, faxeúmque, hoc non quiuerunt persentiscere. Videlicet hæc illa est labes naturæ deprauata. animique humani, nisi assiduè exerceantur harū rerum meditationibus: noxam citò contrahunt obliuionis atque torporis. Hæc (inquam) est solertia scelerata Autolyçi tartarei, animarum sublectoris: quem mirè Homerus *ἐγὼνὺν ἡγοφῶντιν* vocauit, quasi furiam æriuagam, & grassatorem tenebricosum, mortaliū semper capitibus incubantem, ut eis incommoditet. cuius subautolycus est (ut ita loquar) is qui à Christo mundus dictus est. Protheus quidam inauspicatus iis qui in regno Dei vitam agunt, omnia transformans sese in miracula rerum, circulatoriæque vanitate hominum mentes auertens à rerum supradictarum animaduersione. Hic igitur velut scopus, salutis indagatrici philosophiæ propositus sit: eò omnis animus contentus ad commentandum, incumbat: ab eo digitū transuersum ne aberret mens philosophi. Hęc enim est ara misericordiæ dicata, ad quam perfugium certissimum supplicibus patet rerum capitalium reis. Hoc altare edito loco, & vndique aspectabili visendóque erectum: in quo pater optimus, maximus, Isaacum suum dilectissimum, primigenium eundem & vnigenium, sacrificatum voluit. Cui filio numeris omnibus paterni splendoris, diuinæque maiestatis prædito, patrimonium amplissimum dominatus gentium ac nationum omnium, pater, omniumque omnino rerum dispensationem superarum & inferarum, dederat: eaque cum libera, cum sibi æquali potestate, cum pari & eodem secum imperio dederat. Hoc (inquam) ipso in altari, Deus filium suum Christum, mactandum sacerdotibus dedit, ad

cædem eum exposcentibus: fauitiæque & liuori paucorum victimâ tradidit succidaneam atque piacularem pro innumera mortalium multitudine, ex Erebi nexu, è vinculisque eximenda reatus primordialis, & porrò inter diuos superosque adoptanda. tanta (inquâ) pro multitudine dilectissimum filium dedit, in quo filio intuendo & æstimando patria maiestas suauiter acquiescebat, atque pro eiuscæmodi multitudine, quæ stellas cæli numero æquare posset, earumque decori minimè splendorique cederet. Ante id tempus autem, mundus ab ornatu vtræque lingua dictus, nihil tam fuisse videri potest, quàm carcer tyrannorum principis, in quo carcere non tam homines quàm Orci custodiæ, à caluo (vt dicitur) ad caluum inter reos relatæ, erroribus variis sceleribusque victæ asseruabâtur: affectibus etiam nefariis, bellis & discordiis exagitata interim, & vapulantes. indeque ad vltimum vitæ spiritum educatæ, per sceleratum vicum, nefastamque portam & Charoniam, τὴν ἐπὶ Σόλωντος, vt Græci dicunt, abducebantur in perpetuum. à qua forte sæcula nostra exempta, nec grata memoria id beneficium prosequentia, quæ tandè animaduersio Dei, quæ conditio maneat, ominari vereor. Proinde iure optimo atque meritissimo à nobis Deus poscit, non iam vt cruentis sacrificiis filio suo litemus: etsi patri æquali, pari, æquè pollenti: tamè in crucem acto sua sponte salutis hominū ergò. Non vt paria serui, quatenus fieri potest, cum domino facere aggrediamur: non vices vt beneuolentiæ aut pares aut similes (quod fieri nō potest) ipsi exhibeamus exigit. id quod tamè heroica manus quondam, & numerosissima militum purpuratorū, quoad eius fieri potuit, fecit: volonumque lectissimorum, in aciem illa quidem strenuè & fortiter, sed auspiciis Seruatoris instructa, aduersus mundi principem, & contra eius copias immanes & efferatissimas. Cæterum voluntatem vt nostram eidem hero nostro atque domino, liberum vt arbitrium, quale illud quantumque habemus cunque, vel quantulum si mauis, eidem vt mactemus: id verò ille poscit, cum iubere, cum imperare, cum cogere iure suo, eodémque optimo, ipse si velit possit. Simul vetustum vt hunc hominem nostrum, victum, vternosum, sordentem, illotum, & squalentem, in familia denique & comitatu cælestis domini obsoletum: ad aram iugulemus eandem, in qua ipse Dominus pro nobis occubuit: in cuius humerum pater æternus, superiorum inferiorumque & vniuersi imperium summum principatūque cū cruce imposuit. Hoc autem vnū ad verum naturam æstimantibus, nostri est vtcunque mancipii, cum reliqua

sint omnia tantum in peculio. Verum, hoc modo cum sciamus Deum nobiscum agere, Deum (inquam) immortalem cum mortalibus, patrem cum liberis, dominum cum servis, quorum vitæ & necis liberam habet, omniumque dierum atque horarum potestatem: ac ne id quidem modò, sed opificem ipsum cum operibus norimus, & Prometheum cum figmentis suis, cum friuolis, cum vasculis agere luteis: quæ confringere, quæ conterere, quæ in ignem abiicere temporis momento potest, simulac sibi met ipsis videt illa, dominoque ipsi esse inutilia: Hæc igitur & alia eiusdem modi, cum comperta sint omnibus & inculcata, cum aliàs, tum verò ipsius Dei notione, nulli non natura anticipata: nos tamen tam profligata ac deplorata ratione vivimus ad beatam vitam quærendam & consequendam, ad aram ut clementiæ ipsius & misericordiæ, ne hoc quidem quasi thusculo saltem, liberalius sacrificare sustineamus, ipsi acceptissimo. Nam quid aliud est obsecro, corpoream voluptatem, quærendi & fruendi honorum bonorumque cupiditatem, vlciscendi libidinem improbam, denique Cerberi trifaucis tumidam ingluviem, enecare & angulare ad pedes in crucem acti Iesu Christi: quàm thusculo litare Servatori hominum, exiguo quidem illo, sed odoratissimo, nidorisque ad cælum pertinentis? Quòd si cupiditates vitiorum omnium errorumque parentes, exanimare penitus, elideréque earum reliquias nequimus, è terreno corpore, è solo (ut sic dicam) tribuloso, naturæ sponte scatentes: gladio tamen verbi Dei sanctiore de philosophia rogato & accepto, ita fauciare eas possumus & concidere, ut exuccæ iam & languidæ deinde esse videantur. Hæc atque alia animorum venena, cum prudentia civilis parum animadvertere solita sit, aut animadversa sus déque (ut olim loquebantur) habere: nec verò cauenda & auersanda ducere: philosophiæ est utique germanæ veracis & cœlipetæ, id videre. quippe mortis & crucis commentatrix est ipsa, tamque immortalitatis cupida, quàm prudentia illa communis, rerum est intereuntium nugarumque avida & studiosa: quo nomine eam philomoriam appellare verissimè possumus, ut è diametro oppositam philosophiæ. Ad eam igitur cogitationem sese accingat oportet Christigenarum philosophia, quàm fieri potest maximè: quando quidem ab aliis ipsa curis feriata est, nihil ad rem qua de re in primis agendum est pertinentibus. Quodnam autem alioqui dignum erit opere pretium disciplinæ orbicularis, quàm encyclopædiam Græci vocant, per tot annos ætatis decursæ florentissimæ: si senectuti fortasse amœnum præbitura est, animi tantum

causa, non etiam animæ diuersorium? nec veteres eâdem opera (vt inquit ille) auias mihi de pulmone reuellet? Atqui nulli erit vsui memorabili, nisi gradum nobis factura est ad studia altiora, sanctiora atque salubriora. Nisi verò nō à ligno scientiæ, noxiæ causa primordialis manauit: cui lignum illud vitæ idémque sapientiæ, remedium attulit expiabile. Neque verò satis est hominis studiosi & eruditi subactum esse ingeniū (vt Ciceronis verbo loquar) & iteratum, parum est etiam excultum & nitidum esse aruum animi. Nam nisi eam culturam sementis opportuna probaque exceperit, nulla inde fruges existet, quæ quidem culturæ responsura sit. vnde igitur & quò tanti laboris messis? Semen verò sapientia prolixè suppeditabit homini, in eâ pietatis fideique philosophanti. & ipse sibi porrò philosophus è granariis duobus scripturæ admetietur, quæ vnicuique pulsanti, ac modulis suis poscenti, aperiri paulatim solent: idque pro soli bonitate & culturæ industria, restibili fœcunditate prouenit, ampliùsque centuplicatò reddit. Eadem etiam philosophia index thesaurorum sapientiæ, puteos animantis aquæ, à priscis puteariis ipsius sapientiæ demonstrabit effossos, de quibus rigabit agri cultor huiusmodi, ea quæ videbuntur neglecta exaruisse. Pretiū autem erit opere, cum inter hauriendū nectareâ aquam, laborémque studii theoricæ exhauriendum, bibere ex ea licuerit nullo sensu laboris, & cum ingenti desiderio, inexplibili quidem illo fortasse, cæterum huiusmodi, haustus vt quisque, quātus vnicuique plenissimus esse potest, ad stomachū hominis pro portione faciat. Summa verò est comitas illa sapientiæ, incredibilisque benignitas, quòd omnibus bona fide ab ipsa poscentibus, atque eam per ipsam fidem obsecrantibus, ducere largè & assiduè licet. & porrò priuatim non cisternam modò sibi lacumque compluiū, sed puteū viuum fodere: ex eoque inter commentandum magna cum suauitate iugem aquam auferre, pro moduli cuiusque capacitare. nihil etiam singulos vetat, eorum quidem certè quibus cum nunc ipse verba facio, & aquilegem sibi met ipsi, & putearium esse, ad nutritionem mentis & interioris hominis. At hoc quid voueat dulci nutricula maius alumno? Quid homini (inquam) studiosissimo literarum antiquarum, atque vendibilium, magis est exoptandum, quàm in huiusmodi philosophiæ contubernio, emeritæ saltem senectutis annos aliquot exigere, nec inerteis nec effœtos? Mihi certè philologia, quam iam annos fermè quadraginta amare primùm institi, curriculumque ipsum honestarum disciplinarum quoquo modo decursum, cos quædam

esse videtur aptanda gladio verbi Domini, ad aciem ingenii exacuendam, ad significationes percipiendas mysticæ theologiæ, troporumque eius symbolicorum. Quare nobis videndum est ut censeo maximopere, ne ad Lotophagorum littora adhaerescantibus ad horam undecimam, sæpius frustra animi iam sibi moræ conscii immodicæ, ingemiscendo dicant, Quid stetimus hîc tandiu ociosi? Quin à persuasibilibus disciplinis tandem, ad certam illam doctrinam, ac suapte fide nixam migramus philosophiam? *ἄλλης ἀρετῆς* ætati iam vergenti. ex illa encyclopædiæ sylva nihil præter glandem legitur. ad Cereale studium transeundum, quo ager Domini confitus est. Verum (ut alibi diximus) huius philosophiæ caput est, cum Paulo sæpe dicto, principe eiusdem & antistite, in primis hoc profiteri, nos scire Iesum Christum, & scire in crucem actum: idque salutis mortalium gratia, atque immortalitatis. ad quem veluti scopulum, hominum æternæ vitæ rationem prædicationemque respuentium, arietina quidem Iudæorum pertinacia, hætenus in vniuersum offensa est inexpiabiliter. Gentilis verò philosophia, eadem aut simili offensione in pseudosophiam tandem est versa, quæ reuera semper oxymoria fuerat. Hanc porrò effigiem circumferre semper eum & quocunque oportet, qui rectè & commodè philosophari cupit, in sinu cordis conditam: non leuiter ipsam (qualem vulgus hominum solet) deliniatam, sed scalptam, sed incisam, sed indelebili memoria intus penitusque inustam. Nec verò eam modò in secessu & in solitudine: sed vel mediam per Ægyptum, per Babylonem perferre, palàmque & prædicabiliter, siquando negocium sit nobis cum Ægyptiis atque Babyloniiis. Licet enim & Babylone Hebræum esse, ut inquit Ambrosius in libro de anima. Hæc est autem virga, qua in Ægypto Moses quondam memoranda edidit, claræque facinora theurgiæ. quæ in terram proiecta, in serpentemque versa symbolum sapientiæ, cunctos Ægypti serpentes sapientesque deuorauit, cum sua sapientia humi semper reptante. Quo intelligi potest maximè, quantum sit numinis, cuiusmodique, in hac philosophia. Digna igitur est ærumna circumferendæ crucis, homine philosopho, quàmque orthodoxiæ discipulus humeris suis iniunctam cupiat, & gaudeat: quando Herculem indecorum est sine claua conspici. In hac etiam ipsa sita est, & verò clavis fixa trabalibus (ut dicitur) atque adamantinis, auctoritas fidésque Christianismi. In hac confixa est scelestissima principis mundi arrogantia, qui generis humani à Deo ac veritate auersi, imperium sibi vendicauerat,

diro ac detestando errore mortalium. Quapropter, qui ad philosophiam istam resipiscentiæ magistræ sese applicare statuerunt, quod omnibus necesse est cælipetarum viam capeissentibus: ad staurophoriam ii pariter semetipsos oportet vt comparent: quæ pars philosophiæ, ab eodẽ illo ipso auctore rerum cælestium sæpe dicto, instituta est & demonstrata. Nam cùm omnes Christi actiones sint admodum admirabiles, cùm omnia eius opera diuinitatem suspi-ciendam præferant, ea tamen quæ per crucem acta sunt atque ad-ministrata, omnium sunt admirabilissima, vt inquit Damascenus. In hac maiestas Christianismi, eiúsque placitorum vertitur. in hac summa theurgiæ atque œconomix Christi, quasi in capite, in car-dine, in firmamento rectæ philosophiæ, vt posita, sic quærenda est. Hoc denique velut cornucopiæ habeto philotheorus, salutis inda-gator, cælestis viæ confectator, in vita peregrinus: hoc (inquam) Amalthææ cornu locuples in sinu interiore teneto, ex quo viaticum animi contemplatoris largè & copiose promptitet. Hoc eodem in palo, cippoque adeò illustrissimo, medio mundi loco, ob idque vi-sendo & monstrabili erecto, chirographum illud vetus, graue, fœ-neratitium, longissimique temporis interuallis indies ingrauescens, nedum indelebile, cum feruatore ipso confixum est: vt inductum ab eo & circumscriptum, ad nummumque vltimum dissolutum, at-que eo amplius. Cuius chirographi nexu mortalitas vniuersim si-gillatimque, Stygio fœneratori auctorata fuit tandiu, atque in eius ergastulis durissima conditione dirissimæque vincta, nullo sensu (quod mirum est, an miserum potius?) calamitatis suæ: in caligi-ne densissimamersa ignorationis Dei, & summi boni, ac veritatis. Id tale tantumque beneficium, humana oratione nequaquam enar-rabile, cruci Christoque acceptum referri debet vni, recordatione perenni, assidua, & accurata. quippe qui pro nobis tantum æris a-lieni dependerit, à maioribus nostris contracti iam inde à primis vitæ incunabulis. Quorum omnis posteritas iure quodam succes-sorio & erratico, deinceps ad eum diem, malorum tantum (vt cla-rum est) possessionem, non etiam bonorum agnouerat. Cruci igitur affixus, constituto debiti grandis atque piacularis, in præteritum, in instans, in futurumque factò, & sortem ipse & vsuras pro vni-uerfitate dependit: sicque ergastula iam vetusta emisit, iussa esse li-bera: quæ quidem certè salutaris stigmatē, notæque prouidentix, in-usta reperta sunt. Postremò hoc teneamus vt enunciatum quoddā ratum orthodoxiæ, qui inter euocatos Christi cēseri, qui in numeros

illos æternos referri, qui delectarum copiarum, quæ supernis exercitiis in supplementum aggregandæ sunt, numerum augere concupierint: id quod nemini non precamur, ut expetendum in primis, cui optimè consultum ipsi volumus, nobismet etiam ipsis ominari gaudemus. Quibus hæc (inquam) in mentem instinctu Dei venerint, iis omnibus illud gestamen Christianismi, & velut labantis animi scipionem, aut fidei concussæ & languentis adminiculū, suscipiendum esse, ad finemque vitæ constanter perferendum. Siquidem absque eo adiumento surgere iacentes animi, & stare recti nequeunt. Quis autem Christianorum hominum vel immortalitatis inconsiderantissimus in vita, non in morte crucē ipsam cum Christo significato, eius numine & ornamento, adorandam esse censet & amplectendam, ut baculum quoddam alexicacum? Quis funeri suo crucifixum præferri non precatur? Quis inter vltima mandata hæredibus non imperat? nisi fortè simulacrorum inimici, stauromastiges quoque esse sustinent. omnes enim sanæ mētis meritò tanquam tesseram cælestis hospitii, crucem Christi aut eius omen, secum auferre hinc emigrantes cupiunt. Hoc denique sublato gestamine, signum dat nobis è littoris specula in mari euagentibus, theórica philosophia. Quocirca cum crucem Domini supplicum velamen esse nouerimus, & misericordiæ pignus: & in misericordia vnā quidem, cæterum certam nobis spem salutis compertamque esse positam: quid causæ est, quin planè futilis atque nugatoria sit prudentia ciuilis, tametsi honori habita inter eos, ut commoda, qui boni grauesque viri existimantur? Quidni enim bellam istam sapientiam hominum, nugas esse censeamus, si quidem Christigenam sese ingēti contentione asserit, & cælipetam: nec tamē Christum quærit sequiturque Seruatorem? Nisi verò Iesum Christum quærere est, Christū iam triumphantem quærere, Christum prouinciā iam confecta, comitatu laureato insignem, in cælumque ouantem immortali cum exercitu innumerabilique ingredientem, cupere. à nobis enim huiusmodi Christus sperandus est ille quidem, & exorandus: sed ita demum si Christum ipsum quæsierimus in cruce fixum atque cupierimus, cum quo nos cruci nunc affixos esse omnino necesse est, & staurophoros eius, quasque calones esse, si cū ipso quidem certè nos à morte ac per ipsum excitatos volumus & cupimus. Multos porro christos fuisse nos legimus, & Iesus etiā plures: sed vnū tantum cruci affixū, qui Seruator, qui liberator, qui assertor & vindex est hominum. Age, si buccinæ veritatis, spiritu cælestis sapientiæ

plenæ, hæc quondam cecinerunt, quos prophetas sacrosancta scripta vocant: si sermo Dei salutis promulgator, hoc palàm contestatus est: si Paulus accensus (vt ita dicam) cælestis dictaturæ, id verbis conceptis posteritati prodidit, in crucifixoque summam expectationis suæ posuit: si vades ipsius cruci affixi: si tot testes nō fortuiti, non rogati, sed diuinitus oblati, hoc fortunis & pignoribus suis, hoc capite cauerunt: cur omen staurophoriæ vsque adeò reiicimus & auersamur, vt inimicis id nostris capitalibus, vt hostibus imprecemur: à nobis autem, à charis pignoribus, ab amicis id nostris abominando amoliamur? Ecquis est autem mortalium sanæ mentis, qui cū hæc apud se existens, maturè & perpensè considerarit, non extemplo ab hilaribus (vt aiunt) ad cineralia transiturus sit? Profectò si doctrinam euangelii, cum Pauli epistolis, qui veluti codicilli sunt additi testamento ipsius, animaduertere velimus: necesse erit vt fateamur, satyram hanc esse quandam sapientiæ delapsam è cælo, ac destinatam ad reprehensionem humanæ prudentiæ: acerbam quidem illam satyram primore sensu, & tanquam aduersus contumaciam nostram, monita sapientiæ obaudienter excipientem, strictam illam frameam verbi Dei vibrantem: cæterum aures hominum summissè libenterque euangelio auscultantium, mirè patefacientem symbolicæ sapientiæ. verum ad præcordia eorum ipsa demū penitus insinuat, quos Dei prouidentia spiritus sacrosancti appulsu pignerata est. Nunc autem vt mores ad stultitiam, ad vanitatem, ad nugas, ad incuriam denique, contemptionemque æternitatis, vergere iam cœperunt: sic breue curriculum vitæ nos peragimus (quibus quidem cōsenescere contigit, quæ minima pars est hominum) quasi inter aleam quandam ancipitem finiū constituti, bonorum & malorum: ob idque nō magnopere de exitu casūve laborantes. Etenim tanta in securitate futuræ vitæ merfi sumus, tātāque incuria præditi an perditī? vt multi his de rebus sermocinantes, sortiri quid dicant ac censeant (vt est in prouerbio) videantur potius, quàm ratione pendere & æstimare. Cæcum vitæ propositum (superi immortales) diramque amentiam. Scilicet improba Siren illa desidia, secordiāque somniculosa, nos oppressit in tumultu, in naufragio, in incendio gliscente, in tanto discrimine. Tum spes & opinio longiusculæ vitæ, diem ex die ducit, & resipiscenciam plærique differimus in id tempus, quod resipiscendi spatium non admittit. Fati enim supremi aduentus inopinatus, mentem apud sese esse non finit, sibi que consulere attentius, vt pote tumultuariam manum Atropi, candemque inde-

precabilem iniiciens. Nam iuuentus aut firma valetudo, cum semel vnicuique mortalium, caniciem feram & longos promiserit annos: cunctationi protinus homines sese dedunt & procrastinationi. quã deinde incuria sequitur & obliuio vitæ ad decessionem expediendæ, rationumque subducendarum neglectio, ad impetrandum ius illud ciuitatis superne & æternæ. Ad hoc proprium munus est huius philosophiæ quam sectandam esse ducimus, non illius hallucinatoricis, quæ veluti planus gentium atatumque profanarum, verba Graciæ & Barbariæ dedit. Verum illæ duæ ad sese redeundi remora, longè, latèque in vitæ celebritate grassantur, quasi agminibus illis lucifugis cæloque extorri multitudini subseruientes, multosque vbique gentium circumscribentes, quâ iuuenes, quâ senes, quâ valentes, quâ languidos & semineces. Quo clarius intelligere possumus, non de nihilo illud esse, quod excubare nos Dominus & perui-giles esse, fermocinationibus suis admonet sententiosissimis, mortisque subitum vadimonium, & furis nocturni aduentum, prouidere nec opinatum. Qui etiam olim prouinciam suam obiens, primum illud edictum ore proprio ac propalâ pronuncian-dum censuit, Resipiscite, appropinquauit enim regnum cælorum. nimirum ipse legem incoerentis ob secus admissa conscientie, auctoritate sua sanciens: quam prænuncius eius, victimæque præcidanea antea promulgauerat. Id verò satis significat sapientiam humanam & mortalem, cum diuina & immortali plenam habere discrepantiã, ex edictoque illo suo Christum, ius vnicuique prouincialium tandè esse dicturum. Proinde cum rerum diuinarum æternarumque enthei pronunciatores, præscita sua prædictaque reliquerint vitæ, cõscripta luculenter & consignata: cum Deus ipse Christus superum iuxta inferumque potens, pœnas præmiæque ore veritatis atque sapientiæ pronunciarit: omnem nobis ansam vtrique prolatandæ resipiscentiæ, procrastinandique studii philosophiæ propriæ dictæ, præcidit. In biuio igitur vitæ peregrinantis fac duos esse cippos: alterum euangelii doctrina, alterum anteuangelii incisum vel inscriptum, qui sensus est communis magisterio mundi imbutus & institutus: inde autem vias duas à peregrinis iniri, alteram sursum versus spectantem, scan-simque ferentem peregrinos & viatores, asperam, angustam, pedestrem, ac raris diuersoriis: alteram in diuersum vergentem, pronam, planam, curulem & equestrem, tabernis multis diuersoriis distinctam, quibusdãque peramcenis, tum instrumento vitæ vario, visendo, ac copioso instructis. Da etiam huic, si placet,

agendæ vitæ facilitatem non dubiam, commoditatēque conspicuam & luculentam. illinc fac è contrario omnia incommotis scantentia, curisque argentibus. Harum (opinor) duarum vitæ formarum rara in vita exempla sunt, propterea quod ciuilis conuersatio, & alia quæcunque celebritate hominum constans, ex utroque genere temperata est illa quidem, atque permixta: cæterum maioribus minoribusque modulis, prout est id quod tulit ac statuit unicuique ratio prouidentiae. Hæc autem ab hominibus iccirco comprehendere non potest, quod arcanas causas habet effectusque qui mortalium coniecturam fugiunt. Nemeseos enim numen unicuique suum ius suamque sortem tribuens, ut nomine ipso præ se fert, non ex humani sensus formulis ius reddit distributum, sed ut Lachesi illi cælesti visum est, dispensatrici prouidentiae. At verò hæc veluti libraria quædam cælestis, unicuique pensum suum vel parcè vel prolixè: tum operosum & molestum, tum facile & iucundum appendit. Temeritas autem casuum, & fortis fortunæ iniquitas, in rerum humanarum administrationem, bonorumque & malorum adimensionem, iure quodam obscurissimo conuiuentiæ diuinæ irrumpentes atque patientiæ: rationes conturbare videntur ipsius Nemeseos, summæque cum imis permiscere perplexissimè. Inde illa fors & fortuna, in cælum quondam hominum errore sublata: quæ tamen etiam hoc tempore, & summi actus rerum & infimi, eorumque confinis gubernacula tenere vulgò existimatur. Illa verò è cornu copiarum mundi, è penique factorum non modò pro potestate, sed etiam pro numine promere mortalibus, quibusdamque profundere non aliter atque olim, cum simulachrum eius pingebatur gubernaculum manu tenens cum copia, tanquam rerum ipsa regimen haberet in potestate. Quæ causa est ut in ciuili vitæ aulicæque præcipuè rationibus, & acceptorum paginam & expensorum impleant non eius modò beneficia, sed etiam maleficia. æquè enim & bonorum & malorum dispensatrix vel dilatrix potius esse dicitur, è dolisque illis Homericis fundere summa iniquitate. Huius esse creditur beneficentia, mundi penè monarchia sub Alexandro magno (quod mirari possumus) ab ethnarchia nata. Hæc memoria nostra quosdam, terræ quidem filios, sed è Pygmæorum gente, triduo aut triennio colossicos fecit, talesque trinoctio ut concepti è Ioue esse viderentur: quod de Hercule traditum est in fabulis. Itaque cum huius intemperiae ludibriis, perpetua & inexpiabilis est rationi dimicatio: cuius auxiliares copiarum sunt spes bonorum æternorum

fides Dei promissorum, cum charitate Christi numeris omnibus absoluta, nec æmulam aliam admittente cupiditatem. Fortunæ autem auxilia sunt mundus iam sæpe dictus, caro, id est voluptas, & cupiditas. illa, in omne genus animantium imperiosissima domina: hæc, tantum in hominum. Iudice autem philosophia orthodoxiæ affini atque alumna, & cuncta & singula auspiciis reguntur providentiæ: etsi sæpe tum iniquitate mortalium, tum larium Stygiorum instinctu consilioque, negocia & facinora suscepta sunt & instituta. Neque verò in schola philosophiæ, fortuna rerum clauum tenens pingitur, aut fingitur: sed aleam potius manu mouens: quo ludo oblectari etiam ab antiquis dicta est, ut inquit Eustathius. Quapropter rerum euentis mortales rerum peritos, ultra modum permoueri, ægrescereque vehementius non conuenit: sed illis tanquam actis quibusdam cælestium Parcarum, providentiæ utique diuinæ certo quodam modo arcanoque ancillantium, quoad eius facere possumus, acquiescere. Esto verò hoc animo hominis sapientiæ discipuli, præiudicatum in præteritum, in præsens, & in posterum, quicquid tempore & cæli conuersione fiat, factumve à mundi sit molitione, atque etiam ad usque conflagrationem eius futurum, nihil utique fieri, fore, factum esse, absque eius ipsius auspiciis, qui causarum omnis generis auctor iam inde ab initio fuit, & cæli vertiginis arbiter in perpetuum. Id quod attentius paulo sapiusque æstimatum, efficiet in rebus ut aduersis secundisque perinde sentire de amore diuino erga nos indulgentiæque debeamus. Ecquid autem est aliud patientiam rebus aduersis, & fortasse destinato Dei certoque consilio, accommodare, quàm paucorum annorum, an mensium, an dierum, molestiam deuorare? Sæpe verò œconomia ipsius providentiæ, cuidam quasi numini fortunæ ascribitur, ignoratione nostra, rationisque stupore. Flexuosa enim ratione hominum coniectura sæpe vititur: atque in multas erratiunculas digrediente, quæque erratio potius, quàm ratio dici debeat. Ac tametsi humanæ mentis Mercurius, id est ratiocinatio, quæ sæpe mendosa est, providentiæ consilia atque eorum causas, interpretari & explicare nequit: æquitas tamen animi tanquam arbitra quædam honoraria, ac iuris diuini consultior, controuersiam illam providentiæ ac fortunæ, in iudicio communis sensus omni memoria, in omni que gente, apud doctos agitam: conuocato senatu sanctioris philosophiæ, dirimere semel atque in perpetuum: iudicareque secundum illam partem debet, quæ patrociniū cælestis sapientiæ meruit, & simul suffragiū beatæ multitudinis.

In iudicio enim rerum tantarum, ad summamque bonorum & malorum rectè pertinentium, simul vt Mercurius humanus hærere cœpit, ratioque torpere, ad cœlestem illum consulendum protinus Mercurium adeundum est. sermonem dico Dei, inter oracula receptum omnium quondam mortalium consensu, & piè consecratum, rerū cœlestium nobis diuinitus enarratorem datum: adhibita eodem & aduocata ratione ab eo condocesa, non etiam ab ista prudentia communi informata, quæ notiones nobis suggerit erraticas, atque à veritate deuias germanaque sapientia. Quis autem sanæ mentis homo, cunctetur ore, mente, pedibus in sententiam transire sapientiæ: atqui resipiscere, & antè actorum pœnitere, post errorem est intellectum in auctoritate esse velle sapientiæ, vt præstantioris & consultioris magistræ. Quare cùm aduentantis regni Dei prænuncius resipiscere nos iubet, nihil aliud quàm diuersam & auersam viam, ab instituta iure gentium vita, nobis ineundam esse docet: secundum quam vitam animus iure suo decedēs, quasi que vir vxori rerum suarum regimine summo cedens, & principatu sese abdicans, sensibus temerariis habenas arbitrii fœdissimè permisit. Ita qui verè resipiscere instituit, quod plerique præ se ferūt, is viam, veritatē, & vitam sequatur necesse est: quæ vita ex animatibus homines spirituales efficit. mors est enim nō vita si scripturā audimus, Hellenismi sensus, consiliū mundi, & propositum. vt non mirum sit, quòd Christus regnum suum, à mundi tyrannide diremisit, non semel testatus est. Quo vel vno argumento liquere potest, quàm irritæ sint preces nostræ, qui identidem aduentum regni Dei exposcentes, Deumque votis nequicquam fatigantes in ea ipsa verba conceptis, interim quàm longissimè possumus, ab eo regno aberramus. Profectò labat fides, & conspicuè vibrat, etsi cōuelli non potest. & quod Plato in vniuersitate, analogiam esse voluit, id est *ἀεὶ μετὰ τὴν πάντες*, in Timæo, hoc idem est Christi charitas sponsalicia, in Ecclesia. quanquam id appositius esse censeo & commodius, quod è Philone Eusebius dixit, verbum Dei, mundi & naturæ vinculū esse, atque retinaculum: illud verò idem & fidei firmamentum est in vniuersitate Ecclesiæ, vt manifestè apparet. Fidem autem intelligi volo, non inertem, non cessatricem, non manibus confertis in securitate acquiescentem, ignauaque fiducia fretam destinatricis prouidentię: sed strenuam & actuosam, fœtāque æmula probaque charitate. Verum enimvero vt dicere cœperā, vita etsi varietates multas & mirabiles habet, *Διδοὶς γὰρ τε πῶτοι καὶ ἀκείαται εἰ Διὸς οὐδαί, δῶρων δὲ Διδώσι, κακῶν, ἕτερος δὲ ἑαυρ,*

tamen plerunq; bona malis mixta: & versa vice, mala bonis tēperata sunt, duntaxat apud homines rectū iudicium habentes. Nemo certē adhuc inuentus, qui malorū expers fuerit, eodem teste poēta rerum humanarum prudentissimo, vt hisce ex versibus eius intelligimus, *ἢ καὶ μίξας Δὼν Ζεὺς Τερπικέροντος, Ἄλλοτε μὲν τε καὶ ὅ γε κῦρῃται, ἄλλοτε δ' ἐσθλῶ.* & verò abundē atque indulgenter (inquit Plinius) à fortuna cum eo deciditur, qui iure dici non infelix potest. Sed fac esse vt illa via latē patens atque frequentissima, præ se ferat omnia homini cessura animi è sententia, ad implenda vitæ desideria: num in eo tandē viarum diuortio Hercules cōstitutus, non ille quidem Iunonis inclemētia, & glorię cupidine exagitatus, sed pietate Christianismi instinctus atq; imbutus: si ipsi optio permittatur, utrā malit inire viam, Paridis statim exemplo, Minerua contēpta, voluptatem præsentē secuturus sit? an Themidis supradictæ potius oraculum aditurus, ex eiúsq; responsis consilium agendæ peregrē vitę capturus, commodiorem vt in partem, id est ad salutem procliuiorem, summam rationū vitę cōferat? Equidem sic futurum opinor: neminēmq; consultum verēque prudentem, facturum, præsentem vt bonorum copiam, vt theatricū fastum, vt viam denique cæcam & præcipitem eligat, præ via euangelica, ad cælumq; ferente, præsertim aduersus quod ipse pepigit ac sponondit die lustrico ac purifico. Quippe qui probē intelligat, illa bona bonis istis, cēlestia terrenis, vera imaginariis, æterna tēporariis, summa infimis, diuina fortuitis, continuari & coherere nō posse cōtra fidem oraculorū. Proinde si Dominus de torrente in via bibit, & nos saltem in hac via mœrentis ob culpam pœnitentiæ, super agelaston petram sedentes acquiescamus. Nam quid aliud est homo euāgelicę disciplinę retinens, nisi ille apud Terentium in sese suam ob culpam animaduertens, *ἐαὶ τὸν τιμωρόν*, de semetipso Deo dans sua sponte supplicium? Quod qui facere pergunt, iis Dominus non veniam solū deprecantibus, sed etiam vltro grande pretiū operæ pollicitus est. At nos aut liberi sacris & Veneris operantes, aut promissa iuxta minasque Dei, vt Iunonis asseclæ, studiis cupiditatis ambitusq; posthabentes: momo tamen cēlesti litaturos nos speramus ad vltimum, nec de hoc magnopere interim angimur aut laboramus. Verū illa Saturno fata Iuno, vt virtutis inimica semper à priscis inducta est: virisq; fortibus cælum petentibus inuidens, vt inquit Augustinus in decimo de ciuitate Dei. Quę cū Hera à Græcis appellata sit, ancipiti vt videtur omine colitur deuotissimē ab hominibus seruitutem cupiditati, non Christo Seruatori seruientibus.

eius etiam Heræ clientum, atque in fide patrocinióque positorum, longè plures inter heroes, quàm inter diuos relati commemorantur. Nempe quasi ἀεροβατῶν τέτε, καὶ τοῖς νεφέλαις συνόντες, & cum dæmonum natione aëriuagi. Summa autem nostræ disputationis eò pertinet, vt intelligamus, virga Mosis iter per mare pandendum nobis esse, hoc est cælestis sapientiæ disciplina, scripturæque auctoritate: quæ virtutem Dei, summamque theurgiæ totius admirandæ, in Christo cruci affixo sitam esse ac fuisse, nos docuit, atque in eius fide rata, in animóque fixa & persidēte, ad opera semper accincta, qua Christianismus constat. Hanc enim vnā arcem habemus: hoc præsidium religionis rectæ, cœlitúsque proditæ. Cuius auctoritatem & maiestatem, rituúmque eius normalem disciplinam, si summi morum censores, maiorum vestigiis admoniti, fartam ac tectam per manus deinceps posteris tradidissent: longè melius vtique, præclarius, & salubrius, cum genere humano tot iam sæculis actum esset. Sed illa est scilicet potestas principis tenebrarum, hominum vt singulorum mentes sine noxa, morésque vniuersorum, diu permanere non possint, nisi omnibus vngulis, omni ope cautionis diuinitus adminiculatæ, obuiam eatur illi. & natura comparatum est deprauata & vitiata, vt vita & mundus in peius sensim deteriúsque veterascāt. Quam in partem iam iam vix erit multorum opinione, iámque est fortasse, vt incrementum dies afferre posse videatur. quippe vbi fas versum (inquiunt) atque nefas, tot bella per vrbes, eaque nefaria: tam multæ scelerum impiarúmque opinionum facies, non vllus aratro dignus honos, cui nam? dicet aliquis. Nempe quo terra subigitur humana, ad fruges accipiēdas animis salutare, & refundendas vicissim. Proinde hominem philosophum hæc æstimantem, oportet & necesse est, cruce dominica humeris suis iniuncta, quasi quadam ærumna, Christum ipsum crucifixum, diui Pauli delicias, in sinu circumferre: tum Christianismi placita, fixa in corde suo, incisq; habere, literis Latinis & Græcis, ac si fieri potest etiam Hebraicis. hocque quod dicturus sum, vt enunciatum theosophiæ suapte auctoritate nixum fixúmque, confertis manibus retinendum est. Qui lignum vitæ, idémque sacrosanctæ disciplinæ, copiosæ, variæ, amœnæ ac mirabilis, interioris hominis dente non attigerit: qui in caudicem eius & stirpem iudicii morsum non impeggerit cum magna suauitate: ipsum nequaquam posse de puteo aquæ viuæ, atque etiam animantis homines iugis & perpetuæ, salubriter haurire. Quod qui facere superfederit, aliis studiis nimio opere deditus, is non philosophiæ

studio, sed aut philomoriæ (vt dictum est) aut pseudosophiæ teneri, fallacisque aut inanis simulachri scientiæ, ad extremum vt cõperiat neceſſe est: quod genus à Græcis *κενοσωφισλα* dicitur. A diuturniore ergo potu aquarum Ægyptiarum, siccam saltem esse ætatem iam ingrauescentem conuenit professioni philosophiæ: quo facilius hauriat philosophus & suauius è puteo euangelico. Nam Christianismi alumnum esse, & simul Hellenismi perpetuum discipulũ, cothurnum est quodammodo Theramenis perpetuum induere, in confinioque habitare, atque vitam agere pietatis atque Polytheiæ, vel Atheiæ potius impurissimæ. Igitur *ἄλλης* iam *ἀγνός*, quod antea dictum est: nec Cereali munere inuento & pergustato, in sylua deinde Hellenismi diutius expatiandum. ex qua tanquam sylua pascua, vt glande sues læti, ad extremum tantum incõsulti quidam redeunt, frugibusque non gustatis diem obeunt iudicij decretorium in perpetuum, non suum, sed inimici, atrocis & infesti vehementer criminantis. Porro autem qui Christum cruci affixum in sinu fouere & continere cupiunt, expressamque & eminentem effigiem summi boni æternique colere: iis hoc quoque faciendum est, vt cincti sint circa lumbos quàm accuratissimè atque exactissimè. Nec verò vnquam committendum, vt per incuriam discinctis, aut per incontinentiam, fides & charitas excidant, pignora summæ spei, quas ipsi in sinu suo confouere cœperunt. tametsi Christus ipse, quem in limen templi admittere diebus constitutis & aliàs vnicuique solenne est, per paucis autem penitus & hospitali mente: si semel in cordis intima insinuarit: ibique diuersorium sibi loco mundo, scopisque iam dictis reprehensantis sese cum mœstitia conscientiæ, rectè atque ordine circunuerso, elegerit atque ceperit: non facilè deinde sic emigrare solet inde, præsidio vt suo exutum hospitem destituat. Absque hoc verò hospite contubernalem habere pacatæ mentis statum, euthymiàmque illam nemo potest, interioris hominis felicitatem, cuius prisca philosophia nominis tantum splendorem, sanè augustum & expetendum, vehementer admirata est. Sed enim Christo Dei verbo atque sapientiæ, hospiti amplissimo atque suauissimo, & verò votorum philosophiæ summam pignusque summi boni, secum vnà ferenti, via domum aduenienti munienda est & præparanda, supplicium ipsi suppliciter de se dando per mœrentem obsecus admissa ægritudinem. dirigenda etiam & explananda, vt vates ille maximus, appetentis salutis præmetator & prænūcius, admonuit: à quo Christus ipse lustrari mystica immersione voluit. Ita

autem ferre mihi videtur ordo, ratio & processus elementaris philosophiæ ac philotheoriæ, ut verbum Dei in præcordia admissum, paulatim in corde concipiatur: dein ex informi & adhuc inanimato, sensim commentando formetur in modum expressiorem, diuinitusque deinde animetur, vix iam semianimo exteriori homine. Ab hoc profectu Christus ipse cum in corde iam animatus est, tum animans est animi, atque etiam inspirans, ob idque in corde regnare auspicatur: & porro tyrannidem mundi, eiusque principis potentatū, loco mouisse videtur, & eiecisse fortasse. ex quo fit ut homunciones sæpe, plus quam heroes euadant: famiolæque vasa paulum antea & futilia, interdum fiant aurea, dominoque præpotenti grata & utilia. tales enim fuerunt permulti olim viri sancti, quibus numen illud paracletum incubans, spiramentum vitæ cælestis luteam in faciem mirificè inspirauit. Hi sunt qui spiritu Domini tincti atque imbuti, summum bonum in vita, summamque definiunt felicitatem, summa fidei amorisque Dei affectione: quique omnium actionum suarum, consiliorumque ac desideriorum summam, fructum etiam omnem eorum, atque operæpretium vitæ, in duabus illis virtutibus sita esse existimant, amplissimæque ad extremum constatura esse mortalibus. Nobis autem studium sapientiæ auspiciis Christi capeffentibus, hoc omni ope contendendum est, ut ab infantia verbi Dei, ad adultam fidem eius intelligentiamque assurgere commentando possimus. quod quia sine magisterio indulgentiæ diuinæ impulsuque fieri nequit, ideo à nobis precibus imploranda est atque obsecrationibus. Animus autem farragine literarum humanarum disciplinarumque farctus, cum ad sapientiæ studium contentione sui transcripserit: historiæ theurgicæ pabulo primùm delectabitur, nisi genio præditus sit ad salubrem doctrinam refractario atque dissono. deinde animante & mystico intellectu quasi epulis diuinis & pane cælesti aletur. Vnde sensim euehetur ad intelligentiam anagogicam & spiritualem: longè maiorem ipsam augustiorémque profanæ philosophiæ fastigio. Quidnā porro iucundius hoc, quid verò euthymiæ illi beatæ affinius esse potest, quam huiusmodi philosophiæ studentes, ad mortis antè prouisæ atque præmeditatæ vadimonium excubantes: porroque ad mortis certamen proludentibus similes, præpetem spem amplecti, tenere & fouere, hominem quidem illam quanquam adhuc mortalem, sublimem nihilominus, in celumque rapientem? Verum enimvero cum magni cuiusdam sit negotii animum reuocare à commercio sensuum, morisque à consuetudine abducere diuturna, quæ iam callum

obduxit in sensu communis prudentiæ: iccirco philosophiæ priscæ elementis opus est, studium augustioris philosophiæ capeffentibus: quam Cicero in Tusculanis ait culturam esse animi, quæ extrahit vitia radicitus, & præparat animos ad satus accipiendos, qui tandem adulti, fructus vberrimos ferant. Et in tertio de Oratore dialogo, Philosophia est (inquit) omnium optimarum rerum cognitio, atque in iis exercitatio. Quod tamen nunc qui facere optima fide cœperint, philomori magis (vt dixi) civili prudentiæ, quàm philosophi videbuntur: vtpote cuius aures occaluerint ad monita sapientiæ, ad iussa, ad interdicta legis summæ, ad præmiorum iuxta pœnarumque immortalium denunciationes. Proinde qui in literis antiquis, honestisque vtraque lingua disciplinis feliciter eruditi, ad sacram ipsi philosophiam conuertere parem animi contentionem non magnopere laborant semini diuino accipiendo: aut cùm id statuerint, in ætatem iam causariam differunt exuccamque facere: ij mea sententia tam absurdum consilium vitæ capiunt, quàm de agricultura illi perperam statuunt & incommode, qui segetes in agro supramodum inarescere sinunt, messis fructum sustinendum esse putantes, ad inanitatem vsque spicarum aut siliquarum. Qui verò aut animi causa, aut gloriæ comparandæ studētes, in externis disciplinis consenescere constituerunt: atque in extremo actu fabulæ huius vitæ, animam quoque agere non verentur: hos quidem ipsos non tam philosophari in literis censuerim, quàm cum Fauni (vt prisca voce vtar) vxore fatuari. id quod significat amore Musarum lasciuiorum captos, afflatūque spiritus proteruitatis, fanatico atq; insano impetu vaticinari, quod Hesiodus fecit in illa sua Theogonia, stemmatēque teterrimo Titanum atque Tartaridarū. A quo ipso forsitan proximè abesse videri possunt, alumnorum vatum Polythiæ perpetui admiratores, qui lepōre poëtico insanè delectati, sacrosanctæ doctrinæ salutarisque studium ob id floccificiūt, veluti ad eruditionem politioem ineptum & incommodum: in summa sanè ipsi versantes inanitate studij, adumbratamque tātum persequentes philosophiam. Siquidem vaniloquam in vniuersum philosophiam externam, fatuam ac Fauni coniugem esse, nemo inficiari potest: duntaxat non impudens atque impius, aut certè non imperitus. Quòd si sale condita sit eadem philosophia: & verò si salibus aspersa germanæ æternæque sapientiæ, atque diuinitus proditæ: haud dubitarim ipse eam primæ commendationis esse dicere, inter res quidem certè humanas, optandas & cōsectandas ingenuis

animis atque excellentibus. Animi porrò non exigui tantum, sed etiam diuina pro nihilo ducentis esse mihi videtur, & tanquam demissi cuiusdam infernatique philosophi, inter homines rerum humanarum prudentes, facundiam omni studio eloquentiamque cōparare: quod plerique facimus: inter eos verò qui sapientiæ student, ac de ratione summi boni adipiscendi differunt, infantem esse non nolle, aut certè non omni ope vitare. Ultra modum autem & atatem amœnitati tantum studere literarum, summæ est amentia. nisi verò amentium non est, animi causa animam suam perdere, aut de eius salute perpetua negotium sibi non faciendum ducere. nempe quasi ex actis tantum destinatricis prouidentia, ius beatæ vitæ petendum habeamus: nō etiam ex pietatis & religionis studiis, exposcendaque per mœrentem pœnitentiam venia, sperare debeamus. Atqui post sermonis mortalis peritiam atque philologia, ipsa quoque sapientiæ dialectos immortalis & sempiternæ, cognitu est utique dignissima, ut summum ac salubre fastigium eloquentiæ columnenque illustre impositura. Id quod ii demum hominum doctissimorum (ut opinor) contemnere soliti sunt, qui præputium Hellenismi, post Christianismi sacramentum retinentes, creta an carbone notandæ sint animæ ad extremū, aut nihil aut parū interesse nostra putant: nihil verò referre, inter Dei filios & cēlites ipsi referendi sint, an inter Tartaridas & Orcicolas. Verum hi ex eorum natione sunt, *οἱ τὸν οὐρανὸν λέγοντες ἀναπαύουσιν, ὡς ὅτι πνιγὲς, καὶ πᾶσι ἡμᾶς ἔτες, ἡμεῖς δ' ἄνθρωποι*, ut inquit ille Comicus. Hactenus enim ipsi nec amplius cælestibus de rebus sempiternisque philosophantur. quorum contubernium atque sodalitatem, ut diram & capitalem, eos auersari oportet, qui aduersus Sirenum sæcularium delinimenta, & sæpe lustralium, circuncidere sensus suos statuerunt, cultróque selectioris philosophiæ accidere desideria cupiditatis improbæ. Deus autem omni genere doctrinæ ad cognitionem sui ac nostri condoceractos nos volens, præsertim hac ætate literarum meliorum strenua instauratrice, præcidisse nobis omnem spem mihi videtur causandæ ignorantia, quo impendio magis attenti esse debemus, ad aureis perpurgandas veritati exaudiendæ. O tenebræ Cimmeriæ vita quæ lux ab antiquis appellata est. Abrahamus ille medius fidius, in scriptura decantatus, ut fidelium decus ac parens, in tanta luce literarum, in summa illustratione proditæ quondam promulgatæque veritatis, diffidentiam exprobrare nobis capitalem, diramque mihi videtur incuriam immortalitatis beatissimæ: qui in spem ipse maiora spe fidèque

pollicitationis sibi factæ, credidit. quod Paulus ille sanctioris veritatis calamus, ad Romanos scribens, testatus est clarissimè. Tametsi non capitalior est nostra diffidentia, qui in gentem Abrahamidarum nos professione tantum verboque adoptauimus: quàm scelestior confidentia, quòd in lubrico & præcipiti loco stantes, tamen securi, supini, somniculosi, veterno denique diro oppressi, acquiescimus. Proinde (vt finem dicendi faciam ea de re, quæ nec dicendo, nec scribendo, nec commentando finem vllum inuenit) literarum bonarum (vt vocamus) doctrinam, philosophiamque antiquam & externam, sic cedere sapientiæ oraculari & consecratæ oportet, vt sensum rationi. nec modò manus illi vt meliori, vt superiori, vt multum augustiori dare: sed sese etiam ipsam, atque suas omneis copias & facultates, quanlibet instructas & pugnaces, præbere eidem necesse est ac permittere. nec verò manus quolibet modo dare, quasi defunctoriè, sed vinculis quidem illas Christianismi constringendas, timorisque dominici: cæterum æquis atque liberalibus, & porrò dignissimis natione mortalium immortalitatis admiratorum, hominumque animis natalibus restitutorum. Hæc enim post compertam veritatē atque agnitam, sola vocari meritò philosophia potest, fidelium tantum ipsa magistra, & mystagogos, quos Græci *μαθηματικούς* appellant. qui sibi rerum diuinarum atque sempiternarum veritatem ita persuaferunt, adducti vi illa admirabili Pithūs euāgelicæ, abduci vt fide Iesu Christi euangelii alia nulla vi queant, non humana, non dæmonia, non prece, non precio, non terrore, nō premio. quippe qui non suam, non sensuum, non rationis fidem, non disciplinarum sequantur: sed grandis illius pronunciatoris, rerumque in spe positarum certissima certiore repromissoris, classici & assidui, vt prisci loquebantur. Habet autem & hoc genus philologiæ musæum suum amœnissimum, suæque encyclopediæ spatium, studio dignū trisæculari Nestoribusque discipulis. habebunt enim illic homines doctissimi, vbi philologiæ genium accipere lautè & opiparè possint, epulis sanctioribus. gustabunt etiam interdū nonnihil cōtemplationis sublimiperæ, & tanquā extaticæ: qui etsi extemporalis breuissq; suauitatis fructus est, *ἀλλὰ τὸ δὲ ἀμβροσίως καὶ νικταρὸς ἐστὶν ἀπορρώξ.* Neque verò asininū iugum domini est aut bubulum, quod multis ætatibus existimatum fuit & persuasum vulgo. Sed & equestre curriculum decurrere, & quadrigarium potest theórica philosophia, nō tam mortis cōtemplatrix, quàm immortalitatis. idque iure proprio, non occupatio. longè enim maiores (quod Augustinus inquit) di-

uitiæ Solomonis regis fuerunt, quàm aurum, quàm argentum, quàm supellex, quàm vestis, à Mose quondam Iudæisq; ex Ægypto ablata & deportata. Proteus enim est propriè sermo Dei, omnia trāsformans sese in miracula rerum. Quem sermonem si fide tenere, si studio colere, si amore cōplecti institerimus: docebit nos ille omnia quæ sint, quæ fuerint, quæ mox ventura trahentur. Sed vinculo triplici vincendus est hic Proteus arctissimè, fidei, spei, & charitatis Christi. Quantum est autem theorema illud huiusce philosophiæ, genus humanum è mancipio tyrannidis inferorum, humanitate filii Dei supplicioque exemptum esse? & simul inter cælum & terram interuentore Christo tantum talèque commercium initum esse, vt immortalitas cum mortalitate sponsalitium vinculum commerciumque contraxerit & coërit, cōmunicato iure diuinitatis atque æternæ beatitatis? Quanta porrò amœnitas est in libris originum sacrarū, elementa considerare prodentis se homini veritatis sub persona dramaticæ simplicitatis, & mirè symbolicæ? ibi videas Mosem veluti fores cæli adhuc clausas pulsantem, quas Christus postea à se reclusas, patère delectæ multitudini voluit sibi que dedititiæ. Huius lex temporarium edictum fuit è cælo missum: quod ille ipse iam dictus, id est Christus, postea magna ex parte inductum, ad edictum perpetuum redegit: cui nec derogari quicquam ab alio, nec obrogari potest. & Moses quidem cum sua lege tanquam pegasus fuit, id est fama (sic enim pegasum interpretantur) salutis iam iam aduenientis, id est ipsius prænunciatus: qui Musis sacrosanctis fontem illum aperuit enthei vaticinii, veraciumque prædictionum. In vniuersum verò in scripturæ sensu multiplici, quasi in Iano quodam cœlesti, cōmentari magna cum voluptate licet, eadēque saluberrima. Qui Ianus quater geminus principium & finem rerum temporūque & intermedia tenet: aditus etiam multos habet ad veritatem summi boni atque sapientiæ comperiendam. Vnus est aditus, vt volūt, per historiam, quæ fidem rerum gestarum facit. Alter est aditus allegoriæ, quæ ea significat quæ credenda nobis sunt, nō sine ingenti gratia troporum & figurarum. Admittimur intrò etiam per ea quæ in mores recipienda ipsa scriptura docet occulta significatione. Sublimè autem attollitur cōmentatio per eam quam anagogen Græci & ἀναγωγή vocant, quasi theoriæ quoddam auguraculum. Hæc autem literatores planè homines fortasse siqui sunt, non probabunt, quorum ad stomachum literatura magis quàm mystica doctrina facit: doctissimi tamen viri olim & Græci & Latini, in iis ingenia

præstantissima opportunè exercuerunt. Nam quo stomacho homines esse oportet, qui salibus diuinis non delectentur? vagina est historia: gladius est literature spiritus. Enimuero marcentis animi speique homines esse oportet, quos post disciplinas liberales studiūque eloquentiæ, lectio sacra non iuuat, quorum animi fœno quasi animantes tantum alantur, ambrosia non vegetentur. Proinde si studiosissimi homines posthac doctissimique faciant, ut ex Hellenismi campo & curriculo, tempestiuè se in lucum Christianismi condere & abstrudere insistant, tanquam ad Ægeriæ iam sanctioris consuetudinem atque philologiæ animum transferentes: eo pacto fiet utique & instituto, deliciae ut hominum ad ingenii cultum natorum, non modò literæ bonæ & elegantes, sed frugiferæ etiam & salutare tum vocentur in posterum, tum esse videantur. Quippe quarum succo perimbuta aurea argenteaque vasa, ex illa animarum massa diuinitus exempta, ad honorémque electa, non splendidiora modò in æde Domini exposita, sed etiam utiliora fiant, atque ad instrumentum eius ornamentumque præstantiora.

FINIS.

PRIVILEGII SENTENTIA.

Cautum est auctoritate Regia, ne quisquam alius præter M. Dauidem, hos Gulielmi Budæi libros De transitu Hellenismi ad Christianismum, ante sexennium imprimat neue alibi impressos diuendat. Qui secus fecerit, libris & pœna in sanctione æstimata mulctabitur. Lutetiæ Parisiorum, 7. Idus Iulij. 1556.

De Courlay.

Handwritten text, likely a title or header, appearing in the upper left corner of the page.

Handwritten text, appearing in the upper middle section of the page.

Handwritten text, appearing in the middle section of the page.

Handwritten text, appearing in the lower middle section of the page.

Handwritten text, appearing in the lower section of the page.

i 1878-711x



23

colorchecker CLASSIC



calibrite